

ҚАЗАҚСТАН **100** РОМНЫ

СМАГУА ЕЛУБАЙ

АҚ БОЗ ҮЙ

УДК 821.512.122-
ББК 84.4.017.4
Е 49

Қазақстан Республикасы
Мәдениет және ақпарат министрлігі
Ақпарат және мұрағат комитеті
“Әдебиеттің әлеуметтік маңызды түрлерін басып шығару” бағдарламасы
бойынша шығарылды

Жобаның жетекшісі

ҚР ҰҒА академигі **Рымғали Нұрғали**

Редакциялық алқа:

| | |
|-----------------------------|----------------------------|
| <i>Әлібек Асқаров</i> | <i>Мұхтар Құл-Мұхаммед</i> |
| <i>Рахманқұл Бердібаев</i> | <i>Есенғали Раушанов</i> |
| <i>Есенбай Дүйсенбайұлы</i> | <i>Берік Шаханов</i> |
| <i>(жауапты редактор)</i> | |

Елубай С.

Е 49 **Ақ боз ұш:** ~~роман~~. Алматы: Жазушы, 2011. –
376 бет. – “Қазақтың 100 романы” сериясы.

ISBN 978-601-200-308-6

Романға кешегі кеңестік кезеңдегі қазақ халқының жазылмаған шындығы, айтылмаған тарихы арқау болған. Өткен ғасырдың 30-жылдарындағы ашаршылық зардаптары, кәмнеске кезіндегі қуғын-сүргін оқиғалары жөнінде кеңінен әңгімелейді.

ISBN 978-601-200-308-6



Қазақтың 100 романы

АҚ БОЗ ҮЙ

Роман

*...Қаратаудың басынан көш келеді,
Көшкен сайын бір тайлақ бос келеді...*

(“Елім-ай”)

ҚҰДЫҚ БАСЫНДА

1

Елсіз жым-жұрт бос жатқан құла тұз. Көз байланып, қараңғы үйіріле бастаған. Қадау-қадау қалқиған сирек бұталар. Ымырт көрпесін үстіне тартып, жай созылған кең сахара бейбіт ұйқыға бой ұсынған шақ. Төңіректі қоршап, қоймалжың ұйыған осынау тыныштықты сәл дір еткізе елеңдетіп, әлден уақытта әрегірек қалтарыстан сыңғыр етіп тұншығып қоңырау үні естілді. Түн ішінен құмығып талып жетті. Көп ұзамай қоңырау ашық сыңғырлап, жақындай берді. Түйелері шұбап тізіліп, түн ішінде келе жатқан керуен шалынды. Ауыр жүк тиелген атан, нарлар. Үнсіз жолаушылар. Түйе мойындарындағы жез қоңыраулар жүріске бір ырғақ тербетіліп сыңғыр қағады. Шертпе күйдей жаяуқоңыр әуен таратады. Тыныш кештің шырқын бұзбай, қайта осынау бейуак сәттің тылсым кейпіне әдемі үйлесіп жарасатындай...

Керуен көп ұзамай жолдан шықты. Құмсақ шағылға іркілді. Түйелерін шағын алаңға айналдыра шөгеріп, ортаға қапшық, қоржын жүктерін түсірді. Сілесі қатып шаршаған алты-жеті кісі аздасын

бастарына қоржындарын жастады да, киімшен қалпымен қисая кетті. Жамбастары жерге тиісімен жолсоқты жолаушылардың талайы “қор” етті.

Жалғыз Өзбергеннің ғана көзі ілінбеді. Өзберген анау, басына шапанын бүркеніп жатқан Пахраддиннің інісі. Пахраддин бәйбішеден, бұл тоқалдан туған. Өзберген өмірге өлердей ызалы. Әсіресе, “байлардың күні батуға таяу” деген, кеше жәрменкеде есіткен әңгімеден кейін ызалы.

Ұйықтай алмай басын көтерді. Қараса Пахраддин орнынан тұрып кетіпті. Жұлдызы жайнаған түнгі аспанның астында, анадай жерде теріс қарап сұлбасы қарауытып тұр. Иығында шапаны. Кешеден бері бір оңашасын күтіп жүр еді бұл. Тиісудің реті келді енді. Түрегеп, бұған сырт беріп түн өлкесіне назар жіберіп тұрған мол денелі Пахраддинге таяу барды. Шырт түкірді. Пахраддин сәл ығысып бұған қоз қиығын гастады. Бірақ тіс жармады. Өзберген де біразға шейін қасақана үндемеді. Қабағы қарс жабылып, түн өлкесіне бұ да қарады. Ауызын ашса іштегі ашу-ыза лақ ететін түрі бар. Ақыры шыдамады, талағы тарс айрылды:

— Сенсің, — деді дүңк етіп. — Сен кінәлісің! Баяғыда-ақ көшу керек еді! Кету керек еді! Енді міне...

Өзберген сөзге жоқ, істің, қимылдың адамы. Одан ары қарай не дерін білмей тұтығып, булығып тұрып қалды. Пахраддин үндемеді. Күрсініп, теңселгендей болып тұрды да, ләм-мим деместен қарауытып жатқан жүктерге қарай бұрылып жүре берді. Шапанын бүркеніп жатып қалды.

Көп ұзамай шығыс жиекті бозартып ай туды. Батыс аспанды сызып, зырқырап жалғыз жұлдыз ақты. Жусан арасында заржақ шегіртке шырылдайды.

Әзберген күмсақ үстінде шалқасынан жатып, түнгі көктей түбі жоқ терең ойға шомды. Жел жағында көлбеп жатқан салпы ерін сары атанның шайыр иісі танауға келіп тұр. Тіздеулі түйелер ұрттары бұлтындап “күрс-күрс” күйіс қайырады. Теріс қарап шапанын басына бүркеніп Пахраддин жатыр. Осы ағасын түсінбейді. Би деген аты бар. Анау жатқан Мажандай мың-мыңдап мал айдамағанмен дәулетсіз де емес. Сөйтсем, маңдайымнан сипар дей ме?! Түсінсе бұйырмасын. Өткен жылы ғана қолына мөр тиген ауылдағы етікші Шәріптің алдында бүгежектейтінін қайтерсің. Соны көріп, әшейінде асқар таудай көсемсіп жүретін Пахраддиннің кішірейгенін көріп, жан баласынан ығып көрмеген Әзбергеннің жүні жығылып жүр. Бірақ іштей берілуге жоқ Әзберген. Келер әлі бұның заманы да қайта айналып. Әңгір таяқты ойнатар сонда “өкіметпін” деп шелтендеген Шәріптің төбесіне. Сол Шәріптің азу тісі біліпе бастаған әнебір Шеге деген “күшігінің де” жон арқасынан тіліп алар таспаны. Ойы осы жерге келгенде зығырданы қайнап кетті Әзбергеннің. Ойбай-ау, артына қарамай өзі, әлгі етікшінің баласын айтады, Хансұлудан дәмесі бар... Қап, қылуасы өтті-ау, жаман шіріктердің. Хансұлу Әзбергеннің қарындасы. Пахраддиннің маңдайына біткен жалғыз қызы. Талшыбықтай бұралып бойжетіп қалған бүгінде. Өзі сұлу десен сұлу, ерке десен ерке. Оған жаман Шәріптің анау шікірейген немесінің саусағы тиді дегенше бұл намыстан буынып өлер.

Иен далада жатып өстіп ызаға булықты Әзберген. Күйіп-жанып, күз түнінің ет тоңазытар кәдімгідей ызғарын да сезген жоқ. Таңсәріде жұрт ұйқыларын қандырып, тынығып оянғанда бұл беті ісіп, түнеріп,

галауранып оянды. Жара бұлттай қабағы қарс жабылып, сүйретіліп тұрды орнынан.

Содан, ала кеуең таңменен жалғыз керуен атан, нарлары алшаң басып, жез қоңыраулары сыңғыр қағып, тағы да жолға түсті. Алда ел бар. Бұлар айға жуық бетін көрмеген ел-жұрағат, қатын-қалаш, бала-шаға бар.

Керуен салдыртып тартып келеді.

2

Күзекте отырған ауыл. Жер реңсіз. Шөбі тозған. Әсіресе, құдық маңы жалаңаштанып шаңы шығып жатыр.

Жаман торы атын жайдақ мініп, солай қарай Шеге келеді. Төңірегі азан-қазан; қой маңырап, ит үріп, бота боздаған кешкі ауылдың данғаза тірлігі. Мал, адам сапырылысқан қарбалас кезі. Шеге соның біріне көңіл бөлмей ойланады. Ойланған сайын еңсесі ауырлай түседі. Бұ да қызық. Әліне карамай армандағаны — Хансұлу. Күн, түн демей көксегені — сол қыз. Ау, сонда жалғыз Хансұлу дәмегөй қалың бозбаланың қайсыбіріне жетеді? Не көп, осы елде қыз көп. Солардың біреуіне неге көңілі соқпайды? Хансұлуда несі бар? Несі бар, аспандағы айға қол созып? Білмейді. Пахраддиннің еркебұлан қызының бетін қай қасиетімен бұрмақ өзіне? Не дәулеті тасқан, не атақ-абыройы асқан текті атаның да ұлы емес. Үйінің сикы анау — қырық жамау, ауыл шетінде киқиып тұрған. Әкесінің түрі анау — ақсақ қойға жете алмай, ойбайлап, көгенді айнала жүгіріп жүрген. Жеті атасынан шыр бітпеген, етікші Шәріп. Жұрт оны күйгелек мінезіне қарап “Шырылдауық Шәріп” дейді. Озінің түрі мынау — жаман торының арқасында

суырша сопайып отырған. Шоқпыт үйден шыққанын былай қойғанның өзінде қара басынан да бір көз қонақтар ерекше қасиет табылмайды-ау. Қысық көз, арық, пышақтың қырындай сопайған қара бозбала. Сорайған бойдан басқа Жасаған Ие бұған ешнәрсе бермепті. Не өнер бермеген, жиын-тойда домбыра тартып, ән салып сурылып шығып, қыз-қырқынның назарына іліне қоятын. Не шешен тіл бермеген, бұзып-жарып сөйлеп жұртты елең еткізетін. Ең болмаса, анау құдық басында су тартып жатқан Бұлыштың атындай жүйрік ат, жеткір тазы да жазылмаған бұның маңдайына. Қайсы бірін айтарсың, ең азы, жасы он алтыға келсе де осы Шегеде ұялмай киетін киім де жоқ...

Құдық жақта шығыр тартып жатқандардың “Тарт!”, “Қайт!” деген айқайы бөліп жіберді ойын. Еңсесін көтерді. Күн еңкейіп көкжиекке құлапты. Көлеңке ұзарып, батаре күннің қиғаш түскен шапағы жайдақ дала, қоңырқай белдерді қызылқай жалқын нұрға бояп тұр. Ауыл алдындағы ойпандағы құдық басы қазір үйме-жүйме мал. Қараң-күраң адам. Құдыққа шұбап құлап жатқан өрістен қайтқан жылқы, суға қанып қарындары қампиып ойпаңнан мамырлап шығып бара жатқан түйелер. Солардың көбі анау адырспанды сары белде отырған Мажан ауылынікі. Мажан бас болып ішінде Пахраддин бар, ауылдың бір топ азаматы сонау Темірге, жәрмеңкеге мал айдап кеткен.

Қазір екі ауылдың арасы алажабыр мал. Түйе сауып, бота қайырып сыртта өріп жүрген жұрт. Сыңғыр-сыңғыр жез қоңырау үндері. Малдың шуы мен кісі айқайлары ию-кию араласып жатыр. Мал тұяғынан көтерілген шаң желсіз тымықта ауыл

үстінде іркіліп тұр. Жер ошақтардан шудаланып түтін шығады.

Құдыққа жақындай бере, Шеге түйесін суарып жатқан құрдасы Ждақайды көріп мырс етті. Осы ауылдағы сырласатын жалғыз досы. Екеуінің мұңы бір. Ол да — ғашық. Жәрменкеге кеткен Мажанның ауылда қалған жас токалы Балқияға ғашық. Бұның “кеселі” — Хансұлу. Екеуінің басы қосылса болды “жырлайтындары” Балқия мен Хансұлу жәйі.

Шегені анадайдан көріп сойған түлкідей ыржиды Ждақай. Төртбак келген, шымыр, тарғыл бет бала жігіт.

— Тарт! — деп айқайлады, қауға алып тұрған атанжілік қара жігіт Бұлыш.

Шығырға жегілген астау бас қара нар маңқиып теріс айнала беріп жапырылып алға үмтылды. Ашамайға байланған қайыс арқанды жұлқа тартты. Бұйдасын ұстаған бала жүгіріп алдына түсті.

— Қайт!

Балақ жүні бесіктей Шойынқара алшаң-алшан басып кейін қайтты.

Құдықтың тас ернеуінде талтайып тұрған Бұлыш су толы қауғаны шірене тартты. Келесі сәтте буы бұрқыраған көкбұйра су гүрілдеп астауға ақтарылды.

Астауды қоршаған үйір түйе суды сораптап жатыр. Ждақай Шегені бүйірден түртті.

— Қаска бала, анаң қара! Ары жағына қара! — деді. Шеге бұрылып Ждақай нұсқаған жаққа қараса, құдықтың күншығыс қапталын орағытып, Қаракерін сылаң-сылаң желдіріп Хансұлу өтіп барады екен. Басында үкісі бұлғақтаған кәмшат бөрік, үстінде қырмызы кәмзол. Аш белін түрмемен қынай байлаған. Күміс ер-тұрман батар күннің жалқын нұрына

малынып жарқ-жүрқ етеді. Астындағы сыйда бөй кер құнан да иесінің мәпелі жас сұлу екенін білетіндей, аяғын лып-лып билеп басады.

Қыздың мойыл көз, қайқы кірпік, сәл түрік ернін елестетіп Шеге күрсінді.

— Саспа!— деді Ждақай досын иықтан сілкіп. — Тұмсығын қанша көтергенмен сенен артық кімге барады? Айтқаным келмесе кара да тұр, қасқалдақ, түбінде сенікі болады!

Шега лажсыз езу тартты. Ждақай лепіре түсті:

— Әкең ауылсовет, кімнен қорқасың? Бас сал, алып бер деп! Оллаһи, тырп ете алмайды Пахраддин! Береді қызын!

— Пай, сен де... желдей есесің-ау... Біреудің қызын тартып ал деген заң жоқ қой, — деді Шега. Көзі — Қаракерін сыландатып ауылға тақап барып қалған Хансұлуда.

— Мәссаған, қасқалдақ, ендеше жүре бер сөлпиіп... Біреу қағып түссін қасқитып, — деп торсандап қалды Ждақай.

— Тарт!

Балақ жүні бесіктей астау бас Шойынқара бұйдасын қаққан баланың соңынан ошарыла жамбастап қауғаны дедектетіп сүйреп барады.

Құдықтың батыс канатында малы-жаны сапырылысып жатқан Мажан ауылы тұстан бір келіншек келеді сыландап. Иығында иінағашы, ақ көйлегінің кең етегі колең-көлең етеді. Қасына ерткен кішкентай қыз бала бар. Балқияны тани кетті Шега. Пысық-сынған Ждақайды тұқыртып алудың реті келе кетті.

— Ал Ждеке... енді сен қарашы мына жаққа!

Күн астында аяқ жолдың күміс шаңын шұба-ландатып келе жатқан Балқияны көргенде Жда-

қайдың реңі бұзылып қоя берді. Онсыз да тікірейген кірпі шашы одан бетер тікірейіп кетті. Табан астында тықыршып бүлінсін де қалсын... Шеге қиқылдап күлсін кеп. Ждақай, мұрын ұшы тершіп, қызарақтап:

— Қаска бала, ешкімге айтпа, бүгін бір қызық көрсетем саған! — деді, әңгіменің бетін бұруға тырысып, күпия сыбырлап.

— Ол... неғылған қызық?

Ждақай сұқ саусағымен ернін басты. Көз қиығымен қауға алып тұрған Бұлышты нұсқады. Шеге түсіне қойды. Демек, “қызықтың” Бұлыш турасында болғаны.

Ақ көйлегінің етегі көлендеп құдыққа жақындай берді Балқия. Жас тоқалдың жүріс-тұрысы көрінеу еркінсіген ойнақы. Көнек шелегін жерге “таңқ” еткізіп тастай салды. Орта бойлы дембелше. Көзі жабайы мысықтың көзіндей тап-таза жайнап тұр. Бүкіл назары — сақа жігіт Бұлышта.

— Есенсіз бе, бәйбіше! — деді, көмір қара Бұлыш ақ тісі жарқырап күліп. Балқия бір қолымен мықынын таяна қалып, былқ-сылқ етті:

— Е, бәйбішелік қайда бізге, — деп шолақ танауын сәл көтеріп, назданып жігітке шекесінен қарады. Бозбалалар тұрған жаққа көз қиығын да салған жоқ.

Ждақай бір қызарып, бір бозарды.

Балқия Бұлышпен қалжыңды үдетіп жатыр. Бәсе, Ждақайды неғылсын сылқым келіншек, өзі бойдақ, өзі мерген, өзі палуан сақа жігіт Бұлыш тұрғанда. Жалғызілікті, кедейлігі болмаса осы елде Бұлышқа тең келетін жігіт жоқ.

Былай шыға бере Ждақай:

— Қаскитты-ау! — деді басын шайқап, күйініп. — Көз қиығын да... салмады-ау...

Кешкі астарын ішіп, ауыл әлдеқашан жатып қалған. Көзге түртсе көргісіз қараңғы. Ай тумаған.

Ждақайдың “қызық көрсетеміне” елігіп Шегенін Мажан ауылының түйе шаңдағында отырғанына біраз болды. Төңірегінде дуадақтай-дуадақтай теңкиіп жатқан түйелер. Кебеже қарын көрі маяның ық жақ тасасында отыр екеуі. Бакқандары — осы тұсқа жақын Балқияның отауы. Томпыып, карауытып тұрған отау үй.

Шолпысы сылдырап үйге кіріп-шығып күйбеңдеп жүріп, шамды өшіріп Балқия ақыры жатып қалған.

Ждақай Шегені бүйірден түртті.

— Көрдің бе, күткені бар, жалғыз жатты. Қасқа бала, казір көресің қызықты! — деді.

Одан кейін де біраз уақыт өтті. Отау үй әлі жымжырт. Мүлгіп тұр. Ауыл үсті монтаны тыныш. Ит екеш иттердің де жақтары қарысқан. Қора жақтан күйегі алынып қызу науқан кешкен қошқарлардың ғана арсы-гүрсі қимылдары байқалады. Әрекідік сатыр-сүтыр сүзісіп те қалады.

Ауылдың желке тұсынан байғыз шақырды. Сұңқылдап жаман ырым бастап тұр. Жолдары болса жарар еді. Жас тоқалдың есігін ашады деген Бұлыш аңшы әлі жоқ.

— Көп ұзамайды. Келеді ай тумай, — деп қояды Ждақай сыбырлап, қос өркештің арасынан мойнын созып қарай түсін. Қарындары кампыып көлбеп жатқан түйелер марғау мүлгіп күйіс қайырады. Түйе шайырының күлімсі ісі келеді.

— Сол көргенінді айта отырсай, Ждеке, қарап отырғанша! — деді Шеге. Ждақай көрген “қызығын” айтып беруге ынғайланды.

— Сен өз көзіңмен көрсін деп едім, әлгі ағамыз келмей қаскитқанын қарашы... Жарайды айтсам айтып берейін... — деп иығын комдап қойды Ждақай.— Шалы қалаға кеткесін... мен қасқайып кеш түсісімен Балқияның есігін аңдитын болдым, — деп бастады әңгімесін Ждақай.

— Ойдәйт дерсің!

— Дәмем күшті. Күйеуі шал. Өзі болса жас, сылқым келіншек енді осындайда серілік жасамағанда, қашан жасайды деймін. Көзімді жұмсам көретінім Балқия. Ақ отауда екі тізесін күшақтап жападан-жалғыз мені күтіп отырған болып елестейді. Одан сайын дәмем күшейе түседі. Содан, қасқайғанда, күн батысымен бүкендеп осында тартамын. Мажанның иттерінен маған қауіп жоқ. Түгел таниды. “Керегің Балқия болсын” дегендей, құйрықтарын бұлғап, аяғыма оратылып, Балқияның үйіне дейін апарып салады. Бірақ сол есікке жеткен жерде мені Құдай ұрып қасқаямын да қаламын. Жабық есікке қол тигізу мен үшін бір ақырзаман. Қолым дірілдеп, демім бітіп, құлағым шыңылдап, жүрегім тарсылдайды. Күні кеше, тағы да сөйтіп, қасқиып есік алдында тұрсам, қараң-құраң етіп түн жамылып біреу келеді. Зәрем ұшып кетті. Отырған жерімде ернімді тістеп, сілейдім де қалдым.

Бір кезде есімді жисам үй ішінен сыбыр-күбір естіледі.

— Бері... бері жүр, деген Балқияның үні шықты.— Байқа жолыңда құман түр! — дейді.

— Жалғызсың ба? — дейді Бұлыш күнк етіп.

— Немене жалғыз болмай, байыммен жатыр дейсін бе?

— Тек! Бала-шаға жоқ па дегенім ғой.

— Зөрең ұшпай-ақ қойсын!

Сөйткенше ағаш төсек сықыр-сықыр етті.

— Сағындың ба? — деді Балқия сыбырлап. Дауысы балдай тәтті. Бұлыш:

— Сағынбасам келем бе? — деді күңгірлеп.

— Ішің кепсін, өтірік... Қолыңды кім байлап жүр...

Шын сағынсаң...

— Жә, қойшы.

— Әнеки, саған тек...

Одан әрі жөнді ести алмадым. Сыбырласып кетті. Мен үйге құлағымды тақай түсемін. Тысырым сезіліп қалса керек:

— Шік-әй! Өй, мүйізің сынғыр! Шік! — деп айқайлады іштен Балқия. Мен тұра қаштым.

— Қап, қимылдамай отыра бермедің бе? — деді Шеге, әңгіменің дәл ортасынан үзіліп қалғанына өкініп.

— Қасқа бала, Бұлыш біліп қалса құрыдым ғой! Мойнымды жұлып алмай ма?

Желіге таман қараңғыда шоқиып отырған кісіні көрін Шегенің жүрегі суылдап қоя берді. Ждақайды түйіп қалды.

— Ана қара, біреу отыр!

— Қайсы.

Екеуі еңкейе қалды. Қарауытқан адам әлден уақытта сопайып орнынан тұрып кейін қайтты. Шет үйге бағыттады. Қолында — құманы.

— Түу, әкеңнің... Қауқаш кой... дәрет ап жүрген, — деп Ждақай Мажанның қойшысын ондырмай сыбап алды да, шығыс жаққа қарады. Қараңғы аспанның сол жақ тұсы бозара бастапты.

— Қасқа бала, ай туып келеді... — деді Ждақай өректіп. — Енді Бұлыш өлсе де келмейді.

— Не істейміз енді?.. Құрысын, қайтайық онда, — деді Шеге де өкініп.

— “Қайтқаны” несі қасқалдақ! Екі сомадай жігіт тұрып... келіншек жалғыз жатқанда... — деп дүнк-дүнк етті Ждақай.

— Ендеше бар! Күтіп жатқан шығар... сені... — деді Шеге танауынан күліп.

— Барамын! Несі бар? — деп өз-өзіне дем бергендей қоқиланды Ждақай.

— Е, бар! Бар!

— Барамын!

Шегені күлкі буып барады. Ждақайдың сыры мәлім ғой.

— Неге күлесің? Тонымды шешіп алар дейсің бе барсам?!

— Е, неғып тұрсың ендеше? — деді Шеге де Ждақайдың барғанын қалап.

— Ал кеттім! Біреу көрінсе белгі бер!— деп Ждақай түйенің тасасынан шықты. Бұқпақтап бүкең-бүкең желе түсті. Желе түсті де бұрылып Шегеге қарады. Шеге “жүре бер” дегендей қол сілтеді. Ждақай шыбын ұстайтын кісіше сақ басып бүкшендеп алға жылжыды. Мүлгіп тұрған отаудың есігіне де жетті. Бойын тіктеп қарауытып есік алдында іркілді.

Шеге де толқып Ждақайдың орнында бейне өзі тұрғандай жүрегі дүрсілдеп кетті.

Ждақай дыбыс берсе керек, көп күттірмей есік ашылды. Ждақай ішке зып берді.

“Болды бір қызық!” деді Шеге өзіне-өзі. Орнынан қалай тұрып кеткенін білмейді, бір кезде қараса, бұл да бүкендеп жабулы есікке қарай ұшып келеді екен. Үй сыртынан Ждақайдың қызығын тамашаламақ. Сойткенше болған жоқ, үй ішінде тулақ сабағандай

әлдене “таңқ” етті де, іле леген даңғырлап есіктен Ждақай атқып шықты. Атқып шығып беталды тапырақтап ышқына қашты.

Шеге де ойланбастан өкшесін көтерді. Екеуі безіп барады сай жаққа қарай. Бұлардың дүрсіліне желідегі түйе үркіп өре түрегелді. Иттер шу етті.

Шеге Ждақайға қапталдаса беріп:

— Не болды, сорықайнаған?! — деді ырсылдап.

— Қасқайтты, бала, қаш! — деп басы қайқайып зымғып барады Ждақай.

Екеуі сол қашқан күйі ауыл іргесіндегі терең сайға бір-ақ құлады. Бұл кезде бүкіл ауыл иті атойласып сондарына түскен еді.

Сайға құласымен екеуі де кейін қарап жер бауырлап жата қалды.

— Ждеке, не болды?

— Несін сұрайсың? Қасқайтты! — деп Ждақай “кик” “киқ” күліп жатыр. Шегенің қолын алып басын ұстатты. Шекесі шодырайып ісіп кетіпті.

— ...Құтты болсын алған сыйың! Ал айт!

— Есікті аштым. Кірдім, — деді Ждақай екі иығынан тыныстап. Балқия көйлекшен, жұпары аңқып тұрды алдымда. “Не керек?” деді. Дауысы қатқыл. Сасып қалдым. Сөзім божырап “Жеңеше, ойнайықшы!” деппін... Тізем қалтырап аяғын күшып отыра қалдым. Жүрегін жібітейін дегенім еді. Сол екен жеңешем “Қағынгыр, мә, саған ойнаған!” деп төбеме әлденемен “таңқ” еткізді. Қатты ұрды. Қолында оқтау бар екен. Көзімнің оты жарқ етті. Есікке қарай секірдім. Леген бе білмеймін, бір нәрсені басып кеттім. Сойткенше, жеңешем жауырынымның ортасынан оқтаумен тағы қонжитты. “Ойнаған деген осы!” деп. Табалдырықтан аттай бергенде басым мандайшаға соғылып... Әй, қасқайдым-у!..

Шеге жерді кұшып иығы бүлкілдеп жатыр.

— Айт! Шайт!— деп қойдың сыртын айналып біреу айкайлады.

Мажан иттері анадай жерде сап түзеп жақындап келмей әуілдесіп тұрған. Ызалы Ждақай бір кезде төрттағандай қалып “Ауф!” деп тұра үмтылды. Бұттары серейіп тұрған дырау төбеттер сол-ақ екен, шашырай беріп тоз-тозы шыға қашты.

— Балқиядан көрген зәбірім аздай-ақ... о несі кеп!— деп кейін қайтты Ждақай.

Бү кезде түн етегі түріліп, шығыс тұстан қауын тіліктей сарғайып имек ай туып келе жатқан. Қараңғылық сейіліп, сол сирек жұлдызды аспан астында мүлгіген үйлер томпиып көзге анық көріне бастады.

Екі бала жігіт те көп ұзамай үйлеріне қайтты. Шеге құдықтың ары жағындағы өз ауылына қарай, Ждақай Мажан ауылының шетіндегі өз үйіне бұрылды.

4

Таңертең шаң-шұң дауыстан оянды Шеге. Әкесі мен шешесі екен, шай үстінде кикілжіндесіп отырған. Сол баяғы қалыптары. Шеге түк естігісі келмей, көрпемен басын қымтап алды. Бірақ дастарқан басындағы керіс үдемесе толастар емес.

— Гүлжан! Бар!— деді әкесі.— Бар, Пахраддиннің үйінен бір шақпақ қант әкел! Ертең базаршылар келгесін береміз.

Гүлжан осы үйдегі бес қыздың ең кенжесі. Шегенің қарындасы.

— Бармайды! — деді шешесі. — Әй, қыз, тырп етпе! Ауылнай болдым деп етік, тігуге, сен арланғанда

ауылнайдың қатыны боп үй арасында шекер сұратуға біз де арланамыз. Бармайды.

— Әй, кіспұрыш, сен емес, бала алып келсін деп отырмын! — Әкесінің әдепкі шырыл дауысы шыға бастады.

— Бармайды!— деді шешесі. — “Өкімет кедейдікі” деп кеңірдегіңді күнде кергілейсін. Тырқ етсе байға қарай жүгіресің. Сонда, пәтуан қайсы сенің өкімет болғандағы?

Шешесі қара торы келген ірі сүйекті, мінезі салмақты кісі еді. Қоңыр дауыспен айтқан сөзі де салмақты шықты.

Шеге ішінен күліп жатыр. Дәл осы қазір аузына ұтымды сөз түспей қалған әкесінің ашудан қызарып кеткен түрін, шақырайған көзін, едірейген жебесін елестетін жатыр. “Шырылдауық Шәріп” деп жұрт әкесінің осы шапшаң мінезіне қарап атап кеткен.

— Әй, көргенсіз! — деп шаңқ етті, әлден уақытта әкесі. — Не оттап отырсың! Сұрасақ кедей болғасын сұраймыз да! Кедей болмасақ бізді кім қолдар еді?

— Жарылқағаны сонда анау бір мор ме? Шала туған баладай керегеге іліп қойған? Не қайыр көрдік сол морден? Әкім болдым деп сен жүрсің шелтендеп. Кәсібіңді тастап. Қара су ішіп біз отырмыз. Байымыз мөр ұстады деп мәз болып. Сол мөріңді тістеп іш, ендеше, қанттың орнына!

Шеге мырс етті.

— Қыскарт! Көргенсіздің нәсілі! Тарт! Тарт тіліңді морден!— деп шақ-шақ етті әкесі.

Балалар шу етті. Шеге төсегінен ыршып тұрды.

Ойлағандай-ақ әлжуаздау әкесі, қолында қобди, шешесіне қарай шатынап ұмтылған екен. Шеге екеуінің арасына түсті.

— Көргенсіздің нәсілі, мәрге тіл тигізбе деп қашанғы айтам! Ауыл-аймағыңмен, бота-тайлағыңмен кұрып кетесің! Білдің бе!

— Білдім, сабаңа түс! Отыра ғой, шәйің суып қалды! — деп қабағын шытқан шешесі қарасұр өңі қабарып шайсандыққа бұрылды. Бармақ басындай саршекерді алып, дастарқанға тастады.

— Япырм-ау! — деп әкесі әрең сабасына түсті. — Бұл жаман қатын-қалашқа шейін басқа шығып алды-ау, Мөрді тәлкек қылады, әлдеріне қарамай. Тапқан екенсіңдер ойыншықты!

Әлгі бармақ басындай саршекерді “қыт” еткізіп тістеп қойып әкесі шай құйылған күрсаулы кесені қолына алды.

Шеге тысқа шықты. Қатқылдау ызғырық жел бар еді сыртта. Күздің қарасуық таңы. Күншығыс жақ аспан сірескен бұлт. Күн шықса да көрінбей тұрған сияқты. Бүрсеңдеп өріске түйелерін қуалап жүрген әйелдер. Құдық жақта біреу шелегін данғырлатып су алып жатыр. Оның ар жағында қабаққа тырмысып ақ тазысын ертіп жалғыз атты кетіп барады. Аңға бара жатқан Бұлыш еді ол. Кешегі Ждақайдың әңгімесі есіне түсіп, ауыл сыртына қарай беттей беріп, Шеге өзінен-өзі күлді.

Бұлыш — жалпақ елге аты шыққан аңшы. Жасы отызға келіп қалған сақа жігіт. Оны сүймегенде кімді сүйсін Балқия. Оның үстіне Бұлыш қазір бойдақ. Осыдан екі жыл бұрын әйелі өлген. Рас, кедей. Жалғыздікті жігіт. Үйі анау ауылдың арғы шетінде оқшау тұрған шәукиген кұрым үй. Қартайған жалғыз шешесі бар. Күресіп балуан болғысы келген, мылтық атып мерген болғысы келген жас Бұлышты жағалайды. Бұлышты ұстаз тұтады. Шеге де солай.

Бұлыш ел ішіне өралғалы көп болған жоқ. Қарақұм жақта бір түрікпен байында жалшылықта болып, ел ішіне қайтып келгені биыл ғана. Бұлыштың атағын шығарған да сол түрікпеннен оралу сапары еді. Оның өзі бір жатқан хикая.

Ақ тазы ерткен қара арғымақ атты Бұлыш түстік беттегі қарауытып жатқан көлденең жөтадан әрі асып көрінбей кетті. Бағыты — Сарыбай құмы.

Осы Бұлыштай жігіт болса ғой. Шеге... Корер еді Хансұлудың қалай кекірейгенін. Шидем күпісінің өңірін қаусыра түсіп ауыл шетінде тұрып Шеге күрсінді. Мынау Шегенің жаман қоңыр үйі. Анау ауыл ортасында айдыны шығып тұрған үлкен ақ боз үй — Хансұлудың үйі. Сыртта қазықта қаңтарулы Қаракер құнан тұр. Хансұлудың құнаны. Сол құнанға шейін асылдың тұқымы. Бұл елде жоқ ат. Әкесі Бесқаладан әкеліп берген түрікпеннің әйгілі ақалтекесі. Мойыны құлаш жарым тікбақай құнанға ұзынша таралып өскен Хансұлу мінгенде маңынан жүруге Шегенің жүрегі дауаламайды. Сол кезде еркебұлан жас Хансұлу өте-мөте ерекше көрінеді. Хансұлу бөлінуді, ерекшеленуді осы соңғы жылдары шығарды. Мінезі де тұйық болып алды. Бұрын ер баладай бірге ойнап өскен ғой. Мешітте қатар отырып, Лабақ ахуннан бірге дәріс алды. Қазір бір жұмбақ мінез тапты. Атына мініп шошайып күнұзын жалғыз жүреді. Немесе үйден шықпай ұзақ күнді кеш қылып домбырасын тыңқылдатып отыра береді. Ждақай сияқты бозбалалар тыжырынып: “Хансұлу”, “Хансұлу” дегенге настанып, көңілі өсіп кеткен ғой” дейді. “Пахраддиннің қызымын деп көкірегін кергені де” дейді. Бірақ жұрт қанша жамандағанмен Шеге жек көре алмайды Хансұлуды. Керісінше, жұрттан

бойын аулақ салған, осы “тәкаппар” сопақша бет, қайқы кірпік, түрік ерін қызға деген ынтығы бұрынғыдан да арта түсті.

— Келе жатыр! Келе жатыр!— деген айқай шықты, ауылдың өріскей тұсынан. Сөйтсе, Қозбағар екен. Әлгінде өріске беттеген қой соңында бара жатыр еді. Етженді балажігіт аюдай қорбандап ауылға қарай далпылдап жүгіріп келеді. “Бү несі?” десе, сонау Қарауыл төбенің теріскей бөктерін қиып өтіп тырнадай тізіліп керуен келеді екен. Қалашылар керуені. Осы екі ауылдың Темірдегі жәрменкеге кеткен қалашылары.

— Хансұлу! Әй, әй, Хансұлу! Көкең келе жатыр! Көкең!— деп құдды өз әкесі базардан келе жатқандай әрпіл-тәпіл жүгіреді Қозбағар. Табаны жарқ-жарқ етеді. Өзі Пахраддин үйінің малын бағады. О, Жаратқан Ие, сөйте жүріп Хансұлудан бұ да дөмегөй.

Қозбағардың айқайынан бүкіл ауыл құлақтанып, жұрт андыздап тысқа шықты. Бала біткен шуылдап керуеннің алдынан жүгірді.

Үйінен Хансұлу да шықты. Сымдай тартылып ықшам киініп алыпты. Күлгін түсті зәгран шалбар, қынама бел қырмызы пүліш кәмзол. Биік өкше етік. Үкілі кәмшат бөрік. Қолында қамшы.

Арсаландап жүгірген Қозбағарға пысқырып та көз салмай, атына қарай беттей берді. “Орыстың әписеріндей, пай-пай, мына қыздың тіп-тігін-ай!” — деп Хансұлу жәйлі Қикымбай айтқан сөз түсті есіне.

Хансұлудың арықша келген әсем түлғасынан көз ала алмай күрсінді Шеге.

Тықыршып тұрған құнанына қарғып мініп, келесі сәтте Хансұлу да ауыл балаларының соңынан Қарауыл төбеге қарай жосылтып шауып бара жатты.

Ат жалына сәл еңкейіп, қабағын түйіп алған. Қаракер құнаны бейне аяғы жерге тимей ұшып келе жатқандай. Қарсы беттен ысылдап соққан жел ашаң жүзді, әдемі бидай өңді, көз қиығының құйыршығы қайқылау сұлу қыздың көзінен жас парлатты. Кішкентай танауы қусырыла түсіп, сонда да, алдына тура қарап құйғытады.

Хансұлудың жүйрік құнаны көп ұзамай ауыл балаларын артқа тастап, сары беткеймен салдыртып келе жатқан мол жүкті, іркіс-тіркіс керуеннің алдын орады. Жак жүндері үрпийп, беттерін шаң басқан, коздері қызарып іскен жолсоқты жолаушылардың ішінен ә дегенде Хансұлу әкесі Пахраддинді іздеп еді, көре алмады. Керуен алдында — ағасы Әзберген. Батыр тұлғалы Әзбергеннің беті бұрынғыдан да қалындап кеткендей. Қалың бетіне шанжаулап түк шыққан.

— А, Хансұлу, амансыздар ма? — деді, қабағы салбырап.

— Аманбыз. Көкем қайда?— деді Хансұлу. Әзберген ағасының неге екені белгісіз, қанталаған көзі мүлдем ызғарлы еді. Жауар бұлттай түсі түнерінкі.

— Лабақ ахундікіне қарай бұрылған... әлгінде, — деді кою дауысы коңырлау шығып. Керуен салдыртып жанынан өте берді.

Хансұлу енді тықыршыған кер құнанның басын күн астына қарай бұрды. Қаракер жусанды жазықпен сарыжайдың оғындай зырқырап келеді.

Жосытып шапқан Хансұлу көлденең жатқан дөңге көтерілгенде алдынан бірі түйе, бірі ат мініп қатар келе жатқан екі жолаушы корінді. Қарақасқа айғыр мінген әкесін алыстан таныды. Қасындағы ақ түйе мінген, ақ шапанды, басына ақ шалма тартқан, әрине,

Лабақ ахун. Лабақ ахун — осы елдің бала оқытатын ишаны. Жылыбұлақта мешіт ұстайды. Хансұлу осы кісінің қолынан хат таныған. Көп кітапты, оқымысты ғұлама, әрі өзі дүниенің толып жатқан дастан-жырын жатқа айтатын жырау.

Әкесі Пахраддин кең иықты, мол денелі, сақал-шашы көкбурыл тарта бастаған ат жақты, сұлу көзді, келбетті кісі. Ат үстінен еңкейіп, жаяу келіп әлем берген қызының бетінен сүйіп, ұзақ еміренді. Хансұлудан бұрын Әли, Қали деген екі ұлы болыпты әкесінің. Екеуі де шешектен қайтыпты. Солардан кейін туған жалғыз Хансұлуды әкесі ұлдан кем көрмейтін.

— Сұлутай! Амансыздар ма? — деп қобалжып, дауысы дірілдеді. Кең шаралы, аласы мол мейірбан көзіне жас іркілді. Жоталы мұрны домбығып сәл іскендей. Тұмауратқан кісідей түрі.

— Көке, сырқаттан саусыз ба? — деді Хансұлу, қарлығаштың қанатындай, қасы дір етіп.

— Жоқ, Сұлутай, — деді әкесі. Бұдан бір сыр бүккен тәрізденді.

Екеуі ақ түйесін желдіртіп озып кеткен аққудай арық шал ахунға желе жортып қуып жетті. Шал бетін бұрмаған күйі термелеп:

— Уай, інім Пахраддин! “Бай-бағланды кем көрер, күл-күтанға дем берер, қарсы келген жайсаңды, ат көтіне өңгерер” деген едік қой. Окіметтің жағадан осы алғаны алған-дүр. Темірде естіп-білгенің сол алапаттың басы-дүр. Лекин, көрер хикматымыз әлі алда-дүр, — деп бір қайырды.

Астындағы айыр өркеш ақ түйесі шудасы желпілдеп майпаң-майпаң желеді. Жол жөнекей ахун термелеп коп сөйледі. Дүние-ғалам жаралғаннан бастап, осы күнге дейінгі болып жатқан хикматтардың барлығы

да Алла ісі, Алла бұйрығыдүр деп айтты. Хансұлудың бір ұққаны әкесі жәрменкеден жаманат хабар әкеле жатыр екен. Өкімет тағы да байларды тықсыра бастапты. “Жайындыдағы Шоша ұсталыпты, ертең кімді ұстайтынын Құдайдың өзі білсін” деп келеді үлкендер.

5

Ауыл іші бүгін кішігірім мерекедей көңілді. Жәрменкеге айдатқан малдары киім-кешек, қант, шай, астық болып қолдарына тиді.

Жұрт Пахраддиннің еңселі биік қонақ үйіне жиналып, Лабақ ахунның өсиет термесін тыңдап отыр. Ұйып отыр. Ортадағы шойын табада қозданған шоқ. Сол оттың тілдей жалыны ерні сәл түрілген Хансұлудың қарақат көзінде де жылтырайды.

— Уай, садаған кетейін, сөз-ақ! — деп лепіре айқайлап ахунды қошеметтеп қояды Шәріп.

Төрде отырған аққудай арық, сақал-шашы аппақ, қураған кәрі ахун домбырасын боздата түседі. Пахраддин еңсесін қорғасындай ауыр ой басып, мүлгіп тыңдап отыр. “Опасыз жалған дүние, кімдерден кейін қалмаған” деп әлсін-әлсін қайталап, сонау Адам атадан басталған адам ұрпағының небір асылдары, әлемді тітіреткен Сүлеймендей патшалары, Ескендірдей ерлері, Лұқпандайын ғұлама, әз Жәнібектей хандары, Асандайын шерлері, Қазыбек, Сырымдайын билері, оның бер жағындағы кешегі қалмақ заманында қазақты жауға бермеген осы елден шыққан Барақ сынды батырлары байыз таба алмаған бұл жалғаннан, ешкім де опа таппаған” деп айтады.

— Әп бәрекелде! Аяма! Бас! — деп шырылдауық Шәріп атқа мініп отырғандай қопандап, ахунға таман

итіне түсті.— Пах, пах, қайран бұрынғының сөздері-ай!

Түксиген Әзберген бұкакөзденіп шырылдауық Шәріпке жактырмай аларып қарады.

Лабақ-ахун одан сайын аруақтанып, домбыраға шүйлігіп терме сөзді нөсерше төгіп, бұршақша боратты. Шәріптің делебесі одан сайын қозып:

— Пах, пах! Бас! Аяма! — деп қиқулады.

Жыр бігіп кеш үйіріле ортаға тегене толы ас келгенде Хансұлу бой сергіткісі келгендей сусып сыртқа шықты.

Кең тынысты сыңғыраған әдемі кеш түсіпті. Қара көк аспанда самсап жұлдыздар жайнайды. Малың жайлаған шаруа ауылдың ошақтарында оттар жылтылдайды. Жан-жақтан түтін исі, бықсыған тезек исі келеді.

Осындай жайбарақат торғын кешті ду-ду сақылдаған күлкіге толтырып, ауыл арасында бір топ қыз, бозбала “соқыртеке” ойнап жатыр. Хансұлудың балалығы ұстап кетіп топқа қарай беттеді.

— Хансұлу!

— Хансұлу келеді.

— Хансұлу “соқыртеке” болсын, — десіп қыздар жағы, әсіресе, шу-шу етті. Бозбалалардың ішінде Шеге, Қозбағар, Ждақайлар бар еді. Шегенің өзіне тете қарындасы Балжан келіп Хансұлудың көзін байлады. Қара орамалмен байлағаннан кейін Хансұлу түк көрмей қалды. Балжан Хансұлуды қолынан жетектеп ортаға әкелді де тұрған жерінде шыр айналдырып:

— Соқыр теке, соқ!— деп ыршып кетті. Хансұлу сыңқылдап күліп екі қолымен ауа қармап қалды. Кәмшат бөркінің үкісі ағараңдап, шалбарлы,

шонқайма етікті сыйда бой бұран бел Хансұлу ақ тісі жарқырап күліп, төңірегін қоршап сықылық атқан жастарға әлсін-әлсін ұмтылып жүр. Жұрт ду-ду етіп қашады. Әсіресе, аю денелі Қозбағардың күлкісі рабайсыз қатты шығады. Қозғалысы жеп-жеңіл Хансұлу әлгінің толассыз күлкісін түспалдап жүріп ақыры былқ еткен білегінен ұстап алды. Ырқылдап күліп бұлқынғанына болмады. Жібермеді.

— Болды! Болды!

— Ұстады. Ал Қозбағар, сен “соқыр текесің!”

Қозбағар енді шик-шиқ күлді. Хансұлу кара орамалмен Қозбағардың көзін байлады.

— Соқыр теке! Соқ-соқ!

— Ойбай, бұл кұртады! “Түйенің тулағанынан сақта!”

Қозбағар қорбандап қос қолын алға соза ұмтылады. Ждақай лып етіп Қозбағарды өкшеледі. Қозбағардың жүрісін салып, дымын шығармай ере түсті. Анау түк сезер емес. Балалар қиқылдап күле бастады. Ждақай Қозбағарды май бөкседен шымшып алып, тұра безді.

— Ойбай, — деп Қозбағар бұрылып ауа қармады.

— Өй, арт жағыңнан тағы барды! — деді Шеге. Аузы күйген Қозбағар жалт бұрылды. Жұрт қыран-топан. Қолапайсыз жайбасар Қозбағардың қолына ешкім түсер емес. Желіккен қыз, бозбалаларға керегі де сол, аюдай ебедейсіз Қозбағарды түртіп қашып әбден ит сілікпесін шығарды. Қозбағар борша-борша терледі. Күліп жүр. Көзі байлаулы, түк көрмейді. Сықылықтаған күлкілерді түспалдап ұмтылады кеп. Ақыры біреу ілікті-ау қолына. Қыздар шу етті. Әлжуаздау жіңішке білекті ұстай салып, өзіне тартқанда танауына нәп-нәзік әтір иісі ұрды. Қыз екен! Қозбағарға керегі де сол еді. Екіленіп кетті. Алыса жүріп:

— И-и-их! Их! — деп кісіней күліп қолға іліккен талдырмаш қызды ұмар-жұмар құшаққа басты.

— Қасқа бала, көктен тілегенің жерден табылды, айрылма! — деп арандата түсті Ждақай. Қозбағардың құшағындағы қыз бұралып ұрынып бұлқынады. Төңірек у-шу. Иығынан ұрып: “жібер!” деп төмпештеп жатқан қыздар. Оларды қайтсін. Құшағына қыз іліккесін.

— Е-е-ех! Ех! Ех! — деп күледі Қозбағар. Қыздың жұпары аңқыған алқымына тұмсығын тығып алған, сүйіп жатқаны, не тістеп жатқаны белгісіз.

— Жібер! — деп қатты шықты құшағындағы қыз дауысы. Тұмсығына жұдырық сарт етті. Сонда таныды. Хансұлу екен. Иманы тас төбесінен шыққан Қозбағар қызды жібере салды.

— Жарайсың, батырақ! — деп сақылдап мәз болып, секіріп-секіріп түсті Ждақай.

— Оңбаған! — деді Хансұлу көзінің жасы бүрк етіп. Осы арада аспаннан түскендей Әзберген жетіп келсін қастарына. Оң қолымен Қозбағарды, сол қолымен Ждақайды ұстады. Көзді ашып-жұмғанша болған жоқ, екі бала жігітті бір сілкіп тізерлетті. Темірдей тегеурінді қолдар Ждақай мен Қозбағарды бір-біріне қошқарша соқтырды. Төңіректегі балалар тырым-тырақай зытты. Алысып жүріп Әзбергеннің шеңгелінен Ждақай сытылып шығып кетті. Кең даланы бетке алып тұра безді.

Бұта тасасында бұғып жатқан Шеғеге соқтыға жаздады.

— Не болды? — деді Шеғе.

— Оңдырмады, — деді Ждақай зыта беріп. — Ана қасқаны өлтіргелі жатыр.

— Жүр! Арашалайык!

— Қасқа бала, есің дұрыс па? Аямайды.

Ждақай сәйгел тиген сиырша безіп барады.

— Ағатай! Олдім! — деп өкіріп жылаған Қозбағардың үні шықты.

— Бү, жаман поктың... құтыруын... Мә... мә! — деп ұрады Әзберген.

Шеге ұшып жүгірген бетімен Әзбергенді жотадан түйіп өтті. Бұндай түтқиыл соққыны күтпеген Әзберген серпіліп тәлтіректеп барып әрең тіктелді.

— Қап... көрінді... бү қайсы? — деп ізінен тұра қуды. Жеңіл аяқ Шеге түлкі бұлтаққа салып, ұстатпай кетті. Осы ойыннан от шығады деп Шеге, сірә, ойлады ма екен. Ол отқа озге емес, Хансұлу екеуі күйетінін білсе ғой.

Сөйткенше ауыл арасынан шаң-шұң айқай шықты. Ап-ашы, әйел даусы шықты. Әйел болганда да ашуы ақпанның қара дауылынан жаман Торқаның даусы. Қозбағардың шешесі ақсақ Торқаның ойбайы.

— Қайдасың, ойбай, адыран қалғыр, Әзберген!! Ойбай, қайдасың!? — деп айқайға басып келеді дауылдатып ақсақ Торқа. Озі шүйкедей болса да мінезі шақар. Шәріштің жалғыз апасы. Әлгінде “Баланды Әзберген сабап жатыр” дегенді естіп, көсеуді ала ұмтылған сыртқа. Табалдырықтан аттай бере, мандайша қағып басынан жаулығы ұшып түскен. Оған да іркілген жоқ. Күйеуі темір-терсек шұқығаннан өзге кәсібі жоқ Уәп дейтін зергер. Солымның нағыз өзі. Сондықтан жауымен жалғыз айқасуға “аттандап” ақсақ Торқаның өзі шыққан. Қараңғыда бүкпақтап тұра қашқан екеуді көріп Торқа кемпір одан бетер бүрқырады.

— Атаңа нәлет, Әзберген! Токта, қашпа! Кімді басынасың!? Шық былай, қолыңда өлемін, ойбай!

Бірақ Әзберген кезікпеді жолында. Занғар, қашқан сол болды-ау, Торқаның кәрінен қорқып. Ақсақ кемпір енді күшке мінді:

— Тұра тұр, бәлем, сәбетски властың бары рас болса, түбіңе жетемін, сен бандиттін! — деп.

Шаңдақтың арасынан Қозбағарын тауып алды. Солқ-солқ жылаған баласын жетектеп Торқа кемпір үйіне қарай шолтаңдап келеді. Қауашадай үйінде сықсиган май шам. Шалы, ұзынтұра Уәп зергер шоқыт көрпесінен жартылай шығып, шалғы мұрты салбырап екі ұрты бүлкілдеп отыр екен. Ашуланғанының сиқы. Торқа кемпір шам жарығына әкеліп, баласының бетіне қарады да баж етті. Ойбайлап, сарнап қоя берді. Қозбағардың мұрны бұзылған, қабағы іскен. Танау қаны бүкіл омырауын жуып кеткен.

— Тұқымыңа сенің... ойбай, Әзберген, қайда-сың?! — деп қайта тұлданып, босаға жақта тұрған өзінен үлкен келсапқа жармасты.

Қарақшыдай оңкиіп Уәп пақыр түрегелді орнынан.

— Қойсаңа, кімді қырармын дейсің! — деді екі ұрты бүлкілдеп, шашы бүрқырап есікке ұмтыла берген шынашақтай кемпірінің алдын кес-кестеді. Кемпірі одан жаман екіленді. Қолын шолтаң еткізіп:

— Адыра қал! Кет жолымнан, ойбай! — деп жұлқына, баласын сүйрелеп үйден айқайды басып тысқа шықты. Тура Әзбергеннің үйіне тартты, бүкіл ауылды дүрліктіріп.

Әзбергеннің үйінде жарық жоқ, жатып қалғаны байқалады.

— Атаңа нәлет, Әзберген, шық былай, еркек болсаң, тақа! Төбелесті көрсетейін, шық! — деп кеп ақсақ Торқа іштен ілінген қаусырмалы есікті келсаппен пергіледі. — Бүйткенше, өлтіріп неге

тастамадың, мына баланы!?! Адыраң қалғыр! Мә, өлтір!

Торқа баласын сілкіп қалды. Қозбағар есікке соғылып, босаға сықырлады. Іштен Әзберген гүр етті.

— Ау, ағайын, аулақ! Үйді құлатарсыз!

— Адыраң қалғыр, құлатпак тұрмақ қиратам! — деп ашуға мінген кемпір лақша ыршып, секіріп, келсап пен үйді төмпештеуге кірісті.

— ... Қиратарсың! — деді Әзберген қырсығып.

— Адыраң қалғыр, бетінен адам сүймейтін, ол не, ханның қызы ма еді?! О несі-ай кеп! Сүйеді ал! Сүймек тұрмақ, одан да зорын істейді! Ал тақа!!! Қозбағарымның бармағына тұрмайтын үрғашысын, о несі-ай кеп, соншама қалқелләзи қып! Әй, баспашы! Шық былай әкенің көрін... Қол-аяғыңды матап айдатайын! Өкіметтің бары рас болса. Батырақты сабасын деген зәкүн жоқ, білдің бе, аузыңа пәлен қылайын! Ойбай, қайдасың, Шәріп!? — деп енді Торқа кемпір долылық қысып дауыс ете бастады.

Торқа кемпірдің байбаламы бүкіл ауылды аяғынан тік тұрғызды. Ит екеш иттер дағы шабаланып үріп жатыр. Қорадағы қой, желідегі түйелерге дейін құлақтары ербиіп, күйістерін тоқтатып айқай шыққан жаққа мойындарын бұрады. Әзбергеннің үйі маңына бұ кезде ауылдың үлкен-кішісі түгел жиналып еді. Текеше бақылдап секіріп, ыршып үйді тоқпақтап жүрген Торқа кемпірді екі-үш әйел қолтықтап ұстап әрең тоқтатты.

— Сабыр! Шешей, сабыр! Бір ашуынды бер! — деп.

— Бұ жанжал неден шықты? Ау, ұқтырыңдаршы!— десті жұрт.

Балалар жарыса жамырап әлгінде болған уақиғаны айтты. Жұрттың ұққаны Уәп зергердің баласы жалшы

Қозбағар, ойын үстінде күшке салып Пахраддиннің қызы Хансұлудың бетінен сүйген. Қыз жылап қалған. Қозбағардың қызда көңілі болған. Ерке қыз әдепсіз бала жігітті шапалақпен беттен тартып жіберген. Сол арада тап болған қыз ағасы Әзберген Қозбағарды жығып салып жұдырықтың астына алады. Бет-аузын даладай қан қылады.

Шуылдаған жұртты іркіп, Пахраддин көз жасын сүртіп тұрған Торқа кемпірге жақындады.

— Жеңеше, бір ашуыңызды беріңіз! Елміз ғой, бір тентекке әліміз жетуге керек, асасы! — деді. Мол денелі, мауыты шапанды Пахраддин, енді інісінің үйіне қарай бұрылды:

— Әй, найсап, бұ не жатыс, елді шулатып, шығуға керек сыртқа! — деп зекіді.

— Ағайын, мазамды алмандар! Аулақ! — деп ғұр етті іштен Әзберген. Жұрт тіксініп қалды. Әйелдер жағы беттерін шымшылады. Бұл ел, ел болғалы ауыл ағасы Пахраддинге қарсы келіп, бетінен алған адамды көрмеп еді.

Пахраддин ашуға тығылып, теңселіп:

— Найсап, ақылмен іс қылуға керек! Оңбассың, асасы! Оңбассың! — деп теріс айналып жүре берді.

Осы жәрменкеден Пахраддин мен Әзберген кикілжіндесіп қайтқанын бұ жұрт білмеуші еді.

Жұрт арасында Шәріп те тұрған. Ешкі күйрық сакалын қайыра тістеп үнсіз тұрған. Жұрттың назары енді ауыл өкіметі — соған ауды. Әншейінде, дау-жанжалдың лаулаған өртіне елден бұрын қойып кететін Шәкең неге екені белгісіз, қазір үнсіз. Әйелдердің қолында жуаси бастаған Торқа кемпір өкімет інісінің мына мөжан-томпай қалпын көріп:

— Жағың қарысып қалды ма, ойбай, сенің?! Окімет болғанда сенен не қайыр көрдім мен, ойбай! Жалғыз

апаңды бүйтіп дос-дұшпанға таба еткенше, тақа, өкімет болмай орем қап, ойбай! Жіберіңдер түге, қаңғып өлемін! — деп қылғынды.

— Қойсаңа, кемпір! Жүрсеңе үйге! — деген үн шықты жоғары тұстан, мұрты салбырап үңіліп тұрған ұзынтұра Уәп екен. Сырықтай бойын иіп кеп құрықтай қолымен кемпірін қармап иығына салды да, үйіне қарай бұрылып жүре берді. Торқа кемпір аяқ-қолы тарбаңдап шалын иыққа тәмпештеп барады. Тулап барады.

— Жібер түге, адыраң қалғыр! Жайпап салам... тақа! Жібер! — деп.

Жүрт күліп жатыр.

Жуырда ғана ауылдық кеңес ағасы болып сайланған етікші Шәріп қана күлген жоқ. Мына даудын таптық астарына ой жүгіртіп, бір тұтам сақалын саумалап тұр.

6

Әзберген шай ішіп торінде көлбеп жатса үйге салаң етіп, қылышын сүйретіп мелиса кіріп келді. Келіншегі шошынып орнынан ұшып тұрды. Әзберген күс көпшікті шынтақтап жатқан орнынан қонаққа сұсын тікті. Өзі танитын бұрынғы болыстық мелиса — Базарбай емес. Бірақ өңі таныс. Сорынды ұрайын... мынау, өкіл келсе томпаңдап атын байлап жүретін Мажан ауылындағы баяғы малай балаға ұқсайды гой.

— Бұқарбайсың ба, ей?! — деді Әзберген қорыққанын білдіртпей, ескі танысын көргендей серпіліп.

— Сөзді қой, Әзберген! Тұр... киін! — деді кілбік көз, томпақ бет кеспелтек қара үні қатаң, күркірегендей. Түсі ызбарлы. Әзберген, мелисаны Шәріп шақыртқанын ұқты.

— Ау, шай ішейік, жолдас! Отыр! — деді Әзберген төрді нұсқап.

— Тұр, бол! Шай ішетін жеріңе баратын болдың! Тәртіп солай!

Мелиса иығында шошайған мылтық, белінде қылыш, үсті-басын шаңдыған қайыс белбеу, жылтырауық түймелер, түсі зәрлі. Әзбергенді түтіп жеп барады. Қырыс қабак Әзберген етігінің сірісін тепкілеп киді де, орнынан тұрды. Сол-ақ екен мелиса шап беріп қолын артына қайырды. Қайыс белбеумен екі қолын арқасына қайырып байлады. Әзберген қарсыласпады. Сыртқа шыкса, Шәріп үйінің алды ығы-жығы адам. Жапа-тармағай бұрылып бұған карады. Мелиса Әзбергенді солай айдады. Әзберген ызаға булықты. Осы ауылдың оңшең бокташак, катын-қалашы бұны табалау үшін жиналған. Өттең дүние-ай, қор болды-ау! Осы ауылды бір шыбықпен айдаған Әзберген емес пе еді бұл?!

Ауылдың бас көтерген ақсақал, қарасақалдары Шәріптің үйінде екен. Әзберген, қолы байлаулы өңкиіп есіктен кіргенде байқағаны; төрде көзі шақшиып жапалақтай бір тұтам боп шырылдауық Шәріп отыр, оның оң жағында — маңдайы қасқайып Пахраддин, сол жағында — аруақтай аппак, сақалын саумалаған Лабак ахун. Олардан төменірек әйелдер арасында шүйкедей Торқа кемпір де көрінеді.

— А-а, келдің бе, кіспұрыш! — деді Шәріп қозғалақтап күліп. — Отырсын солай! Босағада!

Шәріптің сөзі Әзбергенді камшымен маңдайдан тартып жібергендей болды. Не десін? Дымы құрып ернін тістеді. Жұрт көзі Әзбергенде. Мелиса арқасынан нұқыды. Әзберген түсі қабарып, түнеріп босағаға тізе бүкті. Ағасының кейпін көз қиығымен

шолып еді, оның да меселі түсіп “салы суға кетіп” отырғаны байқалды.

— Ал жаз! — деп көтеріңкі дауыспен саңк етті Шәріп, астынан су шыққандай қозғалақтап.

Әзберген түксиген қабағының астынан назар жіберіп қараса әлгі ауылнайдың алдында жатқан ала қағаздар, енді оның баласы Шегенің алдына жылжып барып қалыпты. Шеге қолында қаламы, әкесінің аузын бағып, жаланып қояды. “Қап, түнде қолға түспей кеттің, әттең...” деді іштей Әзберген ызаға булығып.

— Жаз! “Пртөкөл” деп жаз!!!

— Жаздым.

Үйдегі жұрт сілтідей тынды. Сыртта тұрғандардың гуілі басылмап еді. Торқа кемпір айқай салды.

— Әй, дабырламандар, тақа!

Су сепкендей тыныштық орнады. Тіптен бүкіл ауыл жым болғандай. Үйге ұсталған шидің ғана ызыңы естіледі. Арқадан соққан азынау жел бар екен.

— Үшбу пртөкөлді жасау себебіміз: өткен күні Пахраддин ауылында таптық шайқас болды де! Байшікеш Әзберген Мұсаұлы, тамам жұрттың көзінше кедей-батырақ Қозбағар Уәпұлын... Ие, жаз! Қозбағар Уәпұлын соққыға жықты. Оған әмісе себеп; кедей-батырақ Қозбағар бәйшікеш Әзбергеннің қарындасы Хансұлуға көңілі кетіп, ғашық-машық болады-мыс.

Шеге мырс етті.

— Жаз! Әзбергеннің кедей-кембағалды жәбірлеп, зорлық-зомбылық жасауы жалғыз бұл емес де! Кенес өкіметі келгелі айылын жиып еді де. Әйтпесе, арғы жерде ә десен мә дейтін нағыз кіспұрыштың өзі еді де. Бұл зәнталақтың қорлығы өткен де. Баяғы

Ыбырайдың асында ақсақалдар отырған үйден мені “етікшінің орны ошақтың маңы” деп дырылдатып сүйреп шығып терідей торсылдатып сабаған кім еді? Үшбу осы Әзберген контрдың өзі еді.

— Ау, Шәріп! — деп Пахраддин осы арада кеудесін тіктеді. — Ау, құрдас! Кезінде ақсақалдар ымырасымен біткен дау еді ғой ол. Қайта тірілтіп қайтесін, асасы?

— Қош, солай-ақ болсын. Әрі қарай кеттік. Жаз! Өкімет кедейдікі. Кедей кім? Кедей — Қозбағар. Ендеше, Қозбағарға Әзбергеннің қол жұмсағаны, өкіметке қол жұмсағаны. Солай деп жаз!

Осы арада көпшіліктен маза кетіп, қозғалақтасты.

— Жаз! Батыракты сабасын деген зәкүн жоқ. Ол Мекалайдың заманы келмеске кеткен. Бүгінде батыракқа қол тигізгенге статья бар.

Жиналған жұртшылық араның ұясындай гуілдеп кетті.

— Жаз! — Шәріптің дауысы осы арада ширығып шаңқ етті. — Сол батырағын жәбірлеген байларды сотты ететін статьяға жатқызылсын Әзбергеннің ісі. Өзі Сібірге айдалсын. Барса келмес түрмесіне.

Пахраддин түсінде үрей, козшарасы ұлғайып қасындағы сақалын уыстап қалғып-мүлгіп отырған ахунға қарады.

Пахраддиннің озінен бір уәж күткенін сезіп ахун жүзін котерді. Сақалын тарамдады:

— Шәріп, райдан қайт! — деді әуезді тақуа дауысына салып.

Шәріптің түсі өрт сөндіргендей еді, жалынып-жалбарынғанға құлақ асар емес. Қазықтай қақшиып алған. Күйеуінің мына қаталдығы қытығына тиіп кеткен Жайбасқан:

— Әй, Сібірден басқа жакты жау шауып па? Жөндеп жаз ана пртөкөліңді! Шаш ал десе бас алмай! — деді бүрк етіп.

— Жазылмайды. Бітті. Шеге мөрді әкел! — деді, Шәріп одан бетер шақшия түсіп. — Барсын, кіс-пұрыш! Тапқан екен ойнайтын кісісін!

“Сібірден” қырыс кабак Әзбергеннің де көзі атыздай болған. “Шыны ма, ойыны ма мынаның?” дегендей еңсесін көтеріп ажырайып қарады. Торқа кемпір да шолтаң етіп:

— Адыраң калғыр, осы көрсеткен қорлығы да жетер, барсын Сібіріне! — деді.

— Түу, шешей-ай, ауыл-үйдің арасына осы от салғаныңыз да жетпей ме? — деп бір әйел күңк етті.

Мөр қолына тигенде Шәріп арқаланып, ұшатұғын бүркітше екі иығын қомдап алды. Бота табан мөр қолында.

Әйелдер жағы зәрелері ұшып, шектеріп тартты.

— Шәріп, ей, Шәріп, асасы, андап іс қылмаққа керек! — деп ыныранды Пахраддин, ауыр денесін қозғай түсіп.

Шәріп тас керең. “Пртөкөлді” алдына жайып қойып, мөрді ауызына тақап үрлеп “дем салды”. Жұрт тырс етпей сіресіп, үркіп шошып қалған. Содан Шәріп әй-шәйға қараған жоқ, жер стол үстінде жатқан табактай қағазға бота табан мөрді құлаштап әкеп “тонқ” еткізді. Жұрт селк етті. “Әй” деп шыңғырып қалған әйелдер де болды.

— О, шебер Құдай!

— Мә! — деді Шәріп, мөр басқан қағазды мелисаға беріп жатып. — Дүкене берерсің! (“Дүкесі” болыстық кеңес ағасы Дүкенбай еді).

Шүйдесі калыңдау Бұқарбай мелиса қағазды бүктеп асықпай жан қалтасына салды. Ықтияттап

қалтасының аузын түймеледі. Сосын Әзбергенге сүзеген бұқадай кілбие қарап:

— Марш, түс алға! — деді.

Әзбергеннің қалың беті қабарып, сүметіліп орнынан тұрды. Есікке беттей беріп, Пахраддинге тағы көз тастады. Ағасы назарымен жер шұқып отыр екен.

Жұрт “Арыстыбай”* болған Әзбергенді шығарып салуға сыртқа лап қойды.

— Ау, халайық, ешқайда тарамаңдар! Қонақ-сыларың бар! — деп дауыстады Шәріп. — Әй, Шеге, тұр, ана қызыл тоқтыны әкеп сой!

— Қонақасыға, асасы, тойдық қой, құрдас! — деді Пахраддин, ренішін жасырмай орнынан ауыр қозғалып тұра беріп.

— Құрдас, сен өкпелеме! Өкімет ісі өз алдына, ағайындық өз алдына. Солай емес пе, ахун аға? Шақырса келмейтін өңшең жақсылар себеппен есік ашып қалған екенсіздер, енді қонақасыларыңызды жемей кетпейсіздер! — деді Шәріп, шын ықыласымен...

Пахраддин мен Лабақ ахун бір-біріне қарады. “Бұнысы да жол екен-ау” дескендей.

Мезгіл сәске түс еді. Сырттағы үлкенді-кішілер шығыс қабаққа тырмысқан жалғыз қасқа жолға қарады. Сол жолда көлденең белге қарай атты кісі бір жаяуды алдына сап сүргітіп айдап барады. Емпендетіп қатты айдайды. Жаяудың аяқ шаңы бүрк-бүрк етеді. Жаяу “арыстыбай” болған Әзберген еді.

Күн көзін торлаған кіреуке бұлт бар. Мазаны алып арқадан қатқыл ызғу жел соғады. Қолдарында жез құман, шапандарының шалғайын қаусыра түсіп ауыл сыртындағы жусан арасына таман балпаң-балпаң

* Арестованный.

басқан Пахраддин мен сырықтай ұзын арық, шал Лабақ ахун барады. Ренжулі. Пахраддин тамағын кенеді.

— Ахун аға! Қалай ойлайсыз? Бұның арты немен тынбаққа керек?

— Алла білсін, лекин, заман шапшаң өзгерген-дүр, інім! Әгерки, біреулер бахаслық жасап жүрмесе, тергер-тергер де жіберер!

— Олай болмасқа керек. Бұл іс соңы, мен білсем, асасы, насырға шаппаққа керек. Кешегі жәрмеңкеде сөйлеген өкіл сөзі есімде. Айтқаныңыз бек келді. “Бай-бағланды кем көрер, құл-құтанға дем берер” дегеніңіз бек келді. Қазір ана сорлыны болыстық кеңеске апаруға керек. Онда бардым дегенше орным түрме болды дей беру керек.

— Заман! Заман! Репетің жаман! — деді Лабақ ахун күңіреніп.

Әлден уақытта Пахраддин тағы тамағын кенеді.

— Әлгі шырылдауық та, асасы, соны бек біліп істеп отыр. Мынандай уақта, “түймедейдің түйедей боларын” біліп істеп отыр. Не істеуге керек, ахун аға! Әзберген ит те болса жалғыз тірегім еді. Заманның түрі мынау. Дауды ауыл арасынан шығармау керек еді... Баланың ойынынан шыққан от қой!

— Баланың ойыны... Иә, баланың ойыны, лекин... Лабақ ахун құманын жерге қойып біруақ төсіне түскен қауғадай күміс сақалын қос қолдап саумалап ойланып тұрып алды.

— Баланың бірі бойжетіп, бірі ержеткен-дүр, лекин?— деді, әлден уақытта.

— Солайы солай ғой!.. — деді Пахраддин күрсініп. Мықтап жадап, шаршаған түрі бар.

— Ымм... — деп ахун ойланып шағырмақтанған аспанға қарады.

Үйге кіргеннен кейін:

— Уай, Шәріп! — деді төрге озып тізе бүге беріп аккумуля Лабақ қартыңыз.

— Ләббай, құлағым сізде! — деп елп етті Шәріп.

— Тізеңді бүк! Торқа келін сен де отыр! Уәп, сен де құлак сал. Лекин кешелі бергі дау-далаба хәм-мәңізге баяндүр. Жәмиғат! “Қанды көйлек кесе де, шыдамайды туысқан”. Екі бала ұрысса, ұғыстырмақ лайкат. Екі ағайын ұрысса, туыстырмақ лайкат... Шәріп! Пахраддин! Уай, Торқа келін! Уәп, інім! “Дау мұраты біту-дүр, жол мұраты жету-дүр, қыз мұраты кету-дүр”. Үлкен деп тілді алсаңдар, мен сендерді бітістіргелі отырмын, жекжат еткелі отырмын. Жаспен жастың тілегі бар. Торқа келіннің ұлы ержетсе, сенің, лекин, қызың бойжетіп отыр, Пахраддин! Құда болындар, азаматты қайтарыңдар. Осыған тоқта-саңдар, көне қолдарыңды жайыңдар! — деді Лабақ ахун, бата жасайтын ниет білдіріп.

Тас төбеден жәй түскендей мына бәтуадан екі жақта іркіліп дағдарып қалды. Мол денесімен Пахраддин ыргала түсіп, төмен қарап сыр шығармады. Шәріп болса қышып кеткен тамағын қайта-қайта кенеп, астынан су шыққандай қыбыжықтап Пахраддинге бір, ахунға бір жалтақтады. Әлгінде, басы селтең ете қалған Торқа кемпір, енді дымы өшіп, “әліптің артын” бақты. Ұзынтұра Уәптің жағы сопайып екі ұрты бүлкілдеді. Босаға тұста жаңа сойылған тоқтының терісін тұздап жатқан Шеғе ышқынғандай оқты назарымен мына отырғандарды атып жіберердей сұрланып кетті. Сөйткенше, Шәріп елпең етті. Үлкен жапалақ көзі ойнақшып, шақалақтап күліп, орнынан ұшып кетердей қопандап:

— Пай, пай, бабам-ай! Тауып кеттіңіз-ау! Сөз бар ма? Уай, садағаң кетейін, көненің көзі-ай! Міне,

ақыл! Міне, жөн! Уа, Торқа, жарылып кетпей неғып отырсың! Бағы бар екен боқмұрын балаңның! Жәй қолыңды! — деп алдымен өзі елеуреп ербендетіп қолын көтерді. Торқа сықсың етіп күліп, шалын шынтағымен түртіп жіберін, қолын жайды. Енді тосылып отырған жалғыз Пахраддин еді. Қарт ахун енді солай бұрылды.

— Ал, інім Пахраддин, қолыңды жай! Патиха берейін!— Ахун орақ тұмсығын көтеріп биік мандайшаға қарап сүйекті арық қолын алға созды. Пахраддин жүрттың соңын ала керсолқылау қозғалып қол жайды.

Осы арада Шеге есіктен ыта жөнелді. Шәріп:

— Уай, көргенсіз!.. — деп қалды.

Лабақ ахун нақысты дауысын әндей созып, көтеріңкі әуезді мақаммен дұға оқуға кірісті.

— Ағуз-зи бил-лаһи...

Жүрт сілтідей тынды.

“Пахраддин Қозбағарға қызын беретін болыпты. Өзбергенді сөйтіп күтқаратын болыпты” деген хабар дүңкілдеп ауыл ішін аралап кетті.

Үлкен ақ боз үй алдында сары самауырға от салып тұрған Хансұлу Шәріптің үйінде болған жаңалықты шулаған балалардан естіп, етегіне сүріне аттап “апалап” үйге жүгіріп кірді. Босағада шешесі күмбілдетіп саба пісіп жатқан. Болған сұмдықты ол да балалардың айқайынан естіп, піспегі қолында, өңі шүберектей бозарып тұр екен. Сырттан жүгіріп кірген қызын құшақтай алды.

— Жасаған Ие-ай, ақылдасу деген де жоқ... Бү сорлыға не болған? Жүр, әлгі алжасқан әкене барайық! — деп қолын сүртіп есікке беттеді.

— Бармаймын! — деді Хансұлу жұлып алғандай. Көзінде жарқ еткен ыза. Безеріп алған.

— Жарайды. Өзім-ақ барайын, — деді, шешесі байғұс.

Жаулығын дұрыстап тартты да, майда басып сыртқа беттеді. Дүние күйіп жатса да сол бір биязы жұмсақ қалпынан танбайтын әдеті шешесінің.

Әкесінің алған бетінен қайтпайтынын білетін Хансұлудың қазір төбесіне аспан құлағандай. Дүниесін өрт шалғандай. Керегеге қыстырулы қамшысын суырып алды да, кермеде тұрған Қаракеріне жүгірді, неге екені белгісіз, жүгіре түсті де басына бір ой келіп, Қозбағардың үйіне бұрылды.

Қозбағар үйінде төсек тартып жатқан. Бет-ауызы ісік. Жаңа Шеге келіп зәресін жаман ұшырды. Жағасына жабысып әй-шәй жоқ төсектен суырып алды. “Иттің баласы, Хансұлуда нең бар сенің?” дейді буындыра түсіп. Өзі жылауға жақын. “Өй, Шеге, не айтып тұрсың?!” деп бұл шыр-пыр. Шегені алжасқан дерсің. Бұны төсекке итеріп есіктен ата жөнелді. Әзірейіл өкшелегендей дүрсілдеп барады. О, тоба! Қозбағар сөйтіп әңкі-тәңкі отырғанда сырттан бір топ бала шулап етті. Шегенің алжасқан себебін сонда түсініп, лажсыз езу тартты Қозбағар. Коз алдында — талшыбықтай Хансұлу. Бұралып келіп мойнынан асылғандай. Құшағына кіргендей. Тіптен ақылға сыймайды. Хансұлу Қозбағардың жары! Міне қызык! Сөйтіп жатқанда есік шалқасынан сарт етіп ашылды да, үйге Хансұлудың өзі кіріп келді. Тура орыстың әписеріндей тіп-тік. Қарақаттай көзінде жарқ еткен ашу. Қайқы кірпік, түрік ерін. Қолында қамшы.

Қозбағар ойланбастан-ақ көрпені басына бүркей қойды. Бірақ қыз жетіп келіп көрпесін бір-ақ жұлқып үстінен сыпырып алды.

— Сен бе сонда мені алатын? — деді.

Қозбағар:

— Ойбай, мен емес! — деп көтерілген қамшыға қарап, баж етті. Қамшы “шарт” етіп оң жамбастан осып өтті. — Ойбай-ай-и-и! — деп қалды Қозбағар.

Кекірейген тікбақай қыз, сол тіп-тік қалпы есікті сарт жауып, шығып жүре берді.

Бү кезде Шәріптің үйінің сыртында — Пахраддин мен бәйбішесі кездескен еді. Бәйбішесі ә дегеннен:

— Жазған-ау, бұның не? — деді, қаттырақ айтуға батылы жетпей. — Не көрінді саған? Тал түсте алжасып?

Бурыл тарта бастаған сақал-мұртын жел қозғап, келбетті келген саналы жүзі түнеріп, шалбарланып, қабақ шытып біраз ой сабылтып тұрды Пахраддин. Өңі тым жадау еді.

— Асасы... козді ашып қарауға керек заманға, — деп баяу тіл қатты әйеліне. — Алтын басты баймырзадан, бүгінде бақыр басты кедей артық! Бұны көруге керек! Зерделеуге керек... Менің де ойлағаным — қызыңның болашағы болуға керек!.. Соны ұғуға керек, бәйбіше!

1927 жылдың кара күзінде “Тасқұдықтың” басында болған бұл уақиға дүмпуі Жем өзенінің түстік жағы — Үш Оймауыт, Доңызтау далаларын жайлаған қалың табын еліне лезде-ақ дүңкілдеп тарап жатты. Байлығы тасып бара жатпаса да, ел арасында әділ билігімен, тілді, шешендігімен атағы шыққан сырбаз жан, ауыл ағасы Пахраддиннің, маңдайына біткен жалғыз қызын есігіндегі жалшысына өз еркімен бергелі жатқаны есітер құлаққа ерсілеу жаңалық, тосын хабар болып тарады.



ҮСТІРТ ҮСТІНДЕГІ КӨШ

I

*М*үіімен қар жауды. Сонау Самдағы жылы қора-қыстауларына енді бір екі жұма өткізіп кошерміз деп отырған шаруа ауыл қатты дүрлікті. Ерте жауған қар көші-қонды қиындатты.

Хансұлудың көзі ілінер емес. Жылы төсекте бүрісе түсіп, козін жұмады. Ұйқы шақырады. Шарасыз, тұрлаусыз ағындаған ойдан дөңбекши береді. Суық желді, түн әлемімен бетпе-бет қалғандай. Қиіз үйді айнала шауып, іргені тырнап ойнақ салған ала қаншық боран. Мүздай тұмсығын үй ішіне де сумандатады. Жылы көрпеге еніп денені тітіркетеді. Есік алдындағы ши жаппа желге қосыла сарнайды. Жан құлазытар бір сарын ызыңмен толассыз үн салады. Осы бір үн, жүдеу үн мәңгі үзілмейтін тәрізді. Әлемді жапқан түн мәңгі серпілмейтін тәрізді.

Таң ата талықсып ұйықтап кеткен екен. Ұй ортасында дүрілдеп жанған оттың қызуынан оянды. Ашық түндіктен бозарып аспан көрінеді. Шешесі, жанында көмекші әйелдер бар, мықшындап үйдегі көрпе-тосек, киім-кешек, кілем-сырмақтарды тендеп буып жатыр.

— Сұлутай тұра ғой! Ауыл кошкелі жатыр, — дейді, шешесі бұның қыс киетін жылы тиін ішік, жарғақ

шалбар, түлкі тымағын алып беріп жатып, өздері де буынып-тартынып киініп алыпты.

Тысқа шықса, дүние ақжабын аппақ. Түгел қар басып салған. Желіде жатқан қалың түйелердің мойындары сорайып қарауытады. Қотандағы қойлардың қылтиып бастары әрең шалынады.

Ас үй алдында көкесі бар, Әзберген ағасы, Бұлыш, шырылдауық Шәріп бар, төрт-бес кісі бір семіз биенің буын бұрқыратып, қарнын жалтыратып сойып тастапты.

— Ойхой, жануардың семізі-ай! Қазысы бес елі! Бес елі! Пах! Пах! — деп айқайлап жүр Шәріп.

Көрші-қолаңның қатын-қалаштары да сол төңіректе. Шарт киініп алған. Қимылдары шұғыл. Әзберген білекті түріп жіберіп балтамен етті боршалап шауып, табақтарға бөліп сылқ-сылқ тастап жатыр.

— Алыңдар — деп қояды әкесі, дауысы таңғы ауада саңқылдап. — Алыңдар! Садақаның еті!

Ас үйде асулы тай қазан. Астында лаулаған от. Әкесі, жылқының қалған етін түгел сол қазанға салдыртты. Ет піскенше ауыл азаматтары үйлерді жығуға кірісті. Жүктерді тайлап, теңдеп түйеге артуға ыңғайлап, буып тастап жатыр. Ауылдың бүкіл қора-ағашын жинап, біріктіріп байлап жатқан Бұлыш пен Қозбағардың тірлігі тосындау. Жұрт сонда үймеледі. Пахраддин шолақ бұйрық етіп үйден білектей кендір арқан алдыртты. Бұлышқа “Нарды әкеле бер!” — деді. Ортада кебежедей дүңкиіп бума ағаш жатыр.

— Екі арқанды екі шетіне орап байла! — деді Пахраддин. Бұлыш балпаң-балпаң бастырып Шойынқараны әкелді. Жардай қара нар тұмсығы шуылдап жұртқа төбеден қарайды. Жүндес қабағы астынан суық шегір көзі жалт-жұлт етеді. Бұлыш кестапандай Шойынқараны бумаағаштың алдына

әкеп шөгерді. Нар тісін қайрайды. Үстіне ашамай салып, екі жігіт екі жақтан тепкілеп айылын тартты. Бумаағашқа таңылған арқанның ұшын әкеп ашамайдың екі жағына тас қып байлап тастады.

— Көні түрғызшы енді! Шу, Ойсыл-қара! Шойынқара алпамсадай арбиып орнынан түрегелді.

Бұлыш жетектеп жүр. Түйе тізесінен келетін қар бар еді. Ірі қара болмаса, майда мал жүре алмас күртік.

— Ал айда! Көрелік!

Шығыр тартып машыққан Шойынқара әлгі кебежедей бумаағашты жұлқа тартты. Бумаағаш оппа қарды қарс айырып барады. Соңында, кеңдігі құлаш жарымдай жол ашылды. Шәріп шақалақтап күліп жіберді.

— Пах! Пах! Садағаң кстейін, жануарым-ай!

— Осылай көшуге керек, Алла бұйыртса, — деп Пахраддин мұртының ұшын шиырды.

Бозала таңнан ию-қию қимылдаған жұрт бұ кезде жүктерін түйіп, түйелерін жазылап үдерс көтерілуге дайын болып қалған еді. Жығылмаған Пахраддиннің ас үйі ғана. Жұрт сонда жиылған. Абажадай үй халыққа лықа толы. Ортаға үйме табақ ет келді. Семіз ту биенің буы бүрқыраған жас еті. Осыдан кошсе күндік жердегі Масатының көңіне жетпей іркілу жоқ. Соны білетін жұрт дастарқанға келген бірнеше үйме табақ еттен жұғын қалдырмай сипап салды. Майлы етті бір-бір тостаған ыстық сорпамен басты. Аздасын, маңдайлары шып-шып терлеп бусанып, беттерінен оттары шығып кең үйден атанжілік жігіттер алшаң басып сыртқа шықты. Қатқыл жел, шымыр аязды шыбын шаққан құрлы корер емес. Еңкейіп, оппа қардан осып алып беті-қолдарын ысқылайды.

— Күйеу бала, хал нешік? — деп аксия күлген көмірқара Бұлыш Қозбағарды желкеден қысып

койды. Қозбағардың бітік көзі одан сайын қысиып, сызыққа айналып, екі иығы бүлкілдеп “киқ-кик” күлді.

— Баланың көңілі хош білем? — деп тұрғандар қауқылдасты.

Астан кейін жұрт түйелерін бақыртып-шақыртып жүк жанына шөгеріп, әупірімдеп уық, керегелерді төске алып тиеп, апай-топай қимылдап кетті. Әйелдің пысықтығы мен ер қайраты да осындайда байқалады. Жүкті әрі тез, әрі тап-тұйнақтай арта алмаған ұятқа қалады. Олақ әйел, осал еркектің артқан жүгі қыр аспай қикиып ауып жатады. Көп аласапыранның арасынан Шәріптің ащы дауысы шырылдап шығады. Осындайда күйін-пісетін әдеті, жазғанның. Ісінен айқайы көп. Таң атқалы Шегеге шүйлігумен жүр. Әншейінде әкесінің оң қолындай жұмысқа ұсынақты Шегеде бүгін қимылдайын деген құлық жоқ. Соған үрсамын деп дауысы қарлықты. Осы Шәріпке біткен төлдің бір түйткілі болатын әдеті, әйтеуір. Сабаудай қыздарының отырысы анау, үй орнындағы отқа қолдарын көсеп. Ойпырмау, алды он төртке келсе де әлі бала-ай, бұлар!

— Ай, Балжан! Наржан! Қалжан! Айжан, Гүлжан! Уай, “жандарың” шықсын! Ел көшкенде сендердікі бұ не отырыс?! Ой, кіспұрыштың қыздары-ой! — дей бергенде шөгеріп қойған бақырауық жарбайы селтең етіп тұрды да кетті.

— Уа, арамқатқыр! Әй, шөк! Шөк! — деп Шәріп безек қақты. Түйені айнала жүгірді. Буыршын бақырып айнала береді.

— О, атаңның көрін... албасты! О, пері үптеп, шайтаннан туған ыблыс!

Жарбайдың басымен жағаласып жүріп әрең шөгерді. Қап, мына құлағыңды ұрайын, берді-ау

азапты! Бұрын төбесінде талқан түйіп жатқанында мыңқ етпейтін жуас кәрі маясы бар еді. Ол алжып өлгесін өткен жылы осы буыршынды алған, Мажан байдың келесінен. Жатырынан қағынған асау бопшықты, атаңның көрін.

— Шеге, ойбай, қайдасың? Арғы аяғын тізде! — деп айқайлап, өзі түйе шөге салысымен шарт та-шұрт бір аяғын тіздеп тастады. Нені істесе де төңірегіннің мазасын кетіріп күйіп-пісетін әдеті. Мырыққанды ұнатпайды. Шеге жіп таба алмай жүр еді.

— Ойбай-ай, болсайшы! — деп шыр ете қалды. Сол ақ екен буыршын қақшаң етіп тағы ұшып тұрды. Шәріптің қаны қайнап кетті.

— Шеге! Уа, иттің асыраған төлі! Доңыз, шошқа! Қайдасың!

Сағақтың ұшымен буыршынды қақ маңдайдан оскылады кеп.

— Әй! — деді Жанбасқан. — Аузыңа тыным болмады ғой, соры қайнаған! Ең болмаса ауылнай деген атыңнан ұялсаңшы!

— Тұт-ақ! — деді Шәріп. — Ол ақылыңды мына буыршынға айт! “Ауылнай” деп сыйламай тұрған! Пай-Пай, ақылды да айтады-ау, заңғардың қатыны!

От басын қоршап шүйкілдесіп отырған Шәріптің бір қора қызы сықылықтасып күліп жіберді.

Асау буыршынды шөгеруге қолы қарулы Бұлыш келіп болысып, Шәріп жаман үйдің шоқпытын екі түйе, бір атқа жүктеп болғанша ауылдың бүкіл көші жолға шығып, иіріліп тұр еді.

— Ой, шошканың төлі-ой!! — деп қояды өзінен-өзі Шәріп.

Мезгіл сәске түс. Күн көзі бұлыңғыр. Бозамық, сам-соз аспан ақ қар шымқанған сұлқ даламен ұзай барып астасып жатыр. Бірыңғай ақжабын әлемнің

ортасында қазір алажабыр иірілген көш. Жүріп кете алмай тұр.

Бума ағашты сүйретіп көш бастайды деген Шойынқара қикандап жетекке жүрер емес. Жұрт назары сонда. Бұлыш ашуға мініп қикар нарды қақ бастан камшымен тартты. Бірақ Шойынқара басын шайқап сілкіді де қасарысып тұра берді.

— Ұрма! Ұсылып табуға керек! — деп Пахраддин желдірмелетіп Шойынқараны қапталдай берді.

— Бұл пәтшағарға бірнәрсе көрінулі, — деп Бұлыш аң-таң.

Қойдың шуынан дүние азан-қазан. Қарға омбылап қарға адым жер жүре алмай, маңырай береді. Қойшы байғұстар ешкі, серкелерді алға қуып әлек. Сонау қырдың басында Мажан бай ауылы да пері көшкендей ығы-жығы. Үйлерін жығып жүктерін артып жатыр.

Қарды ашып жол салады деген нар жүре түседі де тісін қайрап, кейін қарап өңкиіп тұрып алады. Жұрт қатты дағдарды. Түйенің қомында бастары қылқиып отырған кемпір-сампырлар Шойынқараны қарғайды. Әйелдер, қыз-келіншектер көш қапталында бір топ атты боп ошарылып тұр. Кер құнан мінген Хансұлу да солардың арасында. Басында түлкі тымақ, қара пүліш тысты тиін ішіктің белін жалпақ күміс белдікпен шарт буған.

— Уай, жасаған ие-ай! Пәле-жалаңнан сақтай гөр! — деп кемпір-шалдар сарнап уайым қылады. Күрт басталған биылғы қыстан шошиды. Мал аузына ілінетін шепті қар басып қалды. Қауырт көшіп құмға шығып кетпесе жұтаған деген осы.

Пахраддиннің даурыққан үні шықты.

— Тұу, пәдеріңе нәлет! Мына кәрі қыртыңның пиғылын ұқтым! — деп екі иығы селкілдеп күлді. — Уай, жігіттер! Анау келені алға шығарыңдар! Барлық гәп сонда!

Жігіттер көш соңында иірілген үйір түйені сүргітіп қуып, көш алдына шығарды.

Қабак жүні салбыраған Шойынқара түксиіп сидаң-сидаң желген ши борбай аруана, інген, мая, құнаншаларға сүзіле қарайды. Бұл Шойынқараның үйірі еді. Сарыжазықты бойлап ұлан жаз шиырып айдап жүретін өз үйірі. Танауына жұмсақ үйіріліп күлімсі аруана исі келеді. Алпауыт нардың үйдей көкірек түкпірінде шым-шымдап бір зор гүркіл бас көтерді. Шыңғыртып азу қайрады. Ашулы бүркіт көзі бір жарқыл ұшқын шашып күпшек санын құйрығымен қамшылады. Бұл — іште булыққан өмірпаз тұма күштің, көп ұзамай жанартаудай сыртқа тебер жігердің дүмпуі еді.

Шойынқара жауар бұлттай түнеріп келенің соңынан жардай құлап ұмтылды. Шөккен түйедей дүңкиген бума ағашты бұйым құрлы көрмей сүйрей кетті. Қалың оппа қардың таңы айырылып қос қапталға жарыла құлап жатыр. Ұйлыққан қалың көштің маңдай алдынан ұзынша көшеленіп жол шықты. Жұрт у-шу. Күлкі.

— Құдай тас төбеңнен ұрсын, Шойынқара!

— Шойынқара! Шойынқараның ойын қара!

— Ұялсайшы, қартайғанда! — деп әйелдер жағы беттерін сызды.

Көш тізіліп шұбырып Шойынқараның ізіне түсті. Көш соңынан үйір-үйір жылқы, одан кейін ай мүйізді қоңыраулы серкелер бастаған қора-қора қой шулап-маңырап ілесті. Өстіп жарты айлық жолы бар, сонау ит арқасы қияндағы жылы жақ, сексеуілді, түлейлі күм — Ұлы Самға мыңғырған малды ауыл ырғалып-жырғалып қатар түзеп қозғалды.

Бүткіл тіршілігін ақ кебіндей сіреу астына жасырып, салқын томсарған ұшан-теңіз қарлы дала айдынында сүйретілген ала жіптей жіңішке шұбатылып қоңы-

раулатып іркіс-тіркіс көш барады. Қыстауға бет алған малды ауыл.

2

Сүйменшот, күрек, кетпендерін бөктерген бір топ салт атты сар желіп, көштен сәске түсте-ақ ұзап озып кеткен. Қазір түс ауған. Аттарын қара тер етіп әлі сол екпінмен салдыртып келеді. Торы шолағы зірк-зірк желіп, ызғытқан топқа әрең ілесіп Шеге келеді. Өңгіме-қалжыңды судай сапырып даурыға желген топтан көңіл-күйі де бөлек. Қабағы жабық. Үні шықпайды. Мана Пахраддин он-он бес жігітті көштен бөліп алып ауыл түнейтін көңге ертерек жетіп үй тігетін, мал жататын орынның тоңын ойып, қарын аршуға Бұлыш, Өзберген бастаған топты аттандырған. Сол арада Мажан көші тұстан алқын-жұлқын Ждақай шауып жеткені бар.

— Рас па, қасқа бала?— деді, иегімен Қозбағарды нұсқап.

— Рас, — деді, сөйлеуге зауқы жоқ Шеге теріс айнала беріп.

— Қасқайтқан екен! — деді Ждақай. Бұны аяп мүсіркей қарады. Шеге атын тебініп шаба жөнелді. Ждақай соңынан:

— Алып қаш, әйтпесе, әкесінің көрін! Өзім көмектесем!..— деп айқайлады.

“Алып, қаш!” дейді. Алып қашатын қыз ба еді ол?

Ат сауырын желге беріп сар желген топтың ішінде Қозбағар да келеді. Тақымында Пахраддиннің бір жүрдек жирені. Кеше малай еді. Бүгін Пахраддинге күйеу болып кісімси қалған.

Ат аяғына оратылып қуалай соққан ызғу жел. Шалғайынды қаққылап, сумаңдап, қойны-қонышына кіреді.

Көңге ұлы бесін шамасында жетті. Жайпақ дала төсінде бұлтиып тұрған домалақ төбенің түстік ықтасын жағы атамзаманнан алыс қыстауға көшкен ел түнеп өтіп жүрген көң еді. Қазір қар астында жатыр. Жігіттер аттарынан сатыр-сұтыр түсе калып іске қауырт кірісті. Жұмыстың ең ауыры — тоң ою. Үй тігетін, ірі қара байланатын жерлердің тоңын оюға Бұлыш, Әзберген сияқты жеті-сегіз қарулы сақа жігіттер кірісіп, қой жататын көңнің қарын аршуға Шеге, Қозбағар тәрізді бозбалалар қалды. Содан бұлар ақ тер, қара терлері шығып, күн батқанша тынбастан сілтеді.

Күн ұясына қона теріскей қабақтан шұбатылып қоңыраулатқан көш көрінді. Көш алдында — шоқтығы қарауытқан Шойынқара. Жалпақ елге жол ашып келеді.

Екі кештің арасында дүниені азан-қазан шуға толтырып ауылдың алды келіп көңге түйелерін шөгере бастады. Меңіреу жатқан суық өлке қапелімде жанданып сала берді. Қары аршылған көңнің нақ ортасында бу бурқырап алшайып Шойынқара тұр. Беліндегі арқанды жігіттер алас-қапас шешіп жатыр. Танауы шуылдап төңірекке бніктен көз тастап алпамсадай алшайып тұрған бураның омырау, шабы ақ-көбік тер. Сүйретілген шуда ішінен де тер сорғалайды.

Жұрт батар күнмен таласып жүріп тоңы аршылған орындарға қамашаулап жаппаларын тікті. Малдарын байлап, сауын сауды. Түйеге артып келген тезек, отындарын жағып қазан көтерді. Керегенің басын жауып қалқайтқан жаппа күркелерінде тығылысып отырып ысымақ ішті. Шайдан кейін маңдайының қырыс-тырысы жазылып көңілі жошыған Шәрін кеудесіне кішкентай қызын отырғызып, тар күркенің төрінде шалжиып жатып әу деп те жіберді. Бір кезде

селқос отырған Шегеге көзі түсіп кетіп, жатқан жерінен басын көтеріп алды. Сирек жирен мұрты тікірейіп:

— Ау! — деді. — Ау, сақалды байтөбет! Бері кара! Саған айтып отырмын!

Шәріптің күрке толы қыздары сықылықтасып күлді. Шеге мойнын бұрды. Бірақ үн жоқ. Кішкентай өткір көзінде бір ызғар бар.

— Ау, заңғардың баласы! Ау, салың суға неғып кетіп жүр сенің? Ал айт! Не көрінді?

— Ештеңе көрінген жоқ, — деді Шеге беті бүлк етпестен.

— Тұу, бәдбақ! Бізді алдағысы келеді. Сөйле тыңдайық!

— Әй, жайыңа отыршы! Нең бар қарап отырған балада?— деп жалт қарады қазан-ошак, жақта күйбендеп жатқан Жайбасқан.

— Қарап отырмаймын! Ау, бұны жұрт бір үйдің сойталдай азаматы дейді. Тыңдайық арызын! Неге кілтиеді екен?

Сол арада кішкентай Гүлжан жұлып алғандай:

— Сен жамансың! — деді сұқ саусағын шошайтып әкесіне. — Хансұлуды неге бересің Қозбағарға! Шеге ағам Хансұлуды жақсы көреді... білдің бе?

Шақыратып қазан қырып жатқан Жайбасқанның қолынан қырғышы түсіп кетті. Шәріптің де шапыраш көзі алақандай болды. Шай құйып отырған Балжан үркіп, тартынып қалды.

— Жап аузыңды!! — деп Шеге қарындасына ақырды. Гүлжан кішкентай алақанымен аузын жаба қойды.

Шәріп ешкі құйрық сакалын тұтамдап, әйеліне қарап басын біраз изендетті. “Көріп отырсың ба?” дегендей. Әлден соң Шегеге бұрылып:

— Пәтшағар... Білдік кеселіңнің төркінін... — деді сол басын изендеткен күйі.

Шегенің осы жерде шыдамы бітіп еді. Талағы тарс айрылды.

— Не білдің! Түк те білген жоқсың! Біреуді біреуге зорлап қосып, заңға қарсы қылмыс жасап отырсың! Сол сенің білгенің! — деп Шеге ыршып тұрды.

— Әй, шошқа асыраған иттің төлі! Отыр, әкірендемей!— деді, Шәріп те ашу шақырып. Бірақ дауысы бәсең шықты. Шеге әлі шакшиып тұр. Жігіт болып қалыпты-ау өзі.

— Отырмаймын! Кетемін! Керегі жоқ бұйткен...— деп, булығып есікке ұмтылып еді, шешесі алдын кескестеді.

— Әй, отыр! Бұрқырамай! Көрмей жүрген әкен емес қой!

— “Зәкүнді бұздың” дейді. Тұт-ақ! Үрді-ақ. Ой, ит-ой! Сонда бұл зәкүнді менен көп білеме-ай? Баласы әкесінен керкуіш үйреткен, ой-хой, кер заман-ай! — деп, Шәріп көзін жұмып, түңіліп бас шайқады.

Азынап жел тұрыпты. Сыртта ер-азаматтардың қауқауласқан үндері естіледі. Сол күні жұрт түнімен ұйқы көрмеді. Майда мал жатқан қоңның жел жағын қоршап ши ұстады. Түйелердің жел жағын айналдыра аққала тұрғызды. Таң алакеуең сәуле берісімен, жаппалардың төбесінен түтін будақтап, апыл-ғұпыл астарын ішті. Сықырлаған сары аязды таңмен таласа жүріп, жүктерін тиеді. Түнімен беймаза уіл енді сүлк жатқан ақжабын суық дала шетінде талауранып күн де көрінді.

Аязды, сіреу қарды шиқылдатып басып көш келеді. Сықай жүк тиелген шойтабан нарлар үскірік, ызғырық сияқты қыс қияпаттарын қаперге де ілер

емес. Алшаң-алшаң басады. Киіз қоршау ішінде ақ жаулықтары ағараңдап түйе ырғағына итендей түсіп, кәрі шешелер келеді. Жылы киініп, жарау аттар мінген жігіттер, келіншектер жағында әзіл-қалжың, ду-дабыр. Кешелі бері тістеріне талшық, тимей шұбырумен келе жатқан қой-ешкінің шуылы бүгін үдей түскен.

Көш алдында майда бүлкілмен желістеген бір топ түйе. Ізін ала бума ағашты сүйретіп шоқыдай айдыны шыққан — Шойынқара. Тондай қатқан сіреу қарды сендей бұзып екі айырып дүйім көшке жол ашып келеді. Томар аяқ, күпшек сан алып түлға Шойынқараның аш белі қаншырдай қатса да танауы шуылдап, суық жанары от шашады. Қар күміс шаңдатып, бауырында бүрк-бүрк етеді. Жігіттер жол-жөнекей қарды аршып баялыш, жусан шауып әкеп нардың аузына тосады. Аш бура орып асайды.

Тағы, арада үш түнеп, төртінші күні көш Көлтабан арқылы Үстіртке көтерілді. Аш, арық-тұрық талай қой-ешкі бұратылып жолда қалды. Үстірттің тақтай жазығымен салдыртып отырып, көш араға апта салып Өкім-Қиықтың сорына құлап, екінші апта Самның құмына да тұяқ іліктірді. Құмның қары жұқа, шөбі қалың еді.

Көзі қарауытқан мал қалқиған бұта көрінсе ұлардай шулап қасқырша қаптайды.

Ауыл сексеуілді қалың түлейге ішкерілей кіріп жыл сайынғы қыстап жүрген көнді ықтасынды жылы қорасына қонды.

Хансұлу үшін қыстың көңілсіз, сұрқай күндері басталды. Мандайынан кісі шертіп көрмеген ерке қыз басына түскен жайды сазарып үнсіз көтерді. Әкесіне “Неге өйттің?” деп тіс жармады. “Көке” деп еркелеуін

доғарды. “Бұның не?” деген әкесі де болған жоқ. Басы катып жүргені басқа нәрсе. Кеш болса, Әзберген екеуі оңашаланып алып керілдеседі де отырады. Ауғанстан, Иран дегендерді жиі айтады. Шешесінде үн жоқ. Қыстауға қонысымен бұның жасауын дайындауға кірісті. Ертелі-кеш қол мәшинесын зырзыр бұрап тігін тігеді де отырады.

Қыс кеші бүгін де ерте түсті. Әлі шам жағылмаған бейуақ еді. Үй іші ала көлеңке. Ортада үш бұт темір ошаққа асылған қазан. Исі бүркырап бүлкіп қайнаған соғымның еті. Қазан астында қоздаған шок. Сол оттан көзін айырмай, Хансұлу тыңқылдатып домбыра шертіп отырған. Бір түпсіз ой тұңғиығына бойлаған. Баяу қоңырлаған бейбақ домбыра, қаяулы қыз жанының жалғыз мұңшысындай күрсіне өксіп кейуана гөй-гөйлейді.

Сырға бәйбіше тігін мәшинесының құлағын бұрауын доғарып жайлап түрегеп босаға жақтағы шамды жақты. Сұлу тұлғалы биязы мінез шешесі көлеңкедей жылжып тысырсыз қозғалады. Мына кешкі бейуақта домбырамен оңаша сырласқан қызының көңіл шырқын бұзғысы келмейді. Үй ішіндегі зілмауыр тыныштықты ауылдың арғы шетінен естілген шаң-шұң айқай бұзды. Сырға бәйбіше селт етіп сыртқа құлақ түрді. Хансұлу шапшаң қозғалып, сыртқа шыкса ауыл ортасында лаулап жанған отқа көзі түсті. Жұрт төбе етіп үйілген қардың жел жағына сексеуіл өртеп, шыршыр* жасап жатыр екен. Әрігеректе жайдақ тайға мініп екпіндеген Ждақай. Даурығып, қырға қарай жүгірген Шәріпті айнала шабады. Әлгі айқай соңікі екен. Жұрт шыршырды тастай сап ауыл артындағы қырға ұмтылды. Хансұлу да жүгірді. Ең

* Шыршыр — от жағып, қар ерітіп, ауыз су алу.

алдымен коргені Мажанның қыстауы тұстан жүгіріп келе жатқан әйел. Оны өкшелей қуып қамшының астына алып сабаған түлкі тымақты кісі. Әйелдің — Балқия екені, еркектің — Мажан екені әбзаматта қыр үстіндегі жұртқа аян болды. Балқияның шашы жайылып кеткен. Ішігінің етегі далақтап қарға сүріне аттап келеді. Екі қолымен басын қорғалайды. Қамшыдан басын, бетін қорғаштай береді. Мажан ұрып келеді.

— Өй, өлтіреме-ей қайтеді!

— Жын қаққан шығар мына шалды!

— Еркелігін көтермейді екен, уыздай жасты алып несі бар? — десіп, қыр үстіндегі жұрт гүлдесіп кетті.

Сөйткенше, жүгіріп келе жатқан келіншек ат қағып омақаса құлады. Балқияны арашалауға ұмтылған жұрттың алдында тайымен жалбақтап шапқан Ждақай, одан кейін қатты ұмтылып жаяу Бұлыш мерген барады. Жүгіріп кеп Балқияның қолтығынан сүйей берген Бұлышқа да қамшы сілтеді Мажан.

— Жә, жетулі! — деп түтігіп кеткен Бұлыш созыла түсіп, шалдың қолынан қамшысын жұлып алды да сабын қақ бөліп, лақтырып жіберді. Мажанның бетіндегі қара қалға шыққан жалғыз қыл да тікірейіп кеткен екен. Тоқалына соңғы рет ақырып:

— Ал баратын өкіметіңе бар! ! Әй, бұзылған, атаңа нәлет! — деді де сары жорғасының басын кейін шапшаң бұрып, тайпалта жонелді.

Екі ауыл арасын шұбарлап өрістен қайтқан мал келе жатыр еді. Малдың соңындағы қойшы, түйешілер де екі кештің арасында болған мына уақиғаға елендесіп шауып келеді.

Аяғын әрең басып солықтаған орта бойлы дембелше Балқияны Бұлыш қолтығынан сүйеп келеді. Хансүлу топ ішінен бөлініп келіншектің екінші қолтығынан

демеді. Шәріп шоқша сақалын саумалап, анадай жерде дағдарып ойланып тұр. Қасына жаман тайын сабалап Ждақай жетіп келді. Көзінде жас.

— Шәріп аға! — деп келе айқай салды. — Қасқитыңызшы әлгі байды! Өкімет екеніңіз рас болса! Шәріп аға! Өкесінің көрін...

Дегенде көз жасы ыршып кетін, Ждақай аулына қарай тайын төпелей жөнелді.

— Ау, өкімет дегенмен... ау, әйелін ұрмайтын адам бола ма? Ау!— деп, жұртқа естірте сөйлеген Шәріп ешкі күйрек сақалын тұтамдай берді. — Ау, ойланып көрейік... Әйеліне қол қотерген жұрттың бәрін айдата берсек, ау, бұл ауылда еркек қалмас!

Балқияның әдемі ақсары жүзіне екі жерден қамшының ізі түсіпті. Төмен қарап көз жасын үнсіз шұбыртып, Бұлыштың қолтығына сүйене түсіп келеді. Ожет сұлу Балқия жас Хансұлудың көзіне ор мінезді еркін тұлғадай көрінетін. Енді міне, сол тәкаппар еркін сылқым Балқия, кісінің қоры боп келе жатыр. Өксігін баса алмай солқ-солқ етеді. Балқияны аяғаннан Хансұлудың да көзіне жас айналды. Мажанға, сол сияқты топас жандарға деген ашу-ыза қысты көкірегі.

Бұлыштың үйіне жақындай бергенде, Дәу-апанын ашық зор үні естілді. Қапсағай қара кемпір қолында таяғы, жұлым үйінің алдында сорайып тұр екен.

— Әй, балам! — деді дауысы, өктем де қатқыл. — Оз сорым өзіме жетеді, менің түге! Дауды шешетін өкіметіңнің үйі анау ар жағында! Сонда алып бар, түге! Өкелме бұнда!

Бұлыш бебеу қағып:

— Апа-ау... — дей беріп еді, қара кемпір “жә!” деп таяғымен жасқап тастады.

— Жә! Сөзді доғар! Комейің белгілі! Айтқанды істе!— деді, әңгімені шарт кесіп.

— Бұлыш! — деді, сол арада Балқия енді есін жинағандай. — Өкіметтің де, өзгенің де керегі жоқ. Маған еліме жететін көлік керек.

— Түн болды ғой... Балым! — деп, көмірқара Бұлыш шарасы таусылып жан-жағына қарады. Хансұлу Бұлышты аяп кетті. Бұлыштың бұрынғы өлген әйелі Хансұлуларға жамағайын болып келетін. Содан бұл Бұлышты “жезде” деп ойнайтын.

Ымырт үйіріліп қалған шақ еді. Қой келіп, ит үріп ауыл үсті азан-қазан. Қой қоралап, түйе байлап жүрт сапырылысып сыртта жүрген.

— Жезде! — деді, Хансұлу Бұлыштың алдына тұра қалып. — Біздің үйге-ақ жүрсін! Біздің үйде-ақ түнеп шықсын!

Әкесі үйде жоқ еді, “Барак ата” басына мінәжат етуге кеткен.

Балқияны Пахраддин үйіне дейін шығарып салып тұрып Бұлыш есік алдында әлдене деп күбір етті. Балқия үнсіз бас изеді. Хансұлу бұлардың не айтқанын ұқпай қалды.

Балқияны Пахраддин үйіне кіргізіп, кейін қайтты Бұлыш. Атын тұсап, ауыл сыртындағы қорыққа жіберіп, үйіне содан кейін ғана кірді. Қауашадай үйіші ала қиғаш түтін. Босаға тұста сығырайған май шам. Өлеусіреген жарығын түтін буып тұр. Үй салқындап кетіпті. Өңкиген шешесі жаулығы бозарып жер ошаққа еңкейіп шоқты үрлеп жатыр. Сексеуіл шала одан сайын быкси түседі. Түтіні көзді ашытады.

— Әдіра қалғыр, мана Сырға келіннің үйінен бір шала әкеліп едім, түге, әлгі тоқалдың алағадасымен жүргенде өшіп қалыпты... — дейді шешесі.

— Көне, былай тұршы, — деп, Бұлыш отқа еңкейе түсіп түтіні будақтаған шаланы көрікше үрледі. Жалын лау етті. Үй іші жадырап, жарқырап сала берді.

— Әй, апа-ай, өзің от жаға алмай жүріп табалдырығыңды аттаулы тұрған келінді қайырасың! — деді, Бұлыш әзілге басып.

— Қой, әй! Шатпа, өйтіп! Біреу уыздай қызын берем деп отырғанда нең бар түге, біреудің некелі қатынында? Тантыма, өйтіп!

— Ой, апа-ай! — деп, Бұлыш тулаққа жантая кетті.

— Әкел, анау Жаулыбайдың қызын, он екіде бір гүлі ашылмаған бала!

— Ой, апа-ай! Қойшы!

Шайды тоң-торыс күйде отырып ішті.

Шаруа ауыл кешкі астан кейін тез жататын әдеті. Бүгін де сөйтті.

Көп ұзамай бытпылдық құмдардың ар жағынан толықсып ай туды. Сексеуілді қалың түлейдің басын қозғап уілдеп арқадан жел есті. Қора қорып маңқылдаған жүндес төбеттер дауыстары өшіп, ықта-сынды жылы қуыстарға боксе тығып, бүрісіп ұйқыға кетті. Алыстан ауылды торып қасқырлар жортты. Аязды түнгі ауыл ұйқыға толық енген шақ. Қыстаудың алды жағы түйе жасырғандай ұйысқан ну сексеуіл. Соның кіре беріс тасасында Бұлыш тұрғалы бірсыпыра уақыт. Ай жылжып шекеге келді. Әлден уақытта үлкен ақ боз үйдің есігі болар-болмас қозғалып ысырылып бір көлеңке бөлінді. Көлеңке сексеуіл арасына қарай жылжыды. Бұлыш тынысы үзіліп, бұта арасынан сығалады. Ішік жамылып баяу басып келе жатқан жас әйелдің шағын сұлбасы. Басында ақ шарқаты, ішіктің жағасын қос қолымен қымтай ұстап келе жатқан Балқия.

Бұлыш сексеуіл тасасынан шықты. Балқия ай сәулесі түсіп тұрған ақшанқан қарлы алаңмен келеді. Жымиып күліп келеді. Озінің кәдуілгі мол сәулелі әсем миық күлкісі.

Байпақ етік, малақай, қалың күпілі Бұлыш, еркелеп кеп кеудесіне маңдайын сүйеген келіншекті ебедейсіз құшақтап жып-жылы шарқатынан иіскеп, самайынан сүйді.

— Әрірек кетейікші!.. — деп сыбыр етті Балқия. Аспан таза. Толық айдың ақшаңқан сәулесі қарлы төңіректі сүт жарық етіп тұр. Аяқ басқан сайын қар сықырлайды. Аттам жер сайын ербиген сексеуіл. Шашын төгіп, ақ білектерін айға созған түн сұлуларындай. Немесе бұралып үнсіз билеген ақ балтыр қыздардай. Сексеуіл арасында үп еткен леп жоқ. Ықтасын. Бұта түптерінде ұйыған қалың көлеңке. Ай сәулесі үнсіз күйылған шағын алаңдар. Жан-жағы сексеуіл, алақандай оңаша жазыққа келіп іркілді екеуі.

— Кәні, көрсетші! — деп Бұлыш келіншектің бетін айға бұрып үңілді. Балқия көзін жұмып жас жуған дөңгелек жүзін айға тосты. Бірі — кең ақ маңдайынан ортасынан қиғаштап құлап сөл жақ бетін сызып, екіншісі — әдемі шолақ мұрны үстінен оймақ аузының оң жақ құйрығын баса түскен қамшы ізі.

— Тілмепті, тек сызып қана өтулі... Бұйым емес. Жазылып кетеді, — деп Бұлыш келіншектің жас жуған көзінен, қамшы тиген бетінен асығыс құшырланып сүйді. Балқия көзін сол ашпаған күйі:

— Арысым... — деп, ыстық тынысы бетін жалындай шарпып, ұмтылып кеп жабысты. Жігіттің қарын қысқан уысы бүркіт шеңгеліндей қап-қатты. Мытып барады. Құшақтары табысып, жалғыз тұлғаға айналып ай астында ұзақ тұрды. Шытқыл аяз. Мүлгіген мол сексеуілді түлей. Аяқ астында сықырлаған қар. Соның бәрі сезілмей, ыстық аптапты жазға айналып кеткендей.

— Не деулі? Неге ұрды?

— Құрысыншы... соны айтпашы... — деп жалбарынды Балкия.

— Талакпын демеді ме?

— Оны қайтпексің? Үйлене қояйын деп пе едің? Табалдырығыңды аттатуға шамаң келмей тұрып...

Бұлыш сөзден ұтылып, тосылды.

— Балым, — деді, әлден уақытта. — Мені сөге бермеші! Мен қайтсем де сені қор қылмаулы... Жаным бірге өзіңмен...

— Өйтін бірге болмай-ақ қойсын! — деп Балкия жігіттің құшақтай берген қолын серпіп тастады.

— Не істе дейсің маған? Шешемді көрдің ғой. Бетін қайтаруға Құдайдан қорқулымын. Төрт баласын жерге берген. Жетімдіктің, жесірліктің тақсыретін одан көп шегулі пенде жоқ. Сөйтіп жүріп мені өсірулі.

— Қырсық кемпір... — Балкия көз жасын сілкіп тастады. — Менің жазығым не еді?..

— Балым! Дұрысы, бұндайда сабыр етулі...

— ... Сен... сен сабыр етерсің-ау!.. Мен бейбақ... Бүкіл елге... — Балкия қыстығып көзінің жасын төкті. Бүгіле берген Балкияны Бұлыштың қарулы қолы көтеріп алды қос қолтықтан. Сөйтті де жігіт келіншектің шарасына жас толған тостағандай сұлу көзінен сүйді. Сол-ақ екен:

— Бұлышым! — деп өксік атқан көкірегі қаяулы Балкия ышқынып кеп Бұлыштың мойнына асылды да қарға шалқасынан тастады өзін. Оппа қардың үстіне екеуі ұмар-жұмар құлады. Бір-біріне ұмтылған қос жандай шарпысып суық дүниені ыстық сезімдерімен күйдіріп, жандырып буы бүркырап жатты екеуінің...

Хансұлу көзі ілініп кеткен екен. Әлден уақытта, бір бүйірі мұздап оянып кетсе, қасында жатқан Балқия жоқ. Орны бос жатыр. Ұйқысы шайдай ашылып, жүрегі дүрсілдеп қоя берді. Мана кешкісін Бұлыш есік алдында Балқияға әлдене дегені есіне түсті. Кең дүние, кенет, тарылып бір уыс болды. Хансұлу Бұлыш жездесін пайғамбардай сыйлайтын. От тілді осек Балқия мен Бұлышты бір-біріне таңып небір пәлемәтерлерді суша сапырып жататын. Ондайда Бұлышқа іші салқын тарта қалатын. Бірақ, былай шыға бере, тазысын ертіп қаннен-қаперсіз аңға кетіп бара жатқан Бұлышты көргенде әлгі есіткендерінің бәрін ұмытып, жездесінің батыр тұлғасына сырттай таңдана қарайтын. Сол сәт Бұлыш бұның көзіне қара қасқа атты Қамбардай елестейтін.

Есік сыбдырсыз ақырын ашылып ішке Балқия кірді. Шолпысы сылдыр етіп, майда басып төсекке жақындады. Қараңғы үйде тынысы ғана сезіліп, сырт киімін шешіп жатты. Хансұлу қыбыр етпей ұйықтаған боп жатыр. Балқия жылы көрпеге сырттың суығын ала кірді. Хансұлу Балқияның тынысынан қарлы түннің, сексеуілдің және Бұлыштың исін сезгендей болды. Балқия жастыққа басы тиісімен маужырап есінеп кең тыныс алды.

Танертең Бұлыш үйінің дастарқаны жиылмай жатып, есігін томпиған бір қара кісі ашты. Жұмсақ дауыспен жымыып күліп сәлем берді. Мажанның Жорға Күреңі екен. Бұлыш орнынан ұшып тұрып жасы үлкен кісінің қолын алды. Қонақ төрге озды. Бұл кісінің аты Күрең, Мажанға жамағайын болады. Мажанның оң қолы. Аздап сауаты бар, қала көрген, көзі қарақты. Мажанға ақылшы, кеңесші тәрізді жан.

Қала шыққанда байдың сауда-саттығын жасайтын да осы кісі. Соның арқасында қожалығы күйлі. Досқа да, дұшпанға да бірдей майда тіліне, үнемі жымсиып жүретін езу күлкісіне бола “Жорға Күрең” деген лақапқа ие болған кісі. Төрге шығып томпиып отырып Дәу апаға қарап сазды дауысын сырнайдай созып:

— Ие, жеңешетай! Ауыл іргелес десекте айда, жылда бір кореміз, күйлі қуаттысыз ба? Мал-жан аман ба?! — деді.

Қолында ожауы, қазандағы сүтті сапырып тұрған қара кемпір:

— Шүкір ғой, — дей салды. Емексіген Жорғаға оң пейіл бермеді. Жорға Күрең езу күлкісін жимастан енді Бұлышқа бұрылды.

— Ие, Бұлышжан! Қанжыған қанға майланып тұрма? Ие, биыл құмда киік көп, атқаның тиіп, қуғаныңа жетіп жатыр деп есітеміз...

Әрбір сөзді майпаздап сөйлейтін осы Жорғамен бетпе-бет келгенде қараптан-қарап отырып құты қашатын әдеті Бұлыштың. Қазір де арбиган күректей қолын қоярға жер таппай мазасы кете бастады. Соны сезген Дәу апа:

— Әй, Жорға, әңгіменді білтелемей, келген шаруанды айт, түге! — деп қойып қалды қапталдан.

— Түу, жеңеше-ай, кісінің көңіліне келеді деп те ойламайсыз-ау! Уа, келген шаруам былай, ендеше, жеңешетай! Кеше осында Мәжекем үйіндегі ерке жеңгем ат басын тіреген екен.

— Немене, бұл не сонда, түге, жұрттың қашқан-пысқан қатындары тұрақтайтын үйі болып па?

— Ойбай, жеңешетай, қойдым. Қойдым!

Кеше Жорға бас боп, ауылдың бүкіл бас көтергендері, балаңнан да кіші уыздай жас тоқалды, ізіне ерген азғантай сөзін көтермейтін болсаң, неге алдың

деп Мажанды қыспаққа алған-ды. Шынын айтқанда байғұс шал Балқиядан айрылғысы жоқ еді. Балаларының қот-қоттауымен сұлу тоқалын ауылдан қуарын қуып шыкса да, іші удай ашып отырған. Тоқалды қайтарып әкеліп беріндер деуге намысы құрғыр жібермей отырған. Жорға Күрең “Балқияны қайтаруды мен мойныма алайын” дегенде қуанып кетті. Тоқалының мінезі тіктеу еді, бір жібітсе енді тек осы Жорғаның тілі жібітер деп ойлады.

Ойлағандай-ақ, сәске түсте Жорға Күрең Балқияны алып, екі ауыл арасындағы құмсақ шағылдан бері асып келе жатты.

4

Хансұлудың ұзатылу тойының қамына әке-шешесі шындап кірісе бастады. Шешесі қыз жасауын дайындаумен, қат-қат көрпе-төсек ондаған пар киім-кешек тігумен ұзақ күнді кеш қылса, әкесі қыс ортасы ауа сонау Ойдағы Бесқалаға* базар шығатын болды. Тойдың керек-жарағын алуға базарға жарты үйір түйе, жылқы айдамақ Хансұлуға тігетін отауды да сол қарақалпақ елінен әкелмек.

Сақылдаған сары аязды, қыстың суық таңы. Бүгін әкесі жанына Әзберген, Бұлыш тәрізді сақа жігіттерді алып жол жүргелі жатыр. Хансұлу жылы киініп, қоржындарға жолазықтарды тықпаштап жатқан шешесін төңіректен көмектесіп жүрген. Сол екен, ауылдың желке тұсынан тағы да бір айқай шықты. Дәл әнеугүнгідей жаналқымға келген дауыс.

— Әй, бұл не айқай?

* Бесқала — бүгінгі Қарақалпақстанның қалаларын кезінде қыр казактары Бесқала атаған.

— Астапыралла! — десін, үйден әкесі бастаған жігіттер өре түрегеп сыртқа лап қойды. “Ойбай!”, “Өл-де-ем!” деп құлжадай өкірген дауыс құлында-құлыны шығып, таяп келеді қыр астынан. Келесі сәтте бүкіл ауылдың бас көтергені, қатын-қалашы түгел сыртта көрінді

— Әй, мынау әлгі түйеге кеткен Қозбағардың дауысы ғой!

— Сол! Соның дауысы! Ойбай, бура қуып келе ме деймін, өзін? Шойынқараның гүркілі естіледі!

Үйден дамбалшаң Шәрін жүгіре шықты. Шырылдап айқайлай шықты:

— Шойынқара ма! Уа, атаңа нәлет Шойынқара! Қырады ол, ойбай, қырады! Қолдарына құрық-сұрық ұстандар! — деп шапшаң үйіне қайта кіріп кетті. Киініп келуге кетсе керек.

Шойнандап, өзінен үлкен шоқпарды сүйретіп қырға қарай Торқа кемпір де барады.

— Олтірді ғой жалғызды, әдіраң қалғыр! Қайдасың, Уәп, қайдасың? — деп барады.

Сөйткенше:

— Өл-де-емм! — деп өкіріп, көлденең қыр үстіне атын сабалап алқын-жұлқын Қозбағар шауып шыға келді. Бас киімі түсіп қалған. Екі көзі артта. Бейне әзірейіл өкшелегендей, түсі әлем-тапырық. Ізінше қыр басына албастыдай ойнақшып Шойынқара шыға келді. Тапырақтап қарды бұрқа шашып екі иығын жұлып жеп, екпіндетіп келді де төбе үстінде шабынып тұра қалды. Бура “Айт!” “Қайт!” қиқу салып қарсы шыққан топ кісіні көрген еді. Шойынқара жыны ұстаған бақсыдай әлем-жәлем бұрқырап, бұтын сабап шиыршық атып зіркілдейді. Кәпірдің түсі тым бұзық.

Бақан-таяғы шошандаған жұрт шошып, серпіліп кейін қашты.

— О, көк тігілсін! — деп шоқпарын тастай сап шойнандай қашып Торқа кемпір барады. Қашқан жұрттың алдында зымғаған Шәріп қораға жетеқабыл тоқтай сап бұрылып, кош жердегі бураға құрық сілтеді. Бура талтайып тұрып гүркілдеп, езуінен қызыл өңешін лок-лок шығарды. Жұрт:

— Е, келеге келген екен ғой!

— Көрмейсің бе, бауырынан жарапты ғой!

— Е, бәсе!..

Енді бұл найсап жан жуытпас! — десіп, гу-гу етті.

5

Базаршылар Бесқаладан оралғаннан кейін бұл ауылда және бір әңгіме болды. Таң сыз бере Шырылдауық Шәріп жез құманын алып, дәрет алуға тысқа шыққан. Қараса Пахраддиннің ас үйіне жапсарлас отырған Әзберген үйінің орны жым-жылас. Дөңгеленіп жұрты жатыр. Кеште барды, бүгін таңда зым-зия жоқ. Көшіп кеткен. Қашып кеткен. Осы ауыл үшін өкімет алдында жауап беретін Шырылдауық Шәріп өз көзіне өзі сенбей сілейді де қалды. Қолындағы су толы жез құманы жерге түсіп кеткенде барып селк етті.

— Әй, кіспұрыш! Әй, контра! Әй, қылдың-ау қылықты! Әй, тұра түр! — деп ащы дауысы шығып дедектеп қыр басына жүгірді. Жан-жаққа қарады. Таң қараңғысында алыс жақын сексеуілдің бәрі Әзбергеннің көшіндей елестеді. Бүкіл ауылды аяғынан тік тұрғызып, Шәріп торы атқа міне шапты. Жайдақ міне шауып еді, бел аспай құйрығын алдырып атын жетектеп кейін қайтты. Ұйықтап жатқан Шегені жүлмалап оятып Көксеңгірдегі болыстың кеңес ағасына

шаптырды. Содан, қылышын саландатып түс қайта Бұқарбай мелиса келді. Ол да ауылды айналып олай бір шауып, бұлай бір шауып: “Өздеріңе со керек өткен жолы көзін құрта салу керек еді, енді міне, бандит боп кетті” деп, қабағын шытты. Жұрт үрпиісіп Бұқарбай мелисаның аузына қарады. Бұқарбай мелиса “ініңді қашырған сенсін!” деп Пахраддинді бүре тықсырып бара жатыр еді, Шәріп шыр-пыр боп араша түсті. Жазықсыз Пахраддинді күйдірмеді.

Содан көп ұзамай түстіктен қызыл жел соғып, күн жылып, қар шұрқ тесілді. Құралайдың салқыны өте қойлар төгіп қоздай бастады. Шаруа ауыл үшін сүріне аттап жүгіретін төлдің ең бір қауырт, қарбалас айы басталды. Мал нобайлап туып, қозы аяқтана бастасымен, Самды қыстаған қалың ел қозғалып ақырын жылжып сонау ит арқасы қиян теріскейдегі жаз жайлауы — Жем бойына қарай лықсыды. Жұрт қыс басындағыдай тізіле шұбырып емес, ендеп қанатын кең жайып, жапа-тармағай көшіп келеді. Қыстағыдай итініп асықпайды да. Қой қозыларын ысырып айдап жайып, жылқы түйелерін қара-құрым өрістете қаптатып асықпай көшеді. Қозылы қойдың маңырағаны, шопан салған әнге ұласып жасыл алқапта алабажақ қозғалған көштің сәнін келтіреді. Жүк тиелген балпаң басқан нарлар. Түйе ырғағына бір қалып сыңғырлаған жез қоңырау үндері. Нар үстіндегі кемпір, бала-шағалар, көш жетектеген атты келіншектер, қапталдаса жорытқан топ атты бозбала, бойжеткендер — түгел көңілді. Жүздерінде кең жайлау жазды сағынған, ойын-тойлы дырдулы өмірге асыққан, құлшынған іңкәр рай. Алдарында — көшпелі елдің арқасын кеңге салып сайраңдайтын ұзын сонар сары жазы. Мол тойлы, ойын-күлкілі, әсем айлы түнді, ыстық сезімге толы думанды қызық жаз.

Сол жазға, өміріндегі тұңғыш зобалаң жазға асықпай келе жатқан — жалғыз Хансұлу. Анау жылқы қуып даурыққан Қозбағардың күлкісін естіген сайын қабағы шытыла түседі. Қозбағар байғұс бүгінде Пахраддиннің шаруасы дегенде төбесімен жорғалауға бар. Бірақ Хансұлудың көңілі одан сайын жылымақ тұрмақ, түршігіп мұздай түседі. Қозбағарға өлсем тимеспін деп Хансұлу іштей серт жасап тастай бекінген.

Сынуға бар, бірақ иілуге жоқ, тік мінез қыз іштей солай қасарысқан.

Артқа бір апта салып көшкен ел Балғаның жазығына құлады. Сіркіреген селдір ақ жаңбыр таң атқалы үзбей себездеп тұрған. Жаңбыр шайған жусанды, бұйырғынды тегіс дала тазарып жасарып бояуы ашылған жасыл кілемдей құлпырады. Тыныс кеңейтіп райыс лебі еседі... Қой-ешкісі маңырап, қозы-лағы дүркіреп шауып, бота-тайлағы қоңыраулатып ойнақ салған бұл көңілді көш дүрмектің ішінде көңілсіз тағы бір жан келеді. Ол — Шеге. Екі жағы суалып, сылынып арықтаған сылыңғыр арық қара Шеге еді. Әкесі мен екеуі үйдің 30–40 ұсақ жандығын айдап көш сонында ілбиді.

Қонып-көшіп, малдарын жайып айдап, қоңыраулатыш көш келеді. Ойын-сауығы, қайғы-мұңы, өзіл-қалжыңы аралас. Жол ұзақ. Атам заманнан үйренген тірлік. Үйренген жол. Жер от. Аяқ басқан сайын көлкіген су. Су төңіректеп отырған ала қаз, үйрек. Көкке ауызы іліккен мал да қунақ. Шаруаға да керегі сол. Жұрт райы ашық. Мынау бүкіл бояуын сыртына теуіп, қызыл-жасыл жасанған жазғытұрғы даладай жұрттың түр-түсінде де соны түлеу бар.

Ырду-дырду көш артқа және екі апта салып, ауылдың жаз жайлауы Түгіскен көлінің түстік жағына

жетіп іркілді. Айға жуық ауыл-аймақ, бота-тайлағымен қона жастанып көшкен ел бейне бір думанды саяхатты бастан кешкендей бір сілкініп түлеп еді.

Жан-жағы тегіс ортада айнадай жалтырап жатқан көлдің түстік жағалауы — қалың изені мен жусаны, күйреуігі мен кодесі көлкіген жасыл жон. Ауыл сонда қонып жатыр. Бесінде жүктерін түсіріп керегелерін қалқитқан ауыл, кешкі күн сонау Хантөрткіл төбеден әрі асып ұясына шөккенде қатар-қатар тізілтіп үйлерін тігіп те тастаған еді. Сол қатардың ортасында кеседей төңкерілген ақшаңқан үлкен ақ боз үй тұр. Ол — Пахраддиннің өз үйі, оң жағындағы ақ отау — Хансұлуға арнап тіккен, қыста Бесқаладан әкелген жаңа отауы еді.

Үйлердің алдында жер ошақтар қазылып жылт-жылт оттар жанады. Қазықтар қағылып, желілер тартылған. Мал жайланып, түйе, биелер сауылып, ауылдың кешкі апақ-сапақ қарбалас тірлігі іңір шапағы семгенше толастамады.

Түс әлеті еді. Ждақай мен Шеге көлдің құсын дүрліктіріп жыңғылды жағалауда үйрек атып жүрген. Ел жайлауға қонғалы бергі екі достын оңаша кездескені осы. Ә дегенде Ждақайдың оң қабағындағы көкталақ ісікті көріп Шеге шошып кетті.

— Қызталақ... Мажанның балаларының істегені,— деп иығын қикаң еткізді Ждақай. Аудан келгелі жатырғаны рас па? Байларды тұқымымен құртады деген рас па?

— “Аудан келмейді” Аудан құрылады, — деп, Ждақайдың қатесін түзетті Шеге. — Бұрынғы уезді байларға әлі келмейтін болғасын таратып, аудан жасайтын болыпты. Аудан шатақ дейді. Байларға:

“Жетеді осы он жыл еркелеткеніміз, енді табандарыңызды жалтыратыңыздар!” дейтін көрінеді.

— Е, бәсе, сөйтсе екен қасқан! “Қашан келеді жаңа өмір?” деп-ақ мойнымызды соза-соза өлетін болдық.

— Бізде ғана ғой. Әйтпесе қайда! Басқа жақта жаңа өмірді баяғыда бастаған, — деп, Шеге көп білетін кісіше маңғазданды.

— Шеге, әкең өкімет қой, есіттің бе, айырплан, мәшине қашан келеді біздің жаққа? — деп Ждақай Шегеге қарай итіне түсті. Шеге бір танауынан күле түсіп:

— Сен де айтасың-ау! Айырплан тұрмақ шайтанарбаны көріп алсақ болмай ма, алдымен! — деді.

— Әттең, мен өкімет болсам!!! — деп, Ждақай өкінштен көкірегі қарс айрылып шалқалап жата кетті. Шеге күлін жіберді.

— Ие, не істер ең сен өкімет болсаң? — деді, кекеп.

— Қалжыңы жоқ, мен өкімет болсам, біздің байларды “тарс-түрс” еткізер ем. Әкесінің... Аудан келгенше оларды бүйтіп алшандатып қоймас ем...

Ждақай мен Шеге күс атуды ұмытып әңгіменің қызығына түсіп кеткен. Ауыл жақтан Қаракер атын сыландатып келе жатқан Хансұлуды байқаған да жоқ.

Көз киығының қайқылау күйыршығына жас іркіліп Хансұлу жалғыз келе жатты. Әлгінде, үйіне ауылдың бас көтергендері жиналған. Ішінде Шырылдауық, Шәріп, ұзынтұра Уәп, Дәу апа, Бұлыш бар. Ақ түйесін желпілдете желдіріп Жылыбұлақтан Лабақ ахун да келді. Пахраддиннің қонақ үйі кісіге лық толды. Шешесі бұны ыммен сыртқа шақырып алды:

— Сұлутай, сен басқа үйге бара түр! — деді. Қабағында кейіс. Қыз жүрегі бір жаманатты сезді.

Желіде тықыршып тұрған Қаракеріне мініп, басының ауған жағына тартып отырды. Сөйткенше, ауылдан жирен қасқа мінген бір бала шауып шықты. Жандарынан сыдыртып өте берді.

— Әй, зәнталақ, тоқта! — деп, су жағасында жатқан жерінен бақырды Ждақай, — бері кел!

— Не? — деп желпініп алған бала атының басын әрең іркіп, көлге қарай бұрды. Жирен қасқаның танауы делдиген.

— Ой, қасқа бала, қайда шаптың, әлем-жәлемің шығып?

— Тойға шақыруға. Келесі сәрсенбінің сәтіне той, Пахраддин қызын ұзатады, — деп бала анадайдан айқайлап атына қайтадан қамшы басты.

— Мәссаған, қасқалдақ! — деді Ждақай козі атыздай боп, атын суарып тұрған Хансұлуға бір, өңі сұрланып кеткен Шегеге бір жалтақтап. Шеге өңі түтігіп томен қарады.

— Шеге, ал қасқа бала, енді не істейміз? Шынымен Қозбағарға кеткені ме Хансұлудың! Алып қашайық, әкесінің көрін! Көне ме өзі? Сүйеме өзі сені? — деп Ждақай едіреңдеп тұрып кетті орнынан.

Шегеде үн жоқ. Тістеніп алған. Назарымен жер шұқып, көзіне жас айналып отыр.

Жирен атты шабарман арқаға қарай жусанды, бетегелі тегіс даламен жұлдызша сызылып шаңдатып ұзап бара жатты.



МАЗАСЫЗ ЖАЗ

1

Мойға санаулы күн қалғанда құрбан айт басталды. Жұрт елең-алаңнан тұрып, қорадағы малдан соярлық бір-бір жандықтарын ұстап байлады. Күн шыға үйлердің алдында бықсып от тұтап, мал сойылып жатты. Жұрттың жүзінде — көтеріңкі рай. Жүрістері ширақ. Қимылдары шалт. Қазан, табак тазалап, бас-сирақ үйтіп ошақ басында жүйткіп жүрген әйелдер. Асық жинап үймелескен балалар. Анадайда сойылған малдың қан-жынына таласып иттер жатыр. Осының бәрі — айтқа дайындалған ескі ауылдың кәдуілгі қарбалас тірлігі. Жыл сайын зарықтырып бір келетін бұл айтқа қыстан әрең шыққан шаруа ауыл сағынып жеткен еді.

— Айт құтты болсын!

— Айтқаның келсін!

Бүгін барлық үйдің есігі ашық. Пейілдері кең. Дастарқандары жаюлы. Осыдан үш күн ұдай жиылмайды ол дастарқаны. Үш күн ұдай айттап қыдырушылар да толастамайды. Есігіңді кім ашса — сол қонағың. Бүгіндері жұрт ең таза киімдерін киеді. Кебеже, теңдер ашылып, дүние-мүлік, киім-кешек, кездеме маталар көрнекке ілінеді. Үй іші бай қызының жасауындай саусап жайнайды. От түтеткен үйге бас сұғу парыз. Бүгіндері жастар жағы, әсіресе, мәз-мейрам. Ата-ананың да қабағы ашық. Жастардың күні-түн ауыл, ел аралап, сауық-сайран жасауына тарлық жасамайды.

Түске таман Жем жақтан құйында-құйын шауып болыстық кеңес ағасының шабарманы келді. Аты ақ тер, көк тер, тура Шәріптің үйіне тұмсық тіреді. Содан әбзаматта ауыл іші жаңа хабарға толды да кетті. “Окіл келе жатыр екен”, “Ауданның бастығы екен”. Хабар дүңкілдеп алдымен естіген Шәріптің өзінен бұрын тарады ауылға. Кішкентай Шәріп аяғы маймаңдап үйден үйге жүгірді Болыстық кеңес ағасының бұйрығын әр үйге жеткізіп тызаттап ауыл арасында жортақ какты.

— Ау, халайық, ошақ бастарынды реттендер! Аудан басы келеді. Халықтың хал-күйін білуге келеді. Қамданыңдар! Ау!!!

— Құдай безгелдек, камданғанда не істейміз?— деді Торқа кемпір торсаңдап. — Жаз болса өкіл қаптап кетеді екен, түге, іннен шыққан суырдай.

— Әй, ондай сөзді қойыңдар! — деп Шәріп шыр ете түсті. — Бұл келе жатқан ойнайтын кісілерің емес сендердің!

— Ау, халайық, қамданыңдар! Жаңа басшы келеді! Қалаған есікті ашады? Қалаған үйіне түседі! Ау, халайық!— деп, үйден үйге жорытқан Шәріп, жұрттың бәрін әбігерге салып, дүрліктіріп жіберді. Пахраддиннің үйінің тұсына келіп бір тоқтады.

— Ал құда, сен де қамдан! Аудан басы келе жатқан көрінеді. Сенің үйіңе түсе ме, кім білсін! Бұл ауылда онды үй де жоқ...

— Оу, құда, қам жеме! Шүкір Алла, келуші қонақ болсын! Күтуші біз болайық! Саспа, асасы! — деді Пахраддин кеудесін шалқақ ұстап жалпақ алақанымен мұртын сылай түсіп.

— Озі орыс көрінеді. Елдің хал-күйімен таныса шыққан көрінеді.

— Е, мейлі де. Қам жеме, құда! — деді, Пахраддин Шәріптің арқасынан қағып жұбауратқан боп. Үйде Хансұлу жоқ еді, әлгінде жастарға ілесіп Көлқұдық жаққа айттап кеткен.

Шешесі, қызымның тойы болады деп қуаныш күтіп жүрген ол жоқ, сынық мінезді нәзік жан соңғы кездері мүлдем іштей ойсырап жүдеп кеткен. Пахраддин оны көрмей, білмей жүрген жоқ. Бірақ қайтсін. Заман бұларға сыртын берсе, не істемек? Шаңырағы ортасына түсіп, бала-шағасымен қаңғып кеткен байлар мен билер, жақсы мен жайсандар аз ба екен?

Мылтығы шошайған екі мелиса ерткен күткен қонақтары талма-тал түсте ауыл шетіне келіп аттарынан түсе бастады. Елден бұрын шәуілдеп ұмтылған иттерді Шәріп қолына таяқ ала қуып тоздырып жіберді. Сөйтіп, өзі майпандап келіп серек бойлы басына былғары кепка киген, иығына жамылған сүр кительді, ауылға шаршаған түрмен қабақ шыта қарап тұрған орыс жігітіне қос қолын ұсынды.

— Здрәсті! — деп дауысы шығыңқырап қалбалақтап сәлем берді. Бұған оң қолын ұсынған ұзын серек жігіт:

— Здравствуйте! — деп қоңыр дауыспен салқындау амандасты. Басшыны сырттан келген жас орыс жігіті деп естіп еді Шәкең. Қонақ Шәріпті танымай “бұның кім?” дегендей жанындағы көзәйнекті шұңкиген арық мосқалдау Апанасқа қарады. Апанасты Шәріп танитын. Апанас патшаның қысымымен осы елге Мекалайдың кезінде жер аударылып келген орыс. Темірде өкіметке дейін школда сабақ беріп, өкімет келгеннен кейін уезге қызметке ауысқан. Өткен жылы Губоно болды деп естіген. Қазір осы ауданға

РИК бастығы боп келе жатқан көрінеді. Озі қазақшаға судай. Апанас Шәріпті арқадан қағып:

— Жолдас Қаспақов дегеніміз осы кісі болады. Қазақша айтсақ Шәріп аға! — деп таныстырды.

— Да, Қаспақов, Қаспақов! — деп Шәріп күлегештеп бас шұлғыды. Содан кейін қабақ шытып тұрған бірінші бастық түсі жылып, бас изеді. Апанас қазақтың жалпақ тілімен:

— Ие, Шәріп аға! Қоныстарың құтты болсын! Айт құтты болсын! — деп ілтипат білдірді.

— Жаксы. Жаксы. Айтқаның келсін, Апанас! Қонақтардың қасында болыстық кеңес ағасы Дүкенбай, баяғы Шәріпті ауылнай ететін Асан деген тегі қырғыз өкіл жігіт, содан кейін екі мелиса бар еді. Оның бірі осы елден шыққан баяғы Әзбергенді айдап кететін палуан денелі Бұқарбай мелиса да, екіншісі Шәріпке бейтаныс қатпа, қара сұр жігіт еді. “Жекей” деп таныстырды оны Апанас.

Осы арада қонақтарға Пахраддин бастаған ауыл кісілер келіп сәлемдесті.

Апанас аудан басшысына Пахраддинді таныстырып жатыр.

— Семен Харитонович! Бұл кісі әлгі мен өзіңізге айтып келе жатқан Пахраддин мырза. Кеңес ісіне қыруар көмегін тигізген осы ауылдың ақсақалы. Ал бұл кісі, — деп Апанас келген бас қонаққа жұрттың назарын аударды. — Жаңа ашылып жатқан аудандық партия комитетінің бірінші хатшысы жолдас Калашников Семен Харитонович. Ел аралап шыққан бетіміз. Семен Харитонович қазақ арасында тұңғыш болуы. Сондықтан бұл елдің хал-күйін, тұрмысын, ауылдық жердегі кеңес ісінің барысын өз көзімен көріп жүр.

— Хош келіпсіздер! Көріңіздер! Аралаңыздар! Қонақ болыңыздар!— деді, Пахраддин орысша. Калашников Пахраддиннің кең иықты зор тұлғасына, бір шекесіне сырма тақия қондырған күнқақты ашық мандайына, әдемілеп дөңгелетіп бастырған көк бурыл сақал-мұртына, ойлы, инабатты дидарына назар іркіп тұр еді. Енді кеп бұ кулақтың орысша сөйлеп, әлгі айтқан жылы лебізі тіптен таң қалдырды.

— Пахраддин мырза орысша да сауатты екен ғой,— деді бас шайқап, жымыып.

— Нан сұрап жерлігіміз бар, жолдас басшы, — деді, Пахраддин мұртының ұшын ширатып.

— Ал жүріңіздер! Өздеріңізге арнап мына Пахраддин мырза дастарқан жайып қонақасы дайындап отыр! — деп Шәріп жортақтап қонақтардың алдына түсті Шәріптің ұсынысын Апанас орысшалап Калашниковке жеткізіп еді, ол “алдымен ауылды аралап көрейік” деді.

Калашников қай үйге бас сұқса да жайнатып керегеге іліп тастаған дүние, мүлік, зергерлік бұйымдар, әр түрлі аң терілері самсап алдынан шықты да отырды. Төрге тоселген оюлы текеметтер. Ілінген кілемдер. Қат-қат жиналған көрпе, төсек. Сүйек кебеже. Адалбақан. Кілемнен тоқылған кермелер. Бір жақ қапталда керілген жібек шымылдық. Үйдің босағасында түрегеп ысырылып ізет білдіріп тұрған әйелдер, қыздар. Бәрі малынып киінген. Білекте, саусақта, құлақта, шашбау да сылдырап, күлдіреген алтын, күміс, асыл тастар.

Ошақ басы таза. Жаюлы дастарқан. Калашников көрмеген бауырсақ, күрт, ірімшік, майсөк, жент тәрізді тағамдардан қайысып тұр әлгі дастарқандар.

— Кедейдің үйін көрсетіндерші маған!— деді Калашников.

— Әлгі кіріп шыққан үйіңіз кедейдің үйі, — деп жауап берді Шәріп. Ол кіргендері Бұлыштың үйі еді.

— Қанша малы бар?

— Ойбай, түгі жоқ тақыр кедей. 20—30 қой-ешкісі, ботасымен қосып есептегенде үш түйесі, жалғыз аты бар.

— Мырзаның қанша малы бар?

— Мырза малды азайтты ғой. Кезінде дәулетті еді. Өкіметке етке өткізді, сатты, сойды — бітірді ғой.

— Қалғаны қанша?

— Екі жүзге жуық қойы, қырық-елу жылқысы, оншақты түйесі қалды.

Калашников сөзге құлақ түре тұрып кездескен қыз-келіншектердің киім киісіне, жүріс-тұрысына қарайды.

Пахраддин қонақтарды ақ боз үйінің есігін өзі ашып кіргізді. Сыртта Бұқарбай меліса қалды.

Төрге өтіп отырған Калашников бейне бір музейге кіріп кеткендей ашық таңырқаулы еді. Әлгі бас сұққан үйлеріндегі байлық мына “мырзаның” үйіндегі сән-салтанатпен салыстырғанда қайыршының лашығындай екен. Бұл үйде жалғыз ғана малынған байлық емес, сырбаз талғам да байқалады. “Қу жапанда бұ не шіренген салтанат?” Оның үстіне “Бара жатқан жағың қазақ даласының ең бір артта қалған аймағы. Кеңес ісінің етек ала алмай, жандана алмай жатқан қаға беріс тұсы. Бәрін де нольден бастау керек” деп Казкрайком секретары Филипп Исаевич қоштасарда айтқан сөзі есінде.

Сырға бәйбіше сызылып басып, өз қолымен үлкен кара сабадан иісі бүркыраған сары қымыз құйды. Ортада тұрған жатаған дөңгелек стол үстіне бірнеше керсен толы қымыз келді. Пахраддин өз қолымен

екі шөлмек “чекушке” арақты ортаға қойды. Қонақтар су жаңа көлдей парсы кілемінің үстінде кең отырып асықпай қымыз сімірді.

— Чудесно! — деп бас шайқап қояды Калашников. Бірінші рет ішуі еді қымызды.

— Пахраддин мырзаның үйінде бәрі бар, байлық та бар, тамақ та көп, но, әйел аз көрінеді, ол неге? — деп сұрақ қойды бір тостаған қымыздан кейін сусыны қанып, маңдайы жіпси қалған Калашников әзілге сүйеп. Апанас оны қазақшалап берді. Қонақтарға қызмет көрсетіп, тостағанды жалғап отырған Шәріп шақылдап қатты күліп жіберді.

— Сол ғой манадан бері бұл кісіні “үлгілі мырза” деп мадақтап отырғанымыз. Ол ол ма?! — деп әңгімеге киліккен Шәріп жұртқа дес берер емес. — Ол ол ма, тақсыр, бұл кісі есігіндегі малайына өз қызын беріп, осы айтқа жалғас той бергелі жатыр! Ол аз болса, қалыңсыз бергелі жатыр!.. Мінекей әділетті кісі!

— Өз қызыңыз ба шынымен? — деп шүкшия қалды Калашников.

— Ие, өз қызым... жалғыз қызым... — деді Пахраддин жасаурай қалған назары төменшіктеп.

— Қызық!.. — деп таңырқап бас шайқады Калашников.

Босаға жакта ас қамымен үнсіз қозғалып жүрген ашаң тұлғалы Сырға бәйбіше бүрқылдап қайнаған самауырдың оң бүйірін ала, сызыла кеп тізе бүкті. Жаңа түскен келіндей бір тізерлей отырып шайсандыктан су жаңа орыс фарфорын шығарып, қытай жібегімен сүртіп, жұмыртқадай тізілтіп қойып жатыр. Әлден соң әдемі гүлді шынаяқтарға құйылған хош иісті үнді шәйі дастарқанды жағалап кетті.

Бас қонақтың жіті назары соның бәрін қалт жібермей байқап отырды.

Кең жағалы ақ көйлектің сыртынан жасыл жібек шапанды желбегей жамылып малдас құрып кең отырған Пахраддин еңсесін көтеріп Калашниковке тіке қарады. Сөйлеуге ыңғайланды.

— Окімет саясатын естіп жатырмыз. Түсініп жатырмыз, деп Пахраддин тың әңгіме бастады. — Окімет артық малды, мүлікті алады. Ортаға салады. Мақұл делік. Оған өз басым қарсылығым жоқ. Алсын. Кедей-кепшікке үлестірсін. Бірақ бір нәрсеге зердем жетпейді, ойлай келсем. Мал-мүлкін алып, өзін, бала-шағасымен тоздырып жіберетіндей не кінәсі бар сонда бай сорлылардың?

Калашников көпшікті іргеге таман ысырып, сәл ойлана түсіп басын көтерді.

— Бұл сұрақты беретіңізді білгем,— деді. — Бұл сұрақты жалғыз сіз емес үстем таптың сойыл соғарларының бәрі береді. Біріншіден, сіздің халықта “мал — баққандікі, дүние — тапқандікі” деген мақал бар көрінеді. Бұл халықтың көкейтесті сөзі. Партияның бүгінгі саясаты халықтың осы арманын іске асыру ғана. Ықлымнан байдың малын батырақ баққан. Партия, енді сәл батырақ өзі баққан малына өзі қожа болсын дейді. Рас, жалшы ұстаған ірі байлардың маңдайынан Совет өкіметі сипамайды. Ойткені, бай — бай, жалшы жалшы бөлғалы бері өз жалшысының маңдайынан бай да сипамаған. Өкімет кедейдікі.

Пахраддин анық жеңіліс тапты. Әңгіменің бетін бұрып жіберді.

— Жок, ә, жолдас! Мен қазіргі өкімет саясатына қарсы емеспін, асасы. Қайта қосыламын деп отырмын. Өз еркіммен өкімет қажет етсе, мейлі, артық байлығымды алыңдар деп отырмын. Сұрап отырға-

ным — өкімет аларын алғаннан кейін өзімізді жүнін жұлған тауықтай бүрсендетіп, елден шығарып қаңғытып жібермей ме, асасы, деп отырмын, — деп Пахрадин маңдайы тершіп, қозғалақтап кетті.

— Жо-оқ... — деді жұбауратын Апанас. — Бәрі заңға сәйкес әділ жасалады. Сіздің жөніңіз бөлек. Өкімет алдындағы еңбегіңіз ескеріледі!

— Би аға, шындай келсек, сіз ірі бай санатына да кірмейсіз ғой. Алып-қашпа сөзден қорқа бермеңіз! — деп Дүкенбай да басу айтты.

— Түз-дәмдеріңізге рақмет! — деп Калашников Сырға бәйбішеге қарап бас иді де серең етіп, әскери адамша шапшаң ырғып түрегелді.

Өзге қонақтар да оған іле-шала өре түрегелді.

Қара сұр мелиса Жекей үйден жұрттан бұрын шығып еді, мана қалдырған орнында Бұқарбай жоқ. Сұржекей жүрегі зірк етіп “бұған не болған” деп алақтап, үйді айналса Бұқарбай үй артында екі жас жігітпен тәжікелесіп тұр. Жас жігіттің бірі — жуантық төртбақ келгені, үйге қарай елеуреп ұмтылады. Бұқарбай зор денесімен оның алдын кес-кестейді. Сұржекей шапшаң адымдап қастарына жетіп барды.

— Бұл не тұрыс? — деді сұрланып.

— Өй, кезінде бірге қозы баққан таныс жігіттер ғой. Байдың қызын құтқарамыз, бізді өкілмен сөйлестір дейді. Болмайды десем көнбейді, — деді Бұқарбай маңдай терін сүрткіштеп.

Ждақайдың екі көзі шарасынан шыға жаздады.

— Жолдас мелиса! Біз әділдік үшін күресіп жүрміз! Өкілге арызымыз бар!

— Әй, қайдағы өкіл? Бұл ауданның хатшысы, — деп Сұржекей түсіне ашу жинады. — Көне тайындар! Марш!

— Ағасы, арызымыз бар еді айтатын! — деді Шеге, сұр жігітке оқтай қадалып.

— Қайдағы арыз?

— Пахраддин қызын еріксіз беріп жатыр...

— Сіздер кімсіздер?

— Кедей жастармыз.

— Ендеше тайыңдар! Зорлық көрсе арызды қыздың өзі берсін? Марш! — деді. Сұржекей Шеге мен Жлақайды кеудеден итеріп.

— Әділет үшін күресуге болмай ма? Кеңес өкіметі қайда?!

— Марш! — деп ақырып қалды мелиса. Жлақай мен Шеге жылыстап кейін шегінді.

Келген қонақтар атқа мініп жүріп те кетті. Бет алыстары — Мажан ауылы. Ауылдан ұзап шыға бере Калашников:

— Шынында да бұл өлкеде әлі еш нәрсе болмағандай. Төңкеріс дауылы бұл төңіректі айналып өткендей. Әх, көп шаруа жасау керек. Көп шаруа! — деп күрсініп бас шайқады.

2

Өмірінде талай тойды көрген Хансұлу. Бірақ бұндай көңілсіз тойды көрмеп еді. Ол — Хансұлудың өз тойы болды.

Әкесі бар тапқан-таянғанын осы тойға рабайсыз шашуда. Ауылдың екі қанатын ала жүзден астам үй тігілді. Әлденеше жүз қой сойылды. “Той бастар” айтқан жыршыға ат мінгізді. “Ошақ бәйгенің” өзіне басын бір бие етіп талай мал шашты. Аламан бәйгеге екі жүздей ат қосылып, бас бәйгесіне өркеші тайқардай қос нар тікті. Палуан күрестің бас бәйгесіне бір бие қойды. Айтысқан ақындардың жеңгендеріне

де, жеңілгендеріне де бәйге берді. Баяғы Қоспанның асынан кейінгі үлкен мереке осы болды десіп жатты жұрт. Хансұлуды солардың ешқайсы селт еткізбеді. Үйдің жартысын ала керілген шымылдық ішінде топ қыздың ортасында ұлы дүрмек, ырду-дырдуға кереге көзінен ғана жылаулы назар салып отыра берді. Тілден, естен айрылғандай халде. Әкесі бас болып, үлкені бар, кішісі бар, мыңғырған қалың ел, жер қайысқан көпшілік бұның жан шырылын есітпес тас керең қатал тағдырдай. Жалғыз Хансұлуды асау ағысқа түскен жаңқадай қанкөбелек ойнатып әкетіп барады. Әкетіп барады. Қарсы тұрып қимыл қыларлық қауқары жоқ. Ұзынша қайқы кірпігінен молдір тамшы әлсін-әлсін түсе береді.

Тойда өтіп жатқан өнер сайыстарының ішінен Хансұлуды елендеткен жалғыз-ақ жырау өнері болды. Алғашында оған да бармаймын деп еді. Бірақ жыр Хансұлу отауынан онша алыс емес шағын төбешік үстінде жырланды. Содан, кешкісін әлгі төбешіктің үстіне, төңірегіне бүкіл ауылдың алаша, кілем, текеметтері жайылды. Ай туа тойға жиылған мындаған жамиғат сол төсек үстінен жапырлап орын ала бастады. Әлден уақытта ай астындағы үйден ақ шапанды, ақ сәлделі, сақал-шашы аққудай ұзын бойлы сексеуілдей қураған тірі аруақ шал шықты. Қолында — домбыра. Лабақ ахун еді бұл.

Лабақ ахун қасында екі-үш кісі бар, ай сәулелі алаңның ортасындағы кілем, көрпеше теселген төбешіктің басына шығып тізе бүкті. Сыртқа түгел ере шыққан жұртшылық дүрлігіп, жырау отырған алаңға ұмтылды. Тойға келген елдің тайлы-таяғы қалмай, ең азы бала-шағаға дейін ахун отырған төбешікті айнала қоршап жайғасып, көлге қонған

аққудай сыланған күміс сақал-шашты, кәрі жыраудан көз алмай қарайды. Ел түгел жиналып, жүріс-тұрыс саябырлаған кезде Лабақ ахун домбырасын қолға алды. Мың сан жұрттың абыр-сабыры су сепкендей басылды.

Лабақ ахун кен құрсақ үлкен қоңыр домбырасын күмбірлетіп құлақ күйін келтіріп біраз созалаңдап отырды.

Хансұлудың қасындағы қыздар дүрк көтеріліп, әлдеқашан үркердей тобымен жырау тыңдауға кеткен. Жалғыз Балжан қалған қасында.

Сөйткенше, шаршы топтың ортасында айдыннан ұшатұғын аққуша иығын қомдаған ахунның кәрі көкірегінен қоңыр боздау үн шықты. Сабырлы есті сарын. Жемнің жазғы жылым ағысындай баяу шымырлап, ұзаққа сілтер ыңғай танытады. Қадым заманнан түү тарих қойнауынан жеткен бағзы ата-бабалар әуезіндей. Күніренген абыз әуен. Жұрт сілтідей тынды. Шалдың аруақ тірілтер сарнау сазы сүлқ жатқан көне даланы ұйқысынан тербеп оятқандай. Айлы кешкі айдала қойнауынан үлбіреп қоңыр самал суырылды. Жырау үнінен күрсін атқан дала тынысындай. Бүгінгі айтылар жыр, толғанар тарих сол даланың домбыраның күйімен айтушының тілінде қалған мол шежіресіндей. Жалпақ Үстіртті жайлаған елге Лабақ ахунның жалғыз өзі-ақ жатқан бір дария, жатқан бір қазына. Кезінде Бұхар медресесінен дәріс алған ахун араб, фарсы тілдеріндегі кітаптарды емін-еркін оқып-тоқып оларды жырдастанға айналдырып осындай шаршы топқа ылғи шашу етіп отыратын. Әгәрки, Лабақ ахун мешітін тастап көшер болса ондағы кітаптардың өзі бір нарға жүк болар еді деп аңыз етеді жұрт. Айтқыштығына

табынады. Қазір де ахун бұл ел естімеген тосын мақаммен тосын бір терме бастап отыр. Үлкен жырға кірместен бұрын откеннің тағлымын жас ұрпақ білмек парыз, үлгі етіп, болашақта жүрмек парыз дегендей өсиет терме толғайды.

— Пах! Шіркін! Сөз-ақ! Бас-с! Аяма! Қи-и-и! — деп шырылдауық Шәріп қиқулады. Оған іле жұрт:

— Ай, жарайсын!

— Сөз-ақ!

— Уа, садаған кетейін, — десіп іліп әкетті.

Жырау толғап жатыр. Дастандарды көштей тізіп атап жатыр, қалағаныңды таңдап ал деп жатыр. Батырлықпен даңқы асқан бар, “Рүстемдей” дастан бар. “Қарақыпшақ Қобыланды”, байшұбар атты “Алпамыс”, ерлігі асқан “Ер Тарғын”, “Едіге” мен “Сал-Сал” бар. Ау, жарандар, жарандар! Бәрің де бермен қарандар! “Ер Қосай” мен “Құбығұл”, “Қозы менен Баян” бар. Әрқайсысы бір тандық, керегінді ал таңдап! “Айман менен Шолпан” бар! “Қырымның қырық батыры”, “Қалпақтың қырық қызы” бар, керегінді сүзіп ал! Қыз аруы “Қыз Жібек”, жігіт бегі “Бөзжігіт”, “Мұңлық пен Зарлық” бар, қарлықпа, даусым, қарлықпа! “Шәкір мен Шәкірат”, “Асан менен Үсен” бар. “Қалқаман мен Мамыр” бар. “Супы Аллаяр” десең бар! “Жүсіп пен Зылиха”, “Әнәфия — Мұхаммед”, “Әзірет Әли соғысы”, керек десең өл да бар. Лабақ ахун толғанар! Табынның “Батыр Барағы” жау жағында жарағы, судай тілім ағылар, ол да бізден табылар! — деп Лабақ ахун енді жырын іркіп, көпшілік қалауына құлақ түріп, алдындағы шайдан ұрттады.

Көпшілік жамырап дауыстап гулеп кетті. Әркім керегін атап, отырған жерінен айқайлап даурығып

жатыр. Дауласып, шауқымдаса келіп, әлгі аталған дастандардың көбін бұл ел жатқа білетін болғандықтан әлі далаға көп таралмаған қалпақтың “Қырық қызын” тыңдауға ұйғарды.

Лабак ахунның қоңыр домбырасымен қоса ызындап ай астында көсілген сары дала сыңсыды. Ай астында көсілген көделі, селеу, сабанды ақ күміс жайқын жазық бетімен үздіксіз толқын жүгірді. Үйге ұсталған шилер сарнады. Лабак ахунның сонау ықылымнан сыр тартқан кәрі мақамынан ай асты әлем түгел тебірене беймазаланып қозғау тапты. Әлсізді әлді басып алып, қатын-бала шулаған, жоқтау, сықтаудан құлақ тұнған зарзаман сесі келді құлаққа. Аспанда жұлдыз дірдектеп, ай жылжып ауыл үстіне еңкейді. Ақ шаңыт тозаңытып “Құс жолы” жатты түтіндеп. Дала дөңбекшіп, күрсініп, жел боздалы ботадай. Желдей ескен жыраудың сөзін жұтып тамсанып қалың жұрт отырды. Әке менен бала, әже менен ата отырды. Қыз, келіншек бәрі отырды. Біресе күліп, біресе жылайды. Біресе айқайлап, біресе тынады. Күңіренеді, толқиды.

Үйде шыдап Хансұлу да отыра алмады. Әлден уақытта Балжан екеуі майда басып келіп жырға еліткен қауымның бір шетінен орын алды. Қырық қыздың сардары өзі батыр, өзі сұлу Гүлайымның тағдырымен тағдыры ұқсап та кетеді. Одан сайын көкірегінде құйын ұйытқып, тебіреніп, кірпігінен жасы үзілді. Ай шалқайып батыс аспанға аунады. Әншейінде қаураған кәрі шал ахунның осындайда жырдың шарықтау тұсына жеткенде орнында отыра алмай зікір салған бақсыдай екіленіп кететін әдеті. Қазір де, домбырасын сабалап, Гүләйімнің Сұртайшамен жекпе-жекке шығатын тұсында Лабак ахун өлең сөзді

қылыштай жарқылдатып ата дұшпанмен, бейне, өзі алысып жатқандай аласұрды. Кәрі жанары от шашып, бүкіл қайрат-қыжалы ыршыған он саусақтан саз боп ышқынып, қызыл тілден оқтай борап жатты.

Жыр шығыстан бас жарып таң ата келе күрсініп барып бітті.

Бұл тойдың екінші, яғни — “той тарқар” күні еді. Сәскеге таман “тартыс” болуға тиіс еді. Дәстүр бойынша қызды үйінен кілемге салып алып шығып, екі рулы елдің жігіттері екі жақ боп тартысар еді. Қай жеңгені қызды өз үйіне апарып, жөнелер алдындағы “қыз қашар” ырымын жасар еді.

Түсте Хансұлу отырған үйге жастар жиналып “жар-жар” айтып, түс қайта “қызды жөнелтуге” жұрт дүркіреп сыртқа шықты. Бұл салт бойынша қыз сыңсып өлеңменен ата-ана, бауыр, жақын-жуықпен қоштасуға керек еді. Сыңсып жылауға керек еді. Шешесі бастаған әйелдер алма-кезек Хансұлуды құшақтап, дауыстап әндетіп, қоштасып жатты. Көздерін жаспен шылап жатты.

Содан кейін ауылдың екінші қанатындағы Қозбағардың үйіне, келін түсетін үйге қарай қалың нөкер қыз-келіншектер бұны алып жүрді. Жарты жолда Қозбағардың шешесі, Торқа кемпір, Жайбасқан бастаған топ әйел шашу шашып, қарсы алып, басына “жаулық салып” ақ желек бүркеді.

Хансұлудың ақ отауы Қозбағар үйінің жанына тігілген екен. Сонда әкеліп кіргізді. Бұнда да шымылдық құрылулы түр екен. Енді “келін түсіру” тойы басталып, ол ертесіне кештете тарқады. Той тарқар алдында “Беташар” айтылып Ағдос жыршы Хансұлудың бетін ашты.

Той тарқап жұрт тараған кеште Хансұлудың некесі киылды. Қайып молда бір кесе суға дұға оқып “дем

салып” бөлек екі үйде отырған күйеу мен қалыңдыққа ризашылығын білдіріп, әлгі кеседегі дуалы судан бір ұрттам ішуге жіберді. Хансұлу кесені ерніне тигізді де ішінен “риза емеспін, екі дүниеде риза емеспін” деп қайтарып берді. Осылай некесі қиылды. Хансұлу ішінен некем қиылған жоқ деп түйді. Кеседегі дуалы суды ішпесе неке қиылмайды деп естігені бар еді.

Жатарға таман, төрт күн ұдай қасынан бір елі калмай жүрген қыз, келіншектер бірсін-бірсін азайып, ең жақын деген досы Балжанның өзі де бұны отауда жалғыз қалдырып “қарасын батырды”.

Сөйтіп, тойдың ду-дабыры су сепкендей басылып, шымылдығы түсірілген, төсегі салынған оңаша отауда шошайып жалғыз қалды Хансұлу. Өңі ме, түсі ме осының бәрі? Тіпті, баталасып қойғанда да, тойы болып жатқанда да Хансұлуға соның бәрі әкесі бас болып алжасқан жұрттың ойыны тәрізді көрінген. Бір есі бар кісі кеп әлгі есалаң топқа “Доғарыңдар! Хансұлу, кәні ер соңымнан, сүйгеніңе қосайын!” деп бұған қол ұшын беретін сияктанатын да тұратын. Жүрегі бұл сұмдыққа сенбей, әлгіндей қиялға сеніп, жұбанып бір күдіретті күшті күтумен болған. Енді қараса басында ақ жаулық. Некесі қиылған. Қозбағардың Құдай қосқан некелі жары. Қараңғы үйде отыр.

Көп ұзамай есік алдында күбір-сыбыр естіліп “Кір! Қағынды келгір!” — деп сықсыңдасқан жас әйел үндері естіліп, ішке біреуді итермелеп кіргізіп жіберді. Ішке кірген пенде есік алдында состиып тұрып қалды. Үй іші қараңғы. Хансұлу бұл келгеннің Қозбағар екенін біліп отыр. “Дәмесінің зорын! Сонда бұл өзін Хансұлуға тең көреме екен? Барлық пәле осыдан.

Осыдан ғой. Осы тек жүргенде, баяғы өйіннан бүйтіп от шықпас еді”.

Хансұлу олердей ызалы.

— Ие, сені кім шақырды? — деді есік алдында пыспыс тыныс алып тұрған Қозбағарға. Қозбағар жалт беріп, шыға қашпақ боп есікті итеріп еді, аша алмады. Ар жағынан жеңгелері басып тұрған. “Қағынды келгір, тырп етпе, өз үйің ғой!” — деп сылқ-сылқ күліп жатыр. Қозбағар есікті әрі итеріп, бері итеріп шыға алмады.

Мына кеудесі аяққаптай Қозбағардың зердесіздігі Хансұлудың жынын одан бетер қоздырды.

— Тұра қашатының бар, үйлену не теңің еді? — деді дауысы ашулы шығып.

Қозбағар сойлегісі келгендей теңселіп, тамағын қайта-қайта қырнады. Жотелді. Сосын есікке бұрылып:

— Кетіндерші, Кұдай ақына! — деп жалынды, есік сыртында дымдары өше қалған жеңгелеріне. Жеңгелері сыбырласып күліп есіктен аулақ кетті. Қозбағар әзер дегенде сөйлей бастады.

— Хансұлу! Мен не істейім... Маған айтты... Үйленесің деді... Ұрысты...

— Созінің түрін! — Хансұлу оскырынып іргеге бұрылды.

• Ірге тұрулі еді. Ауыл сыртында бақасы құрылдап, жалтырап көл жатыр. Жағалаудағы жыңғыл арасында су шалпылдады. Жылқы жүрсе керек. Бұта арасынан үркіп қанаттары сатырласып құстар ұшты. Көл жақтан судың қоңыр салқын лебі еседі. Жағадағы ызғар топырақтың исі де үйіріліп танауға келеді.

— Хансұлу!

Хансұлу дір ете түсті. Үйде Қозбағардың барын ұмытып барады екен.

— Ух... Ие, не дейсін?

— Хансұлу... мен... мен... сені ренжітейін дегем жоқ, оллаһи!

— Және не айтасың?

— ... Жақсы көремін...

— Жақсы көрмей-ақ қой! — деді Хансұлу жұлып алғандай. — Мен сені жақсы көрмеймін!

Қозбағар дыбыс шығармай танауы шуылдап біраз тұрды.

— Не кінәм бар менің, Хансұлу?.. — деп бір кезде Қозбағар қорсылдап жылап жіберді. — Осылай боларын білгем, баяғыда-ақ. Бөрі ұрысты маған... Енді не істейім?!

Қозбағар еңкілдеп ал кеп жыласын.

Ашық іргеден әлгінде туған айдың жарығы түсіп, үй іші ала көлеңкеленді. Шымылдық алдында бұратылып отырған Хансұлу сырға, шашбауы сылдырап түрежелді. Үстінде шұбатылған ұзын етек ақ жібек көйлек. Көз жасын сұрткіштеп отырған Қозбағар Хансұлудың қозғалғанын көріп жүрегі жарылардай қуанып кетті. Осылай жылағанда шешесі Торқа байғұс жібіп кетіп, “Пошымыңнан-ау сенің!” деп келіп басынан сипайтын. Қазір де Хансұлу сөйтетін шығар, басымнан сипайтын шығар деп ойлады. Бірақ шолпысы сылдырап үй ішінде қозғалып жүрген Хансұлу келмеді қасына. Сипамады басынан. Босаға жаққа бір көрпе жастықты лақтырып тастады.

— Ал әне төсегің! — деді. Дауысы қатқылдау естілсе де Қозбағарға майдай жақты. Бұндай сөз естимін деп күтпеген ғой Хансұлудан.

Босаға жақтан өзі өзіне төсек салып жата кетті. Өз қасына жатқызбаса да Хансұлудың қолы тиген нәзік өтір иісі сезіліп тұр көрпе, жастықтан. Қозбағар жүрегі дүрсілдеп, осы сәт өліп кетсе де риза өмірге.

Шолпысы сылдырап, түн перісіндей биязы қозғалып басып, майда самал ұлбіреткен торғын шымылдық ішіне кіріп кеткен айдай сұлу тәкаппар жарына мың мәртебе риза. Осы сәт егер “күйеу” деген аты болмаса жалаң аяқ, жалаң бас анау көлге қарай тайрандап жүгірер еді. Сақылдап күлер еді-ау, айқайлар еді-ау... бақытын айдай әлемге паш етіп.

Ай жылжып бұлтқа кірді. Ауыл шырт ұйқыда. Күйіс қайырып шаңдақта манқиып түйелер жатыр. Ит дыбыстары баяғыда-ақ өшкен. Тек көл аңғарында ғана үздіксіз тірлік белгісі білінеді. Шегірткенің шырылы, бақаның құрылы, құс сыңқылы, көл бетінде ойнаған балық шолпылы.

Көл жағасында ерттеулі екі аттың сағасынан ұстап, жыңғыл арасында бір кісінің бұғып отырғанына бірсыпыра уақыт болған. Екі аттың бірі Әзбергендікі еді. Әзберген ауыл ұйықтады-ау деген шамада бұғып жатқан орнынан тұрып Пахраддиннің еңселі ақ боз үйіне қарай жылжыды. Пахраддиннің есектей төбеттері бастарын көтере түсті де Әзбергенді танып, құйрықтарын бұлғады.

— Бү кім? — деді Пахраддин есік тықырлаған соң.

— Менмін... — деді Әзберген дүңк етіп. Пахраддин шапанын жамылып есік ашты. Сырга да оянып шам жақпақ болып еді, “Жакпа!” деді.

— Бү не жүріс? — деп Пахраддин киіздің шетіне тізе бүккен інісінің сұлбасына қарады.

— Тойға келдік! Шақыртпасаң да! Сәбет өкіметімен құда болып, көңіліңді жайлапсың! “Құтты болсын” айта келдік! — деді Әзберген кекетіп.

— Сәбет өкіметімен мен құда болмағанда, сенің басың түрмеде шіріп еді бү кезде! Не тантип отырсың! — деді Пахраддин ашу шақырып.

— “Тантыған” мен емес, сенсің! — деді Өзберген түксиіп. — Қызынды, малынды түгел көгендеп беріп жатсың Сәбетке: Сендей алжыған бұл елде жоқ. Жүрт қарсыласып өледі! Сен жағынып өлесің, білдің бе?! Көерміз ертең мандайыңнан қалай сипар екен сол сәбет.

— Жә, естіген жырым! Хабарыңды айт! Қайда жүрсің?

— Қайда жүргенімді саған айтпағаным. Хабарым сол — Сәбет құлайды. Ана жақтан ағылшын, мына жақтан қытай бас салады. Жылқы керек маған!

— Шырағым, сендей елеурегендердің талайын коргенбіз. Өйтіп алжаспауға керек! Жылқы берілмейді.

— Ит те болсақ бір құрсақтан шықтық. Әйтпегенде, жалғыз оққа жалынтар едім!..

Өзберген ұшып тұрып есікке беттеді. Табалдырықтан аттай бере іркілді де, әлдене дегісі келіп оқталып тұрды да есікті тарс жауып шығып кетті.

Қозбағардың ұйқысы қатты еді. Есік қағылып, Хансұлу тұрып ілгішті ашқанын, одан үйге Өзбергеннің кіргенін сезген жоқ. Албастыдай зілбатпен біреу үстіне қона түсіп, алқымынан ұстағанда ғана апалақтап көзін ашты. Бұлқынып еді үстіндегі албасты тырп еткізбеді. Содан кейін өңім бе, түсім бе деп көзі жыпылықтап үстіндегі кісіге бездиіп карап аз-кем жатты. Үй іші ала-көлеңке. Кеудесіне қонған албастының Өзберген екенін тани бастады. Бір қапталда Хансұлу жүр жүйткіп әлденені жинастырып.

— Таныдың ба?— деп бет-аузын түк басып түксиген Өзберген гүр етті.— Дыбысыңды шығардың ба, мына пышақпен жатқан жерінде бауыздаймын, күшік! Пахрадиннің жылқысы қайда?

Әзберген Қозбағардың алқымын мытыңқырап жіберіп сәл босатты.

— Түгіскеннің... шығыс жағасы...— деді еңтігіп Қозбағар.

— Шының ғой?

Қозбағардың табақтай беті талақтай боп, жөтеле түсіп, бас изеді.

— Мен тірі тұрғанда Хансұлудың енді маңынан жүрмейтін боласың! Мынаны көрдің ғой?

Әзберген пышағын жалаңдатты. Қозбағар шапшаң бас изеді.

— Әзеке, өлтірмеңіз! Бәрін істеймін... айтқаныңыздың!— деп еңкілдеп жылап жіберді.

— Өшір үніңді! “Талақпын” де Хансұлуға!

Қозбағар түсінбей қалып:

— Не дейсіз? — деді қырылдап.

— “Хансұлуға талақпын” деп айт, атаңның!..

Қозбағардың көз жасы бетін жуды.

— Айт, күшік!.. Әйтпесе...

— ... Талақпын! — деді Қозбағар жасын жұтып, әрең тілге келіп.

Аузына сүлгіні тығып, Қозбағардың аяқ-қолын домалантып байлады. Содан кейін, күйрықтан ыққита бір тепті. Теріс қарап жатқан Қозбағардың көз жасы бірсін-бірсін ақты. Әзберген мен Хансұлу жүкті аударыстырып, төңкерістіріп жатыр. Аздасын үйді айналып жүріп кетті.

Орнынан тырп етуге қорықты Қозбағар. Содан, таң атқанша жатты. Ақыры таң ағарып атып, жұрт тысырлап сыртқа шығып, түндіктерін ашып, ауыл ояна бастады. Желі жақта боталарын емізген түйелер ыңырсыды.

— Келін-ау, келін! — деп шойнандап келіп Торқа кемпір, ашық есіктен ішке бас сұғып, аяқ-қолы

байлаулы көзі аларып жатқан баласын, түрулі шымылдык, келіннің бос төсегін көріп баж ете түсті. Қолын сермеп, бет алды “ойбайлап” тұра қашты.

— Жау шапты! Жау шапты! — деп бажылдап шынашақтай кемпір шойнаңдап зытқып барады.

— АстаһпырАлла! Тағы не тапты таң атпай! — деп ауыл адамдары үрпиді.

— Адыраң қалғыр, жау шапты! Ойбай, жау шапты!

— Шешей, қайдағы жау?

— Ойбай, бала жатыр байлаулы! Өлі-тірісі белгісіз. Келін жоқ, ойбай! Жау шаппаған несі қалды?!..

Жұрт дүркіреп отауга ұмтылды. Ең алдымен үйге Шеге кірді. Шымылдык түрулі тұр. Төсек салулы. Хансұлу жоқ. Үйдің бір қапталында аяқ-қолы шандулы Қозбағар жатыр. Ыңырсиды. Аяқ-қолын босатқасын Қозбағар сықсыңдап жылап отырып түндегі болған уақиғаны айтып берді.

— Пошымыңнан-ау сенің! Қой жылама. Құрсын... Қатыны құрсын! Жаныңнан садаға! — деп Торқа кемпір баласының басын күшақтап жылады. — Атаңа нәлет, бандит! Қарасы батқанға қуанып едік... Аш бөрідей айналып соққанын қарашы, имансыздың!

Ауылда ауылнай Шәріп жоқ еді. Жаңа ауданның жиналысы болады деп кеше сонда кеткен. Бұндайда, қуғын-сүргіннің төбесі көрінгенде, ауылдың бетке ұстары Бұлыш еді. Ол да жоқ. Аң аулап кеткен. Ауыл адамдары күр қауқылдасқаны болмаса, әрекетке бармады.

— Е, алып кеткен өз ағасы екен. Ашуы тарқансын әкеліп тастар, қарындасын, неғылсын! — десті жиналғандар.

Жаз биыл ыстық болды. Күн шықса кілкіп көкжиек сағымға толып кетеді. Даланы бұралаңдап күйін кезеді. Шөбі күйіп кеткен жер беті әуірлеп өртенгелі тұрғандай. Аптабы бет қариды. Мал атаулы көлдің жағасынан шықпайды. Суға кіріп, шолпылдатып жүргені. Көлеңке іздеп иттер жүр жанынан безіп. Ауыл біткен сәскеңе шейін қыбырлап ши тоқып, түйе жүндеп, арқан кесіп, диірмен тартып тірлік істейді де, содан қара кешке шейін түяк серіппей жатады.

Сондай бір күні, талма-тал түсте торы шолағын сүмірейтіп, жападан-жалғыз Жем жақтан шошайып келе жатқан Шәріп көрінді. Бөркі астында көлдей ақ орамал. Алқа бел торының үстінде жапалақтай жарбиып отыр. Жаман торы аяғын өзер алады.

— Алақай, көкем!.. Көкем келе жатыр! — деп Шәріптің үй толы қызы шуылдасып алдынан жүгірді. Көрші-қолаң түрулі іргеден сығалады.

Шәріп о несі екені белгісіз, қорғасындай салмақты бола қалыпты. Ат үстінен еңкейіп ең кішкентай қызын алдына көтеріп алып, бетінен иіскеді. Қолына әлдене ұстатты. Кәмпит-сәмпит болуы керек.

“Мына жазғанның үні шықпайды, бір өзгеріс болды-ау шамасы” деп ойлады үйінде отырып Пахрадин.

Шәріп үйіне басын сұғар-сұқпастан ауыл ішін жаңа хабар шарлады да кетті.

— Ибай-ау, келіншек-ау, “Шырылдауық” қайнағаны алып тастапты дейді ғой.

— Көтек, “алғаны” несі?

— Ибай, әлгі ауылынайлықтан да.

— Өш қасқа! Рас па?

“Басымның сақинасы ұстады” деп қабағын шытып, Шәріп үйіне кірген бойда теріс қарап бүркеніп жатып қалған. Шайға бір-ақ тұрды.

— Хансұлу келінің қашып кетті... — деп ақырындап ауыл жаналығын айтуға кіріскен Жайбасқан. Шайдан ұрттай берген Шәріп әйеліне қарап бакшырайды да қалды.

— “Қашқаны” несі?!

— Әзберген ағасы... ұрлап әкетті.

— Сауап бопты, — деді Шәріп жирен мұрты тікірейе қалып. “Бір қатынның кесірі қырық есекке жүк болды” демекші, Хансұлудың тойы еді басына пәле боп жабысқан. Осы тойда рабайсыз мал сойылғаны үшін “таяқ жеді” Шәріп ауданда.

Шайды екі-үш ұрттағаннан кейін көпшікті шынтақтап жатқан Шәріптің маңдайынан шып-шып тер шықты. Сол-ақ екен, осы үйге қарай бүрқылдап келе жатқан Торқа кемпірдің дауысы естілді. “Адыран калғыр, тоқтай тұр, бандит! Үскен тау асырмасам ба сені! Торқа атым құрысын!” деп келеді. Шойнаңдап келіп табалдырықтан аттады. Апасының осы келісін ұнатпады Шәріп.

— Әй! — деді қып-қызыл боп шайды сораптай берген Шәріпке Торқа кемпір. — Ана бандиттің табасы әбден батты! Өкімет екенің рас, болса... Аяқ-қолын байлап әкелің бер алдыма, тақа!

Торқа отыра қалып жерді төмпештеді.

Шәріп апасының шолтандап тулақты соққан жұдырығынан көз айырмай қарап, керең кісіше шайды сораптай берді. Торқа кемпір сабасына түсті-ау деген сәтте жамбасын сипалап шалбарының қалтасынан әлдене іздеді. Торқа кемпір де, Жайбасқан да тосылып қарай қалған. Әлден уақытта, Шәріп мыж-

мыж бір шүберекті қалтасынан суырып алып, апасының алдына тастады. Кәдуілгі ішінде ботатабан мөр жүретін бүрме ауыз шүберек қалта екен.

— Көтек, мөрі қайда ішіндегі? — деді Торқа кемпір.

— Бәсе, мөрі қайда? — деді Шәріп те қырсығып. Сөзге Жайбасқан араласты:

— Е, оны арқалап жүрген сен білмесең, біз қайдан білдік?

— Білу керек... Білмегендерің жаман сол!.. — деп Шәріп саршекерден “қыт” еткізіп тістеп, шайын ұрттады. “Әңгіме осымен бітті” дегендей сыңай танытты.

— Құдай тас төбесінен ұрыпты ғой... — деп ашу да жоқ, айқай да жоқ Торқа кемпір сүйретіліп орнынан тұрды да, аяғын сылтып басып есіктен шығып жүре берді.

4

Пахраддин үйде таң намазын оқып отыр еді. Текіректен шапқан ат дүрсілі дәл үйдін іргесіне дейін келді. “Бұл қай көргенсіз?” дегендей ажырайды Пахраддин бәйбішесіне қарап.

Сырға биязы басып сыртқа шықты. Пахраддин құлақ түрді тысқа.

— Маған Би ағаның өзі керек! Тез шықсын! Ауданнан пркәз бар! — деп бір дауыс тақылдап алып барады.

Пахраддин жайнамазын жинап, дегбірі қашып намазын бұзды. Сырға кірді.

— Сені шақырып тұр. Жорға Күреннің үлкен баласы. Ждақай деген.

— Ау, үйге неге кірмейді!

— Белсенді білем... Мойнында сөмкесі бар...

Иығына шапанын іліп тысқа шыкса, жирен қасқа аттың үстінде шіреніп жуантық келген жапалақ көз шұбар бет бозбала отыр. Бала болса да көзқарасы өңменіңнен отердей тік.

— Ассалаумалейкум, Би аға. Пркөз бар ауданнан! Салық төлейтін болдыңыз!

— Айта бер!

— 120 кілә жүн. 60 кілә сарымай. 80 кой терісі. Срогі — бір жұма.

— Сен кім боласың, бала?

— Салық жинайтын агентпін. Қилыбайдың орнына. Есіңізде болсын, уақытында айтылған салықты тапсырмайды екенсіз, ісіңіз КПУ-ге түседі, — деді Ждақай. Пахраддин тықақтаған мына баланы көрінеу жақтырмай.

— Әй, Жорганың баласы! Есіттік, жетер! “КПУ” емес ГПУ деп сөйле! Мойнындағы сөмкеңнен айрылып қалып жүрерсің! — деді. Соны айтты да сыртын беріп үйіне бұрылды.

— Би аға! Сіз бекер ашуланасыз. Анау Жарасбай, Ұлман, Құлман, мынау Мажандардың көрген күнінің қасында сіздікі ойыншық! Нағыз қасқайып жатқандар солар! — деп айқайлады Ждақай.

Пахраддин оның сөзін жүре тыңдап үйге кіріп кетті. Ждақай кенет өз-өзінен сақылдап күліп жіберді де, дүрсілдеп шауып ала жөнелді. Ауылдың бүкіл итін шулатып ертіп ала кетті.

5

Пахраддин салықтан құтыла алмай жатқанда, ел шетіне “Қызыл отау” дегені келді. Мажан аулына орын теуіп күнде ойын, күнде той кернейлетіп-сырнайлатып жатып алды. Жастарды жинап билей ме,

ойнай ма, әйтеуір, білгенін істеп жатыр. Күндіз-түні жиналыс. Дүниедегі жаңалықтың бәрін айтатын көрінеді. Кәзит-журнал оқитын көрінеді. Ауырганды емдеп жатқан доғдыры да бар дейді. “Көнцерт” дегенді бұрын қалада, жәрмеңкеде көруші еді. Бұлар сол “көнцертті де” әкеліпті ел ішіне. Ауыл сыртына от жағып “Алтыбақан” құрып, “пәтефон” дейтінін айқайлатып ел жастарының басын айналдырып жатыр. Жиналысына көбінесе жастарды, кедейлерді, қыз-келіншектерді шақырады. Бай, молда, ауыл ақсақалдары дегендерді жолатпайды. “Қызыл отаудың” басшысы баяғы Шәріпті ауылнай сайлап кететін Асан дейтін бәлшебек екен. Сол баяғы келгенде-ақ Пахрадин үйіне бас сұқпай, кедейлерді жағалап, дініне берік бәлшебек екенін байқатып еді. Қазір де сол беті көрінеді. “Қызыл отаудың” бірінші жиналысында-ақ сөзінің тоқетері “Жаңа өмірге барар жолдағы ортамыздағы басты кедергілер — бай мен молданы арамыздан аластау керек” депті.

— Ал бай мен молданы құрттық. Ары қарай не болады?— депті жұрт.

— Көмпескеленген байдың мал-мүлкін кедейге бөліп береміз. Серіктікке ұйымдасамыз. Бір атаның баласындай бірлесеміз. Жер жыртып егін саламыз. Үй салып, отырықшылыққа көшеміз. Оқу оқып білім аламыз. Үлкен қалаларда тұрамыз. Сөйтіп гүлденген жаңа өмірге, мәдениетке жетеміз!— деп ұжмақты бір-ақ күнде орнатыпты. Жастар жағы қол шапаттап мәз болыпты. Ұзынтұра Уәп, қойшы Қауқаш, жылқышы Жаңбырбай тәрізді кедейлер:

— Уай, інім! Бізді қайтесің, сол, қартайғанда жер тырмалатып! Біз сол үйренген ата кәсіппен малымызды бағып, көшіп-қонып жүре берелік те! Әлгі

айтқан “қала” дегенін де қазаққа жараспайтын нәрсе, біз осы мына жаман киіз үйде туғанбыз, сонда өлсек те ризамыз ғой! Қайтесің сол, бізді қалаға сүйреп! — десе, Ждақай:

— Өлгісі келген жұрт сол киіз үйінде өле берсін! Біз тұрамыз қалада! — деп айқай салыпты. Оны жастар түгел қол шапаттап қолдапты. Асан бөлшебек:

— Ақсақал ондай кертартпалықты қойыңыз! Болашақ жастардікі! — депті. Жиналыс соңында Асан:

Кел, кедей жастары,
Ұйымдас жалшымен!
Бай менен молданы
Қойдай қу қамшымен!—

деп ұран тастапты. Жастар ду-ду етіп оны сол заматта жаттап алыпты. Содан әлгі тақпақ ауыл балаларының аузынан түссінші енді. “Ақсүйек” ойнап жатып та, “Айгөлек” ойнап жатып та:

Кел, кедей жастары,
Ұйымдас жалшымен!
Бай менен молданы
Қойдай қу қамшымен!—

деп түнгі аспанды бастарына көтеріп шуылдап жүргені. Тақпақ біртін-біртін құлаққа сіңіп жатталып, ел ішіне тез тарап кетті. Жалшы, малшы, сауыншы қатын-қалашқа шейін үйде де, түзде де, су әкеле жатып та, тезек теріп жүріп те, арқан есіп тұрып та “Кел, кедей жастары, ұйымдас жалшымен” деп дұғадай күбірлеп жүргені. Жасаған ие, сақтай гөр! Кемпір-шалдар күңіренді. “О, жасаған ие,

осынша жасқа келсек те, көрмегеніміз көп екен-ау!” деп. “Заман азды ғой!” деп.

Пахраддин сан-саққа ой сабылтып іштей тынды. Осылай боларын бұл әу баста-ақ болжағанды. 18-і жылы қазақтың ірі байлары ұсталды. “Өгізге туған күннің бұзауға да туарын” сонда-ақ сезген Пахраддин. Бұл істің күн өткен сайын қаптаған қалың тасқындай үдеп, қаланды да, далаңды да түгел басып аларын, оған қарсы тұрған кімді де болса ұйпап кетерін ұқты. Ұқты да Кеңес ісіне қарсы тұрмақ былай тұрсын, оны қолдап, құптады Пахраддин. Қажетті жерінде мал, байлығын да аямады. Байлық деген баянсыз бақ емес пе? Бұл өлкені басқарып жүрген өкімет кісілерінің көзінде: “Кім жақсы? Пахраддин жақсы”, “Кім мырза? Пахраддин мырза” деген лақапқа ие болды. Соның бәрі не үшін? Соның бәрі күні кешегі атқа мінгендердің қай-қайсысына да ерте ме, кеш пе, бір зауалдың туарын болжаудан еді. Мінеки, сол зауалдың тықыры енді таянды.

Кел, кедей жастары,
Ұйымдас жалшымен!
Бай менен молданы
Қойдай қу қамшымен!

Іргесі түрулі керегеден алыс созылған тұлдырсыз құба далаға қарап, Пахраддин жанарына жас тұнып ұзақ отырып қалған екен. Сағымға батып бұлдырап бедері жидіп балқыған көкжиекте бұлыңдап шайқақтап жалғыз құйын өтіп барады. Қайдан шығып қайда барары белгісіз. Бір парықсыз тірлік. Айдау желдің алдына түсіп қан-көбелек айналып дедек қаққан тағдырдай. Қай сайда қаларын Құдай білсін. Сол құйын, жел айдаған жалқы құйын емес пе бұл

дағы? Қанбақтай қуалап, келеді емес пе замана желі, тамырынан жұлып алып. Арқа сүйеген елі, табан тіреген жері қайда? Гулеп соққан дауыл Құдай білсін, қай күні таптап өтерін?

— Көкесі! — деп Сырға ақырын үн қатты ту сыртынан. Пахраддин өз ойымен өзі, үйде Сырғаның барын да да ұмытып кеткен екен.

— Ау! — деді, дауысы дірілдеп. Бұрылмады. Көзінде жас бар еді. Ғұмыр бойы бұның қас-қабағын ауа райындай болжап дағдыланған жамағаты қазір де сергектік, сезімталдық танытып отыр. “Көкесі!” деген үнінде Пахраддинге ғана ұғымды тілмен мейірімі, махаббаты, үрейі түгел қоса айтылған еді. Сыңсыған елдің ішінде отырып Пахраддиннің соңғы кезде жалғызсырап жабығып жүргенін сезеді Сырға. Қайран асыл жар. Өмірінің сәні Сырға. Ағайын кетті. Бауыр кетті. Қыз кетті. Кетпеген осы жалғыз жары Сырғасы ғана.

Үнсіз Пахраддин тұйық қалпын бұзбағаннан кейін үнсіз Сырға ысырылып басып келіп, иығына асыла отырды. Жібектей майда саусағымен аркасынан сипады.

— Саған қарап... мен де сырқатты болдым... Құрсыншы таусыла бермеші!.. Жазғанын көрерміз тағдырдың! — деп аркасына маңдайын сүйеді.

Жалғыздықтың құлазыған жапан даласынан ұмтылып кеп ибалы, сұлу жарының құшағымен құшағы табысып, мейірім махаббат шуағын сансырап сағынған жаны бордай езілді. Жарының жас жуған сопақша сұлу жүзіне бетін басып солықтап өксіп кеп жіберді.

— Қойшы! Не болды саған? — деп шошып кетті Сырға. Өмірде бүйтіп әлсіздік танытпаған ғой

Пахраддин. Кең иығы толқын ұрған талдай дір-дір етеді. Сирек сөйлейтін, сөйлесе дауысы құлаққа күміс қоңырау үніндей жағымды тәрбиелі жан еді Сырға. Кісіні есті, назды қылығымен табындыратын. Қазір де сөйтеді. Жүзінен иман нұры төгіле отырып, күйеуін балаша аймалап, құшып жұбатты. Пахраддиннің басын тізесіне қойып, бейне сынықшыдай сипап, аймалайды. Тұмсығы қоңқиып шалқасынан жатқан Пахраддин әлдене есіне түскендей езу тартты.

— Асасы, осы жұрт та ақымақ. Пахраддиннің байлығы деп күн құрғатпай өрістегі малын санайды. Әй, қандай ессіздер-ай! Әй, Пахраддиннің байлығы үйінде емес пе? Ол мына отырған бәйбішесі емес пе?— деді.

Монтаны пішін, бидай өнді Сырға бәйбішенің түндей тұнық қара көзі жарқ етіп, ақ тісі ашылып күлгенде бет ұшына қаны тепті. Күйеуіне еңкейіп сыңғырлап күлді.

— Бұнынды біреу естіп қалмасын! Онда бәйбішене де кетті дей бер, кәмпескеленіп... — деді.

6

Биылғы жаз бір ерекше жаз болды. Сағыздай созылып өтпей тұрып алатын баяғының жазы емес. Таң атса эне-міне дегенше күн де батады. Әңгіме көп. Жүріс-тұрыс көп. Атқа мініш, селтендеп, ауыл-ауылдың арасын шаңдатып құйғытып жүрген белсенді жастар. “Комсомолмыз” дейді біразы. Оның не екенін білмейтін сахара жұрты үрпие қалады. Әйтеуір, өкімет адамы ғой деп. “Қызыл отаудың” ойын, жиынынан қалмай, бәлшебек Асанды төңіректеп жүріп, ақыры, Шеге, Ждақай, Қозбағар, Балжан сияқты жастар да “комсомол” болып кетті. Қозбағар “комсомол” бол-

ғанда Торқа кемпір қуанғаннан шойындап жортып, бүкіл ауылды айналып шықты. “Адыраң қалғыр, ал керек болса! Ойындарың келген екен бадырақпен” деп. Ауыл көзінде жастардың беделі өсті. Кешегі жалшы бүгінгі “комсомол” Қозбағар келе жатқанда Пахраддин сияқты зиялылардың, жүрегі зірк етеді. Комсомол жастар:

Қара табан бадырақ,
Күннің туды жадырап.
Егін салып, жер ексең,
Бай боласың қазір-ақ,—

деп әндетеді.

“О, Құдай шебер! Жаңа заманның да жарапазанын есіттік-ау!” деп кемпірлер тамсанады.

“Қызыл Отау” меңгерушісі Асан бәлшебек жастардың ұйытқысы, етене жақыны болып алды. Дүниеде білмейтіні жоқ. 16-шы жылы окопқа алынып, орыс-герман соғысына қатысқан. Мәскеу, Петербор дейсіз бе көрмеген жері жоқ. Жиырмасыншы жылдары Хорезмде Хан-Жөнейттің баспашысымен шайқасқан. Рас болса, Қировты, Фрунзені, Калининді және Сталиннің қазіргі орынбасары Тұрар Рысқұловты өз көзімен көріпті. Осы келген бетінде Қазақстан астанасы Қызылордада революционер ақын Сәкенмен таныстым дейді. Ел жастары үшін, бейне айдан түскен адамдай Асанның өзі де, сөзі де таңсық. Асанның ықпалымен Шеге бір жиналыста тұңғыш рет сөз сөйледі. Созін былай бастады:

— Ескіліктің түп-тамырына балта шабатын мезгіл жетті!— деді. — Онсыз біз жаңа өмірге аттап аяқ баса алмаймыз! Аяғымызды шырмап отыр ескілік!

— Көтек, тағы бір Асан шыққан ба арамыздан? — деді бір шайпауыз келіншек, Шегені әжуалап. Шынында Шегенің сөзі Асанның күнде айтып жүрген “жырынан” аумай қалып еді. Соны өзі де сезіп, қысылып қалды.

— “Әйел теңдігі” дейміз. Ал өзіміз күні кеше бүкіл ел болып сүймейтін адамына Хансұлуды ұзаттық. Қайдағы әйел теңдігі болсын бізде! — деп жіберді тағы да.

— Ау, сол Хансұлуды ақсақал ымырасымен той жасатып, некесін кидырып, әйелдікке алған қасыңда отырған комсомолдың өзі емес пе? — деп аяқтан шалды әлгі келіншек, назарын жиылыстың төрінде компиып отырған Қозбағарға аударып. Қозбағар қып-қызыл боп кетті. Құты қашып желкесін қасыды.

— Жолдастар! — деді Шеге, — өткен жиылыста Қозбағар ендігәрі ақсақалдар ымырасымен әйел алмауға уәде берген.

Алажабыр жиылған жұрт қыран-топан күлді.

Жиылыс соңынан күнұзын қалғып отырған кілбік көз Бұқарбай мелиса әукесі салбырап, орнынан тұрып мылтығы бар үйлердің тізімін оқыды. Онда аталынбаған үй қалмады. Мылтық әңгіме болғаннан кейін жұрт секем алып, дағдарып бір-біріне қарады. Бұқарбай: “Орталықтан бұйрық бар, мылтық біткеннің бәрін өкіметке өткізу керек. Тәртіп солай” — деді түсін суытып. “Мылтықты жинаймыз” дегені ешкімге ұнай қоймады. Екі ұрты бүлкілдеп ұзынтұра Уәп түрегелді орнынан.

— Ау, өкіметке рақмет! Кедейді қолдап жатырсыздар! Оларың жақсы делік. Ау, енді, үй болған соң бір қару болмай ма? Ит-құстан малымызды қорғасақта. Қарақұм жағында баспашы көтерілді деп жатыр-

сыздар! Ау, сол сабаздарың ертең келіп бас салса кайтеміз? Таяқпен жасқаймыз ба? — деп ұзынтұра Уәп ұрты бүлкілдеп отырған қауымға қарады. Жұртшылық:

— Уәптікі жон!

— Дұрыс айтты!

— Дөп басты! Расында қарусыз топырлаған қара қойдан неміз артық?! — десіп шулады. Бұқарбайдың беті бүлк еткен жоқ.

— Осы тізбеде аты аталған азаматтар, қазір жиылыстан кейін мылтықты тапсырасыздар! Тәртіп солай — деді.

Сол күні жұрт “Құрысын, бір мылтық үшін өкіметпен кетіспейік” деп мылтықтарын “Қызыл отауға” әкеліп жатты. Мылтығын тапсырмаған Мажан аулынан Мажанның үш баласы мен Пахраддин аулынан жалғыз Бұлыш ғана еді.

— Бере алмаймыз мылтықты! — деп Бұлыш күнк етіп, Бұқарбайға сыртын беріп, кеше қақпанға түскен арлан көкшолақтың құлаш жарым терісін кергілей бастады.

— Бұлыш аға! — деп мән-жайды тәптіштеп айтуға кірісті Бұқарбай.

— Тәртіпке қарсылығым жоқ. Бірақ аңшы екенімді күллі жұрт білулі. Астымдағы атымды, жетегімдегі итімді, қолымдағы мылтығымды кім сұраса да бере алман, — деді Бұлыш көмірқара өңі түтігіп.

— Бұлыш аға, тәртіп солай... — деп келе жатыр еді Бұқарбай, қараша үй жақтан:

— Әй, Игенсарттың баласы! — деп Дәу апа ақырып қалды. — Әй, өйткен тәртібіңнің ... түге! ... Аңшының қолындағы мылтығына жабысқан ол неғылған тәртіп?! Мылтық берілмейді! Дәу апа айтты де, түге,

айтатын жеріне! Шауып алатын жау келіп мені-ақ шауып алсын!

Әңгіме осымен бітті. Бұқарбай мелиса ләм деп аузын ашпай атына қайта отырып жүріп кетті. Бұлыштың шешесі Дәу апаның кім екенін жалғыз Бұқарбай емес, бұл төңіректегі дүйім ел білетін. Қыз кезінде шашты желкеге түйіп ерлермен бірге жауға қарсы шауыпты деп айтады жұрт. Төркіні — адайдың құнанорыс деген тайпасы. Бойжеткесін ағайынның ыркына көнбей табын арасында аңшылығымен аты шыққан Бұлыштың әкесі Арша мергенге қашады. Арша мерген 1916 жылы солдатқа алынады да, содан хабар-ошарсыз кетеді. Жетім бала, жесір әйел 21-дің аштығына ұрынады. Дәу апаның есі кіріп, адам болып қалған он екі, он үштегі екі ұлы шешектен шетінейді со жылы. Аштықтан малсыз, күйсіз шыққан Дәу апа кәсіп іздеп үлкен ұлы Бұлышпен базаршыларға еріп, Ойға түседі. Қоңыраттың базарында түрікпеннің бір байымен кездесіп, соған түйекеш болып жалданады баласы екеуі. Байдың аты Пірімкүл екен. Пірімкүл жылына бір түйе аласың дейді еңбек ақына. Дәу апа жалғыз ұлы Бұлыш екеуі байдың түйесін екі жыл бағып елге қайтуды ойлап бір күні еңбек ақысын сұрайды. Сонда, бай бұларға келенің ішіндегі ең жаман қотыр тайлақ пен қатпа маяны береді. Жетім бала, жесір әйел есесін қалай дауласын, жолым үйін қикитып қотыр тайлаққа артып, өздері маяға мініп, сараң байды қарғап-сілеп қырдағы алыс елге қайтады. Күн жүріп Үстіртке көтеріледі. Әрі қарай қазақтың кең даласы. Дәу апа сол арада бір іске бекінеді. Шолақ көшті іркеді. Түйелерді шөгереді. “Жүкті түсір!” дейді баласына. Бұлыш таң қалады, бұл ыздиган қыр үстіне неге қонып жатқанын білмей. “Балам! — дейді Дәу

апа. — Мені енді ана сараң байдан есем қайтпайынша, осы жерден қозғалады екен деп ойлама! Қотыр түйе мініп елге барғанша, менің осы арада өлгенім артық. Атаңа нағылет Пірімқұлдың бізге қылғанын, өзіне қыл, бар! Келесінің ішінен қос нарын тандап тұрып бөліп ал да айдап кел, менен туған үл болсаң!” дейді.

Бұлыш бір ауыз сөзге келместен шиті мылтығын қолға алып, қотыр тайлаққа қарғып мінеді де кейін қарай тартып отырады. Түн ортасы ауа жүрек жұтқан жас жігіт байдың сандық өркеш қос нарын сүргітіп қуып келеді анасы отырған жерге. Дәу апа, сонда: “Әп бәрекелді, міне енді үялмай елге де баратын болдық!” деп қабағы жадырап орнынан түрегелген екен дейді. Бұл хикая, батыр мінезді Дәу апаның көп ерлігінің бірі ретінде ел ішінде аңызға айналып кеткен.

Оны Бұқарбай мелиса да білетін. Сондықтан Дәу апамен салғыласып жатуды бекер деп санады.

Бірақ “Хантөрткіл” ауыл советі бойынша өкіметке қару-жарағын тапсырудан бас тартқан азаматтардың тізімінің дәл ортан белінде бадырайып “Бұлыш Аршаұлы” есімі де кеткен еді.

7

Күздің басы бұл елге “кәмпеске” атты ұлы дүр-белеңін ала келді. “Кәмпеске” Бас Оймаут, Орта Оймаут, Сарыбай құм, Доңызтау жақтан басталып Хантөрткіл, Түгіскен төңірегіне жайлаған қалың елге қарай жағалап келе жатты. Бір күні Жарасбай, Тегінберді “кәмпескеленсе”, бір күні Байтақ, Ұлман, Құлман “сорлапты”, малын, дүние-мүлкін солдат шығып сыпырып алып, өздерін “арыстыбай” етіп, Темірге айдатыпты деген дақпырттар жерді жарып жатыр. “Кәмпеске” жалғыз байларға ғана емес, бүкіл

елге тиген ылаң, бүгін бай “кәмпескеленсе”, ертең кедей де киеді ол кебінді, елдің қолында тыпшақ лак қалдырмайды екен, ине-жіп, қазан-табақ бәрі “кәмпеске” болып орталыққа түседі екен, бір көрпенің астында жатып, бүкіл халық бір қазаннан тамақ ішеді екен, тіпті қатын да ортақ меншікке айналып, “маятыбая, тыбая-мая” болады екен деген ұшпа қауесет жел тиген өрттей қаулап, қызыл тілді апатқа айналып, дүрілдеп лаулап бүкіл даланы шарпыды. Қожа, молда, байлар, кешегі атқамінерлер ол отқа май құйды. Ол өртті сөндірмекші болған белсенді жастардың, ел ішінде саусақпен санағандай партия, комсомол мүшелерінің жанталасқан үгіт-насихаты лаулаған отқа қарлығаштың аузымен су тасып құйғандай әрекет еді. Сөйтіп, “кәмпеске” келмей тұрып-ақ ауылдар сытылып қаша бастады. Байлармен қоса дақпырт қауесет ықпалына түскен кедейлер де кетті.

Сондай бір күні, коленке басы ұзарған кіші бесін шамасы еді. Әлгіндей хабарларды есіте-есіте тырс еткенге елендеп отырған Пахраддин аулына Мажан аулы тұстан жалбақтап шауып жалғыз атты келе жатты. Ауыл өріп тысқа шықты. “Астапыралла” деп тәңіріне сыйынып “Және не хабар келеді?” деп жалпылдап шапқан жалғыз аттыны тосты. Жалғыз атты жау келе жатқандай айқайлай кірді ауылға. Ждақай екен кәдімгі.

— А-а-а... халайық! Бірің қалмаңдар? Шақырып жатыр, кәмисия! Шақырып жатыр митинг! “Кәмпеске” болады! Мажан “кәмпеске” болады! Кәм-песке-е-е! Бірің қалмаңдар! Митинг!

— О жағың қарыссын! “Митыңы” несі тағы?!

— Соншама өректігені несі, жетпегірдің! — деп әйелдер Ждақайды қарғап-сіледі. Бірақ “кәмпеске”

дегеннің не екенін көзбен көруге бәрі де құмартулы еді. Аттысы атты, жаяуы жаяу тай шаптырым жердегі Мажан аулына қарай қатын-қалаш, бала-шаға түгел шұбырды. Шойнаңдап ұмтылып, жаяу ағылған жұрттың алғы шебінде Торқа кемпір де барады. Қара қасқа айғырын ерттеп мініп, жұрттың соңын ала Пахраддин де шықты ауылдан. Көлденең белден аса бере кең алапқа көлбей қонған бай ауылы көрінді. Ауыл үсті ханбазардай қайнап жатыр екен. Одағайлап ауыл шетіне тұрған қызыл тулы “Қызыл отау” төңірегі ығы-жығы адам. Тізілген ат арба. Құмырсқадай бала-шаға. Ауылдың алды шаңытып иірілген қаптаған қалың мал. Мыңғырған қой. Үйір-үйір жылқы. Түйелер. Мал қайырып селтендескен аттылар. Ит үріп, қой маңырап, жылқы кісінеп, ауыл үсті ию-кию.

Ел шетіне тиген лаңды көргендей, Пахраддин тітіркеніп кетті. Естуінше ірі қарасы 300-ден асатын байлар ғана ілігуге тиіс бұл науқанға. Сатты, сойды, қолды болды, әйтеуір, Пахраддинде бес-он түйе, жүз қаралы ұсақ жандықтан артық мал қалмады. Бұл есеппен қарағанда Пахраддин “кәмпеске” құрығынан құтылуға керек.

Жұртты жиып арбаның үстіне шығып Асан бөлшебек сөз сөйледі. Бай мүлкін кәмпескелеу жайлы Каз. ЦИК-тің декретін оқыды. Асанның қасында бір топ адам. Ішінде жаңадан болған ауылсовет бастығы — Жорға Күрең. Жорға Күрең жымсиып күліп алға шықты. Қолындағы тілдей қағазына үңілді. Бастық болуға Шәрінтен гөрі епті, оңтайлы екені көрініп-ақ тұр. Тілі де майда, жатық. Үні де жұмсақ.

— Жолдастар! Енді сөз кезегін тап жауымыз Мажан бай Ұлмановтың есігінде қой бағып өмірін өткізген

жалшысы, жолдас Қауқаш Көшекбаевқа береміз! — деді. “Жолдас Қауқаш Көшекбаев” деп жұрт қайталап айтып жамырап күліп жатты.

— Ау, қайдасың, жолдас Көшекбаев?

— Уа, түбің түссін, бол тез! Теңдік тиді саған да, сөйле!

Жетегіндегі жарбай түйесінің бұйдасын қасындағы біреудің қолына ұстатып, жапырайған кішкентай қатпа қара кісі аяғы маймандап арбаға қарай жүгіре түсіп келеді. Басындағы мақтасы бүрқыраған ескі бөркін бір қолымен басып-басып қояды. Көпшіліктің көңілді күлкісі толастар емес. Ортаға шығып арбаға жақындап тоқтаған Қауқаш батырақ бұрылып елге қарады. Бөркін басып, ыржиып қойды.

— Жолдас! Арбаға шығыңыз! Жұрт көрсін!

Арбаға шыға алмай тырбандаған Қауқашты Асан бөлшебек қолтықтан көтеріп алды. Биікте, бастықтардың қатарында тұрып, ескі терідей мыжырайған Қауқаш қаумалаған көпшілікке қарап тағы ыржиды.

— Ойхой, Қауқаштың да күні туды-ау!

— Ойындарың келмесін Қауқашпен! — деп гүлдеп жатыр жұрт.

— Ал жолдас! Сенің сөзің халықтың сөзі! КазЦИК-тің декретіне қалай қарайсың! Соны айтшы! — деді Асан бөлшебек.

— Бас, Қауқаш аяма! Көсілт! — деп кикү салды Шәріп. Қауқаш иегін уқалап тосылып, басындағы бөркін біресе шекесіне, біресе желкесіне апарып, аузына сөз түспей састы.

— Ау, жөніне қойса, сорқайнаған бөрікті! Онсыз да ыдырап бітіпті ғой! — деп артқы жақтан ұзынтұра Уәп айқайлады.

— Kha... kha... жиылыста сөйлейсің деген соң... kha... kha... кеше осы бөркімді ең болмаса бүтіндейін деп...

кһа... Мажанның бәйбішесіне бардым... — деп жеткірінін сөз бастады Қауқаш.

— Әнеки, тағы жабысты бөрікке! Уа, ішің өтсін Қауқаш!

— ... Барсам Жамал бәйбіше кебежесін ақтарып жатыр екен. Бөркім қолымда. Келген шаруамды айтып, бір суыртпақ жіп сұрадым бәйбішеден... Кһм...

— Уай, сөзің бар болсын... Арғы жағын айтпай-ақ қой түсінікті!

— Жоқ. Айтсын! Айтсын!

— Кһм... Осы маған айтсын деп сөз берген жоқ па?

— Айта бер, жолдас Көшекбаев! — деп құптап қойды Асан Айтжанов.

— Кһм... Сөйтіп бір суыртпақ жіп сұрадым. Бәйбіше “кәні, бере тұршы!” деп қолын созды бөркіме. Бердім. Қайдан білейін ашулы екенін. Жітірді кеп бөрікті ашық есіктен далаға. Содан бөркім күлге барып түсіп...

— Пай, бөркің де құры, озің де құры, Қауқаш! Лақпай “кәмпескені” айт! Өкімет саясатына қосыласың ба, жоқ па, соны айт! — деп күйіп-пісті Шәріп.

— “Кәмпескеге” қосылам-ау... тек... кһм... ертең осы... Мажан бай жіберген жақтарыңнан... қайтып келіп... бізді сорлатып жүрмесе неғылсын... Құрысын... сол байдың малы құрысын... Өзімнің он шақты қойым өзіме бұйырса да... жетеді.

— Жолдас Көшекбаев! Сабыр етіңіз! — деп оның сөзін болді Асан. — Сенің қорқуың бекершілік. Ойтіп жұртты үркітпе! Егер, осы жиналыс Мажан бала-шағасымен жер аударылсын деп тапса... Мажанды үрім-бұтағымен енді қайтып көрмейсіздер! Сен, жолдас Көшекбаев, сөзіңнің енді тоқ етерін айтшы! Мажан

бай мал-мүлкі көмпескеленіп, жер аударылсын ба? Әлде жоқ па? Көні, соны айтшы!

Самсап тұрған қауым күнге шекесі жылтырап мұрын ұшы тершіген бір жапырақ қара кісі Қауқаштың аузына қарады. Қауқаш қойшы жаны иненің ұшында тұрғандай абдырап, аузына сөз түспей, өзіне қадалған саналуан көздерден қашып құтылатын тесік таба алмай тығырыққа тірелді. Мажан мен бәйбішесі арба алдында көрнектеу жерде отыр еді. Олар да Қауқаштың аузына қарап қалыпты.

— Сөйле! — деп күбір етті Жорға Күрең арт жақтан нұқып.

— Аударылсын... Өкіметтікі жөн ғой!.. — деді Қауқаш байғұс тілі әрең шешіліп. — Khm... өкімет білмей істемейтін шығар...

Жұрт гулеп кетті. Қолдап та жатыр. Қарғап та жатыр. Жамал бәйбіше дауыс салды. Екі қолымен бүйірін таянып, үрген местей етжеңді бәйбіше дауыс етіп теңселді.

— Түз-дәмім ұрғыр Қауқаш! ... Түз-дәмім ұрсын!.. Ой-бо-ой! Не жазығым бар еді?..

Бір жапырақ Қауқаш көпшіліктің шауқымынан шошып кетіп “не істеп қойдым?” дегендей алақтап бастықтарға қарады. Ат жакты, сылынғыр ұзын қара Асан бәлшебек күліп арқасынан қақты. “Жарайсың!” деп. Сонда ғана жүрегі орнына түсті байғұс Қауқаштың.

— Ал енді сөйлеймін деушілер бар ма? — деп Жорға Күрең дабырлаған қауымға жымсиып қарады.

— Мен! — деп Ждақай топты жарып, арбаға қарай тұра ұмтылды. — Мен сөйлеймін!

— Ал енді сөз алатын — тап жауымыз Мажанның кішкентайдан қозы-лағын баққан бадырағы Ждақай Күрең баласы. Көмпеске жөніндегі комиссия мүшесі.

Жуантық келген тығыншықтай Ждақай анадайдан барысша атылып, секіріп мінді арбаға. Көзі шырадай жанып, шашы тікірейіп алыпты. Жұдырығы түюлі.

— Батырақ байғұстың... біз сияқты қасқиған... Әлгі Қауқаш сияқты... байда кеткен кегін қайтарған... Жасасын төңкеріс! — деп қолын аспанға тік көтеріп айқай салды Ждақай. — Жа-са-сын!

Арба үстіндегілер шарт-шұрт қол шапалақтады. Сендей соғылысып сөйлеушіге қарап тұрған көпшілік не істерін білмей бір-біріне қарады.

— Жасасын революция! — деп Шеге айқайлады арт жақтан.

— Жаратқан ием сақтай гөр!

— Жаксылықтың нышаны болса жарар еді... — десіп күңкілдесті кәрілер.

— Кәмпескелеп тек мал-мүлкін алып қою аз!.. Жер аудару деген де түк емес! Байлар ана жақта тайрандап жүреді деген сөз ол! Қауқаш айтқандай тірі жүрсе олар, оллаһи, қайтып келеді! Келеді де, біз сияқты байғұстарды қасқитады да салады (Жұрт күлді). Оу, күлмендер! Осы айтқаным келмесе қара да тұрындар! Сондықтан бұл қасқалдақтарды қатыру керек! Аяқ-қолдарын матап мәңгі-бақи шыға алмайтын темір тордың ішіне тығу керек! Сол менің айтарым!

— Уа, аузың желкеннен шықсын... Ждақай! Көктей сол! Көктей солғыр! — деп Жамал бәйбіше жерді төмпештеді.

— Ал шуды тоқтатындар! Қаулы оқылады! — деді Жорға Күрең жымып, қолындағы табақтай қағазға үніліп.

— Оқы, оқы! Құлағымыз сенде!

— “Хантөрткіл ауылсоветіне қарасты, 5-ші ауыл кедей-батырақтарының жалпы жиылысы қаулы етеді: Бірінші. Біз өз жиылысымызда аулымыздың ең ірі

байы, тап жауымыз Мажан Өтешовтің ісін қарадық. Мажан ірі бай. Жеті атасынан бері еңбекші халықтың қанын сорып, еңбегін пайдаланып келе жатқан жауыз. Сондықтан оның мал-мүлкі түгел кәмпескеленсін, өзі бала-шағасымен жер аударылсын және көзі тірісінде бұл жерге қайтып айналып келмесін. Екінші. Осы ауылсовет қарамағында тағы бір тап жауымыз тұрады. Ол — бұрын патша заманында бай болған, билік құрған Пахраддин... Оның қазіргі қолда бар малы бай дәрежесіне жетпейтіндіктен ол “құлақ” деп танылсын. Мал-мүлкі кәмпескеленсін. Бірақ Кеңес өкіметіне өз еркімен жылқы берген, ет берген зиянсыз “құлақ” болғандықтан ол “жер аудару” жазасынан құтылсын. Қаулы осы, жолдас-тар! — деді Жорға Күрең қағаздан тұмсығын көтеріп. — Жолдастар, айтпақшы және бір айта кететін жәйт бар. Ол бай да емес, “құлақ” та емес, Кеңес тілегіндегі кедей де емес, “құйыршық” мәселесі. “Құйыршық” деп кімді айтамыз? “Құйыршық” деп тап жауымыздың шашбауын көтеріп жүрген кейбіреулерді айтамыз...

— Ол кім ол? Басс! Аяма! Айт! — деп еліріп елпілдей түсті Шәріп.

— Айтсам ол — дәл сен, Шәріп! Өзіңсің! Тап жауымыз Пахраддинге біраз құйыршық болдың, құда болам деп!

— Не дейсің, әй?! — деп Шәріп түсінбей қалды алғашында. — Әй, қайталап айтшы!

Араның ұясындай гүлдеп кеткен көпшілік бір жанжалды сезіп тына қалды. Жорға Күрең жымысқы күліп:

— Пахраддинмен құда болғаның, шапан киіп ауыз жаласқаның өтірік пе, Шәріп?! Сөйте жүріп өзің “белсенді кедеймін” деп төске ұрасың! — деді.

— Әй, әй, Жорға! Сен, сен, не оттап тұрсың, әй!— деп ышқынып қалды шырылдауық Шәріп. Дыз етіп елдің алдына жүгіріп шығып, басындағы бөркін жерге бұлғап ұрды. Жердің шаңы бүрк етті. Жорға Күрен селк етті. Жұрт үрпиіп қалды.

— Мен екем ғой, сонда “құйыршық!” Уа, атанның көрін... қаражон! Уа, Мажан байдың базар сайын мініп жүретін жорға байталы! Сен қайдан кедей атынан сөйлей қалдың? Терін саумай тілін сауған саудагер сукит! Мен Пахрадинмен құда болғаным рас! Бірақ ол бай емес — орташа! Оны неге жасырасың сен сукит!

— Сабыр... сабыр етіңіз, Шәріп аға! — деп Айтжанов тәртіпке шақырды. Жорға Күрен:

— Әнеки, бұл елге шындығын айтсаң жақпайсың,— деп беті бүлк етпей ырк-ырк күлді.

Екі мелиса бірі — Бұқарбай, бірі — баяғы Сүржекей, Шәріпті қолтықтан көтеріп дедектетіп ала жөнелді.

— Жіберші! Көн табан қара бетінен бір ұрайын кіспұрыштың! Жіберші! — деп Шәріп бұлқынады.

— Жолдас, жиналысқа кесайт етпеңіз!

Шапшаң Шәріп қолтықта бара жатып-ақ етігінің бір сыңарын шешіп алып, мелисаның төбесінен асыра лақтырды. Арба үстіндегі Күренді жіберіп ұрды.

— Мә, саған “құйыршық”!

Ұлтаны ауыр қара етік қарғадай далпылдап ұшып барып Күреннің оң жақ шекесін жанап өтті. Күрен сол жаққа, Асан оң жаққа құлады. Қыран-топан күлкі. Шәріпті “Қызыл өтауға” апарып қамады. Шәкеннің Жорға Күренді сыбаған ащы дауысы бәрібір тынбай естіліп жатты.

Күн ұясына қарай еңкейген. Нарттай қызарып тегіс алапта отырған ауылға қырмызы нұрын төгеді. Бұл

кезде жұрт жапа-тармағай Мажанның кең бүйірлі қоңыр үйіне қарай лықсыған. Ат арбалар да солай қарай қозғалды. Әудемде жиналыс болған алаңда шашын жайып батаре күнге карап жылаған жалғыз бәйбішеден өзге жан қалмады. Жұрттан бұрын әлдене деп айкайлап атын қамшылап екпіндетіп жеткен Ждақай бай үйінің үзік, туырлық бауларын қиып жіберіп, киізді екпінмен сыпырып ала кетті. Үлкен қоңыр үйдің бір жақ шекесі уықтары ырсыып ашылып қалды. Оған іле атымен кидірмелетіп жеткен Шеге бауы кесілген үзікті шалқайтып сыпырып алды. Сүйек ағашы жалаңаштанып үйдің бір жақ қапталы түгел ашылды. Атынан қаргып түсіп жұрттан бұрын үйге жүгіріп Ждақай кірді. Үйдің бір бұрышында Мажан бай тұқшындап теріс карап тұрып әлденені орап жан қалтасына тыққыштап жатыр екен. Ждақай барысша атылып, кеп Мажанның қолына жабыса кетті.

— Әй, көргенсіз! — деп Мажан шынтағын шолтаң еткізгенде орамалға ораған бір бума ақша копырап шашылып жерге түсті. Өңшен қызыл отыздықтар.

— Көрдіндер ме! Сабатаж! — деп жиналған жұртқа карап айкайлап екі қолын көтеріп секіріп-секіріп түсті Ждақай. — Көрдіндер ме, қасқалдақ, дүниесін қалай жасырып жатқанын! Мә саған! Мә саған ақша!

Ждақай копыраған ақшаны уыстап, жынданып, шаңыраққа қарай лақтырып жүр. Мажан:

— Өй, ант атқыр! Ант атсын сені! — деп отыра қалып ақшасын жинауға кірісті. Мелисалар Мажанды қолтықтап алып арбаға апарып мінгізді. Мажан бүгіліп жылап әрең отырды. Біреулер бәйбішесін сүйемелдеп ертіп келеді. Жалаңдаған жас жігіттер үй ішінің ойран-ботқасын шығарып, кебеже, тең, сандықтарды ту-талақай тартқылап арбаға апарып

тиеп жатыр. Керегеге ілулі түскиіз, кілемдердің бауын шешпей бырт-бырт үзіп арба үстіне лақтырады. Әпсәтте кең үйдің іші қанырап босап қалды. Ашық іргені қуалап, жылт етіп тышқан қашты.

— Үйді не істейміз? Үйді де кәмпескелейміз бе? — деп еліріп сақ-сақ күлді Ждақай.

Жалаңдаған көңілді жастар өршеленген үстіне ершеленіп:

Кел, кедей жастары,
Ұйымдас жалшымен!
Бай менен молданы
Қойдай қу камшымен!—

деп қосыла әндетіп, шапқылап жүріп уықтарды сыпырғанда, шайқалып кеткен қара шаңырақ, бақанмен тіреуге үлгіртпей үйдің ортасына келіп гүрс ете түсті. Күлдіреуіштерінің күл-паршасы шықты.

— Құдай бетін көрмегір! Көз жасым жібермегір! — деп аңырады бәйбіше.

Күл-паршасы шыққан шаңырақты көріп жиналған жұрт тіксінді.

— “Жайлауынды жау, қыстауынды орт шалды” деген осы да!

— Кесапаты тиер! Қой, балам, кетейік! — деп, жаулығы дағарадай бір кемпір немересін сүйреп үйіне беттеді.

Шаңырақ әлгінде ортаға түсіп күл-паршасы шыққанда бейне өз ордасы құлағандай төбе шашы тік тұрып еді Пахраддиннің де. Бүкшендеп ақшасын жинаған Мажан, оның қолына жабысқан төртбақ бала жігіт Ждақай — Пахраддиннің бұл өмірде көрмеген сұмдығы. “Бұл ел оңбас. Оңбас. Ендігі жердегі тірлігіміз осы болса, өз ұрпағымызбен өзіміз жағаласып

өтетін болсақ, біткен екенбіз. Біткен екенбіз” деп іштей омырылды Пахраддин. Ары қарай беруге дәті шыдамай Мажанмен иек қағып қоштасты да атына мініп аулына қарай жүріп кетті.

Қираған шаңырақты көріп, Ждақайға қатты ұрысты Асан бәлшебек. Ждақай безілдеп қоя берді.

— Асан аға-ау, бұл зәнталақтың шаңырағы қирағанға үрсасыз, бұлар менің қабырғамды қиратты емес пе! Міне, қараңызшы! — деп, жейдесін түріп жіберіп қамшы ізі айшықтаған арқасын көрсетті.

— Давай, бұзақылықты доғар! Айтқанды істе! — деді Асан шолақ бұйырып. Арық кара талдырмаш көрінгенімен өңі сұсты, ашуы қатты еді Асанның. Ждақай майпаңдап сала берді.

— Құп, аға, құп! Қасқа Ждақай екі айттырмайды ғой! Екі айттырмайды.

Ымырт үйіріліп те қалды. Бұл кезде Комиссияның Жорға Күрең бастаған бір тобы жалшыларға азын-аулақ малдарын бөліп беріп, халықтың нобайы үй-мелеген Мажан үйіне қарай беттеген. Жылап-сықтау, шаң-шұң айқай да осы маңда. “Жер ауып, келмеске кеткелі” жатқан Мажанның үйін қоршаған ел кеш қаранғысын жамылып келіп тұрған жалғыз аттыны байқаған жоқ. Бұл — жалғыз атты аңнан қайтқан Бұлыш еді. Соңында — тазысы. Иығында — мылтық. Екі кештің арасында боздаған бәйбішенің дауысын алыстан құлағы шалып осылай бұрылған.

Ждақай, Қозбағар, Шегелер Мажанның үлкен үйіндегі дүние-мүлікті арбаға тиеп бола бергенде, бүйір қапталда тұрған отау үйден шаң-шұң айқай шықты. Ышқынған әйел дауысы:

— Шық үйден! Шық! — деген Балқияның үні. Іле отаудың есігі сарт ашылып, бүрмелі ақ көйлектін етегі көлең етті. Жалаңбас, шашы тарқатылып кеткен

Балқия, үн-түнсіз жабысқан бір еркекті қараңғы үйден сүйретіп сыртқа ала шықты. Жеңсізінің өңірі ағытылып кеткен қайқы төс мықынды келіншектің белінен ұстап алыпты Бұқарбай мелиса.

— Жібер! — дейді Балқия жұлқына алысып.

— Әй, кәмпескеге қарсысың ба? Мына алтын-күмістерінді өткіз, тәртіп солай! — деп кілбік көз, әукесі салбыраған гүжбан қара Бұқарбай қарулы келіншекке әлі келмей күле береді.

— Мә, мына қызықты қарандар! — деп шу еткен бала-шаға, қатын-қалаш дүркіреп отауға ұмтылды. Сөйткенше, Балқияның білезікті ақ білегі жарқ ете қалды. Сақина, жүзікке толы ауыр жұдырығы, ебедейсіз құшақ жая берген күмpek қара Бұқарбайдың тұмсығына сақ етті. Бұқарбай танауын басып бүгіле қалды.

— Қағынды келгір, сазайын! — деп ашуға булыққан Балқия басын сілкіп тастап, шашын жөнделді. Омырауын түймеледі.

— Бұл не? — деп жұртты қақ жарып жүгірін жетті нәшендік мелиса Сүржекей.

Бұқарбай:

— Мажанның тоқалы... дүниесін кәмпескелейін десем... сабатаж жасап... алыса кеткені! — деп бастығына болған жайды баян етті.

— Ие саған! Қараңғы үйге кіріп кеп... “Кәні шешін, табарыш!” деп алыса кеткен кім? — деп Балқия да бет бақтырар емес.

— Е, “шешін” демей не дейін, үсті-басың толған байлық! Оны кәмпескелеу міндетіміз! Тәртіп солай!

Сүржекей:

— Дұрыс айтады. Кәнеки, өз еркіңізбен беріңіз мүлкіңізді! Әйтпесе, тартып алуға хақымыз бар! — деп дікектеді Балқияға.

— Дүние керек болса ала бер ана байдың малын! Менің қолымдағы сақина-білезікте не әкелеріңнің құны бар? — деп қайтпады Балқия да. Көпшіліктің сыртында түн жамылып келіп тұрған Бұлышты көріп, әсіресе, батылданып кетіп еді. Балқияны баяғыдан сүйетін Ждақай не істерін білмей жаны қыдырып, осындайда арқа тұтар Асанды іздеп “Қызыл отау” жаққа ұмтылды.

— Асан аға! Асан аға! — деп айқай сала жүгірді. Асан алдынан қарсы шықты.

— Асан аға! Анау Бұқарбай Мажанның тоқалымен шатысып... қиқу болып жатыр! Асан аға!

Бұлар жеткенше ақ отаудың есігі алдында опыр-топыр жағалас басталып та кетті. Ымырт қараңғысында ақ көйлегінің етегі ағараңдап еркекпен алысып жүрген әйел көрінді.

— Иттің балдары! Бү қайсың! Доғар! — деп қатты жекіп ұмтылды Асан бәлшебек.

— Ойбай! Көтек!

— Құрсын! Масқара!

— Мынау масқара ғой! — деп шу-шу етті қатын-қалаш. Шеге:

— Жәке! Бү не сұмдық! — деп атылып кеп Сүржекейдің кеңірдегін жұлып алатын кісіше иек астына жетіп барды.

— Қаншай сабатаж! — деп Сүржекей кабурге жабысты. Сөйткенше, Балқияның:

— Хайуан! — деп ышқынып жылап жіберген үні шықты. Бұқадай көзі аларып алған Бұқарбай асау келіншекті тақымын жарқыратып жығып салып тізеге басқан. Үстіндегі асыл тас моншақтарын бытырлатып үзіп, қолындағы сақина, білезіктерін сыпырып жатыр. Төңірек у-да шу. Қызық көргісі кеп итермелесіп үй-мелескен бала-шаға.

— Көте-ек!!! — деп бір қатын баж етіп қапталға ыршып кетті. Ортаға екпіндетін кірген атты кісі ысқыртып қамшы көтеріп келіншектің үстінде түқшыңдаған бітіккөз Бұқарбайдың аю жотасынан тартып-тартып жіберді. Бұл Бұлыш еді. Бұқарбай қайқаң етіп ұшып тұрғанда жағасына жабысқан темір шеңгел ес жидырмай дірдектетіп, көкпарша сүйретіп ала жөнелді. Шегенің:

— Ойбай, Бұлыш аға, пәлесіне қаласыз! — деген жан дауысы шықты. Дүрсілдеп қуған адам.

— Сабатаж! Сабатаж! — деген айқай, оған іле тарс-түрс мылтық атылды. Оқ ызындап Бұлыштың төбесінен ысқырып өтті. Бұлыш жібермеді Бұқарбайды. Иттер қосыла қуып аты үркіп ауылдан оқшау шығып та кетті. Қырылдап, Бұлыштың қолына жабысқан Бұқарбай кімнің тақымында келе жатқанын енді біліп, ауылдан ұзай береді:

— Жазығым не еді, Бұлыш аға?! — деп зар-зар жылады.

— Иттің баласы, осы елден шыққан бөкмұрын емеспе ең! Көзіңе шел біткен екен сенің, сыпырып алайын!

— Бу-бу... Бұлыш аға... Не жазығым бар? Б-байдың тоқалы.

— Тышқақ лакша бауыздайым... қазір... иттің баласы!

Ауылдан ұзап оңаша шыққасын атты іркіп, қапталда саландаған Бұқарбайдың жағасынан көтеріп, алдына өңгеріп алды. Түншығып онсыз да жалпақ беті камырдай ісіп кеткен Бұқарбай шалқасынан “қырр”, “қырр” етіп алдында жатыр.

— ... Иттің баласы... Балқияға қолыңның ұшын екіншілей тигіздің екен өз қолыммен бауыздаймын! — деді Бұлыш. — Есіттің бе?

Бұқарбай бас изеп “қырр”, “қырр” етті.

— Есітсең... ұмытпа осыны! — Бұлыш тынысы тарылып әлсірей бастаған Бұқарбайды жерге лақтырып тастады. Анау жаны жоқ денедей сылқ ете түсті. Ауыл жақ азан-қазан. Бұлыш түнге сүңгіп жоқ болды.

Мажан аулындағы көмпескенің аяғы былай болды. Мажан бәйбішесімен со түні Темірге айдалды. Одан әрі қайда кетерін Құдайдың өзі біледі. Балқия Асан бөлшебектің көмегімен байдан бас бостандығын алып, ермей қалды. Сұржекей мен Асан қатты қақтығысты сол түні. “Бұның солшылдық” деп ұрысты Сұржекейге Асан. “Ал сенікі барып тұрған “байшылдық” деп Сұржекей Асан Айтжановтың өзіне тарпа бас салды. Мажанның малы ауданға айдалды. Ертесіне ертелетіп Айтжанов басқарған комиссия бірнеше арбамен Пахраддин аулына қарай бет алды.

Пахраддин мен Сырға бәйбіше со күні түнімен ұйқы көрмей үйдегі дүние-мүліктің бәрін сыртқа, есік алдына үйді. Кеше кешке Мажанның ауылынан түсі бұзылып келген Пахраддин үйге кірер-кірместен:

— Көрпе, төсек, қазан-табағыңнан басқасының бәрін шығар үйден! Үйді босат! — деді. “Ошак басымызды ойран етпей тұрғанда артық нәрсені, құрысын, өзіміз-ақ бөліп берейік” деді. Бұл ақылды Сырға бәйбіше де қостай кетті.

— Құрысын... дүниесі құрысын... Басыңның аман қалғанын айтсай... — деп жүр Сырға бәйбіше.

Ауылға таңертең мал өре келіп кірген комиссия Пахраддин үйінің алдындағы үюлі дүние — қат-қат кілем, тең-тең мата, қымбат ішік, тондарды, ірілі-ұсақты жиһаздарды көріп қайран қалды. Есік алдына

шығып құрметпен Пахраддиннің өзі күтіп алды комиссияны.

— Бір киер киім-кешек, көрпе-төсегіміз, қазан-табағымыздан өзгенің бәрі осы, жігіттер! Үйге кіріп көріңіздер!— деп Айтжановқа есік ашып ізет қылды. Құрамында Жорға Күрен, Шеге, Ждақай, Қозбағар және түндегі екі мелиса бар комиссия үйге кірді. Саудырап кіріп келген түсі суық қонақтардан ығыса үркіп босаға жақта тұрған Сырға бәйбішеге комиссия мүшелері түгел сәлем берді. Есіктен кірген кезде іркіліп үй ішіне қарады бәрі. Басы артық дүние көре алмай таң қалды. Жалғыз ғана босағаға ілулі күміс ер-тұрманды қолтыққа қысты Бұқарбай.

— Бү кісі жаяу жүрсін дегенің бе? — деді Айтжанов.

— Нешауа, жаяу жүрсін! — деді, Бұқарбайдың орнына Сүржекей жауап беріп.

— Алсын! Алсын! — деп бәйек қақты Пахраддин. Жүк астында жалғыз қара кебеже тұр еді, Сырға іріктеп киім-кешегін салған. Оған ешкім тиіскен жоқ. Сөйтіп, есік алдындағы үюлі мүлікті алдымен тізімдеп, қағазға түсіріп, содан кейін арбаға тиеп комиссия сәске түсте ауылдан аттанып кетті.

Бұл ауыл, өстіп, көптен күткен “кәмпескені де” бастан кешкен еді.



ҚАШҚЫН АУЫЛ

1

Жан-жағы шағыл құм, сексеуілді түлей ішінде бой жасырып бір ауыл отыр. Қоңыртөбел елу-алпыс үй. Елден жырақ осынау ит арқасы қияндағы құмайт арасына ойдан қырдан келін бас қосқан бұл ауыл “кәмпескеден” үріккен елдің бір шеті. Үстірттің құс қанаты талатын сусыз қиян іпөлінен отіп бұнда келіп жатқан өкімет жоқ. Тыныш. Тағдыр желі қанқобелек айдап әкеп Хансұлуды да осы ауылдан бір-ақ шығарған. Оған да бір жыл өтті.

Хансұлу ауыл сыртындағы құмаршық, селеулі бұйратқа қарай Қаракерін текіректетіп келеді. Үстінде қынама бел қара пүліш кәмзол белін қызыл жібек түрмемен таңып алған. Басында үкісі бұлғақтаған кестелі тақия. Күнге, желге тотыққан сопақша сұлу оңінде көптен ойын-күлкіні ұмытқан қалып бар. Ерні сәл түріліп, ұзын қайқы кірпігінде шаң іркілген. Назары тұнжырап шаңыт көшіп буалдырланған көкжиекке қарайды. Кімді, нені күтеді, оны өзі де білмейді. Қозбағарға матап берген елдің қармағынан құтылып Әзберген ағасына еріп түн жамылып қашқан күн қуаныштан жүрегі жарылғандай еді. Бостандыққа қолы жеткендей еді. Бірақ ол қуаныш ұзаққа созылмады. “Ертеңіміз не болар екен?” деп қалың сексеуілдің ішінде бұғып, қорқып-үркіп отырған қашқын ауылға тап болды. Иті екеш итіне шейін қаттырақ үруге жасқанатын сияқты бұл

ауылдың. Балалары да елдегідей асыр салып ойнамайды.

Түтіннің саны қырықтан асқан шамада бұл ауылға “басшы сайлау керек” деген бір дерт жабысты. Қызыл кенірдек күнде айтысады да жатады, күнде тартысады да жатады. Сол айтыстың ден ортасында ылғи да қалың қабағы түсіп, тұнжырап Әзберген отырады. Асқабақтай қыртыстанған көктұқыл жалаң басын сипап қойып ақсақал, көксақалдардың сөзіне қырын отырып құлақ тігеді. “Бұл ауылға басшы керек, ақылшы керек. Жау жағадан алғанда суырылып шығатын батыр керек” деп қаумалаған көпшілік, ақыры бірмойын Әзбергенді ырқына жығып Жылыбұлақтағы жалғыз үй мешіт күзетіп отырған Лабақ ахундікіне аттандырған. Өкімет тәртібіне көнбей жырақ шыққан ел атынан үш-төрт кісі тағы да ере барған. Бұл елде Пахраддиннен өзгені тыңдамайтын тақуа шалды қозғау онай тимес деп құралып барған. Барса, Лабақ ахун қолында аса таяғы тірі аруақтай ағарып қыр үстінде тұрады. “Ау, жұртым, сіздер маған сөз рәсуа етпеңдер! Мен көшсін десеңдер, алдымен анау, садаған кетейін, Барақ бабамның жиеніне барындар. Сол Бұлыш деген жаман немені үгіттендер! Оқ қағары бар бұл елден бір батыр шықса, содан шығар” дейді. Содан Әзберген бастаған топ лажсыздан ат басын бұрып, Шошқакөлдің басында өкіметтен бой тасалап жүрген Бұлышты іздеуге шығады. Бұл кездерде өкіметтен қашып жүрген Бұлыш елсіз көлді қоныс етеді. Сүржекей ізіне қанша түссе де шалдыртпайды. Балқияны бір түнде ұрлап отауымен көшіріп әкетеді. Сөйтіп, шығандап елсізге асады. Бү төңіректің ат тұяғы жетер қойын-қонышын бес саусақтай білетін мерген, жағасы қалың Шош-

какөлді мекен етеді. Өзберген бастаған топ Шошқа-көлдің жағасын аралап, оңды-солды сүзсе де Бұлышты таба алмай дымы құриды. Тапа-тал түсте Өзберген бастаған топ жыңғылдың көлеңкесінде тынығып жатса мылтығын кезеп қамыстың ішінен Бұлыш шыға келеді. “Жөндерінді айтындар, кімсіндер?” деп айқайлайды. Жоғы табылған Өзберген бастаған топ қуанғаннан жамырап қоя береді.

Ахун мен Бұлыштың бұл ауылға көшіп келуі қашқын жұртқа үлкен демеу болды. Әйел, бала-шағаға шейін еңсе көтеріп бүгінде жайраң қағады. Араларына күдірет иесі ғұлама ахун келді. Атқан оғы зая кетпейтін атышулы мерген келді. Оның үстіне ана жақтан адай, мына жақтан табын, әлім арасынан шығып қосылып жатқандар тағы бар. Молығып толығымен қатар ынтымақ ауызбірлік те күшейді. Бұрынғыдай қызыл кеңірдек керіс жоқ. Бәрі жиналып сақал-шашы аппақ кудай Лабақ ахунның аузына қарайды. Шаршы топтың алдында шаршау дегенді білмейтін кәрі тарлан біресе термелеп, біресе мысал сөзді ілмелеп сазды дауысы саңқылдап отырғаны. Жұртты түгел ұйытып қыбыр еткізбей аузына қаратады. Сол кемеңгер қарттың нұсқауымен бұл ауыл Бұлышты басшы етуге ұйғарды. Сол үшін бүгін ала көбеңнен күллі ауыл еркектері “Барақ атаның” басына аттанған. Кешегі қалмақ заманында қазақты жауға бермеген әйгілі бабаның басында анттаспақ. Ауылда қатын, бала-шаға ғана қалған.

Күн райы таң атқаннан бұзылулы еді. Дауыл боларға көрінген екен. Қазір, Қаракерін текіректетіп селеулі құмсақ шағыл үстіне шыққан Хансұлудың көзін суырған құм аштырмай тұр. Ызғып жортқан ақ шаң борасынмен қабаттасып қылт-қылт туындап

арқа тұстан бір шолақ көш көрінді. Шаң перденін тасасында жоғалып көзден ғайыптанып біресе көрінбей кетеді. “Елес емес пе?” деп аласұрған Хансұлу атын тебініп үңіліп шұқшия қарады. Елес емес. Төрт-бес түйелі, атты көш жел қуған қаңбақтай дірдек қағып келеді. Атты кісілердің иығында шошайған мылтық. Хансұлудың жүрегі зу етті. Бұл ауылдың қорқатыны әскер ғой.

Хансұлу атының басын ауылға қарай бұрып қамшыны басты. Сексеуілді ойпаң түлей арасында ұйлығысып отырған ауылдың бірсыпыра әйел, балашағасы шашырап сыртта жүр еді. Қатты екпіндеп келген Хансұлу:

— Жеңеше, — деп атынан дік етіп секіріп түсті.

— Ау, Еркежан! — деп Рәш жеңгесі (Әзбергеннің келіншегі) сасқалақтап қайын сіңлісіне қарсы жүгірді.

— Жеңеше! Мылтықты кісілер келеді! Әскер ме деймін! Ел жақтан!

— Ош қасқа! Енді қайттік?!

— О не? — десіп, әйелдер жиналып қалды. Қапелімнің арасында ауыл қым-қиғаш дүрлігіп кетті. Балалар келе жатқан жауды көзбен көруге асығып қыр басына қарай ұмтылды. Сол-ақ екен қатындар:

— Қайт, қағынғыр, қайт! Тұра жүгіруін әкесі келатқандай! — десіп, ақырып-жекіріп балаларды үйге қуып тықты. Сөйткенше, қалтарыстан сау етін төрт-бес түйеге жүк артқан көш, іле мылтық асынған төрт-бес қызыл әскер шыға келді. Әйелдер бықпырт тигендей шуылдап үйді-үйіне қашты.

— Ойбай! Ойбай!

— Құрыдық! Қасқайдық!

Балаларын арқалағаны арқалап, жетектегені жетектеп сүріне аттап үйлеріне топырласып кіріп жатыр.

Түйе сауып тұрғандары көнек шелектерін тастай сала қашты. Сүттері ақтарылып қалды.

Әйел бала-шағаның дені Әзбергеннің үйіне кіріп кеткен. Зәре-құт жоқ. Кемпірлер немерелерін бауырына қысып зар-зар етеді. Балқия, Хансұлу да осы үйде.

— Ау, халайық, неге қаштыңдар! Жау емеспіз! Өкімет адамдарымыз! Тілдесіңдер! — деген дауыс шықты сырттан.

Жұрт дір етті.

— Құрысын... мынау Асан ғой! — деп сыбыр етті, Балқия бетін сызып.

— Онысы кім тағы? — деп іргеге тығылып отырған бір кемпір күңк етті.

— Асан бәлшебек тағы! — деп қалды бір әйел жұлып алғандай.

— Соның дауысы, — деді Балқия сыбырлап.

— Ау, хабарлас! Ау! Құдайы қонақпыз! — деп айқайлады әлгі дауыс, дүңкілдеп.

— Келін-ау, таниды екенсің!.. Бой көрсетсейші!.. Үйге кіріп келіп жүрер... Құрысын! — деді әлгі кемпір.

— Ие, сойт! — деп қатын-қалаш жамырап қоя берді.

— Е, көрінсе несі бар, көрінейін! Көрмей жүрген Асан емес қой! — деп Балқия жаулығын түзеп жіберіп тосін қайқаң еткізіп сыртқа беттеді. Үйдегілер Балқияның батырлығына қайран қалып бас шайқады.

Ақ көйлегінің етегі көлең етіп ортадағы қоңыр үйден дембелше бойлы ақ сары келіншек жайнандап шыға келгенде Асан бастап келген топ — Сүржекей, Бұқарбай мелиса, Шеге, Ждақайлардың көздері жарқ еткендей болды.

— Мінекей, іздеген жоғымыздың бірі алдымыздан шықты, — деп басында орыс кепкасы бар арық кара

Асан ырсиып күлді. Беті шалбарланып кететін баяғы күлкісі.

— Жоғымыздың бірі екені рас, бізге керегі екіншісі ғой, әттең... — деп қойды Сұржекей төңірекке тінте көз тастап. Сұржекейдің ойын түсінген Балқия:

— Ол “керегіңіз де” келіп қалар көп ұзамай! Күтіңіз!— деді қырыстанып.

— Ал Балқия, бұл ауылдың бөріктілері қайда?

— Келіп қалар... дедім ғой?

— Сонда бұ... қайда кеткені... олардың?

— Өны келгесін өздерінен сұрай жатарсыздар! Үйге кіріңіздер!

Суырма желден мазалары кетін тұрған Асан мен Сұржекей бір-біріне қарады. “Не істейміз?” дегендері еді. Асан шешімге келді.

— Қазір... Қазір кіреміз!— деді Балқияға ізетпен бас иіп.

Келіншек ішке кіріп кеткеннен кейін Асан мен Сұржекей ақылдасты. “Қырдың астында бұғып жатып, үйге кірісімен тарпа бас салмасын, әлгі келіншектің шайға шақыруы тегін емес” деді Сұржекей. Ауыл маңынан шолып шығуға Шеге мен Ждақайды жұмсады. Бітік көз Бұқарбай аттардың қасында қалып, Асан мен Сұржекей әлгі Балқия кіріп кеткен үйдің есігін ашты. Өңшең кемпір-сампыр, әйелдер өре түрегеп, кейін шегініп жол берді. Түстері қашып кеткен. Балқия ортадағы тұрған мосыға шәйнек іліп жатыр екен.

— Ау, неге қорықтыңыздар? Немене кепкі киген кісі көрмеп пе едіңіздер? — деп Асан әзіл айтып төрге озып, көрпешенің үстіне тізе бүкті. Бесатарын керегеге сүйеді. Сұржекей де отыра беріп:

— О-го, және бір жоғымыз табылды! — деп босаға тұста үркінкіреп тұрған ұзын бойлы шалбарлы қыз

Хансұлу жаққа иек қақты. Асан киіктің лағындай көзі жалт-жұлт еткен бидай өнді бойшаң сұлуға бір ауық назар ірікті. Күйеуін менсінбей бүкіл елді шулатып қашып кеткен қайсар қалыңдықты содан бері көріп тұрғаны осы. Хансұлу бәлшебек Асанның шүкшиған назарынан ұялып ығысып қалды. Кекселеу әйелдер жағы тізе бүгіп отыра бастады.

— Қорықпаңдар! — деді Асан, әйелдердің үрпиген түрлеріне қарап. — Сіздерге істейтін жамандығымыз... әрі кетсе... елге қосу ғана. Басқа мақсат жоқ бізде.

Кемпірлер суық демдерін алды. Тонторыс үнсіз күйде бәрі. Үшбұт мосыға ілінген қара шәйнек қана зыңылдайды. Үйдің түндік бауларын ұрғылап сыртта жел гулейді. Ат тұяғының дүрсілі естілді.

— Асан аға! — деген Шегенің ащы үні шықты. Алдымен Сүржекей ытып кетті. Іле Асан да ұмтылды есікке. Үйдегі қатын-қалаш дүрлігіп қалды. Бірақ сыртқа шығуға қорықты бәрі. Хансұлу Шегенің дауысын естіп елең еткен. “Анық сол ма?” деп Шегені өз көзімен көргісі келіп есіктің саңылауына еңкейді.

Кемпірлер сарнап жатыр.

— Иә, жаппар ием!

— Иә, Барақ ата! Иә, Бекет ата! — деп.

Хансұлу есіктің жақтауына жабысып сыртқа көз тікті. Байлаулы тұрған аттарына қарай жүгірген әлгі екеуді, олардың қасында сары айғырдың басымен алысып шығыс тұсқа камшысының сабын шошаңдатып тұрған Шегені көрді. Оның да басында былғары орыс кепкі. Бірақ үстінде әлгілердікіндей қызыл әскер киімі жоқ. Белін белдікпен буған жүн шапан. Иығында — мылтық. Мынау баяғы “ақсүйекке” таласып жүретін қара сирақ ШеҒе емес, дегенмен. Түсі суық пышақтың қырындай таралып өскен естияр жігіт. Әнеки, ар жағынан далбактап шауып Жлақай

келеді. Асанның қасына жиналып жатыр. Күн жел-кем. Олардың не деп жатқаны естілмейді.

— Қаптаған қол... Асан аға... Қаптаған...— деп ышқынған Ждақайдың дауысы ғана үзік-үзік жетті құлағына.

— Біздің адамдар келеді білем... — деді Хансұлу, үй ішіне естірте.

— Иә, сақтай гөр! Ата-бабалар аруақтар жар бола гөр!

Сөйткенше ауыл алдындағы қалың сексеуіл арасынан шоғырланып топ атты ауыл адамдары шыға келді. Ақ түйесінің шудасы желпілдеп арасында ахун келеді. Ауыл шетіндегі әскерді көріп қалса керек, алғы шептегі бір атты әжептарқы айқайлап жіберіп, жалт берді. Үркердей топ кейін серпіле түсіп іркілді. Қаруларын жалма-жан қолға алды. Ахун ғана сасқан жоқ. Түйесін алшаңдата желдіріп алға оза берді.

— Бауа, тоқтаңыз! Ауылда әскер бар! — деген айқай-ұйқайға көңіл бөлер емес. Әлдебір дұғаны танау астынан ыңылдаған күйі мылтықтары шошайып ауыл алдында иіріліп тұрған бес-алты аттыға қарай желпілдеп желіп келеді. Ысқырған жел түйе табаны астынан бүрк-бүрк шаң алып қашып жатыр. Шалдың алдынан Асан бөлшебек атын тебініп қарсы шықты.

— Ассалаумағалейкум, ахун бауа!

— Уағалайкүм-ассалам, балам. Жол болсын!

— Айтқаныңыз келсін, бауа! Бірлік іздеп қалдық.

— Лекин... Бірлікті қарудың күшімен іздемес болар, балам!

— Рас, бауа! Сұхбатқа көшелік онда!

Түйе үстінде отырған шал ойланып аппақ сақалын саумалай берді. Ақ кірпігінің астындағы нұрлы кәрі

жанарында ой тұнған. Әлден соң түйесін бұрып анадайда иіріліп тұрған топқа қол бұлғады. Аналар не істерін білмей дағдарды. Ахун:

— Жүрсендер, әй, өңшең су жүректер! Елуі тұрып бес адамнан қорқады-ай! — деп бас шайқады. Бір-бірлеп еріп тыста қатын-қалаштар бой көрсете бастады. Сүржекей, Бұқарбай мелисаларды көріп ит көрген мысықтай жиырылып келеді ауыл еркектері. Алда — Бұлыш. Өл да шықшыты шодырайып тістеніп іштей шиыршық атады. Ортада тұрған Лабақ ахун мен Асанға жақындай беріп іркілді. Қалғандары алысырақ тоқтады.

— Ассалаума-ғалейкум, Ас-еке! — деді Бұлыш. Сүржекей мен Бұқарбайды әдейі көрмегенсіді. Асан:

— Ал азаматтар, аман барсыздар ма? — деді ширақ дауыстап.

— Шүкір!

Сол-ақ екен қалың нөкер:

— Ау, өкімет сау болса, біз де саумыз! — деп жамырап қоя берісті. Асан:

— Ал жігіттер! Жауласқалы емес, елдескелі келдік. Өкімет атынан келдік. Айтар сөзіміз бар өздеріңізге! Басшыңызды кім деп білеміз! — деді көпшілікке қарап.

— Басшымыз — Бұлыш, ақылшымыз — ахун! — деп топ аттының ортасынан қызыл бөрікті бүйрек бет жігіт шаңқ-шаңқ етті.

Түйе үстінен Лабақ ахун:

— Уай, Асан балам! Сұхбат дегенді үйде отырып айтар болмай ма? — деді сақалын салалап.

— Ахун бауа! Күллі жұрт естісін деген сөзіміз бар еді...

— Ләббай, болсын айтқаның. Уай, жиналындар түге!

Лабак ахун ыргайдай арық мойнын созып жан-жағына қарады. Бү кезде көпшілік онсыз да анталап жиналып қалған еді.

Атын тебініп, түксиіп Әзберген жақындады Бұлышқа.

— Былай жүрші! — деді күңк етіп.

Әзберген мен Бұлыш екі атты болып жұрттан бөлініп шаңытқан далаға қарай шыға берді.

— Құлағым сенде! — деді Бұлыш Әзбергеннің түнерген қабағын жақтырмай. Бұлыш осы пәтшагарды о бастан суқаны сүймейтін. Кедей-кембағал, жетім-жесірге тізесін батырмаса ішкен асы бойына тарамайтын осы әпербақанды көргенде бұның да арқасы құрыстап қоя беретін. Іштей тиіссе екен деп тілейтін. Тәубасын келтірін жұдырық сілтегеннің не екенін көрсетіп өзін бір илеп алар еді. Бірақ Әзберген өлсе бұған жоламайтын.

— Сен, немене, анау алжығанға еріп шоқынған кәмөнесті тыңдағалы тұрсың ба? — деді Әзберген дүңк-дүңк етіп. — Оның жыры белгілі, одан да сөйлеттірмей басын қағып алу керек! Оның емі сол!

Бұлыш өңкиген шомбал қара Әзбергеннің түр, әлпетіне бағжырайып тіп-тік қарады. Әзбергеннің түк басқан қалың беті бүлк етер емес.

— Сен не көкіп тұрсың? — деді Бұлыш та бүрк ашуланып. — Бізді банды етіп, бүкіл өкіметке қарсы қоймақсың ба?

— Кәмөнестің басын алғың келмейді екен ғой... — деп қалың беті түтігіп, қанасына сыймай атын тебініп бір орында шыр айналды Әзберген. — Онда көр де түр, сенің басыңды ертең ол алады!

— Жауласуға емес, елдесуге келіп түр бұлар!

— Шоқынғанға сенім жоқ! — деп ақырды Әзберген, көзі қанталап. Бұлыш мына кәпірдің түрінен сескенейін деді.

— “Сенім жоқ” болғанда не істей алады, небары бес-ақ адам?

— Сөйлемесін, керегі жоқ сөзінің! Ортамызда тұрып басынбасын! Бас керек болса кетсін! Жоғалсын!

— Әзберген! — деді Бұлыш ашуын ақылға жеңдіріп. — Сен тек өзінді ойлаулы... Ізімізге ерген ел бар, қатын, бала-шаға бар. Мен соның қамын ойлаулы...

Осыны айтты да Бұлыш атының басын жиылған топқа қарай бұрды. Бұлыштың ту сыртынан оқты көзімен ата қарап аласұрды Әзберген. Әзбергеннің қасына кәмпеске болған Мажанның үш ұлы Мотан, Шотан, Қапандар топ құрап шапшаң жиналып қалды.

Бұлыштың келуін күтіп тұрған Асан бәлшебек атын тебініп ортаға шықты. Жиылған қауым Асанның аузына қарады.

— Ау, жұртым! — деді Асан ашық дауысы саңқылдап. — Ал менің бір сұрамағым бар сендерден!

— Ай, бәрекелді, сұра!

— Сұра! Сұра!

— Ал жұртым, сендер елден қашқанда, өкіметтен қашқанда қайда бармақсыздар? Әлде бас құрап өкіметті төңкермек ниеттесіздер ме? Соны айтыңдаршы!

Көпшілік гуілдеп толқып кетті.

— Токтаңдар, біреуің айтыңдар! — деді Асан бәлшебек.

Ақ түйенің үстінде аппақ сақалын саумалап отырған аққудай ахунға қарады көпшілік. Ахунның сөзі дайын екен.

— Уай, балам! — деп Асанға бағыштап сөйледі. — Уай, “Үйірінен қаңғыған тұлпар оңбас, тұғырына саңғыған сұңқар оңбас” деген. Біз хокиматпен белдесіп береке табамыз деп айтпаймыз. Хөкимат алдымыздағы малдан, аузымыздағы дұғадан, көші-

қонмен жүрген еркіндігімізден айырса қазаққа одан артық өлім бар ма? Елден безген бетіміз содан-дүр. Алдымызда не күтіп тұр? О жағы бізге қараңғы.

— Дұрыс айтады ахун!

— Бәрекелде... сөз-ақ! — деген қошемет айқайлар естілді.

— Ахун бауа! — деп тағы айқайлап сөз бастады Асан.— Бұл ауылдың өкіметке деген үш өкпесін айттыңыз! Енді сол өкпе орынды ма, соны айтайын, ау, ағайын, аздап құлақ сал! “Өкімет малды алды” дедіңіз. Рас. Малды алғаны рас. Бірақ байдың малын алды. Алды да кедей-кембағалдың, жоқ-жітіктің алдына салды. Қалғаны мемлекет мүлкіне айналды. Айналып келгенде ол да халықтікі. Бір ме?! Екінші — “ауыздағы дұғадан айырды” дедіңіз. Халық аузындағы дұғасын тастасын деген заңды көргем жоқ. Екі ме? Үшінші — көші-қонмен жүрген ел едік, “еркімізден айырды” дедіңіз, ахун бауа! Бұныңызға айтар дауым бар! Заман алға озды. Ат жалын тартып мінген киіз туырлықты қошпенділер отарба, айырланды замана жүйрікке жете алмады. Далақтап артта қалды. Ең болмаса мына іздеріне ерген шиеттей балашағаның обалын неге ойламайсыздар!

Осы жерде атымен екпіндеп кимелеп жұртты бұзып-жарып ортаға шыға келген Әзберген қамшымен Асан бөлшебекті қақ бастан тартып жіберді. Асанның кепкасы ұшып түсті. Маңдайынан қан саулап берді. Опыр-топыр болды да кетті төңірек. Жаяу жұрт бытырап тұра қашты. Аттылар алысып араласып кеткендей. Тарс-түрс мылтық атылды. Көпшілік ішінде тұрған Хансұлудың байқағаны Шегені біреу, шамасы, Шотан болуы керек ат үстінен сыпырып алып жатты. Сүржекей, Бұқарбай мели-

саларды жігіттер көзді ашып-жұмғанша мылтықтарын тартып алып қолдарын қайырып байлап тастапты. Ждақайды біреу топыраққа аузын былғап бақыртып тепкілеп жатыр. Әзберген Асан бөлшебекті көкпарша сүйреп тақымға ала бергенде, Әзбергеннің желкесінен Бұлыш қона түсті. Лабақ ахунның түйесі үркіп өзі шеттеп шығып кеткен. Оның сөзін ешкім елеп тындап жатқан жоқ. Шаңыт аралас қым-қуыт аласапыран. Жаяу халық, ішінде Хансұлу да бар, үріккен қойдай серпіліп анадай жерге барып іркіліп бұрылып қарап тұрды. Асан бөлшебек, Сүржекей, Бұқарбай мелиса, Шеге, Ждақайлар қолдары арттарына байлаулы аузы-бастары қан-қан болып жерде жатты. Енді үрпиген қалың нөкердің алдында, жаяу алысып жүрген Бұлыш пен Әзберген еді. Жұрт абыр-дабыр, у-шу, кім-кімге жақ, бұрысы қайсы, дұрысы қайсы біліп болу мүмкін емес. Озінен бойы да биік, әлпеті де зор Әзбергенмен Бұлыштың айқасын дос та, дұшпан да бірауық қаңтарылып, қызыға тамашалап қалғандай. Бітіспес бір-біріне әзелден өш, түздің ызалы екі тағысы аңдаусызда жолығып қалып өліспей беріспес жекпе-жекке шыққандай. Шын басшының тағдыры да кәзір осында шешілетіндей. Екеуі де өлермен, киімдері дал-дүл айрылып жалаң бас алысады. Өңкиген алпауыт тұрықты Әзбергенді, қайың денелі, қабыландай шапшаң Бұлыш айналдырып әкеп біркезде қалың нөкердің алдына былғап ұрды. Жұрт гу етті. Омырылған теректей етпетінен сұлаған Әзбергеннің қолын жауырына сындыра қайырып арқасына қонжиып мініп алған Бұлыш:

— Әкел жіпті! — деп ақырды дағдарған топқа қарап. Біреу аттың шылбырын лақтырды. Әзбергеннің қос қолын арқасына байлап болған Бұлыш енді оны әлгі

жатқандарға қарай сүйреді. Тура Асан бәлшебектің қасына сүйреп әкелді.

— Әп-бәрекелді! — дей береді Лабақ ахун.

— Шешіндер қолдарын! — деп жекіді Бұлыш жігіттерге. Өзі Асан бәлшебектің байлауын шешіп жатыр. Мотан, Шотан, Қапан бастаған бір топ айқай салды.

— Дұшпанды неге босатамыз?

— Босатпау керек!

— Ат көтіне байлау керек!

— Коздерін жою керек! — десе, Бұлыштың ісін қолдаған мол нөпір дауыс:

— Бұлыштікі жөн!

— Өкіметпен жаулықтың керегі жоқ!

— Біз банды емеспіз!

— Басымызға тыныштық керек! — десіп айқай салды. Лабақ ахун да:

— Бұлыш баламдікі жөн! Ақылмен іс қылмақ ләзім! — деп жатыр көзін жұма тақуа кейіпке еніп.

Қолдары босатылып ұсқындары қашып орындарынан тұрған өкімет адамдарының алдарына әкеліп аттарын көлденең тартты жігіттер.

— Қаруларын да беріндер! — деп Бұлыш сұсын төкті Мажан балаларына қарап. Бұлыштан ғана емес көпшіліктен қаймыққан Мажан балалары өкімет адамдарынан әлгінде тартып алған бесатар, нағандарын өздеріне қайтарды. Асанда да, Сүржекейде де, Бұқарбайда да, Шегеде де, Ждақайда да үн жоқ. Қаруларын алып, үсті-бастарын реттеп ат беліне қонып жатыр. Жел гулеп соғып тұр. Ышқынып азынап ысқырады. Қара аргымағына мінгесін Бұлыш Асанға қарап:

— Асеке! — деп дауыстады. — “Бір қарын майды бір құмалақ шірітеді” деген екен. Сол айтқан келді.

Бір ақымақтың кесірінен біз міне қарабет бөлулы. Жолымыз енді екі айрылулы...

— Рас айтасың! — деді Асан бәлшебек бетінің қанын сүрткіштеп. — Жолымыздың екі айрылғаны рас. Біз қайттық, ендеше!

Асан бәлшебек атын тебініп қалды. Бес атты саудырап бөлініп шыға келді. Құйрық жалы желбіреген сары айғырдың үстіндегі Шегеден, кетіп бара жатқан Шегеден көз алмай топ арасынан Хансұлу қарайды. Қыздың бүгін байқағаны Шеге өзгерген, өскен. Бұрынғы бала Шеге емес. Құйрық, жалы желге желбіреген сары айғырдың үстіндегі Шеге кенет жалт бұрылып кейін қарады. Топ ішінен назары Хансұлуға түсті. Хансұлу да көз алмай караумен түр еді... Бірақ Шегелер ұзай берді.

2

“Өкімет адамдарының” қарасы үзілісімен ауыл опай-топай үйлерін жығуға кірісті. Бала жылап, ит үріп, түйе бақырып азан-қазан бөлып жатыр. Бұл кезде Лабақ ахун Әзберген мәселесін де бір жөйлі еткен. Әзбергеннің қолын шештіріп Шотан, Мотан, Қапандарды да шақырып алып ер-азаматтардың көзінше ақ сақалын саумалап тұрып пәтуа айтқан. “Уай, Әзберген ұғлым, бүгін біз Бұлышты басшы сайлап баталастық. Сен батаны бұздың. Арамызға іріткі салдың! Көнсең осы, көнбесең жөніңді тап дейміз. Көп тілегі осы!” деп айтты. Әзберген түнеріп ұзақ тұрып бір кезде: “Айып бізден, ахун бауа!” деді кінәсін мойнына алып. Көпшілік Әзбергеннің кінәсін кешті.

Шай қайнатым уақыт ішінде дауылмен араласып дүрліккен ауыл жүктерін түйелерге артып та тастады.

Ақ түйесіне мініп алған Лабақ ахун:

— Ал жаппар ием, жар болғай! Жорытқанда жолымыз, Қыдыр ата жолдасымыз болғай! Тарт, балам! — деді дауысы саңқылдап.

Бұлыш кара арғымағын текіректетіп жолға түсті. Соңынан тізіліп салқар көш қозғалды.

Көзді бұған қым-қиғаш шаңыт әлі ұлып соғып тұр. Көп сексеуілді, аракідік жайдақ құмсақ адырмен күнбатысты оң шекеге ала отырып, кіші бесін шамасында бір ескі молаға түмсық тіреді. Ойпаңнан басталып шағын төбе үсті түгел жауып жатқан өңшен төрт құлақты бейіттер. Саздан, кара тастан аралас соғылған. Қасқайып карап тұрған төртқұлақ тамдар. “Барақ ата”, “Барақ ата” бейіті деген күбір қашты көшті жағалап. Жағын қызыл орамалмен байлап алған Хансұлу бір топ атты қыз-келіншектердің арасында тұрған. Лабақ ахун бас болып ер-азаматтар домаланып аттан түсе бастады. Жұрттың айтуынша, анау төбе басына таман тұрған кәрі сексеуілдің түбіндегі төрт құлақты мола — Барақ атанікі, одан томен ойпаңдағы төрт құлақты тас бейіт оның баласы Асаудікі. Ерліктері жырға, аттары аңызға айналып кеткен әкелі-балалы батырлардың бейіттерін Хансұлудың көріп тұрғаны осы. Жырда айтылатын бүкіл уақиғалар көз алдында тіріліп елестеп жүрегі лүпіл қақты.

Жұрт аруақты бабаның бейітіне жүз беріп тізе бүгіп, бас ие мұлғиді. Лабақ ахун қалың көпшіліктің алдында, жел өтінде ақ сакалы желбіреп отырып әндетіп құран оқыды. Ахунның қазіргі аят оқысы бөлек. Сазды үнін шырқай созып бозінгендей боздап, аруанадай зарлайды. Құлақ түбінен ысқырған жел, бас шұлғыған бұта түгел баянсыз мезгілдей жүйткіген опасыз тірліктен хабар бергендей шал үніне үндесіп

жадау сыңсиды. Аяттың орта тұсында ахун үні бұзылып қалтырап сала берді. Шал орамалымен көзін сүртеді. Сол-ақ екен, қаптап отырған қалың жұрт әйелі, еркегі бар түгел бырсылдап жылауға көшсін.

— Қош, бабам! Қош! Қош! — деп көз жасын сыға отырып ахун аятын аяқтағанда, бордай езіліп отырған жұрт еңселерін көтере алмай бірауық қыбырсыз қалды. Кіндік қаны тамған жер — ата жұртпен ауыл осылай жаназаға жиналғандай жылап-сықтап қоштасты.

Батар күнді бағытқа алып көш тағы салдыртып кетті. Алыс жол, алды қараңғы сапар алдында аңырап дауыс еткен әйелдер жағының да үндері бірсін-бірсін толастап ақыры көкірек айыра күрсініспен тыншыды. Жас, кәрі, қатын-қалаш енді неге де болса белді бекем буған түрлері бар. Түйенің итің ырғағы ғана жұртты бір қалыпты тербеп келеді.

Түнде қалың сексеуіл арасына түйелерін шөгеріп, таң саз бергенше көз шырымын алып ауыл елең-алаңмен тағы көтерілді. Күн шыға Сам құмының кедір-бұдыр бұйраттарын артқа салып, көш Үстірттің жылмиған тегіс айқай жазығына шықты. Толас таппастай көрінген жел де Алланың әмірімен тыйылып көкжиек далиып кеңіп сала берді. Көліктің белін суыту үшін ғана түсте, кеште байыздағаны болмаса ауыл іркілместен үдере тартады. Қауіптері — артта. Қуғын келіп қалама дейді. Жалтақтап, жауды ылғи осылайша желкеден күтіп келе жатқанда, үшінші күн дегенде жау тура маңдай тұстан шықты. Үстірттің тақтай жазығы таусылып, енді бытпылдық құмға келіп кірген еді. Төңіректің бұтасы да іріленіп, өзгеріп сала берді. Қоянсүйек, дүзген, нарселеу тәрізді құм бұталары кезіге бастады.

Келе жатқандары ескі керуен жолы еді. Қазылып төмен түсіп кеткен. Күн нарттай қызарып алыс жал құмдардың басына қона берген шама. Ер-азаматтар бөлек топ болып көштен оқ бойы алда келе жатқан. Алдағы, көлденеңдеп шөккен нардай дүңкіс жотаны айналып өткелі келе жатқан. Сөйткенше, түмсықтың тасасынан саудырап үркердей бір топ атты шыға келді. Өңшең мылтық асынған сеңсең бөрікті салт атты түрікпендер.

Жүрегі зу етті Хансұлудың. “Қазір атыс, у-шу қырғын басталады. Өкіметтен қашып жүргенде енді баспашыға жем болғаны ма?”

— Иә, Барақ ата! Иә, Бекет ата! — деп шулап қоя берді көш.

Хансұлу да пірлерге жалбарынды.

Көшті көріп түрікпендер аттарының басын тартып тұра қалды.

Кош те іркілген. Елді тонап, қыз-келіншектерін олжа ғып алып кететін аты-шулы жауды Хансұлу көзбен көрін тұрғаны осы.

Түрікпендер қиястап жолдан шығып қозғала берді. Әлдене деп қауқылдасқан үндеріне шейін естілді. Өн-бойы мұздап сала берді Хансұлудың. Бұлыш бастаған ер-азаматтар дағдарып тұр. Олар да әккі жаудың мына қылығын ұға алмай дағдарғандай. Бірақ бәрінің көзі капталдай берген жауда. Шекпендерінің белін қатармен шарт буған түрікпен жігіттері қаз мойын сәй-гүліктерін текіректетіп айналып өтіп барады. Бәрінің де бөктерген қоржындары бар. Көшке көз қиықтарын салып өтіп барады. Түйенің пысқырғанынан басқа дыбыс білінбейді. Заржақ әйелдерге шейін жым болған. Баланың да, кәрінің де көзі — түрікпендерде. Түрікпендердің алдында алаяқ жарау торы үстінде

өзінен бөркі үлкен, кішкентай қабасақал кісі барады. Тіп-тік отырысына қарағанда осы нөкердің басшысына ұқсайды.

“Шынымен бір оқ атпай-ақ өткені ме?” деп, Хансұлу тізгінді қысып қарысып қалған уысын әрен жазып, төңірегіне қарады. Жұртта өң-түс жоқ. Есеңгірегендей қалыпта. Сөйткенше, көш тағы дүр ете түсті. Тағы түгел жау жакқа қарады. Қараса, нөкерлерін алға оздырып жіберіп әлгі алаяқ торы мінген қабасақал көлденеңдеп тұр екен. Әлдене деп қол бұлғады. Көшке қарап айқайлады. Көп ұзамай ауыл азаматтарының арасынан Бұлыш жалғыз шығып әлгі түрікпенге қарай жорта жөнелді.

— Жасаған-ау, бұнысы несі?

— Тағы не тапты? — деп әлгі заржак әйелдер сарнап қоя берді.

Бұлыш көп тәжікелеспеді. Екеуі де ат үстінде тұрып шолақ ғана тіл қатысты. Содан кейін қабасақал түрікпен нөкерлерінің ізінен желе шауып кетті де, Бұлыш кейін бұрылды. Лабақ ахун бас болып, жұрт назары түгел қара арғымағын шапшаң аяңдатып келе жатқан шойын қара жігіт Бұлышта. Бұлыш түсі қатулы. Анадайдан-ақ қамшысын алға сілтеп:

— Тарта беріндер! — деді. Дауысы қайратты өжет үкімдей, жұртты жігерлендіріп жіберді.

Көшпен қатар келе жатқан қыз-келіншек тобына Бұлыш хабары жеткен жоқ. Бұлыш түрікпенмен болған әңгімені алдымен ер-азаматтар құлағына тигізді. Көп ұзамай ол хабар әйелдер тобына да жетті.

— Қайдан келіп қайда бара жатқан көш бұл? — депті түрікпен.

— Өкіметтен қашып Ауған асып барулымыз! — деп жауап беріпті Бұлыш.

— Өкіметтен қашпау керек, өкіметпен алысу керек, — депті түрікпен.

— Өкіметпен алысар шама бізде жоқ, — депті Бұлыш.

— Сізде жоқ болса, бізде бар. Шағыл деген құдыққа қарай бұр көшті! Өкіметің көп ұзамай сол құдықтың басында жерленер, — депті түрікпен.

— Бізге әмір етпеңіз, жолаушы! Бұл ауылдың әлі еркі өзінде! — депті Бұлыш.

— Әй, қазақ, өкіметтің құрығынан құтылғанмен Ханжөнейттің құрығынан құтылмассың! — деп түрікпен атын тебініп қалыпты. Болған әңгіме осы. Бұл әңгіменің астары жұрттың үрейіне үрей қосты. “Енді өкшеде жалғыз ғана өкімет емес, тағы бір көкжал — Ханжөнейттің баспашылары да түсті десенші” деп, көпті көрген кәрілер жағы қапа шекті.

Жол жүрген сайын ұшы-қиыры жоқ біріне-бірі мінгескен жал-жал құмдарға бойлап кіре берді. Тап-таза сусыма құмдар оңында да, солында да қалып барады. Сарғайып, алтын шашақтанып кураған құм селеулер. Құмаршық, дүзгендер. Жантақтар. О заманда бұ заман мал тұяғы тимеген, иесіз қу медиен шөл дала. Күн де қайтадан ысыған. Тандай құрғатып, каталатып бетті жалындай шарпып құм аптабы еседі. Көшкен ауыл енді түн баласында ұйықтарда төбе басына қарауыл қоятын болды. Жолда кездескен бірекі құдықтан ауылдың мал-жаны түгел қанып су іше алмай тарығып келе жатқанда суы мол бір құдықтың үстінен түсті. Саршейіт деген құдық екен. Төңірегiнiң түйе жайылатын жантағы да мол. Жұрт жүктерiн түсіріп көлік малды суарып түгел сол жантаққа жіберді. Ауыл кешті осында батырып, таңғы салкынмен жүруді ұйғарды.

Құрамында еріктілер, халық милициясы аралас елу кісі жасағы бар Апанас бастаған отряд қашқан ауылды ескі керуен жолымен қуып келеді. Күн демей, түн демей отрядты алып келе жатқан — Асан Айтжанов. Түрікпеннің Қара құмына кіргеннен кейін үшінші күн бесін шамасында Асан Айтжановтың көзі жұрттан бұрын алыста құм арасында қылт еткен түйенің мойнын шалып қалды. Отряд сайдан шыға берген. Сайға қайта шегінді.

— Мал көрінді. Ауылға жеттік! — деді Асан бөлшебек дүрбісін оңтайлай берген Апанасқа. Апанас дүрбімен алысқа шұқшиып біраз қарады.

— Рас. Жайылған түйелер көрінеді. Түйе баққан бала көрінеді, — деді.

Апанастың бұйрығымен отряд сайда іркілді. Күн батып көз байланды.

— Манағы түйе көрінген төбе басына көз салыңыз! Шошайып тұрған кісі емес пе?! — деді жер бауырлап көкжиекке қалалған Асан. Апанас та еңкейіп қарады.

— Рас, — деді. — Бархан басында қарауыл тұр. Отрядтың дені қазақ жастарынан құралған еді. Солардың ішінен Апанас, Ждақай мен Шегені шақырып алып бөлек сөйлесті.

— Анау тау құм басында қарауыл тұр. Жалғыз адам, — деді Апанас таза қазақша сөйлеп. — Сіздер отрядтағы ең саналы жастарсыздар. Революция атынан бұйрық етемін! Сол қарауылдың дымын шығармай қолға түсіресіздер! Шамаларын келгенінше қолға тірі түсіріңдер! Біз ауылды ұйқыда жатқан таң қараңғысында басып қалуымыз керек. Өйтпеген күнде олар атқа отырып қарсыласып кетсе қантөгіс болады. Ұқтыңдар ма?

Отряд командирінің алдында әскерше тіп-тік тұрған екі бала жігіт, көздері жайнап:

— Ұқтық, жолдас командир!— деп қосарласып жауап берді.

— Бұл сіздердің алғашқы жауынгерлік тапсырмаларың! Бұлжытпай орындайсыздар деп сенемін! Көп ұзамай ай да туады. Төңірек анық көрінетін болады. Қарауылды қолға түсірген минутында сол төбенің үстінде бой көрсетін қол бұлғап қана белгі бересіздер! — деді Апанас.

Командирден бұйрықты алғаннан кейін Шеге мен Ждақай сай-сайды қуалап бұқпақтап алға жылжыды. Әлі тұтасқан қою қараңғы. Селтигеннің бәрі жолынды тосқан жау сияқты. Екеуінің де жүректері дүрсілдеп кеуделеріне сыйяр емес.

Былайырақ шыққан соң Ждақай сыбыр етті:

— Қасқа бала, қасқиған деген осы...

— Қорқып келесің бе? — деді Шеге мырс етіп.

— Қорықпай... еңгезердей біреу келіп қазір желкенізге қона кетсе не істейсің...

— Жалғыз қарауылдан басқасының бәрі ұйқыда... Қам жеме!

Аяқ астында сытырлаған шөп.

— Ойбай, сытырлатпа!— дейді Шеге сыбырлап Ждақайға ұрсып.

Екеуінің де көзі түйе өркеншіндей үшбұрышта нып жұлдызды аспанға шаншылған құмтөбенің ұшар басында қарауытып тұрған кісі сұлбасында. Екеуінде — екі бесатар. Екі сапы пышақ. Болғаны сол. Еңкендеп, бүкең-бүкең жортады. Ай тумай тұрып бітіргендері — сол қарауыл төбенің иек астына жетті. Басы күрдек үйдей дөңгеленген дүзгеннің тасасында етбеттеп жатыр.

Қарауыл иығында шошайған мылтығы, тебе басында қалқиып әлі тұр. Болмашы қозғалып дүниенің төрт бұрышына сонау биіктен бұрылып қарап қояды.

— Бұл әкеңнің... бүйтіп тұра берсе маңайлатпас... — деді Ждақай күйініп.

— ... Күту керек. Әлі уақыт көп таңға шейін, — деп сыбырлады Шеге.

Құмды аймақтың бедері айқындалып қараңғы сұйылып, ұзамай дүниенің бір бұрышында жарты күлше нандай қызарып ай да туды.

Ждақай Шегені нұқып калып, иегімен төбе басын нұсқады. Шеге бұта тасасынан ақырын мойнын созып қараса, қарауыл мылтығын құшақтап малдас құрып отырыпты.

— Құдай берді... — деді Ждақай асығыс сыбырлап. — Отырғаны дұрыс болды. “Тынығайын” деді ғой қасқаң.

Шеге аспан төріне қарай ысырылған айға, ай сәулесі себездеген құм өлкесінің таңғажайып келбетіне қарап тамсанды. Түс тәрізді. Биязы нұрға бөленген аппақ жұмыр тегіс иықтары жалаңаштанып әр тұстан бозарады. Жалаң аяқ жүгіргің келеді сол ұлпа құм баурайлармен. Хансұлу екеуі неге, сөйтіп, осынау ай астындағы айдаланы кезіп кетпейді? Сөйтіп, неге нұрлы бақыт түнін кешпейді? Ғашығының қайқы кірпігін тігіп жалт карағандағы өңменіңнен өтер нәркес көзі елестеді. Сәл түріктеу ерні елестеді. Ұзыншалау келген жас талдай солқылдаған бой, тұлғасы елестеді.

Шеге күрсінді. Ждақай бүйірінен нұқыды. “Не болды?” дегені. Шынын айтқанда, мана Апанас бұларды мына қауіпті сапарға жұмсағанда Шегенің

жанын бір белгісіз қуаныш баураған-ды. Біріншіден Хансұлуға жұрттан бұрын жақын баратынына қуанса, екіншіден, бұны әлі көзге ілмей дінкелетіп жүрген тәкаппар қыздың алдында ерлік көрсететін сәт туған еді.

Қарауылға қарап қойып бұта түбінде бұққан Ждақайдың да іште бұққан өз арманы бар. Ол — Балқия, орта бойлы дембелше келген ақ сарының әдемісі Балқия. Көзі жабайы мысықтың көзіндей жайнаған сұлу Балқия. Еркектерін быт-шыт еткеннен кейін қашқан ауылдың әйелдерін қойдай топырлатып алға салып айдайтын күн тумай ма? Жүнін жұлған тауықтай пана іздеп Балқия қолтығына тығылмай ма? Сөйтіп, ақсары келіншектің ендігі жердегі сыйынар пірі Ждақай болмай ма?

— Ждақай, — деп сыбыр етті Шеге. Қиялға шомып отырған Ждақай селк етті.

— Анау қалғып отыр... шамасы.

Ай аспан тәріне жуықтаған түн ортасы мезгіл болыпты. Бойды тітіркетіп, селеу басын қозғап түн түкпірінен салқын самал суырылып еседі.

Бұлар төбе басында мойыны салбырап отырған қарауылға біраз тесіле қарады. Қарауыл шынында қалғып отырғанға ұқсайды.

Екеуі сәл шегініп төбенің етегіне түсіп бүкеңдеп айналып жүріп кетті. Бір тәуірі, бүйірлі құмның басындағы кісіге етегі көрінбейді екен. Бұлар құмды ық жағынан айналып өтіп қарауылдың ту желке тұсынан құм төбеге ормелей бастады.

Кесірткедей жербауырлап жылжиды. Бұл тұстан төбенің батыс ойпаңында ай сәулесі түсіп тұрған ауқымы тай шаптырымдай алаңда шоғырланған ауыл сұлбасы шалынады. Үйлерін тікпеген екен. Керегеден

есекарқа, күрке калқитқан. Ерттеулі, қантарулы аттар тұр.

Еңбектеп, сусыма құмның жотасына да шықты. Алдын ала келісіп алған. Егер қарауыл оянып кеткен жағдайда Ждақай пышақ лақтырады. Тым жақын болса барысша атылып барып Шеге қарауылдың аузын бітеуге тиіс. Қалайда мылтық атпайды.

Қарауыл жас жігіт іспетті. Үстінде — түйе жүн қақпа шекпен. Белінде — жалпақ белдік. Белдікте — окты қатар. Басында — дөңгелек бөрік. Мылтыққа маңдайын сүйеп ұйықтап отыр. Бірнәрсе айтқысы кеп қапталында еңбектеген Ждақай Шегенің құлағына еңкейді.

— Құдай біледі. Мынау Рысбек... — деді Ждақай, Шегенің құлағына. Шеге ананың түріне жалт қарады.

— Кет әрі... — деді. Көзінде — үрей.

“Соның өзі” дегендей Ждақай көзін жұмып бас изеді. Екеуі бірауық арқасы дүңкиіп отырған сұлбаға зөрелері ұшып тосылып қадала қалыпты.

Шегенің көз алдына Мажанның жылқысын бағатын жетім бала сопақ сары Рысбек кеп тұра қалды. Қара күшке бар, бірақ су жүректеу момын бала еді Рысбек. Кешегі күнге шейін ауыл ортасындағы айтақырда шаңқай түсте асыр сап асық ойнайтын Рысбек. Мына Ждақай сияқты балалар қараулық жасап жанжал, шығара бастаса болды, жасқаншақтанып ұтқан асығын қайтып бере қоятын. Әкешешесі Мажанның есігінде жүріп ерте өліп, Рысбек тұлдыр жетім қалған. Мажан үйінің басыбайлы құлындай малмен бірге жатып, малмен бірге өріп жүретін. Анда-санда ойын қызығына түсіп кеткенде болмаса Рысбектің көкшілдеу көзінде құтаймас мұн

тұратын. Ел ішіне шыққан “Қызыл отау” осындай Рысбек тәрізді батырақ малайлардың теңдігі үшін күрескен. Мажанда кеткен Рысбектің есесін қайтарып беруге шырылдап жүріп осы Шеге, Ждақайлар да араласқан. Қашқан ауылға бұл қайдан қосылып жүр? Түсініксіз еді.

— Тірі ұстайық... өлтіріп алмайық сорлыны, — деді Шега алдынан көз айырмай.

— Ұстатса... кәне, — деді Ждақай еңбектей түсіп. Енді екеуі де дымдарын шығармай жылжыды. Ұйықтап отырған қарулы Рысбекпен аралық тым жақын қалған еді. Тымық түн ішінен әредікте бұта сатырсұтыр ете түседі. Құм тіршілігі белгі беріп қояды. Бұлар ұйықтап отырған Рысбектің қорылын естігенде біріне-бірі қарап бас шайқады. Ұлпа сусыма құмға тіреген қол, тізелері малтығып Рысбектің ту сыртынан таяй берді. Сөйткенше, бұлар күтпеген бір тосын жәйт болды. Содан кейін бұлар не істеп не қойғанын өздері де білмей қалды. Табан астынан жақын селеу арасы дүсірлеп кетті де қоянның “бик!”, “бик!” деп шыңғырған үні тымық түнді ап-ащы тіліп өтті.

— А?! А?! — деп қолын сермеп алақтап орнынан ыршып тұра берді Рысбек. Бірақ ту арқадан келіп қалған қауіпті әлі көрген жоқ еді. Дәл осы сәтте Ждақай да, Шега де тісін басқан қасқырдай секіріп кеп ұзын бойлы Рысбектің арқасына жармаса кетті. Шегенің мылтығы әлгі секірген жерде қалған. Ұмтылған сәтте екі қолын созып еді. Әйтеуір, көздеген жеріне қолы да ілікті. Рысбектің қонқиған мұрны мен аузына алақаны тигенін біледі. Енді бір сәтте жанұшырып айқайлайын деп бұлқына берген жігітті екеуі бүктеп астыға салып тыпырлатып басып алған екен. Шегенің уысы қатты еді. Қос қолы Рысбектің

аузында. Ждақайға жалт қарады. Бұл ұзынтұра жігіттің басына шапшығанда дембелше бойлы Ждақай белінен ала кеткен. Қазір құлаған жігіттің кеудесіне қонжиып мініп алған. Шеге жалт қарағанда он қолындағы сапыны айға жарқ еткізіп Рысбектің ішіне ұрды. Шеге “Өй!” деп ышқынып қалды, бірақ тамағы құрғап кеткен бе үні шықпады. Бұның үні шықпаса да, дауысын Ждақай есітті. Үшінші рет жоғары көтере берген пышақты қолын Рысбектің ішіне сілтей алмады. Екі жүзді болат ақ сапы тот басқан темірдей қарауытып тұр екен. Ждақайдың да, Шегенің де назары — қанды сапыда.

Екеуінің астындағы Рысбек біресе жиырылып, біресе созылып жан кеше алмай жатты.

Шеге Рысбектің аузын түмшалағай қолын жұлып алып ыршып кетіп екі-үш адым аулақ барып тұрды.

Әлгі қояндар тағы да шынғырып бикылдады. Бү жолы үндері бір төбенің астынан, алысырақтан естілді.

Шеге өлгелі жатқан Рысбектің козіне түскісі келмеді. Естен айрылғандай мең-зең сілейген Шегеге қазір аспан айналып жерге түссе де бәрібір еді. Қазір анау ұйқыдағы ауыл оянып бұларды қоршап алып атып тастаса да лайық тәрізді. Әлден уақта Ждақай келіп жанына тізе бүкті.

— Бітті, — деді. Өкінішпен айтты. Ждақайға деген әлгі ашу-ызадан дінкесі құрып құр сұлдері отырған Шеге:

— Неге өйттің? — деді ақырын ғана.

— Болар іс болды. Пышақты қалай ұрып жібергенімді өзім де білмеймін... — деп Ждақай ұнжырғасы түсіп төмен қарады.

Таң алакеугім тартып келе жатты. Бойды тітіркетіп әлдеқайдан ескен тоназық самал бар.

Шеге буыны дірілдеп тұрды орнынан. Алдымен өлікке қарады. Рысбек басын шығысқа беріп құм үстінде шалқасынан жатыр. Басы жалаңбас. Бөрігі домалап кеткен. Бөрігі сонау етекте ноқаттай қарауытып жатыр.

Ждақай қойын қалтасынан боз орамал шығарып таң астына қарай бұлғады.

4

Күллі ауыл тұяқ серіппей ұйқыға шомғанда ай астында боз шапаны, ақ сәлдесі қылаңытып шошайып жалғыз Лабақ ахун қалды. Аяттың ара-арасында саусағы жорғалап тасфих санап кетеді. Көзі жұмулы, көңілі ұйыған. Қанша отырғанын білмейді, әйтеуір жаздың қысқа түні сұйыла бастаған шамада ахун буын-буыны күтірлеп жайнамазын жинап түрегелді. Кейін бұрыла бергені сол, көзі қарауыл бала тұрған төбеге түсті. Төбе үсті жым-жылас. Шал байғұс өз көзіне өзі сенбей шұқшиып кеп қарады. Рас. Төбе үсті бос тұр.

— Бұлыш! Ай, Бұлыш!— деп сарнай берді шал қалбалақтай. Бұйыққан тыныштықты шайқағандай шал үні. Мылтықтарын басына жастап киімшен жатқан ауыл еркектері күркелерінен ытып-ытып шыға келді.

— Аттан! Аттан! — деп ақырды Бұлыш ойнақ-шыған арғымақ аттың беліне қарғып міне беріп.

Таң астына қарай тұра шапқан Бұлышқа ілесіп ауыл ер-азаматы қаһарлы қосынға айналып дүсірлете жөнелді. Сөйткенше, алдарынан, таң астынан мылтық шаңқ етті. Бытпылдақ құмға кіре берген қосын ат басын іркіп шоғырлана қалды. Құм арасында бекінген әскер барын көрді. Сол тараптан айқай естілді.

— Тоқтаңдар! Көні, нахақ қан төккілерің келмесе қаруларыңды тастаңдар! Қаруларыңды тастаңдар! — деген айқай таңғы ауаны жаңғырықтырды.

Бұл айқайды шапанының шалғайы далақтап мылтық атылған майдан шебіне қарай жүгіріп келе жатқан Лабақ ахунның көрі құлағы да шалды. Ызышу, қым-қуыт күркелерін жығып түйелеріне жүк артып жатқан қатын-қалаш.

— Иә, Бекет ата! — деп сарнап бебеу қақты ахун байғұс.

— Иә, Барақ ата! — деп дауыстаған әйел үндері күйке шымырлатады.

— Бас иін келгенге кешірім бар! — деп жатыр ана жақтан естілген өктем дауыс.

— Тапқан екенсің алдайтын ақымақты! — деп жатыр жігіттер.

— Жігіттер! Бой тасалаңдар! — деген Бұлыштын айқайы шықты. Жұрт селеулі томпақ қыратты тасалап аттарынан домаланып түсе бастады. Төбе тасасынан тарс-түрс мылтық ата бастады.

— Бұлыш! Ай, Бұлыш мерген! Мен — Апанаспын! Сөзіме құлақ сал! Қарсыласпа, жұртты бекер қырма! Өз еріктеріңмен беріліңдер! Ант етемін! Жазаламаймыз! Елге қайтарамыз!

Апанастың ұсынысына жауап ретінде шаңқылдап екі-үш жерден мылтық атылды. Бірақ Апанас тараптан оған қарсы оқ жаумады. Жігіттер отрядтың бұл қылығына таң қалды. Бірақ отряд қайта-қайта айқайлап “қаруды тастап, соғыспай берілуін” талап етті. Жігіттер одан сайын ызаға булығы түсті.

— Ай, балаларым-ай... ай, балаларым-ай!.. — деп аса таяғы қолында, анадай жерде зарлап сақалын саумалап ахун тұр.

— Бауа, оққа ұшасыз! Бұғыңыз! — деген айқай-үйқайға мән берер емес. Аузында — дұға. Көзінде — жас. Отряд оқ атпаса да бекер жатпаған екен. Кенет жігіттердің оң жақ және сол жақ бүйірінен қырка астынан:

— Түс-тұстан қоршалдыңдар! Екі жаққа екі пулемет қойылды!

— Кәні, қаруды тастандар! — деген айқайлар ереуілдеп кетті.

— Бұлыш аға, қарсыласпандар! Бұлыш аға! — деген Шегенің айқайы шықты. — Бұлыш аға! Текке қырасыз елді! Текке қырасыз!

— Атқа... атқа отырындар!.. — деп бұйырды Бұлыш. Бұлыштың да оңайлықпен беріспек ойы жоқ еді. Сөйткенше, сыртын орап бүқбақтап жүгірген екі әскердің төбесі қылт етті. Бұлыш сығаламай басып салды. Алдыңғысы, шортан балықтай шоршып-ақ түсті. Екіншісіде бір жігіттің оғынан сеспей қатты. Сөйткенше:

— Атыңдар! — деген қаһарлы бұйрыққа іле-шала қос бүйірден қос пулемет сақылдап қоя берді. Сол-ақ екен, төрт-бес жігіт аттарынан сыпырылып қала берді. Аттарға оқ тиіп, шынғырып, шапшыды. Көзді ашып-жұмғанша иесіз аттар ойнап шыға келді. Пулеметтер сақылдап жатыр. Ию-кию. Айқай-шу. Әркім енді өз басымен қайғы болған зобалаң сәт туды. Қардай бораған оққа кім қарсы тұрсын. Бұлыштың жігіттері бытпылдық құмға бет алды. Құмға желдіртгіп бытырап қашқан көш те кіріп бара жатты.

Ұрыс болған майданның дәл кіндік ортасында әлгі жігіттер бекінген қырка үстінде қалқиып таң шапағына малынып ақ жалаудай ақ шапаны желбіреп ахун байғұс тұр. Қолында — таяғы. Аузында — дұға.

Қыршынынан қиылып жатқан жастарды өз көзімен көріп тұр. Қардай бораған жау оғы апжыланша ысқырып, аш бөріше ұлып шарқ ұрады ауада. Шал Құдайдан өлім тіледі.

— Иә, Тәңірім, жібер ажал оғыңды! Жібер ажал оғыңды мына кәрі қақбасқа! Бұны көзім көргенше күмрә неге болмадым?! Күмрә неге болмадым! — деп сарнайды. Көз жасы сақалын жуды. Әй, бәсе! Түн ұйқысы төрт бөлініп бірнәрсеге өрекіп еді-ау жүрегі. Сөны неге үкпады бұ кәрі қақбас?! Неге аттан салып ауылды түнде көшірмеді? О, алжыған! Обалына қалдың елдің! Обалына қалдың?

Шал таяғымен жерді түйгіштеді. Күңіренді, күйреді. Енді біруақ құм арасынан елу шақты салт атты әскер дүркіреп шығып, қашқан көштің соңынан лап қойды.

Төбе басында сарнап тұрған ахунды ешкім елеп іркілген жоқ. Жан-жағынан қиқулап ағып өтіп жатыр. Бордай езіліп боздап тұрды ахун байғұс. Әлден уақытта ес жиып төңірегін шолса құдық маңы ойпат қаңырап бос қалыпты. Оққа ұшқан ат өлімтіктерінің үстіне қарға, құзғын жинала бастапты. Әріректе құм етегінде иесіз жылқылар жүр жайылып.

Ыңырсған, ыңыранған дыбысты шалды құлағы. Мойнын созып сайға қарады. О, жасаған ие! Сайда жатқан бір өліктің басын сүйеп мықшындап жатқан екі кісінің жотасын көрді. Өліктердің арасында жаны шықпаған жаралылар да болғаны-ау.

Шал асатаяғы қолында кең адымдап төбеден түсіп келеді. Әлгі екеудің біреуі егделеу орыс екен. Екіншісі — жас қазақ жігіті. Ақ матамен жаралының кеудесін шандып жатыр. Бұны көріп, орыс тілі бұралып:

— А, ақсақал, салам! — деді. Жаралыны тани кетті ахун. Асан бәлшебек. Жарасы ауыр сияқты. Ыңырсиді береді.

— Су! Су! — дейді. Докторға көмектесіп жүрген жас жігіт брезент қалтадан Асанның аузына су тамызды. Жаралы Асанның көзі жақындай бере тоқтаған ахунға түсті. Басын шайқай берді. Сөйлесуге тілі келмеді. Олім аузында жатқан Асанға одан әрі қарауға ахунның дәті жетпеді.

Басын шайқай берді ахун. Беталды жүріп кетті күңіреніп. Бү тірліктен безіп өмірді тәрк етіп дүние кезіп лағып кеткісі келді байғұстың.

— О, Жаратқан! О, Жаратқан! — деп сарнап кетіп барады. Қаңғып өлуге кетіп барады. Ендігі лайығы бүл қақбасқа сол қаңғып өлген.

Ойпаңның батыс тұсынан күм арасынан шұбатылып көш шықты. Алқа-салқа көш. Жылап-сықтаған қатын-қалаш дауысы. Көшпен қабаттасып жапырлап жаяулар, оған іле-шала топырлаған аттылар. Жүк артқан түйелер, айдаған мал, ойпаңға нөпірлеп шаңғытып құлады. Ахун көшке қарсы келеді.

Апанастың бұйрығымен содан көш кешке дейін құдық басында іркілді. Оққа ұшқандардың ішінде біреудің баласы, біреудің әкесі, біреудің бауыры табылып онсыз да жүрегі жаралы ауыл у-шу қазалы дауыс көтерді.

Отряд та со күні түсте қаза болған Асан бәлшебекті және екі жауынгерді, оққа ұшқан ауыл адамдарымен, жерге берді. Аспанға үш дүркін мылтық атып, отряд кешке дейін аза тұтты.

Күн ысуы қайтты-ау деген шамада көш жолға шықты. Кешегі келген іздерімен кейін елге бет түзеді. Көштің дені әйел, бала-шаға, кемпір-сампыр. Қару-

ларын тапсырып өз еркімен беріліп бала-шағасының қасында келе жатқан ер-азаматтар да жоқ емес.

Мана, көш қаша бытырап құмға кіргенде бір жалғыз үйлі көш жылға-жылғаны қуалап бөлек кеткен. Бұл көш Балқиянікі еді. Қуғын-сүргінді көріп қалған ер мінезді келіншек, әйтеуір, отрядтың құрығынан құтылса, Бұлыштың оны қалайда тауып аларына көзі жеткен. Бұлыш жігіттері өкшелеген жаудың бетін аудару үшін қиястап қаша ұрыс салған. Отряд олардан көрі айлалы болып шықты. Негізгі күшін Бұлыш нөкерлерін қуалауға қалдырып, бір тобы бөліне шауып көшті қайтарды. Көш қолға түскеннен кейін отрядтың негізгі күші де атысты доғарды.

Қарсыласқанмен, саны да, қару-жарағы да бұлардан әлдеқайда басым отрядтан жеңіліс табатынына көздері анық жеткен ауыл азаматтары сол арада іштей іруге айналды. Айқай, дау, керіс басталды. Егер Бұлыш басу айтпағанда өзара ұстаса кетуге де бар еді ашынған жұрт. Бүгінгі өлім-жітімді көрген Бұлыш енді іштей шұғыл шешімге келген-ді. Ізіне ерген жұртқа соны жария етті.

— Күші басым жауға салып обалдарыңа қалудымын, жігіттер! — деді Бұлыш иіріліп тұрған нөкеріне. — Енді ұрынсақ қатын-бала коз жасына қатудымыз. Мен сендердің қатындарыңды — жесір, балаларыңды жетім еткім келмейді. Жігіттер! Бәрің де осы жерден түгел кейін қайтыңдар! Сөз осы! Мен әрі қарай жалғыз кетулімін!

Ат үстінде қаздиып отырған сіренке қара Бұлыштың түсі түтігіп, көзі қанталап кеткен еді. Бесатарын алдына көлденең ұстаған. Басқаны күтсе де жұрт Бұлыштан дәл бұндайды күтпеген тәрізді. Сең соққандай теңселіп кетті.

— Менің қайтар жолым кесулі. Мен не көрсем де алдымнан көрулімін. Әмірім — енді бала-шағаларыңа қосылыңдар! Батам да осы. Енді ізіме ергенінді атамын! — деді Бұлыш атының басын бұра беріп.

— Мәссаған!

— Ау, бізді енді... кімге тапсырғаныңыз, Бұлыш аға!?

— Апанаска! — деді Бұлыш атының басын бұрып. — Ол әділ орыс. Айтқан сөзінде тұрады. Кешіреді.

Бұлыш қара қасқа арғымағының басын Балқияның көшіне қарай бұрды.

Жұрт антарылып тұрып қалған. Көп ұзамай дау, керіс қайта басталды. Жартысы көштен қалмайтын болды да, жартысы Кеңес өкіметінің қас дұшпаны Әзбергеннің аузына қарады. Сөйтіп, нөкер екіге бөлінді. Үшінші бөлік боп Бұлыш пен Балқия кетті. Бұлыштың жалғыз үйлі шолақ көші сонау көз ұшында қылт етіп қабақтан әрі асқанша біраз жігіттер жалтақ-жалтақ қараумен болды.

Бұлыштың не ойлағаны, қайда бет алғаны көпшілік үшін жұмбақ болып қалды.

5

Көшті алып келе жатқан отряд ұшы-қиырсыз құм мұхитынан екінші күні де шыға алмады. Екінші күні де құм арасында түнеді. Ай әлі тумаған. Сары күздің май тонғысыз түні. Қоянсүйек бұталарының арасына кіріп іркілген ауыл жұрты бұ кезде ұйқыға бас қойған. Оларды қоршап, бөлек-бөлек боп отряд жатыр. Ал отрядтың сыртында түс-түсқа қарауыл қойылған. Соның бірі — Шеге. Көзін жұмса көз алдына Рысбек келе қалады. Құм үстінде болған уақиғаны бір сәтке ұмыта алар емес. Ұйықтай алмай екі жағы суалып

көзі кіртііп кеткен. Содан бері Ждақайды көрсе ит көрген мысықтай жиырылады. Өпат болған Асанды ойлайды. Өлім туралы тұңғыш рет сарылып көп ойланады Шеге. Мана Лабақ ахун Апанастың өтінішімен жұртқа уағыз айтқан. Көңілін көптен торлаған қасіреттің қара бұлты содан нөсерлеп кеп берген. Жұрт бір сәтке атыс-шабыс ауыртпалықты ұмытып шалдың боздау қоңыр әуеніне тербелген. Шеге көз жасын тия алмай күм ішіне жалғыз кетіп жылады. Жер бетінде бұның мұңын ұғар жан қалмағандай қатты жалғызсырады. Бұны бір түсінсе жалғыз Хансұлу түсінетін сияқтанды. Хансұлумен оңаша сөйлесуді көздеді. Реті келді. Жұрт кешкі асқа қамданып, сапырылысып жатқан кезде бір қаға берісте Хансұлуға бір ауыз тіл қатып “Түнде күзетте тұрамын. Сені күтемін” деп қалды.

Көп ұзамай ай туатын сыңайы байқалып, төңірек бозаруға айналды. Жұрт — ұйқыда. Бұл — күзетте. Қыз әлі жоқ. Шеге осы сапарда, әсіресе кешелі-бүгін Апанасқа таң қалды. Жол-жөнекей таң намазы, бесін намазы кездерінде түйесін шөгере сап жайнамазын күм үстіне төсеп құбылаға бет бұрған Лабақ ахунды байқап қалса болды, Апанас шапшаң бұйрық етіп көшті іркеді. Әскерді де іркеді. Сөйтіп, Лабақ ахунның және оны төңіректен сәждеге бас қойған жұртшылықтың намазы аяқталғанша бүкіл елді иіріп күттіріп қояды. Тәртіп сақтатады. Содан Лабақ ахун бастаған ауылдың үлкен-кішілерінің Апанасқа деген көзқарасы күрт өзгерді. “Орыс та болса, бір иманды жан екен!” деп, қариялар отряд командиріне ілтипатпен қарады. Ждақай бастаған кейбір жастар ғана “Мынасы, несі командиріміздің молдаға табынып...” — деп күңкілдеді. Сүржекей сияқтылар Апа-

насқа: “Бұныңыз қалай Афанасий Васильевич? Бандиттерді бүйтіп неге құрметтейсіз?” — деп наразылық та білдірді. Апанастың жауабы біреу: “Халықты құрметтеу керек, дәстүрді сыйлау керек” дейді.

Шеге селк етті. Қараңғы ішінен бір тысыр сезілгендей. Қарауытып, майда басып бір сұлба таяп келеді. Үңіліп қарады. Хансұлу! Рас, соның өзі! Шегенің тілі байланып, таңдайы құрғады. Ал енді қайтті?

Майда басып жақындай берген қыз іркілді. Соның өзі. Талдырмаштау сопайған Хансұлу. Қолындағы бесатар да осы сәт шамадан тыс ауырлап кеткендей көрінді. Ұстауға ебедейсіз. Озі де сөлекет қозғалып сөлең етіп, үнсіз тұрған қызға қарай аяқ басты.

Төбеде далиған жұлдызды аспан, табан астында шалқар құм жатқанын және сол жалпақ әлем қазір ұйқыда екенін шапшаң ойдан өткізді.

— Хансұлу! — деді дауысы жарықшақтанып, сыбырлағандай. Кісі есітердей емес еді. Бірақ Хансұлу есітті.

— Мен ғой!.. — деді. Үнінен жұмсақ ілтипат сезілгендей.

Шеге қызға жақын келді. Тоқтады. Қыз иығына жұқа шапанын жамылып шыққан екен. Жағасынан бүріп ұстап, бұған төменнен қайқы кірпігі түріліп сүзіле қарап тұр. Қара көлеңке түн де болса Шеге қыздың тік қадалған ағы ақ, аласы ала үлкен сұлу жанарын көрді. Алдында қол жетер жерде тұр Хансұлу. Түн жұлдызы тұрғандай алдында.

Қыз сәл миық тартты. Сонда ғана Шеге өзінің қисынсыз көп тұрып қалғанын байқады. Жүрегімен алысып:

— Жүр... қыр үстіне шығайық! — деді. Қыз бұны үнсіз қоштап қатар қозғалды. Шегенің жүрегі

кеудесіне сияр емес. Жүйрік сезімі дүниені шарлайды. Аяқ астында құрғақ шөп тысыры. Тыныштыққа құлақ түріп жанқұйынымен алысады Шеге. Төбеде далиып аспан, шаңытып құс жолы, төменде кең медиен құм жатыр. Сарғайып сағынған ғашығына не демек? “Неге шақырдың?” десе, не деп жауап қатпак?

Маңдайы жарқырап үр қызындай аяғын ерініп басып келеді Хансұлу.

Төбеге шыққасын да екеуі сол бір ынғайсыз тұйық қалыпты бұза алмай бедері айқындала бастаған түнгі құм өлкесіне сәл тосылып іркіліп, назар қыдыртты.

— Отырайық! — деді Шеге күрсініп, иығынан мылтығын сыпырып, ұлпа құмға тізе бүге беріп. Түн аспанының шығыс қапталы ағарып ай шапағы мол біліне бастаған еді. Жүзін сол тұсқа беріп жанына кеп Хансұлу да жайғасты.

— Ай туып келеді,— деді қыз қиялға шомғандай. Мұңайып айтты.

— Қазір ай туғасын... керемет болады құм арасы!— деп іліп әкетті Шеге. — Айлы түн астында құм аралап көрдің бе?

Хансұлу таңдайын қақты. “Жок” дегені.

— Біздің жақтағы айлы түн бір басқа, мына түн бір басқа... — деп бастады әңгімесін Шеге.

Құм бетіне әлденені сызып қырын отырған қыз күлімсіреп әлсін-әлсін жас жігіттің ұшқын атқан жанарына, әңгіме айтқан кездегі өзгеше құлпырған дидарына көз қиығын салып қояды.

Қыз бұрылып қарады.

— Шеге! Одан да... елге барғасын окімет бізді не істейді, соны айтшы!

— Апанас айтты емес пе? Түк те істемейді. Артельге кіресіздер... Жаңаша өмір сүресіздер...

— Сол-ақ па? Кісінің сенгісі келмейді. Апанастың айтқанының бәрі рас болса...

— Апанас нағыз революционер, — деді Шеге бұ жерде өзінің саяси қозғарасының биік екенін танытқысы келгендей. — Апанас айтса, өтірік айтпайды.

— Сен де ребелсенерсің бе?.. — деді Хансұлу.

— ...Кеңес өкіметі үшін күрескендердің бәрі революционер! — деді Шеге. Деді де кенет түйіліп, ойланып қалды. Өз жан сарайына өзі құлақ түргендей жанында бір түйткіл бар. Оны қалай айтар? Оның бетін қайтып ашар!

Хансұлу жігітке көзін төңкеріп бір шекесінен қарады. Күлімсіреп жігіттің ай сәулесі түсіп тұрған қиық мүртты балаң жүзіне шамалы назар ірікті.

Шеге тағы да күрсініп жүзін бұрып қызға қарады. Қыздың жұмсақ нұрланған көзіне көзі түсті. Назарын тайдырды. Хансұлудың жанарынан жылы шуақты гүмырында тұңғыш байқауы еді. Тобесінде шаңытып — Құс жолы, табанында толқын айдын байтақ құм жатқаны түсті есіне. Ойласа, сол әндей шырқаған даңғыраған кең ғаламның кіндік ортасында айдың сүт нұрына шомылып отыр екеуі. Қан аққан жаралы жүрегінің басына шым-шымдап шипалы бақыт тамшысы тамғандай қыбыр ете алмады Шеге. Жан түкпіріне сәуле сеуіп көкірек қуысында рауандап таң атқандай. Тынысы тарылып жүрегі дабылдап құбылып қайта түлегендей.

— Сұлу!.. — деді.

Қыз ай астындағы ертек дүниесіндей қылаңытып жатқан құм бұйраттарға үнсіз назар жібереді.

Шеге қол созды Хансұлуға. Тұңғыықтан алып шық-шық деп жалбарынғандай қалпы. Қолы қыздың

бұрым ұшынан ұстап көрді. Жүрегі аласұрып кеудесіне сыймай барады... Қыз шашынан бір нәзік иіс, әтір иісі сезіледі. Сол тәтті жұпардан жұта бергісі келеді Шегенің. Екеуі де бірауық тілдері байланғандай үнсіз қалды. Шеге Хансұлудың қолынан ұстады. Өз батылдығына өзі таңырқады. Қыздың сүйрік сау-сақтары алақанында... Хансұлу, сөйткенше, тітіркеніп ығысып қалды. Жәудірей қарап, қолын ақырын еппен сусытып босатып алды. Арман құсының әлгінде ғана уысында болғанын зерделеп үлгерді Шеге.

— Кеттім, — деді, шапанының өңірін қос қолдап қымтап төңазығандай тітіркенген бойжеткен. Бақыттан басы айналған Шеге:

— Отырсай! — деп жалынды қыздың енді іркілмесін біле тұра.

— Жоқ... — деді қыз. Жымия қарап бас шайқап тұр. Қыз қылығына табына түсті Шеге. Осы сәттің шындығына сенер емес.

Шеге теңселіп орнынан тұрды. Жібек шапан жамылған сұңғақ бойлы қыз майда басып, көлеңкедей жылжып кетіп барады. “Мен сендікпін” деп кетіп бара жатқандай ұзай берген сұлбасы.

Түн. Аспан төрінде жүзген ай. Төбе басында состиып тұрған Шеге. Көкірегін кернеген қуаныштан, бақыттан басы айналып теңселіп тұрған Шеге.



ЖАҢА ӨМІР

1

Ел шетіне кіргеннен бастап Хансұлудың таңырқауы көбейді. Бұлар қуғын-сүргінмен жүрген жыл ішінде ел сиқы қатты өзгерген. Бұрынғы, әр төбенің астында бес-он үйден, балгердің құмалағындай шашылып жататын ауылдар азайыпты. Оның есесіне құдық, бұлақ бастарында мол шоғырланып, желбіретіп қызыл жалау көтеріп, сапырылысып кірпіш құйып, қабырға қалап жатқан жұрт. Бұл ауылдар баяғы көп айтылатын “жаңа өмірге” қарай жүйткіп кетіп қалғанға ұқсайды. Доңызтаудан бастап Оймауытқа жеткенше бұл көшті — қашқын ауыл көшін Апанас екі-үш үйден әлгі серіктіктерге бөліп тастап келеді. Тастағанда да үйін, бала-шағасын ғана қалдырып келеді. Ал ер-азаматтарын Нарқамысқа — ауданға апарады-мыс. “Бандит” болып кеткен жұрттың ақ-қарасы сонда шешіледі-мыс.

Хансұлудың жүрегін тітіркетіп, жанына түрпідей тигені басқа бір жайт болды. Ол — мына жаңа өмірге бет бұрған кешегі өздеріндей ағайынның бұларға тосырқай қарауы, “банды ауыл”, “бандиттер” деген сыпсың сөздері еді. Соны естігенде жақ жүні үрпиіп, құлазып, жүдеп кетті. Қуғын-сүргінмен өткен соңғы бір жыл өмірінде жас та болса талай-талай ой кешіпті. Бірақ мына жұрт айтқандай “банды ауыл екенбіз-ау” деген ой миына кірмеген екен. Ойлап қараса, істеген істері, елден қашуы, өкіметке қарсы оқ атуы

жұрттың әлгі айтқандарын растап тұр. Соған көзі жеткен сайын құты қаша түсті.

Жылыбұлақ Хансұлуға ес білгелі таныс. Тастақ, төбенің күншығыс етегін тесіп ағып жатқан көз жасындай мөлтілдеген бұлақ, сол бұлақтың басында мешіт бар. Күйген кірпіштен өрген күмбезді, Лабақ ахун мешіті. Талай ұрпақ хат таныған орын. Хансұлу да “Әптиекті” сонда ашқан. Шегенің айтуынша ауыл жиналып сол Жылыбұлақ басына қонған. Серіктікке ұйысқан. Енді ауыл “Жаңа жол” деп аталады.

Таң атқалы Оймауыттың көзге ыстық таныс құба жондары, күйреуігі күнге күйген жалпақ сары белдері, ақ сортаң айтақырлары алдынан алмасып шықты да отырды. Жаймашуақ күз аспаны жалтыр, ашық. Үлбіреген керімсал желпіп беттен сипайды. Ақыры, ауыл төбесі де көрінді. Хансұлу, Рәш жүректері дүрсілдеп мойындарын соза қарады. Рәш жеңгесі қорқақтау еді. Жол бойы “Құдай-а, күніміз не болар екен?” деп сарнаумен келе жатқан. Енді, тастақ төбе етегінде сары беткейде отырған ала-бажыр ауылды көріп:

— Ей, Алла-ай! — деген үні шығып кетті. Тіптен әпшері қашып кеткен байғұстың.

Хансұлудың көзіне тастақ төбе етегінде мыңғырған қала тұрғандай көрінді. Сары беткей төсінде халық жыбырлап, той өтіп жатқандай. Откен жыл ішінде дүние таза өзгеріп кеткендей. Ел түгел жанарып кеткендей. Сең соққан балықтай сенделіп арып-ашып, жадап-жүдеп бұлар келеді. Бү Құдайдың шебері-ай! Таңқалмай қайтсін.

Хансұлудың есіл-дерті тезірек әке-шешесін көру. Бауырынан шыққан қызы бандит боп кеткен ол мұндарлардың күні не болды екен дейді.

Назары — ауылдан шеттеу тұрған ақ боз үйде. Танып келеді өз үйін. Ақ боз үйі баяғыдай айдындап емес, қоңырайып жетімсіреп тұрғандай. Үй алдында шешесі тұр. Мандайын қолымен көлегейлеп тапжылмай қараумен тұр. Қайран шешесі!.. Байғұс анасы!.. Бүрк етіп көзіне жас айналды Хансұлудың.

— Ай, қасқалдақ, жаса кәллектеп! Қарашы Шеге, мектепті қасқайтып салып тастапты! Әй, маладес, Қозбағар! деп Ждақай ат үстінде едірендеп айқайлап ұшып кете жаздады.

Хансұлудың есіне Шеге айтқан әңгіме оралды. Жаңа ауылға Қозбағар басқарма болыпты. Баяғы жаман Қозбағар, сөйтіп, елге тұтқа болған. Осының бәріне Хансұлу сенер-сенбесін білмейді.

Жақындай келе ауыл бедері айқындалды. Бұлақты жағалай тізіле қонған елу шақты үй. Шеткерірек тұрған мешіт. Одан әрегіректе Ждақай айтқан мектеп. Сыртын әлі сылап үлгермепті. Кірпіштері ырсиып тұр. Жұрт соның төңірегінде. Балтырларын түріп, аяғымен балшық илеген еркектер, су тасып сапырылысқан қатын-қалаш. Жаңадан біткен мектептің шекесінде желбіреген қызыл жалау. Ойпанда бұлақтан жиналған шалшық су маңында көлбеп жатқан түйелер, үйездеген жылқы, шашырап жайылған қой ешкілер.

Бұларды байқап қалған сабалақ жүнді барқылдақ төбеттер андыздап шулап келеді.

Ауыл жұртшылығы жұмыстарын тоқтатып, иттерді шулатып жақындай берген шолақ кешке самсап қарап тұр. Бір қатын жай тұрғанша Торқа кемпірді сөйлеткісі кеп:

— Шешей-ау, көзайдын, кім десек қашып кеткен келініңіз екен ғой келе жатқан! — деді дауысын саңқылдатып жұртқа есіттіре.

— Әдірам қалсын... “келін” болмай! “Құлақтың” қызын... баламнан аулақ, о несі түге! — деп Торқа кемпір тұрған жерінде тулады.

Шағын кош ауыл шетінде іркілді. Бала-шаға алдарынан жүгіріп шықса да, үлкендер жағы қарсы алуға асығар емес. Шеге Қозбағарды көріп тұрса да:

— Ау, басқарма қайда? Басқарма!? — деп дауыстады әдейі.

Сүйменшотпен жерді төмпештеп жатқан Қозбағар мандай терін жеңіне сүртіп, тіктелді.

— Ау, жолдас! Мына еліңді қарсы ал! — деп Шеге жанын қуырып барады. Қомпиған Қозбағар қолайсыз күйге түсіп, көшке қарай аяндады. Сол-ақ екен, Торқа кемпір:

— Әй!— деді.— Қанша қатынжанды болсаң да қайт кейін!

— Апа-ау... міндетім ғой...

— Дәл “міндетіңнің” ішіне... сенің! Қайт! Қайт деген соң! — деп шақ-шақ етті шешесі.

— Апа-ау, өкімет... — деп желкесін қасыды Қозбағар.

— Әй, “өкімет” болмай, өртеніп кет! Ойбай, намыссыз неме! Ойбай, бұндай ынжықты көрсем көзім шықсын!

• Торқа кемпір отыра қалып сары беткейдің құрғақ топырағын жұдырықтады.

Торқаның айкайына үйренген ауыл жұрт түйелерді шөгеріп, жүктерді түсіріп, керегелерді жаза бастады.

— Апа! — деді инабатпен адуын кемпірдің жанына келіп еңкейген Шеге. — Апа, сабыр етіңіз! “Құлақ”, “банды” деген сөздерді андап айтыңыз! Бұл үйлер біздің ауылға ГПУ-дің бұйрығымен келіп отыр. Өзіңіз басқарманың шешесісіз, олай айтуға бола ма екен?

— Е, мен... не айтыппын?! — деді, Торқа кемпір жұлып алғандай. — “Құлақ” десем, Пахраддинді айттым...

— Саясат, апа, саясат!..

— Ол не қылған сайсат! — деді Торқа кемпір шошып. Жаулығы да одырая қалған.

— Астанавит откошовкі пркәзібайт табариш Сталин, — деді Шеге дауысын қатайтып, әдейі орыс-шалап. — От сондай саясат!

— Ойбүй! — деп Торқа кемпір түйелерге қарай тұра жүгірді. — Ойбүй, жамалдатқыр, емізіп қойды-ау ботасын! Ай, шу!

Жұрт қыран-топан.

Шынашақтай кемпір шаңдаққа қарай жүйткіп барады. Хансұлу да күлді. Даукес кемпірді бір ауыз сөзбен қашырған Шегенің тапқырлығына іштей құлай риза болды. Шегені тұңғыш көріп тұрғандай алғысты назарын алмай үзіліп кеп қарады.

2

Жалғыз көш құм ішін көп шарлады. Алғаш арттан қуғын-сүргін бола ма деп беталды қашты. Қуғын-сүргін болмады. Содан бағытын шығысқа таман өзгертіп күн-түн демей үдере тартты. Жал-жал құмдар таусылмады. Екі күн жүріп үшінші күні дегенде құм арасында бір жасыл жантақты, шырмауықты шұқырға кезікті. Көш кідірді. Жүктерін түсіріп, екі түйе, бір ботаны тұсап жантаққа жіберді. Екі көлік аттың да ер-тұрмандарын сыпырды. Көштегі адам саны да екеуі еді. Бір еркек, бір әйел. Еркегі малды жайғап жүргенде, әйелі от түтетіп су қайнатты. Екеуінде де үн жоқ. Екі кереге басын қосып жіберіп лезде есекарқа күрке жасады. Сосын, сол қуыс күркеде шұңкиіп

отырып шай ішті. Ыстық шайдан маңдайлары жіпсіп, терлегеннен кейін ғана еркегіне тіл бітті:

— Сен үйді тіге бер! Шаңырағын көтеріп берейін! Мен құдық қазулы... — деді.

— Ух, рахат-ай, көсіліп отырып шай ұрттайтын да күн туады екен ғой, — деп шайға қанған ақсары келіншек жігітіне еркелеп, мысықтай керіліп көрпеше үстіне құлай берді. Маужырап есінеп мол сәулелі тарғыл көзін бір ашып бір жұмады. Бұл Балқия еді. Жігіті — Бұлыш. Елді шулатып етегінен ұстаған Бұлышы. Мажан шалдан басын арашалап Бұлышқа бас қосқан күннен бастап тірлігі “аттың жалы, атанның қомында” өтіп келеді. Мелисадан қашып Доңызтау, Шошқакөлде бұлар баспаған жер қалмады. Жалғыз үй жасырынумен бой тасалаумен келеді. Бірақ соның бірінде Балқияның қабағын кірбін шалған емес. Керісінше, құлпырып жайнай түсті Балқия. Анадан қайта туғандай түледі. Тіптен, бақыттан басы айналды Балқияның. Көзін ашса да жұмса да көретіні — Бұлыш. Шойын қара Бұлыш. Түсі қалай сұсты болса, жаны сондай жұмсақ Бұлыш. Бүкіл жарық дүниеден жалғыз өзін ғана тандап алып, өмірдің өзге қызығын тәрк еткен Бұлыш. Балқияға да осыдан артық өмірдің керегі жоқ. Тек Бұлыш аман болсын.

— Қимылдайық. Аттар шөлден қатты. Жатуға болмас, — деді Бұлыш жанында бұратылып жатқан келіншегінің назын іштей ұната отырсадағы. Кірпігін айқастырып сәл миық тартып жатқан келіншегі көзін ашты. Жабайы мысықтың көзіндей...

Жігіт жүрегі дүрсіл қақты. Келіншегінің мықынына көз тастады. Күркенің аңырайған есігінен төңіректі білеулеп қоршап тұрған орасан жойқын құм әлеміне көз жіберді. Піскен нандай қызғыш құм жалдардан жоғары далиған зеңгір аспан. Түпсіз

түнғыық аспан. Сілтідей тұнған тыныштық. Көптен ұмыт болған жанға жайлы тыныштық. Әлдеқайдан шегіртке шырылы естіледі. Пыр-пыр пысқырады аттары. Тілсіз меніреу, дүние, жырақ жапандағы жалғыз жолдасы мынау ақсары келіншек. Отқа да, суға да бірге кіруге қайыл жан. Өзге дүниені тәрк етіп етегінен ұстаған жалғыз жан. Жүрген жері базар Балқия сұлу. Шошқаколдің маңында тып-тыныш отырған жылы орнын тастап, жұрт үгітіне еріп қашқан ауылға ілескеніне ғана өкінеді Бұлыш. Ел басқарам деп талайдың обалына қалды. Бекер істеген екен. Басын бағып жайына жүре беруі керек еді. Енді міне өкіметке қарсы оқ атып кінәсінің үстіне кінә жамады. Енді, бандыға да, өкіметке де жоламасқа ант ішті. Көзі ашқалы үйренген кәсібі — аңын аулап басын бағып құм ішінде заман тынышталғанша жалғыз үй жүруге бекінді. Балқия есінеп тағы да керілді. Жалаң аяқ жатқан. Кестелі етек ақ көйлегінің етегінен толық ақ балтыры жарқырап шығып жатыр екен. Ұндай таза сусыма құмға жалаң өкшесі тиіп жатыр. Жігіттің басына қаны шапшыды. Жүрегі аласұрып иығындағы шекпенін шеше беріп Балқияның жүзіне назары іркілді. Ерні сәл-пәл шөлікпей ашылып дидары масаурай қалған. Ақ ұлпа бұғағы тұрымтайдың тамағындай бүлкілдейді. Бұлыш еңкейер-еңкейместен Балқия қарсы ұмтылды. Келіншектің тегеурінді құшағы жігіттің қабырғасын қаусатып жібере жаздады. Екеуі тар күркеге сыймай жалаң құм үстіне шығып кетті. Күз аспаны биік, түнғыық. Қанатын кең жайған тыныштық. Шегірткенің шырылы әлдилеп түр әлемді.

Түс ауа Бұлыш пен Балқия тірлік қамына кірісті. Балқия үй тігіп Бұлыш ойпаңнан құдық қазып жатты.

Су кешке таман үш құлаш тереңдіктен шықты. Алдымен ызғар топырақ содан, кейін балшық, содан

кейін ылай су жылтырады. Бү кезде түйелер құдық басында үймелесіп тұрған. Ақыры, төменнен Бұлыш ылайы сәл тазарған тастай салқын су алып бере бастады. Ортасына қойған шелекке малдар таласатармаса бас қойды.

Ертесіне Бұлыш қоянсүйек шауып, соның ағашымен құдықты шегендеді. Құдық біткеннен кейін қақпан, мылтығын алып Бұлыш кішкентайынан үйренген кәсібі аң аулауға шықты.

3

Бүгінде ел іші аласапыран. Баяғы көсіліп жатып ұйықтайтын, ала жаздай ел қыдырып ет жеп, қымыз ішіп, қызара бөртіп жүретін кең заман жоқ. Қай ауылға барсаң да “жоспар” “ойбай, жоспар!” деп дірдек қағып жүрген біреу. Кеш болса жиналыс. Қызыл кеңірдек айтыс. Біреу “құлак”, біреу “құйыршық”, біреу “бадырақ” боп жарғыласады да жатады. Ел кезген өкіл. Өкілге қарап аузын ашқан надан халық.

Шегелер қашқан елді қуып жеткенде Жылы-бұлақта қалған ауылдың соңғы көрген өкілі баяғы Бұқарбай мелиса еді. Бұқарбай бү кезде “Бұқа” деген лақапқа ие болған. Сол “Бұқа” мелисалықты қойып, ендігі жерде елге жол сілтейтін өкіл болып жүр.

Ауыл арсы-гүрсі кірпіш құйып жатқан. Намаздыгер, намазшам шамасында Хантөрткіл төбе тұстан солбырайған бір жалғыз атты сопайып көрінді. Өкіл екені білінді. Бұрынғы өкілдер арсы-гүрсі екпіндетіп, құйындатып келуші еді. Мынау ат үстінде қалғып келе жатқандай. “Ал бала, жүгір алдынан! Мынау дәл “Бұқаның” өзі...” деді, жолға қарап тұрған Шәріп, ешкі сақалын умаждай түсіп. Қозбағардың түсі қашып кетті. Шыбын жанын қоярға жер таппай

бебеу қакты. Сүріне аттап өкілдің алдынан шықты. Қайкы бел, көрі жирен үстінде бүгінде үрген местей орасан семірген кілбік көз қабан желке Бұқарбай отыр. Көзі тарс жұмулы. Шынымен ұйықтап келе жатқаны ма? Екі иығынан дем алып жүгіріп жеткен Қозбағар байғұстың сәлемін де алған жоқ. Бірақ оны арсынатын қауқар Қозбағарда жоқ. Дөкей қонақтың шылауына оратылып “ағалап” жайылып жастық, иіліп төсек болды. Бұқарбай онан ары ыңыранды. Керіліп созылды.

— Бала, жиналысты, сходу өткізейік, — деді, аттан бөксесін әрең сүйреп түсіп жатып. Бұрынғы Бұқарбай Бұқарбай ма? Өкіл болғалы мінезі көрінеу өзгерген. Бала күннен көз көріп өскен Қозбағарды танымайтын кісідей ерін ұшымен әрең сөйлеседі. Ыңыранып саран сөйлеп Қозбағар пақырдың жанын қас-қабақпенен-ақ қуырып барады.

— Жаксы! Жарайд, Бүке! — деп Қозбағар ышқынып тұра жүгірді елді жинауға.

Бұқарбай темекі шегіп түтінін бүркыратып шалқайып тұр.

— Так, жолдастар! Жекеменшік! — деп сөз бастады жұрт жиналғасын Бұқарбай. — Қазіргі біздің қас жауымыз, жолдастар, ол — жекеменшік! Жекеменшігі көп адам — бай-құлақ! Жекеменшігі шағын адам — орташа! Ал жекеменшігі жоқ адам қас батырақтың өзі! От так! Сәтсәлізмді кім жасайды? Сол батырақкедей жасайды. Түсіндік пе? От так! Тәртіп солай!

Алғы қатарда отырған Шәріп алақанын шапаттап:

— Әп, бәрекелді! Қандырдың-ау құлағымның құрышын, Пай! Пай! — деп айқайлап ұшып кете жаздады. — Қайран жаңа заманның жастары-ай! Жаса! Бас! Аяма!

— Та-ак! Сөйтіп, едриттімат жекеменшікті жоймай біз алға баса алмаймыз! Калашников солай деген. Түсіндік пе? Жойылсын жекеменшік! “Сенікі-менікі” жойылсын! Жасасын кәллектип!

Жұрт жапа-тармағай қол соқты.

Өкіл суық демін бір алып, көлдей орамалмен тершіген жалпақ шекесін сүртті. Жанында отырған Қозбағарға еңкейді:

— Бала бір шай ішетін мезгіл болды-ау деймін!

Қозбағар ұшып тұрып жаңа өмірге бет бұрған “Жаңа жол” аулының атынан мазмұнды сөзі үшін өкілге үлкен алғыс айтты. “Ақыл кеңес, нұсқауларыңызды бұлжытпай орындаймыз” деді. Онаша қалғаннан кейін өкіл, Қозбағарды қолтықтап:

— Ал бала, енді бір... дастарқаны кендеу үйге баста!— деді. Қозбағар ойланып қалды. Өкіл бұйірден нұқып қойды.

— Бойжеткен қызы бар үй болсын! ... — деп бырс-бырс күлді.

Қозбағар тықыршып тершіп кетті. Желкесін сипап ойлана қалып бір кезде “Жүріңіз” деді. Жұмаш деген орташа шаруа бар еді. Үйінде бойжеткен Наркыз деген қызы да бар. Жұрт ірілігіне қарап “Наркыз” деп кеткен. Қызы бойжеткесін бе, әйтеуір, келді-кетті қонаққа Жұмаш үйі бейілділеу еді. Окілді Қозбағар ауыл арасымен солай бастады. Кенет “Бұқа” қалт тұра қалды. Бұлақ жаққа сүзіле қарап тұр. Сол жаққа Қозбағар да қарады. Қараса Аймырзаның келіні иығында иінағашы, бүрмелі қос етек ақ көйлегі көлбеңдеп су әкеле жатыр.

Бұқа әукесі салбырап, көзі кілбиіп сүзіле қарап тұр. О, жасаған ие! Осы тұрысында тура бұқа! Ел де айтқыш-ау!

— Бала... анау кім?.. — деп танауымен нұсқап тұр бұлақ жақты Бұқарбай.

Қозбағар бебеу қағып без-без етті:

— Ойбай, Бүке! Аймырзаның келіні ғой ол! Ойбай, күйеуі бір Құдайдан безген! Қызғаншақ болғанда сұрама! Кеттік, ойбай!

“Бұқа” әлі сүзіле қарап тұр. Жас келіншекке назары желімделіп қалған. Сәл еңкейе сүзіліп тым-тырыс тұр. Әлден уақта тамсанып шайқады басын.

— Өзі былай... нешауа екен, ә?! — деді.

— Ойбай, Бүке! Кеттік, Бүке!!!

Содан екеуі Жұмаштың үйіне келді. Жұмаш ақ құбаша арық кісі, қолтығында жалтыр қарын бала, қалбақтап орнынан тұра берді. Төрге Нарқыз көрпеше жайды. Бүгін кірпіш күйіп еді. Сондағы жұмыс киімін шешпеген екен. Етік, шалбары өзі ірі кісіге жараспай-ақ тұр. Өкіл қабағы кіртііп үрке қарап отырды қызға Бір қаға берісте Қозбағарға қарап еді. “Бұдан басқа үй таппадың ба?” дегендей ренішті сезілді көзінен. Күмпиген Қозбағар қаңбақтай қозғалақтап кетті. Самауырды алып сыртқа шығып кеткен Нарқыз біршама уақыттан кейін үйге қайта кірді. Үстінде төгілген қызыл ала шыт көйлек. Белі тырсиған қоңыр мақпал камзол. Өңірі малынған моншақ. Білегі толған білезік. Өзі жуынып, таранған. “Бұқа” үй иесінің әңгімесін тарс ұмытып қызға қадалды. Түсі жылыды. Кеудесіне жан кірді, “Бұқа” көп ұзамай ыржалақтап күле бастады. Қозбағардың жүрегі орнына түсті.

“Бұқа” осы үйде түнеп, таңертең оны Қозбағар шығарып салуға келетін болып тарастан кешкісін.

Жұмаш дегенің бір жылауық сорақайнаған кісі екен. Кеш бойы шаруашылығын айтып, жағдайын айтып мезі қылды. Бұқарбай қайтсін, қонақ болған

соң лажсыз тыңдады. Бүгінде алым-салықты айтып жыламай отырған үй бар ма? Оған еті үйренген Бұқарбайдың. Кейде жыны қозады сондайларға. Ойлағаны тек жеке бас қамы. Жекеменшіктік құлықтың адам санасына қаншалықты тамыр салғанын ойлап ызаға булығады. Бес-алты ешкінің амандығы үшін күллі қоғам мүддесін құрбан етуге бар бұлар.

Шашбауы сылдырап-гүлдіреп Нарқыз төсек салу қамына кіріскенде, Бұқарбай серпіліп қатты қуанып кетті. Әйелдер төсек сала бастағанда қонақ сыртқа шыға түру ләзім. Бұқарбай бұлты бар қараңғы түнде сыртқа шыққан бойда “ух” деп, көкірегін кере салқын ауадан жұтты. Қара аспанды жерге төндіріп мырыңдаған отағасыдан құтылғаным рас па, өтірік пе деп олай-бұлай адымдап денесінің құрыс-тырысын жазды. Қынама бел камзолды, сәл бойшаңдау, сәл ірілеу, бірақ аяқ, қолы балғадай құлын денелі бойжеткен қыздың әсем тұлғасы көз алдынан кетпей тұрып алды. Өзі неткен тәрбиелі. Күнүзақ тіс жарып бір сөз айтпады-ау. Тек шешесімен күбірлескені болмаса. Ұзақты кеш ең болмаса бір рет тіке қарамады. Сонысымен ынтықтырды-ау. Сонысымен жұмбақ күйінде қалды-ау. Тілдесу керек. Қыз да соны қалайтын сияқты. Жігіт болсаң ебін тап, жеке сөйлесейік дейтін сияқты. Бұқарбайдың әйелі бар. Бұл қызметке ілінбей тұрғанда әке-шешесі үйге кіргізе салған бір кембағал жан. Оны әйелім деп жүрген бұл жоқ. Әсіресе қызметке ілінін атқа мінгеннен кейін Бұқарбай өзін бойдақ, санады. Мына жағы — Жем, ана жағы — Доңызтау. Үстірт ыңырсыған қалың елге дақпырты кеткен Бұқарбай өкіл. Қай ауылға бармасын жайылып жастық, иіліп төсек болған ел.

Сол қалың елден маңдайына шертіп жүріп бір сұлуға үйлену — Бұқарбайдың ендігі жердегі арманы.

Шам сонін тас қараңғы үйде тыныштық орнады. Сыртқа шығып кеткен Нарқыз біраздан кейін оралды. Есікті ішінен ілдірді. Шолпысы сылдырап үйдің он жағындағы салынулы төсекке жақындады. Кішкентай інісінің қасына жатуға ыңғайланды. Үйдің сол жағында әке-шешесі жатыр. Қонақ Бұқарбай жалғыз өзі — төрде, ортада. Үй іші тас қараңғы болғанмен, Бұқарбай үшін дүние жап-жарық тәрізді. Тас қараңғы үйде сырт киімін шешінген кұлын мүсінді қыздың сұлбасын шырамытады. Жүрегі кеудесіне сыймай өрекіп, танауға жеткен нәзік әтір иісінен таза мас болғандай Бұқарбай. Қыз жып беріп төсегіне кіріп жатып қалды. Не қимыл, не дыбыс жоқ. Тынысы да сезілмей қалды. Бұқарбайды өстіп жазалайын дегендей.

Ауылдың о жақ, бұ жағынан иттер үріп қойып, ақыры олардың да жағына құм құйылды.

Мұрны шуылдап отағасы мен әйелі тәтті ұйқы кұшағына енгендей. Қыз бейне өліп қалғандай жым-жырт. Дәу де болса демін ішіне тартып Бұқарбайды күтіп жатыр. Жаным-ай, неткен ақылды. Жылдай жылжып екі-үш сағат әрең өтті. Қыздың әке-шешесі ұйқы арасында сандырақтады. Енді ұрып жатсаң да оянбас. Киіз үйдің жыртығынан сынық айнадай түнгі аспан көрінеді. Бұлт ыдырағаны-ау.

Бұл кезде Бұқарбай талай тәтті қиялдарға шомып, қол созым жерде қимылсыз жатқан қызды енді кұшақтап кұшпаса, бұл өмірдің зөредей мағынасы қалмайтынына әбден көзі жеткен. Сондықтан төсегінен шығып, қыз төсегіне таман төрттағандап жылжыды. Ойын билеген арманы баяу тыныстап

шалқасынан жатыр. Беті бері қарай бұрулы, бір бұрымы жастықтан түсін кеткен. Білезікті, сақиналы сол қолы көрпе сыртында болмашы көтеріліп басылған кеуде үстінде. Жақындап үңіле қарап, не істерін білмей шоқиып жүрелеп отырды. Содан кейін қыздың қолын ұстады. Ып-ыстық екен. Оянсын деп қысыңқырады. Қыз оянды. Басын көтерді. Қолын тартты. Шошына қарағанын болжады Бұқарбай.

— Не керек... сізге?! — деді қыз. Сөз саптасы қатандау. Абыржып қалды Бұқарбай. Асау ма деп қалды. Манадан бергі ыстық сезіміне салқын су шарыпқандай.

— Мен ғой бұл... шошымаңыз!.. — деді дауысы дірілдеп. Масқара-ай дырдай өкіл Бұқарбайдың дірілдегені несі?

— Сіз болсаңыз қайтем? Орныңызға барыңыз!

— Нарқыз! Сізге айтпақ сөзім... бар. Озіңіз бойжеткелі осы бүгін көрдім... Көрдім де ұнаттым... Менің мақсатым сізді тәлкек қылу емес... Сіз қаласаңыз... Қаласаңыз өмірлік жар ету...

— Ол ой қашан кірді басыңызға?!

— Ол ой... бұрыннан да бар ғой... Бүгін сізді көргесін... анық шештім... — деп абдырады Бұқарбай.

— ... Асықпаңыз... ойыңыз пісе тұрсын... шыдаңыз... Өмір бойы өкініп жүрерсіз... әйтпесе... — деді қыз. Дауысында әзілі де, кекесіні де қоса байқалды. Бұны Бұқарбай қыздың беті бері қарағандық деп ұқты. Енді тек уәдені көлітіп ең болмаса құшақтап, сүйіп бір шер тарқату керек.

— Құрбым, шыным осы... Бір қызды бақытты етуге Бұқарбайдың күдіреті жетеді. Тек мені бетімнен қақпаңыз!

— Беттен қақпағанда не істе дейсіз?

— Түк те істеме, қалқам! Осылай монтиып отырсаң болғаны... — деп Бұқарбай қапсырып құшақтай алды қызды. Қыз капелімде мойнын олай бір, бұлай бір бұрғаны болмаса тырп ете алмай қалды.

— Қалқам... ғашығым! ... Жаным! — деп қабан желке Бұқарбай Нарқызды ұмар-жұмар бауырына басып мойыннан, алқымнан өліп-өшіп сүйіп жатыр. Шөлдеп ындыны кеуіп қалғандай.

— Жіберіңіз! — деді Нарқыз сыбырлап. Бұқарбай одан бетер екілене түсті.

— Мен аламын... Үйленемін... — деп бастырмалата сыбырлап жанталасып қызды жастыққа құлатып омырауының астына салды. Бір ғажабы қыз айқайлар емес. Үнсіз қарсыласып бұны кеудеден итеріп көтеріп барады. Қолдары неткен қарулы. Оң қолымен Бұқарбайды иектен тіреген. Бұқарбай енді төсімен қыздың толық омырауын езгілейін деп қанша ұмтылса да иектен тіреген тегеурінді білек бұның басын шалқайтып кейін қарай қайырып барады. Ендігі жерде екеуі үнсіз қасарысып тіреседі. Білекке білек айқасып қалған. Қыз біртіндеп бұны кеудесінен ысырған сайын Бұқарбайды намыс өртеп барады. Ойпырм-ай, бір қызға әлі келмегені ме? Ызаланып басын шайқап қалды. Қыз қолы иегінен тайып кетті де Бұқарбай екпінімен алға құлады. Қыз бұлтқып төсектен шығып кетті. Бұқарбай белден құшақтай алды. Бұқарбайдың аяғы ербең етіп былқ еткен бірдеңені басып кетті. Бала шар етті. Қызды төсекке қарай тарта берген Бұқарбайдың маңдайына әлдене сарт етті. Көзінің оты шықты. Сол күйі өз төсегіне секірді. Бала жылап қараңғы үйді басына көтерді.

Нарқыз інісін жұбатып жатыр.

— Не болды, Нарқыз? — деп шешесі оянды.

— Ештеме емес... — деп шолақ жауап берді қызы

...Қозбағар байғұстың түнімен кірпігі ілінбеді. Тан қараңғысымен ақырын тысқа шықты. Назары еріксіз Жұмаш үйіне ауды. Өкілдің қайқы бел жирені үй сыртында байлаулы тұрған еді. Қараса ат орнында жоқ. Зәресі зәр түбіне кетті Қозбағардың. Құрыды деген осы. Жұмаш үйіне қарай бүлкілдеп жүгірді Қозбағар. Кенет, қалт тоқтады. Қараса сонау ауыл алдындағы қабаққа тырмысып атын қамшылап ентелеп біреу барады. Қозбағар шүкшия кеп қарады. Қараса сол, өкілдің өзі! Атын қамшылап зытқып барады. Сол күні жұмыс басында Жұмаш бұған:

— Үйге қонақ әкелгеніңе қарсылығым жоқ, інім... бірақ... Бірақ... сен кешегідей үйге “бұқа” әкелгенді қой, бұдан былай! — деді. Қозбағар ұяттан жерге кіріп кете жаздады.

Содан “Жаңа жол” серіктігі ауданнан келген өкіл нұсқауларын демде жүзеге асыруға кірісті. Қозбағардың басшылығымен белсенді кедейлер “жекеменшік” деген “қызыл козді пәлені” құртуға кірісті. “Әй, әкесінің көрін, аяқтан шалып жатқан кедергінің басы осы жекеменшік болса, айда, жоялық көзін!” деп құлшынды белсенді кедейлер. “Ие, өкіл сөзі, өкімет сөзі, бұлжытпай орындау керек!” деп ұран тастады Шәріп. “Аша тұяқ қалмасын, Голощекин заңына қарсы тұру болмасын!” Содан басқарманы бас етіп білекті сыбанып алған белсенді кедейлер небары екі-үш сағаттың ішінде ауылдың ойран-ботқасын шығарды. Небары елу шақты түтіннің бүкіл малын топырлатып әкеп кәллектиптің қорасына қамады. Құрал-сайман, кетпен, күрек, балта, балға түгел коллективтің қоймасы — мешіттің бір болмесіне үйілді. Сөйтіп, кешке дейін “Жаңа жол” серіктігі жекеменшікті жылан жалағандай қылды. Бірақ кеш түсісімен үйдегі “жекеменшіктің” жойылмай қалған бір түрі — әйелдер түгел бас көтерсін. “Қап, кол-

лективтің қорасына алдымен осы әйелдерді қамамаған екенбіз!” деп талай белсенді кедейлер тымағын қолға ұстап үйден шыға қашты.

Шегелер оралғанға дейін ауыл осындай дүрбеленді бастан кешіп отырған.

4

Шеге, Ждақай және ауылсовет Жорға Күреңнің басы қосылысымен басқарма мүшелерінің арасында ал айтыс басталсын. Қозбағарда үн жоқ. Кім не айтса соның аузына қарайды.

— Коллективте зорлап енгізу, кедейдің қолындағы бес-он малын, дүние-мүлкі тартып алып ортаға салу бұл партия жолына қиғаш, партия бұндай әрекеттерді “солшылдық” деп сынға алып отыр! — деді Шеге, жұрт естімей отырғандай зіркілдеп.

Сонымен, жұрттың мал-мүлкі қайтарылатын болды. Мәслихаттың аяғын ала Қозбағар солбырайып орнынан тұрды.

— Ағалар! Ых... Жолдастар! — деді, біресе аспанға, біресе жерге қарап. — Осы мені босатсандар екен!

— Босатқаны қалай?

— Істей алатын емеспін... оллаһи... Шыным.

— Ал қасқалдақ керек болса... — деп Ждақай жырк-жырк күлді. — Әй, сен немене, шаршағанда тастап жүре беретін өкімет жұмысын ойыншық деп ойлайсың ба?

— Сауатым жоқ...

— Әй, сенен біреу сауат сұрап тұр ма, қасқалдақ? Сауатсыз Ерназаров та байтақ Қазақстанды басқарып тұрған жоқ па?!

Қозбағар желкесін қасыды.

Ертесіне жұрт жаппай шөп шабуға шықты. Кетпен, шалғы, орақтарын көтеріп, сай-сайды аралап кетті.

Шеге, Ждақай, Хансұлу, Рәш, Балжан бір бөлек кетіп “Есекөлген” сайының шөбін шапты.

Рәш пен Балжанды әңгімеге айналдырып Ждақай алға әкетті. Әдейі Хансұлу мен Шегені оңаша қалдырды.

Қас қарайып көкжиекті түн көрпесі бүркеген шақ. Шегемен оңаша қалуды Хансұлу да тілеген. Өйткені, кезінде қашып кетіп енді ауылға қайтып оралған Хансұлудың күні күн емес еді. Торқа кемпір мен Қозбағар жайы айтпаса да белгілі. Шамасы келсе бұның төбесіне аспанды тастап жіберуге бар. Ең қиыны — өз үйіне сыймағандығы еді. Шешесі айтып отырса әкесінің басына түскен ауыртпалық бұл қашқасын одан бетер ауырлапты. “Ініңді, қызыңды бандыға әдейі қостың” деп Сұржекей ауданға шақыртып ап талай тергеудің астына алыпты. Екі-үш күнге түрмеге де жауып қойыпты. Бүгінде әкесінің кірерге тесігі, барарға есігі қалмай отырса керек. Кәллектіпке мүше етін сірә алмайды. Бірер сауын түйе мен жалғыз аттан өзге малы да қалмаған. Бүгіннен ертеңі қараңғы. Тығырыққа таянған, шарасыз, дәрменсіз күйде. Ешкіммен сөйлеспейді. Ешкіммен араласпайды. Күнұзын малын қамдап жалғыз шошайып сыртта жүреді. Кешкісін шұқылап жазып жүрген шежіре дәптерлерін қарайды. Кітап оқиды. Тірлігі сол. Той жасап ұзатқан жеріне бармай батаны аттап кеткен Хансұлуға өкпесі өз алдына. Келгелі назар салған жоқ. Бір ауыз тілге келген жоқ. Әке қабағын бағып үйренген Хансұлу бүгінде көбінесе Рәш төңірегінде. Соның үйіне түнейді. Туған әке бүйтіп теріс айналғаннан кейін қалған жұрттан не қайыр.

Хансұлу қалайда “қарасын батыруды” армандады. Ойы сонда Шегеге тіреледі. Бұл қыз болып көзге

түскелі бері емеурін байкатпаған, ғашық болып хат жазбаған бозбала кемде-кем екен. Соның бірі — Шеге. Басы Қозбағарға шырмалғалы бері Шеге жайлы Хансұлу көп ойланған. “Әкесінің мақсаты, сірә, кедейге матап беру екен, ендеше шөбі Шегеге неғып түспеді екен” деп баяғы той алдында опынған. Екеуі қыз бен жігіт боп әнеуті жолда құм ішінде ғана алғаш тілге келді. Содан бері Шегені тыңдаумен келеді. Тыңдаған сайын Шеге көз алдында өсумен келеді. Өзгерген, өскен Шеге.

Бүгін де Шеге көп сөйледі. Ол сөйлеген сайын Хансұлу тыңдай түсті. Бірақ Шеге бүгін де Хансұлу күткен сөзді айтпады. Ең басты сөзін айтпады.

5

...Соңғы күндері Шеге үйге түн баласы кешеуілдеп келуін жиілетті.

Шам сөнген шақ. Жайбасқанның ірге жағында жатқан Шәріп көзі іліне берген еді, күңгірлеген бір үннен оянып кетті. Жайбасқан екен.

— Сен осы не ойлап жүрсің? Балаң болса ержетті...— дейді. Ұйқысы шайдай ашылған Шәріп шоқша сақалын тұтамдап жаман үйдің жыртығынан жылтыраған жұлдыздарға қарап ойланды.

— Е, комсомол болғасын, қайдан білейік... өзі білер деп жүргенбіз да... — деді.

Жайбасқан күрсінді.

— Балаң ендеше бүлдіріп жүр. Өзі білгені сол болса...— деді.

Шәріп жастықтан басын жұлып алды, Жайбасқанға қарап ажырайды. Жайбасқан:

— ...Ана ұрғашымен байланысып жүрген көрінеді. Торқа апамыз кеп бүгін тағы бұрқылдап кетті, — деді.

— Ой, кіспұрыш-ай, кіспұрыш! — деп Шәріп баласынан түніліп басын шайқай берді. — Осы кіспұрыш бірнәрсені бүлдірмей неғып жүр деп ем-ау өзім де! Тура ойлағаным келді... Қайда өзі? Әй, кіспұрыш, қайда жатсың!

— Жоқ үйде. Жоқ, міне түннің біруағы болды.

— Жоқ па?! Мейлі жоқ болсын сол! Әй, бұл үйде сірә, әке бар-ау, шеше бар-ау деп бір имену қайда? Сүйкенген жерінің түрін қарашы, көпірдің! Қой, бәйбіше, бұның аяғын байлайық! Енді бұл текешіктей бақылдап елді бұзуға айналған екен. Ал кім бар? Кімде бар бойжеткен қыз!

— Көптегі Сағидолланың қызын өткен тойда көрдім. Бойжетіп қалыпты.

— Пай, пай! Заңғардың қатыны да айтады-ау! Құлақпен құда қылып, мені тап жауыммен ауыз жаластырайын дедің бе?

— Көтек, Сағидолла құлақ па еді? Ізтілеу ше Шомдағы? Ол да құлақ па?

— Ізтілеу ме? Ізтілеуің — орташа. Ал оның да бойжеткен қызы бар ма?

— Айыбы ажарсыз демесең, қызы тәуір. Аяқ қолы балғадай, жұмыстың баласы.

— Бәп-бәрекелді. Нағыз бізге керегі де сол. Ажарын қайтеміз, ас қылып ішеміз бе?! Гәп бітті. Құдалыққа кісі жіберу керек, тап ертең.

— Қайдам, “әйел теңдігің, “слабода” деген шықты ғой. “Заман жастардікі” дейтін болдық қой. Балаң көнсе...

— Ау, көнбей қайда барады? Көнбей көрсін! — деп қалшылдап кетті Шәріп. — Әкенің айтқанына көнбесе, шешенің айтқанына көнбесе, керегі не ондай баланың? Кетсін бұл үйден!..

— Тәк!.. Тәк!.. — деп Жайбасқан басу айтты.

— Жоқ, ә! Расы сол, — деп Шәріп сабасына әрен түсті.

— Есік ашылып үйден біреу зып беріп шығып кетті.

— Бұ қайсы, әй?

— Қызың ғой.

Балжанның үйдегі жаңалықты Шегеге жеткізгелі кеткенінен хабарсыз еді екеуі.

Хансұлу Шегемен түннің біруағында қоштасып ауыл шетіндегі ақ боз үйдің есігін майда басып келіп ашқанда Рәш жеңгесі ояу жатқан.

— Жеңеше, әлі ұйықтаған жоқсың ба? — дегенде, қыз дауысы ойнақы әндей сыңғырлады. Жеңгесі қайын-сіңлісінің үнінен лүпілдеген бақыт лебін сезді. Ә дегеннен лақ еткізіп бүгінгі естіген-білгенін қайын сіңлісіне айтып салуға Рәштің дәті бармады. Біршама уақыт оздырып, Хансұлудың басы жастыққа тигеннен кейін ғана бүгін естіген Торқа кемпірдің “жырын” жеткізді. Жұқалап жеткізді. Бү жаңалықты естіген Хансұлу қорқа ма десе, жоқ, сылқылдап күлсін кеп.

— Тұу, жеңеше-ай, сол-ақ па айтпағың?! Торқадан қорыққан... сен де әбден су жүрек боп біткен екенсің! — деді.

Сөйтін жатқанда, үй сыртында ат тұяғының дүсірі естілді. Дүрс етіп біреу аттан түсті. Рәш пен Хансұлу тына қалған.

— Хансұлу! — деген ер кісінің үні естілді. Үй іші тастай қараңғы еді. Қорқып жатқан екеуі Шегенің дауысын танып “ух” деп суық демдерін алды.

— Ау! — деді Хансұлу.

— Шығып кетші, — деді Шеге.

Шапанын жамылып сыртқа шыққан Хансұлу жігітімен аз-кем күбірлесті де, үйге қайта кірді. Рәш

төсегінен жартылай тұрып жүрегі әлденені сезгендей қалтыранып отыр еді.

— Ал женеше, мен кететін болдым!.. — деді Хансұлу, дауысы өрекіпп.

— “Кеткені” несі? Қайда? — деді жұлып алғандай Рәш.

— Білмеймін... Шам жақшы, жеңеше!

Хансұлу үйден қоржынға тықпыштап киім-кешегін, көрпе-төсегін алып шықты. Рәш жеңгесі көз жасын сығымдап жүгіріп жүр. Шеге қоржынды атқа бөктерді.

— Ең болмаса бағыттарыңды біліп қалайын! — деді Рәш Шегеге.

— Жеңгесі, әзірше бізге оң сапар тілеңіз! Бағытымызды біле жатарсыз! — деді Шеге. Орта бойлы дембелше келген Рәш Шегені бас сап құшақтап маңдайынан сүйді. Жылап жіберді.

— Айналайын... жолдарың болсын! — деп Әзбергеннен бір, қайын сіңлісінен екі айрылған қам көңіл Рәш көз жасын тыя алар емес. Жаулық ұшымен бетін басып үй сыртында солқылдап тұр. Қараңғыға сіңіп теріскейге қарай суыт тартқан қос аттымен Рәш жалғыз қоштасып қала берді. Ауыл ұйқыда. Үй арасынан шыққан кісіге иттердің де үрмейтін әдеті. Тыныштық шырқын ешкім бұзған жоқ. Аспанда шашыраған сирек жұлдыздар тоңазық ауада түн кешіп бүрсең қағады.

...Елсіз жазыққа шығып қос атты сыдыртып келеді. Темірқазықты маңдайға алып соқтырта тартады. Екеуі де үнсіз. Ғұмырында бұндай көңілді сапарды көрген емес Хансұлу. Бойын ағарып атқан мына таңдай уыз сезім билейді. Коз алдында керіліп оянған кер дала келбетіне сұқтанып қарайды. Неткен кең, неткен

ғажайып дүние! Қылт етіп айтақырдан сызып киіктер қашады. “Пырр” етіп аяқ астынан бұлдырық ұшады.

Күн шыға шөпке жабысқан боз қырау еріп жылт-жылт етіп ат шашасын жуа бастады. Сәскеге таман бірырғақ жүрістен Хансұлуды ұйқы қыса бастады.

— Қой, ұйқың келсе, дем алайық, ат шалдырайық!— деді Шеге. Хансұлу қарсы болмады. Елсіз бір жарқабақтың күнгей бетіне іркіліп, шөбі от сайтабанға аттарды шідерледі. Қараған ығына көрпеше төсеп, қоржынды басқа “жастап екеуі киімшең қисайып көз шырымын алуды ойлады. “Ұйықтайық, көз ілдірейік” десті. Бірақ әлгінде есінете берген ұйқы, жатқасын шайдай ашылды. Шеге тас қып құшақтап алды қалыңдығын. Хансұлу үстінде белін үзілдіріп түрмемен ораған қырмызы кәмзол, зәгран шалбар, сымдай созылып жатыр еді. Жігіт құшағынан босанғысы кеп қайқы кірпігі дір етіп қабақ шытты.

— Сұлу! — деді Шеге күліп. — Сұлу!

“Сұлу” үндемеді. Сүзіле кеп карайды.

— Бүгіннен бастап екеуміз енді ерлі-зайыптымыз!

— Оны кім айтты саған? — деді, “Сұлу” кекеткендей.

— Мен айттым.

— “Ерлі-зайыпты” деп некесі қиылған жандарды айтады! Есінде болсын!

Шеге сөзден жеңілді. Ұйқы келмегеннен кейін атқа қайта қонды екеуі.

6

Ел аузында беделі өсіп келе жатқан жас Шегенін Пахраддин “кұлақтың” аты-шулы Хансұлуын алып кашуы “Жана жол” аулын дүр сілкіндірді.

— Өсіп келе жатқан бала еді. Кесайтты өзіне-өзі жасады.

— Елде қыз көп. Соның ішінен ұрынған жанынын түрін көр! Ойхой, кері кеткен заман-ай! — десті жұрт.

Жорға Күрең таң атқалы жымсиып күлумен жүр. Үлкенге де, кішіге де бірдей жұмсақ тілді Жорға ғұмырында кісі бетіне леп боп тиген жан емес. Сол мінезінің арқасында төңкеріске дейін де, кейін де жаман болған жоқ. Ес білгелі жамағайыны Мажан байды сағалап күн көрді. Көзі қарақты Жорғаны Мажан бай қала шықса тастамай қасына ертіп жүрді. Есейе келе байдың сауда-саттығын жүргізетін базаршысы болып алды. Ана жақта Қоңырат, Хожелінің базарына мал салып қарақалпақ, өзбек, түрікпен саудагерлерімен тізе қағыстырса, мына жақта Қарақамыс, Темір жәрменкелерінде орыс, татар қалталыларымен иық тірестірді. Мажан байдың ен далаға сыймай жататын қисапсыз малы Жорғаның онды-солды сілтеуіне жетіп жатты.

Жаңа үнем саясаты түсында Жорғаның тасы өрге домалады. Соның өзінде сауысқаннан сақ Күрең сақтана білді. Қарайтып мал жинамады. Ақша, алтынды көбейтті. Сырттай “бетеғеден биік, жусаннан аласа” көрінді. Көп ұзамай ауыл тірлігі астан-кестен болды. Мажанның басына күн туды. Сол тұста Шәріп пақыр ауылнайлықтан ұшып түсті де “Іс жүргізуге икемі бар, көзі ашық адам” Күрең боп табылып, ойламаған жерден “атқа” мінді. Көктен көксегені жерден табылды. Соңғы жылдары Күреңнің бір түйгені — мынау. Жиналыста өкімет саясатын қошеметтеп неғұрлым жаныңды салсаң өзінді сол саясатқа адал, жанашыр екенінді көрсетіп, неғұрлым кеңірдегінді соза түссең өкілдің көзіне соғұрлым жылы ұшырайды екенсің. Бұл да сөйтті. Мажанның күні мәңгі батқанын білген күні одан безіп шыға келді. Жиналыс болса қара шұбар өні жымсиып

кедейдің сойылын соқты. Және тыңдаған құлақты ұйытып, сөзін шашпай жатық сөйлей білді.

Жорға Күрең жымсиып тұрып Мажанды өз қолымен өзі кәмпескеледі. Өкіметке адал боп көріну үшін оған берілетін жазаны да халық атынан басып-басып жіберді. Тек, сол митингте бір кателік жіберді, Шәріпке тиісіп. Онда да нағыз таза ауылсовет екенін дәлелдеу үшін, Шәріптің Пахраддинге құйыршық болғанын айтып өкіл назарына іліккісі келген. Шәріп етігін шешіп жіберіп ұрғаны түк емес еді. “Мажанның базарға мал айдағанда мініп жүретін жорға байталы” дегені жанға батты. Бір тәуірі Шәріптің қызба, тыз етпе мінезін білетін өкілдер ашу үстінде айтылған ол сөзге онша мән бермеді. Содан бері Шәріппен іштей қас. Бірақ сырттай әлі жып-жылтыр. “Шәке-ай!”, “Шәке!” деп оны көрсе арқадан қағады. “Нағыз белсенді кедей Шәкең ғой!” деп бұрынғыдан да бетер қошеметтей түседі. Шәріптің өзін қойшы! Онда не қауқар қалды дейсін. Азу тісі білініп келе жатқан мына Шега деген күшігінен қауіп күшті. Ауыл билігі түбінде осы балаға тиіп кете ме деп қауіп етеді. Сөйткен бала, мінеки, омақасатын” жарға ұмтылып өзі барды. Қалай қуанбасын. “Дұрыс, — деді іші. — Бүлдірсін. Бүлдіре түссін”. Сол еді, таң атқалы жымсиысып құлумен жүргені.

Қозбағарды көрді. Қомпиған ынжық неменің қабағы қатпарланып кетіпті. Тура қарамайды кісіге. Күрең іштей мырс күлді де ез жігіттің жарасына түз құя түскісі кеп:

— Е, інім... өз нағашыңнан көріпсің ғой “қайырды”, құтты болсын! — деді.

Қозбағар жаны ауырғанын байқатып қалды. Бірақ тіс жармады.

...Шырылдауық Шәріп балалардың ойыншығына айналып шашыла бастаған қобди толы құрал-саймандарын ауылнайлықтан босағаннан кейін қайта жиып алған. Ескі кәсібі етікшілігіне қайта кіріскен. Хансұлуды Шеге алып қашып кететін күні таңертең бір пар етіктің ұлтанын қағып тастайын деп отыра берген. Төңірегін былғары, шерім, таспалармен ыбырсытып темір қалыпқа кигізген етік ұлтанына шегені тық-тық ұра берген.

Үйге Жайбасқан кірді. Буы бүрқыраған ыстық табананы қолында.

— Хабар жоқ па әлгі итіңнен? — деді Шәріп шерім ұлтанға жоңқа шегелерді бірінен кейін бірін ызғыта түсін. “Иті” — Шеге. “Бұ неге үйге түнемеді?” деп алаңдап отырған үй іші.

— Балаң ана ұрғашыны алып қашып кетіпті. Ал хабар керек болса! — деп қойып қалды Жайбасқан.

— А? Ып... — Шәріп балғамен саусағын ұрып алды. “Ыңң...” деп ыңылдап саусағын жалап, көзін жұмып біраз отырды. Басында — орамал. Үстінде — тері кеудеше. Бір кезде:

— Уа... Уа, иттің асыраған толі! — деп баж-бұж айқайлап, көзі шапыраштанып, жирен мұрты тікірейіп атқып тұрды орнынан. Тура керегедегі қамшыға жармасты. Қамшыны ала сап есікке ұмтылды.

— Жон терісінен... Жон терісінен таспа алмасам ба, кіспұрыштың!

— Соры қайнаған, кімді ұрайын деп барасың? Атпен түнде қашып кеткен балаңды ма? — деді Жайбасқан.

Шәріп қалт тоқтап әйеліне қарап үнсіз ажырайды.

— Неменене баржиясын? Торы атпен кетіпті балаң. Жаяу қыз алып қашқан кімді көрдің?

— Қап, иттің ғана баласы... Күйдірді-ау... Өртеді-ау...— деп Шәріп жыламсырады. Баланың күйігі аз болып тұрғандай, енді жағасына әйелі жармассын.

— Барлық пәле тап сенен!!! — деді әйелі көзіне шұқып.— Сенің тәрбиең осы! Окіметке жағу үшін “белсенді кедеймін” деп шолтаңдап жұрттың сакалына жармастың! Өтірік пе! Соны көрген жастар не істемесін? Жабысты мінеки сенің де сакалыңа! Ал енді өле қал!

— Кіспұрыштың қатыны, қысқарт! Тарт тілінді өкіметтен! Тарт! — деп шырылдап күйіп кеткен Шәріп әйелінің жанына дызаттап жетіп барды. Қып-қызыл боп кеткен. Қолында — қамшы.

— Ұр! Ұр! — деді Жайбасқан міз бақтастан. — Ұрғаннан бәрі орнына келетін болса!

Шәріп оқталып келгенмен ұра алмады.

— Ол ит пе, ол иттің төлі... тоқтай тұр... колыма бір түсер әлі! — деді, қалш-қалш етіп.

...Ауылдағы бұл жаңалық жерде жатпады. Таңертең түйе сауып тұрған Сырғаның да құлағына тиді. Сырға бұл жаңалыққа қуанарын да қуарарын да білмеді. Отағасы қалай қарайды, не дейді, Сырғаның қуанар-қуанбасы соған байланысты еді.

Пахраддин үйде аяғына асықпай шұлғауын орап, етігін кигелі жатыр екен.

— Қызың қашып кетіпті... — деді Сырға шелек сүтін босағаға қойып жатып.

Пахраддин етігін тарта түсіп іркіліп ажырайып қарады бәйбішесіне. Шошып, үрейленіп қарады.

— Шегемен қашып кетіпті... — деді Сырға үй ортасында жанған отты көсеумен қағыстырған боп. Бір көзі — ерінде.

Пахраддин етігінің сіресін жерге тепкілеп киді де, сол сабырлы, салмақты қалпы үн-түнсіз сыртқа шығып кетті.

Үйден шыққан бойда Пахраддин назары күздің алыс құба жондарын қыдырып, байыздап дағдарып тұрды. Әлгі Сырға айтқан жаңалық турасында ойланды. Таңданатын дәнemesі де жоқ. Пахраддин білген. Қызының “жыры” дәл осылай аяқталарын білген. Қайтсін деп аяп, ойлап тұр қызын. Одан басқа мойын бұрар жолағы да қалмады емес пе? Қайтсін, комсомолға сүйенбегенде. Болашақ, заман солардікі емес пе? Ждақай, Қозбағардікі емес пе? Соны болжаған, асасы, қызының ақылы кірейін деген екен. Әке-шешеден, сірә, қауқар жоқ. Кезінде, ағайын арасында дабырайған Пахраддиннен не қалды бүгінде? Тірі аруақ, құр кеуде қалды. Күн сайын құбылып, ай сайын алмасып жатқан мына теңіздей буырқанған мезгіл асаудың құлағында енді сол Шегелер ойнайды. Ұртоқпағы Сүржекей болса, жандайшабы Жорға Күрең шығар. Өңға салсаң оңға, солға салсаң солға шапқан бас білмес бұла тайлардай дүркірей шулаған жастардың заманы туып тұр. Ескіліктің қалдығы деп ол жастар айқаспай жатқан дәстүр жоқ. Ескі жазудан бастап әдет-ғұрыпқа дейінгі аралықтың бәрін жоймақ, бәрін жаңаламақ. Және асығыс, қолма-қол жаңаламақ. Одан не нәтиже шығарын бір Алламның өзі білсін. Арынды ағыс жағаға жітіріп тастаған жанқадай дәрменсіз, есеңгіреп Пахраддиндер тұр. Жәй тұрған жоқ. Іштей қан жылап: “Бұның соңы не болады? Ждақайлар, Шегелер, Жорғалар басқарған елдің күні не болар” деп күңіренумен тұр. Көкірегінде кейде айқай қозады Пахраддиннің. “Өткенге түгел топырақ шашпаңдаршы! Өткен деген әкең емес пе, өткен деген ақ басты анаң емес пе!” деп айқай салғысы келеді Пахраддиннің. Жар салғысы келеді дүниеге. Бірақ түнеріп барып тынады. Іштей тынады. Кім тыңдар?

Ат төбеліндей шал-шауқан, кемпір-сампыр болмаса?! Тыңдамас көпшілік. Іркілмес нөпірдей лықсып алға ұмтылған көпшілік. Қайта таптап өтер жолда тұрғанды, жайпап өтер, бірақ іркілмес. “Бізге ілескен — дос та, ілеспеген — қас” деді емес пе Сталиннің өзі де.

Пахрадиннің көзі ауылдан шығып сонау қабаққа қарай желдірте жөнеген түйелі кісіге ауды. Түйені бірден таныды. Шойынқара. Байғұс Шойынқара. Үстіндегі Ждақай болса керек. Жәй жүру дегенді, малды аяу дегенді білмейді. Қашан көрсең сабалап желіп бара жатқаны. Аямайды, кәллектиптің малы деп. Арықтап бітті бүгінде байғұс Шойынқара. Жануар, малдың төресі еді гой... төресі еді...

Көкірегі қарс айырыла күрсінді Пахрадин.

7

Елден жырақ қызыл қия құм арасындағы жалғыз үйдің тірлігі бүгін тоң-торыс халде. Құм арасының бейкам тірлігі де ұзаққа созылмады. Алдымен шай, қант таусылды. Содан кейін астық таусылуға айналды. Таусылмай келе жатқан тек боталы түйенің шұбаты мен киіктің қақтаған еті ғана еді. Қабағы қатулы Бұлыш кеше кешкісін:

— Балым, мен базар шығып келмесем болмас... — деді.

— Қайдағы базар? Есің дұрыс па? Озің қашып жүріп...

— Қарақалпақ жағына барам. Бесқалаға. Кім таниды дейсің... Осы тұста Қоңырат шамалауымша, атты кісіге екі жарым тәулік жер. Аман жүрсем 5 — 6 күнде шаң берулімін. Сен жалғыз қалуға қорықпасаң!

— Қорыққанда кайтем... — деді Балқия.

Сонымен Бұлыш екі аттың бірі ту биені сатып ақшасына биыл қысқа жетер азық-түлік әкелуге алыста, қатерлі сапарға шығатын болды.

Таң саз берісімен Бұлыш жолға қамданды. Балқияның көзіне жас айналып қоржынға оны-мұны тығып жатыр. Баяғы босқан ақтың әскерінен қалған Бұлышта екі бесатар бар еді. Соның бірін Балқияға қалдырды.

— Күндіз төбеге шықпа! Құмда... баспашы болулы. Малды да тасада ұста. От жақпа! — деп Бұлыш иығына мылтығын асынып қоржынды көтеріп есікке беттеді.

— Біреу-міреу келіп қалса қайттым?.. — деді Балқия көз жасын сүртін.

— Бір Құдайға тапсырдым, Балым!

Атып келе жатқан танды маңдайға алып, түйесін жетектеп Бұлыш жүріп кетті. Балқия шошайып жапанда қалған жалғыз үйдің алдында тұр, көзі боталап.

...Бұлыш Қоңыратқа келесі күні түнде кірді. Қалпақтың иір-иір тар көшелі, біріне-бірі жалғасқан дуалды, тандыр түтіні бықсыған қаласында түйе жетектеген қыр қазағы көзге оқшау көрінер еді. Үргенит, мөңіреген сиыр дауыстары саябыр тапқан шамада Пахрадиннің тамыры Шамұрат атты саудагер қалпақтың үйіне ат басын тіреді. Томпақ қарын саудагер Бұлышты құдды көптен күткен қонағындай жалпақтап қарсы алды. “Кәмпескеден кейін дала жұрты тұрмақ қала жұрты да өкіметке наразы, ана жақтан ағылшын мына жақтан Ханжөнейт бас салса, Кеңесіңнің аяғы көп ұзамай көктен келер” деген болжау айтты. Бұлыштың ел басқарып өкіметке қыр көрсеткен дақпыртына қанық саудагер оның шаруасын екі етпей орындады. Жылқының нарқы базарда 80—90 сом екен. Бұлыштың мініп келген биесін табан

астында 90 сомға кесті де, соның есебінен екі қалта жүгері, қант, шай, сабын тәрізді кәкір-шүкірлерді қорасынан-ақ алып берді.

Содан, Бұлыш түн жамылып жүріп кетті. “Жеті қарақшының” салбыраған күйрық ұшын маңдайға ала тартты. Қыр үстінің кәдуілгі аңқыған желі. Алыста құм арасында көзі жәудіреп қалған Балқиясын ойлап нарқоспақты қыстай түседі. Таң сарғая тырбық жусан, баялышты жалпақ тегістік далиып кең көріне бастады. Әлден уақытта өз-өзінен секем алып артына қарады. Сол-ақ екен, жүрегі зірк етті. Сарғайған таң астынан шаңытып үркердей топ атты қуып келеді артынан.

Бұлыш түйесін іркіп жан-жағына қарады. Көсенің иегіндей жылмиған жазық. Неде болса алға қарай айдады. Қамшыны басты нарқоспаққа. Көп ұзамай Қарымбеттен Ойға құлайтын “ауыз” кездесуге тиіс еді. Сол құламаға жетсе ғой жар тасалап жау жуытпас еді. Бірақ қуғын өңшең саудыраған салт атты екен. Өне-міне дегенше ентелеп жетіп қалды.

Бұлыш бір Құдайға сиынып, түйесін шөгерді де, алдыңғы екі аяғын мықтап тіздеді. Содан кейін, жатқан түйені тасалап бесатарын қолға алды. Бір өзі топ аттының алдын тосты. Сеңсең шөгермелі түрікпені де, дөңгелек бөрікті қазағы да бар, мына қуғын әтретке ұқсамайды. Мылтықтары шошандаған баспашыларға келеді сүдіндері. Және ел тонап олжалы келе жатқан сабаздарға ұқсайды. Жетектерінде сауырлары төңкерілген он шақты семіз ат. Қолы шандулы тұтқыны да байқалады.

Оқ жетер жерге келгенде иіріліп іркілді.

— Уай, кім боласың? Нағып жүрген жансың? — деген айқай шықты топ жақтан.

— Жолаушымын! — деп дауыстады Бұлыш түйенің тасасынан.

— Жолаушы болсаң неге жол тосасың? Шыныңды айт!

— Уа, жүре беріндер! Менен залал жоқ сендерге!— деп айқайлады Бұлыш.

Баспашылар арасында күбір-күбір әңгіме туды. Аздасын топ қиялап қозғалып Бұлышты айналып өте берді. Төбе көрсетсе оққа ұшатынын білген Бұлыш тасадан шықпады. Топ алдында баяғы жол-жөнекей кездесетін түрікпен. Өзінен басындағы шөгермесі үлкен. Ала аяқ ахалтеке үстінде сол қаздиган қалпы. Аналарды кара! Баспашылардың арасында Әзберген бастаған Мажанның үш “қасқыры” — Мотан, Қапан, Шотандар да барады. “Мыналардың қолына түсірте көрмегей Құдайым!” деді Бұлыш іштей.

Баспашылар бұның тұсынан өте берді де, иіріліп тағы тоқтады. Әзберген шөгермелі үлкен түрікпенге әлдене деп жатыр бұ жақты нұсқап. Тағы да күбір-күбір әңгіме туды. Ат үстіндегі боз көйлек, бұлтық сан галифе шалбарлы тұтқынды сүйреп жерге түсірді. Ұыз жас жігіт екен. Бұлыш анадайдан көрін отыр. Қазақ па, түрікпен бе, қалпақ па белгісіз. Қыр мұрын, әдеміше. Ұзынша арық тұрқы Шегеге келеді.

— Әй! — деп айқайлады баспашының бірі бұған.— Ендігі жердегі көмөнестердің көретін күні осы болмақ! Есінде мықтап сақта!

— Қолы артына байлаулы жігітті дірдектетіп бір баспашы ортаға сүйреп шығарды. Соңынан келе жатқан екінші біреуі, кенет, сапысын жарқ еткізіп сілтеп қалды. Жігіттің басы салбырап кеудесіне түсті. Мойны желкесінен қиылды.

Бұлыш одан әрі карауға дәті бармай назарын ала қашты. Енді бірде жүзін көтерсе топ қозғала бастапты. Өлі дене жерде жатыр. Әлгі екі жаяу, шыбықпен шұқылап әлденені шөптің басына іліп жүр. Көп ұзамай аттарына мініп олар да шауып кетті.

Бұлыш отыр. Аң-таң. Мыналардың шыныменен кеткені ме? Бірақ қаралары үзілгенше қозғалмауға ұйғарды. Баспашылар алға таман ұзай түсті де, кенет тағы бір жұмбақ қимыл жасады. Бағыттарын кілт өзгертіп батысқа қарай ойысты. Ойға бұл тұстағы құламадан түспейін дегені ғой, сақтық жасап, деп ойлады Бұлыш.

Баспашылар ұзап барып тасаланғаннан кейін түйесіне мінін бұл да қозғалды. Опат болған жігіттің тұсынан ете берді. Әлгілер таяқпен шұқып алып шөп басына нені іліп жүрді десе өлген жігіттің ішегі екен. Баялыштың басына шұбатып іліп кетіпті.

Күн сәскеге таяп кеп қалған. Жайпақ кең далада жалғыз өзі нарқоспақты сар желдіріп келеді. Бағыты — құлама. Одан әрі ойға түседі де бытбылдақ құмға шығып кетеді. Әлгі баспашылардан аман құтылғанына сенер-сенбесін білмейді. Құламаға да жетті. Екі жағы тік жар. Ортасы қазылған жылғамен жалғызаяқ соқпақ қиялап қырдан түседі. Төңіректе селт еткен тірлік белгісі жоқ. Түйе ылдиға қарай кібіртіктеп кейде артқы аяғымен тайғанақтап түсе бастады. Соқпақ екі жағы түйе бойын жасырғандай қыспақ жардан өте берген кезде “Ап!” деп әжептарқы айқайлап бірнеше адам тасадан барысша атылып кеп Бұлыштың үстіне қона түсті. Түйе ытып кетті. Көзді ашып-жұмғанша болған жоқ әлгілермен ұмар-жұмар айқасып жерде жатты. Мылтығы түсіп қалған. Арқасына жабысқан еңгезердей жігітті бұйым құрлы көрмей көтере сүйреп мылтығына ұмтылды. Сол арада жар үстінен топырлап секірген көп аяқтың астында қалды. Жұдырық, тепкі жауып берді.

— Байландар қолын! — деп жатыр. Біреу екі қолын артына қайырды. Сол қабағы жыртылыпты. Бетін жылымшы қан сызып ағып жүр. Көзін қанталап кеткен Әзберген тура иек астына тақап кеп:

— Әкеңнің көрін... түстің бе қолға! — деп бетіне былш еткізді жұдырықпен. Беті ысып қоя берді.

— Қайда ана қаншық?! — деп бөкседен ыңқита тепті келіп Мотан.

Бұлыш тістеніп алды. Үн қатпады. Баспашылар аттысы атты, жаяуы жаяу төңірегін қоршап тұр енді бір қараса. Қолы байлаулы бұны етбетінен салып тепкілеп жүрген Әзберген мен Мажанның үш баласы. “Әттең!”, “Әттең!” дейді ішінен қалай алданғанын білмей. Мана батысқа қарай бұрылғаны бұны алдау үшін, қыр астымен қайтып келіп алдынан тосу үшін жасалған айла екен ғой. “Әттең!”, “Әттең!”. Тепкі жауып жатыр. Бұлыш естен танды. Түйе үстіне көлденең байлап жатқанын біледі. Одан арғысын білмейді. Бір кездерде есін жиса — тас қараңғы түн. Құм ішінде келе жатыр. Аттылар алда. Бұл — артқы түйе үстінде. Байқаса аяқ-қолы бос. “Бұ қалай?” деп ойланып біраз жатты. Өзі шешілсе де, біреу шешсе де әйтеуір арқан шешіліпті. Бір ұшы жерде, сүйретулі. Доскөңіл баяғы өз нөкерлерінің бірі болар арқанды қиған. Баспашылар үнсіз келеді. Дүзген, селеу бастарын шулатқан жел бар. Құм баурайды жанап өте бергенде Бұлыш түйеден сыпырылып түсіп қалды. Құлаған жерінде бұқты да, бейғам керуен сәл ұзасымен тұра сап түн ішіне қарай қашты. Аяқ-қолының, тұла бойының ауырғанына да қарамады. Қуғын болама деп қорқып еш жерге тоқтамады. Бағытын жұлдызға қарап болжап түн жамылып жаяу тартты.

Екі күн құм ішін шыырлап жүріп ақыры иен шөлде жалғыз қалған Балқияға да жетті.

Атырау мен Арал арасындағы Үстірттің ұлы даласына дым бүркіп желдетіп қара суық күз келді. Ызғырық жел азынап бет қаратпайды. Берекетті кетіріп, қурап-солған дала шөбін елпең қақтырып, толассыз желдетеді. Жүдеу аспанда түстікке бағыттап қияндап ұшқан құстар. Жылы жаққа қарай ықтап жайылған үйір-үйір киіктер.

Шегенің байқауынша жаңа өмірге бет бұру, жеке шаруаны артель, серіктіктерге біріктіру, бай-құлақтарды тап ретінде аластау, қырдағы кошпелі ауылдағыдан гөрі Жем бойындағы жатақ ел ішінде ұйымшыл өтіп жатқан сияқты. Өзгерістер, жаңалықтар қарқыны, әсіресе аудан орталығы Нарқамыста пәрменді көзге ұрады. Үлкенді-кішілі мекеме маңдайшасындағы қызыл матаға жазылған ұрандарды есептемегеннің өзінде, ауыл тірлігінде бұрын-соңды болмаған “кооператив”, “клуб”, “спектакль”, “мәшине”, “радио”, “телефон” сияқты жаңалықтар күн сайын молайып келеді. Тұңғыш мәшинені көрген күн бұл үшін бір естен кетпес күн болды.

Хансұлу екеуі ауылдың өзен жақ шетіндегі бір жетім кемпірдің үйінде тұрып жатқан. Күндіз Шеге мекемелердің көлік аттарын бағады. Кешкісін келіншегімен ликбезге барады. Жылқыны Жем бойындағы тепсеңге айдап салып, Шеге кешке таман құмсақ жағалаудағы радиосы сампылдаған ауылға қарап тұрған. Ақтөбе жақтағы кабактан бір қарауытқан нәрсе ауылға қарай жылжып түсе берді. Дауысы ғүр-ғүр етеді.

— Мәшине!

Шеге ауылға қарай тұра шапты.

— Не болды? — деп үйден Хансұлу жүгіре шықты.

— Мәшине! Әнеки! — деді Шеге ат үстінен елеуреп жолды нұсқап. Кешкісін өрістен қайтып келе жатқан түйелер тұмсықтарын көтеріп ап мәшинедан үркіп бет-беттеріне безді. Бұйдасын үзіп қазықтағы боталар қашты. Мәшиненің алдынан елеуреп жүгірген бала-шаға. Шегенің торы аты мәшинеден үркіп шегіншектеп ыра-ыра қашады. Ауыл у-шу. Мәшине арбаңдап гүрілдеп бейне күн күркірегендей аспан астын азан-қазан етіп көшеге кіре берді. Ізінде шуылдаған ит, бала. Иығына ұзын кәмзолын желең жамылып сыртқа жүгіре шыққан Хансұлу, алғаш мәшиненің бақырайған екі үлкен көзінен шошып тұрып қалған. Енді бірде қараса арылдаған пәлекет тура бұны таптап кеткелі келеді. Қорыққаннан аяғының буыны босап кетті Хансұлудың. Әйтеуір қолымен ауа қармап жандәрмен бұлттарып үйге тығылып үлгерді. Мәшине көше тұсынан құлақ тұндыра арылдап өте шықты сөйткенше. Хансұлу есік алдында құлағын басып отыра қалған. Соны көрген Шеге Хансұлуды екі-үш күн тәлкек етіп жүрді.

Пәтер үйі — керен кемпірдің бір бөлмесінің жартысы. Ортасына шымылдық ұстаған. Хансұлудың Қаракерін сатып пұл қылып алған. Соның ақшасына көрпе-тосек алды. Мінеки, үй дегендегі бары осы. Бірақ оған жасып жүрген бұлар жоқ. Жалғызілікті керен кемпірдің ошағының басы бейне келін түсіргендей жадырап қалды. Нарқамысқа келген күннен бастап Шегенің бір қорыққаны аудандық комсомол комитетінің хатшысы Нұрила дейтін қатпа қара қыз еді. “Өзің ұя хатшысың, сөйте тұра бұ не бүлдіргенің, Қаспаков!” дейтіні анық еді. Кеңсесіне бара жатса, бұны анадайдан көріп есік алдында тосып тұр екен Нұрила.

— Ал жолдас Қаспақов, жол болсын! — деді. Ине-ліктей кара қыз.

— Осылай болды, — деді, Шеге айыбын мойындағандай.

— Неге сразу келмедің? Қашып құтылам дедің бе?— деп дүрсе қоя берді Нұрила.

Кеңсеге кіргеннен кейін:

— Сөгіс жариялаймын! Қыз алып қашқаның алып қашқан, мақұл делік, “құлақтың” қызын алғаныңды қалай түсіндік? Жолдас комсомол! Таптық көзқарас қайда?

Нұриланьың кеңсесінен шыға беріп еді:

— Е-е-е, — деген дауыс шалынды құлағына. Жалт караса — Сұржекей. Иығында желбегей жамылған сұр шинель. Белінде — наган. Сұп-сұр шіреніп тұр дорба ауызы томпайып.

Шеге жүгіріп кеп нәшәндік мелисаға:

— Ассалаумағалейкум! — деп қол ұсынды.

Сұржекей бұның қолын әрең алды. Түсі өрт сөндіргендей.

— Ты! Ты сматри* ... бала! — деп сүк саусағын шошандатты. — Тым еркінсу бұның! Ну, что ж белсенді болсаң?! Байшыл белсенділерді де білеміз біз! Сматри!..

Шеге жаман састы. Бусанып қоя берді.

Сұржекей “Әңгіме осымен бітті” дегендей қоңыз мұрты жыбыр етіп теріс айналып махорка орауға кірісті.

Бұл Нарқамысқа келген күнінің ертесіне болған жәйт еді. Апанасқа кіруге тура келді. Аупартком, РИК кеңсесі ауыл ортасындағы көк шатырлы жаңадан салынған еңселі үй. Апанас орнында екен. Шеге кіріп шығып сапырылысқан жұртпен қабаттаспай дәлізде күтіп, Апанас жалғыз қалған сәтте бұл есіктен басын

сұқты. “О, боец, кел!” деп Апанас шұрқырап амандасты. Арқасынан қағып қызыл мата жабылған үлкен столдың алдына әкеп отырғызды.

— Ал сөйле! — деді Апанас жұмсақ жымиып. Шеге өз жайын түгел әңгімеледі. Бұны ынтамен тыңдаған Апанас:

— Көгершінім, сенің бұл қадамыңды мен қателік дей алмаймын! — деді. — Өте тамаша! Сүйгені үшін осылай рыцарылық жасай алмаған жігіт ертең Отанды қалай қорғайды?! Ақылым — бұл жерде кешкі мектеп бар. Екеуің де оқындар! Қазір өздеріндей жастар, көзі ашық жастар көп керек. Өте керек!

— Афанасий Васильевич! Үлкен рақмет... Сізге!

— Келіп тұр! Жағдайыңды айтып тұр! — деді Апанас бұның қолын қысып.

Шеге Апанастың алдынан шыққанда иығынан бір ауыр жүк түскендей көкірек кере бір дем алды.

Соңғы кездері ел арасында Апанастың “әділ төре” деген атағы шыға бастаған еді. Апанастың ондай жақсы атағын шығарған, әсіресе, отряд бастап барып елді қайтарған соңғы сапары еді. Ауыл ақсақалдары намаз оқитын сәтте көшті іркіп корсеткен құрметі еді. Содан бандыға қатысқан ауыл азаматтарын Апанастың отряды Нарқамысқа айдап әкеледі. Түннің іші болса керек. Елу шақты кісіні Сүржекей ауыл түрмесіне айналған ат қораға топырлатып камайды. “Сотка дейін осында ұстаймыз” дейді. Шаршаған жұрт қара жерге қисая кеткенде жалғыз Лабак ахун шошайып отырып қалады. Жайнамазын тосеп, бетін құбылаға беріп ұзыннан шұбак аят оқуға кіріседі. Сол отырған қалпы танды атырады. Таң саз бере даусын әндей созып күзетшілердің зәресін алып азан шақыруға кіріседі. Қамаудағы ахунның шақырған азаны Нарқамыс жұртының төбе шашын тік

тұрғызады: Жұрт өріп көшеге шығады. Лабах ахун таңертең мелисалар ұсынған асты да ішпейді. Болған жайды мелиса бастығы Сүржекей Апанасқа баяндайды. Апанас дереу Лабақ ахунды шығартып алып тілдеседі. Сонда Лабақ ахун: “Уай, ұғлым Апанас, орыс та болсаң, Құдай көкірегіңе сана берген жан едің! Лекин, түбінде бізді абақтыға қамарың бар, расын айтпай несіне алдарқатып әкелдің! Сол еді айтпақ арызым!” дейді. Апанас қысылыс тауып “Көп ұстамаймыз, босатамыз, ақсақал!” дейді. Лабақ ахун ұсталғаннан кейін бұрыннан да жандарын шүберекке түйіп әрең жүрген ауыл молдалары енді, тіпті, кірерге тесік таба алмай бебеулеп кетеді. Ал кейбіреулері Доңызтауда бала оқытқан Әріп ишан сияқтылары молда емес екенін дәлелдеу үшін мешітке қарап іш етеді. Осының бәрі мәдени революция турасындағы партия саясатын көптеген шолақ белсенділердің жайдақ түсініп “аңқау елге арамза молда” болып асыра сілтеп жүрген іс-әрекеттерінің нәтижесі дейді Апанас. “Бас иіп келген бандиттерге берілетін амнистияға сәйкес Лабақ ахун бастаған қамаудағы кісілерді босату керек” дейді Калашниковке.

Бірақ бірінші хатшы Апанастың дегеніне қонбамайды. Калашниковтың көшпелі ауыл туралы мағлұматы тым жұтандау еді. “Бұл аймақта мен бірде-бір пролетариат көре алмадым. 30—40 ұсақ жәндіксіз, 4—5 ірі қарасыз бірде-бір шаруа жоқ. Шындап келсек, бұл дала толған кулак. Ал кулакқа, қолындағы малдан қымбат нәрсе жоқ. Кулакқа малды ортақтандыру — өлім. Сондықтан жеке шаруаның ең алдымен малын құрту керек. Малы бар көшпендінің аяғы ұзын. Оны ұстап тұра алмаймыз” деп айқайлайды Калашников столын тоқпақтап. “Көшпелі ауылды коллективтендіру жолында үш үлкен боғет тұр. Ол — бай, молда

және мал” дейді. Апанас ел ішінде болып жатқан келеңсіз жәйттердің біразын Калашниковтың алдына көлденең тартады. Коллективтендіру саясатын шолақ белсенділердің ұрда-жық әрекетіне айналдырып алу қаупінен сақтандырады.

Сол күні түнде ешкім күтпеген бір уақиға болады. Есік, тесігі жабық ат қорадан Лабақ ахун қашып кетеді. Өзге жұрт қаннен-қаперсіз ұйықтап жатады. Жұрттың айтуынша, Лабақ ахун өкіметке өкпелеп сол күні есік күзеткен мелисаны дуалап тастап кетеді-мыс. Содан мелисалар атқа міне шауып, ахунды іздейді. Бірақ Лабақ ахунның өзі тұрмақ ізін таба алмайды. Жолда кездескен қариялар: “Ахун енді ашуға мінген екен. Құдіретін көрсетейін деген екен. Енді ол оңайлықпен қолға түсе қоймас” деп пәтуа айтады.

Нарқамыстағы ел Лабақ ахун әңгімесін осы жерге жеткізіп бір қайырады да, ары қарай әркім әр түрлі болжам түспал айтады. Біреу ақ түйесін желдіртіп Лабақ ахунды Мекке-Мәдинадан бір-ақ шығарады, екіншісі Хиуа тұсты шарлатады. Енді біреу: “Дәл, сол ахун ешқайда да кеткен жоқ. Кіндік қаны тамған жерді тастап қайда барсын. Үстірттің кең даласының бір пұшпағында жүрген де” дейді.

9

Хансұлу мен Шегенің ерлі-зайыпты өмірлері ерекше тату-тәтті басталды. Бұрынғы сезімдері ендігі жерде май құйған оттай лаулай түсті. Бірін-бірі жарты күн көрмесе сағыныштан өле жаздайтын сияқтанады. Хансұлу өзіне беймағлұм жаңа Шегені көргендей. Ер-азаматқа тән асыл қасиеттің бәрі осы Шегенің бойынан табылғандай.

Ал Шегеде тіпті жан жоқ. Дүниедегі ең сұлу көп жұлдыздың ішіндегі жарқыраған Шолпанын алғанына мәз. Аты аңызға айналған Хансұлу — Шегенің жары! Ал не үйі, не күйі жоқ екенін ойлай бастаса болды берекесі кете бастайды жас Шегенің. Үй, күйі, қызметі бар, қалаша шаш қайырған бір суқиттың көзіне түсіп қалама деп қауіптенеді Хансұлуды. Сондықтан жылқыларды айдап өріске кетсе, қашан үйге жетіп Хансұлудың әсем тұлғасын өз көзімен көргенше көңілі көншімейді. Басына сан-сапалақ ойлар кіреді.

Күн батар-батпастан жылқыны шиырып айдап, ауылдың шығыс тұсындағы құмшағылдан шыға келеді. Ауылдың өзенге таман қанатындағы жыпырайған балшық үйге қарайды. Есік алдында шошайып тұрған келіншегін көреді. Сонда ғана жүрегі орнына түседі. Жылқыны жайбарақат айдап қораға беттетеді.

Бүгін ауылдың өзен жағынан келді. Аспан сірескен бұлт. Кеш ерте үйірілген. Өрістен мал қайтып, ауыл іші апақ-сапақ қарбалас. Есік алдында Хансұлу көрінбейді. Шеге жылқыны қораға қамап тастап үйге қарай беттеді. Жаяу. Аяғында ауыр етік. Үстінде қалың күпі. Белін қайыспен буған. Жел қаққан өңі түтіккен, тұнжыраңқы. Керең кемпірдің жыпырайған тамы ауылдың өзен жақ шеті еді де, бұл қазір соның төмен қора жағынан келе жатты. Үйдің ар жағы — көше. Кенет, сол көшеде, үй тасасында тұрған мәшиненің тұмсығын көрді. Мәшиненің есігіне жақындап еңкейген Хансұлуды көзі шалды. Шеге қалт тоқтап ес жиып үлгіргенше, мәшине ішінен бір жігіттің басы қылтың етіп Хансұлуды қолтығынан көтеріп ішке тартты.

Шеге тұрған жерінде сілейді де қалды. Бір сәтке құлағы тас бітелгендей. Беті дуылдап кетті. Бұрын-соңды бастан кешпеген бір дүлей сезім жан-жүйкесін өрттей шарпыды. Санасына у боп құйылды. Сөйткенше, гүр етіп мәшине қозғалды. Әлгі сезім улаған Шегеге Хансұлу қазір дүниедегі ең ақымақ, дүниедегі ең жеңілтек “шүйкебас” боп көрінді. Осындай шүйкебасқа үйленген дүниедегі ең ақымақ еркек те өзі боп көрінді. Төбесіне аспан құлап түсін, аяқ астындағы жер жылжығандай. Осы оймен ауызғы үйге, одан солбырайып ішке кірді. Сорайып пеш жанында іркілді. Үйдің бір бұрышын бөліп тұрған қызыл ала батсайы шымылдыққа қарады. Осы шымылдық іші, жалғыз-ақ тосек сиятын ұжмақ ұядай еді. Сағынышты ыстық құшақтары жалындап қауышатын, небір шырын сөздер айтылып, сезім шәрбатынан ұрттап, бақыттан талай басы айналған жар төсегі еді. Енді соны өрт шалғандай. Ақ сезімі алданғандай. Ыңыранып қиналып жаны ауырды. Алашаның бір шетіне сылқ түсіп отыра кетті. Жаралы болған жыртқыш аңдай ызалы ыңыранады. Сөйтіп отырғанда шоланға екпіндеп біреу кірді. Іле есікті ашты.

— Шеге! — деп, мәз-мейрам екі беті балбырап жанып үйге Хансұлу кірді. Коңілді. Әрине, оқыған жігіт қолтығынан ұстағасын көңілденбей қайтсін. Шегеде үн жоқ, тырсиып отыр.

— Шеге, қызық болды! Мәшинеге міндім... — деп елеуреп саңқылдап күліп, хабарын айта бастады Хансұлу. Бөлме іші алакөлеңке еді. Хансұлу Шегенің түтіккен түрін байқай қоймаса керек.

— “Ө” деп қозғалған кезде, қорыққанымнан бір селтиген темірді ұстай алыппын. “Болмайды!” деп баж етті Ибрагим. Құрысын, сөйтсем, ол әлгі мәшинені

жүргізетін темір екен. Қайдан білейін. Ибрагимнің күлкіден ішегі қатты.

“Ибрагим” деп тұрғаны Калашниковтің мәшинесын айдайтын қала модысымен шаш қайырған татар жігіті. Білмейтіні жоқ, пысық. Белгілі болды сыңғырлаған күлкіннің төркіні. Өзіне мәшине да, Ибрагим да ұнап қалса керек. Мал баққаннан басқа білері жоқ Шегені қайтсін.

— Шеге, не болды? Неге үндемей отырсың?! — деп Хансұлу бір кезде бұның алдына кеп жүресінен отыра қап бетіне үнілді. Күліп қарайды. Күлгені бұны табалағандай болды. Шапалақпен жактан осып кеп жіберді. Шегенің қолы қатты еді. Шапалақ шарт ете түсті. Хансұлу шалқалап барып екі қолымен жер тіреді. Үй іші күңгірт болса да Хансұлудың жарқ ете қалған көзін көрді. Оң жағын басып бүк түсіп бүгіле берді. Бір кезде шарасынан шыға ашу бүріккен отты козін оқша қадап:

— Не болды? — деді жан дауысы шырқырап шығып.

— Білмейсің бе, не болғанын? — деп қарсы ақырды Шеге.

— Білмеймін!.. Білмеймін!.. — деп ышқынып жіберді Хансұлу. Сөйтті де, үйден ытқып шыға жонелді. Жәй кеткен жоқ. “Жынды!” деп есікті тарс жауып кетті. Үйге кіріп келе жатқан керең кемпірмен тар шоланда қақтығысып қалды.

— Көтек! Құдай зекет! — деп шошып кеткен кемпір алақтап есік алдында сәл бөгелді. Содан кейін ішке кірді. Үй іші қараңғы еді.

— Ибай-ау, Құдай зекет, бұларың не... шам жақпағандарың?.. — деп қайран қалды кемпір.

— Балам-ау, бұларың не? — деп пеш жанында күйбелендеп сіренке іздеуге кірісті.

Шеге үнсіз. Осы сәт қараңғы бөлме іші тар қапастай көрінді. Тұра ұмтылды бұл да сыртқа. Есік алдына шыға келсе ымырт үйіріліпті. Ызғарлы желеміктеу мазасыз түн. Көрші-қолаң қораларына малдарын қамап болып, әрқайсысы жылы ошақ бастарында саябыр тапқан шақ. Сыртта жалғыз ғана Шеге. Осы үйдің ала күшігі Шегенің мұңына ортақтасқандай қасына келді. Құйрық бұлғақтатты. Кемпірдің жыңғыл шарбағының тоңірегінде ешкім көзге шалынбады. Шеге Хансұлуды іздейді. Бірақ келіншегі жым-жылас жоқ. Жігі айрылып қақыраған дүние одан сайын қақырай түскендей.

Ойы құйындай ұйытқып не істеп, не қойғанын білмейді. Бір кезде қараса, солбырайып шарбақты орап өтіп өзенге беттеп келеді екен. Ала күшік жігіттің мүшкіл халін түсінгендей селтең қағып қасында келеді. Ұйытқыған жан құйыны кем-кемдеп толас тапқан шамада бүгінгі уақиғаны ақыл таразысына салып ойлай бастады.

Шеге кенет іркіліп аспанға қарады. Тобені бүркеген түн. Ауыр бұлт бар. Іркілген себебі басына бір сұмдық ой келді. “Ешкім де емеспін мен. Революционер де емеспін. Комсомол да емеспін. Жаңашыл жас та емеспін. Ескілікпен айқасқаны рас, бірақ одан жаңашыл да болып жарытпаған... Бір байғұс жандайшаппын...” деген сұмдық ой келді. “Ие, жандайшап!”, “Жандайшап!”. Бұны алдыңғы қатарлы жас деп ізіне ерген Хансұлуды аяп кетті. Жанын өкініш оты шабақтады.

— Хансұлу! — деп дауыстап, бүлкілдеп жүгіре түсті. Отыра қап үңілді. Түк көрінбейді. Әлде таныс келіншектерінің бірінің үйіне кетті ме екен? Он шақты күннен бері Хансұлу қоймада, тұқым тазалайтын бригадада істеп жүрген. Әй, бірақ ойтуге түн

жамылып баруға намысы жібере қоймас. Жүгіре басып кемпірдің қорасын, шарбағын, үй сыртын тағы бір айналып шықты.

— Хансұлу! — деп сүнк ете қалады. Қатты дауыстауға естіп қойса жұрттан ұят. Үй төңірегінен таба алмай өзен сайға қарай бүлкілдеді. Күшігі де ереуілдеп үріп шәуілдеп қалмай келеді. Бү жолы өзеннің тура жағасына дейін барды. Ойы сан-саққа жүгіреді. Кім біледі. Өмірде маңдайынан жан шертіп көрмеген Пахраддиннің еркебұлаң қызы ашу үстінде суға секіріп кетті ме?

Отырып карауытып жатқан су бетіне үңілді. Жым-жылас. Тым-тырыс.

— Хансұлу! — деп тағы дауыс шығарды. Мелшиген түн. Мелшиген өзен аңғары. Қоймалжың қараңғы Хансұлуды жұтып қойғандай. Әлде өзеннен өтіп ап елге тартты ма екен?

Төңірегінде селтендеп жүрген күшіктің дауысы өше қалған. Бір кезде өзеннің жоғарғы жағынан үргені естілді күшіктің. Өне-міне дегенше арсалаңдап жүгіріп жетті. Көрінеу қуанып, құйрық бұлғап, аяғына оралды да, дереу келген жағына қарай қайта жүгірді. Шеге соңынан жүгірді. Құмсақ болушы еді жағалауда. Құмсақтың дәл ортасында шоқиып отырған кісі тұлғасын көрді. Жақындай түссе ақ жаулығы қылаңытып теріс қарап отырған Хансұлу! Бетін құбылаға беріп, намаз оқыған молдадай шоқиып отыр. Келіншегінің табылғанына қуанып кетті Шеге. Ақырын келіп жанына тізе бүкті. Жағаға шылп-шылп соғып Жем жатыр. Аздап үіл жел бар. Екеуінде де үн жоқ. Ала күшік “ауф” деп қояды, бұларға қарап жалтандап.

— Сұлу! — деді Шеге тілі әлден уақытта әрен шешіліп.

Хансұлу былқ етпеді. Түн ішіне қарап бездиіп отыра берді.

— Жә, айып менен... — деді Шеге. Хансұлу тас керен.

— Үйге барайық. Тонған шығарсың! — деді Шеге. Осы арада келіншегіне тіл бітті.

— Жаның ашымай-ақ қойсын! — деді жұлып алғандай.

— Отыра береміз бе, сонда, құла дүзде?!

— Кетемін!.. Сенімен тұрмаймын!

— Түн ішінде ме?.. Ертең кетерсің... күн шық-қасын!

Хансұлу тырсиып отыр. Дыбыс жоқ.

— Біреудің мәшинесіне мініп... жаулығың желпілдеп баратсың... Бұны қалай түсіндік?!

Сол-ақ екен, Хансұлу дүрсе қоя берді.

— Өзің емес пе едің “Әйел мен еркек тең!” деп, “Слабода!” деп айқайлап жүрген? Мәшинеге мінгенің үшін мен сені соқсам қайтер едің?

Шеге “ымм” деп тосылып біраз отырды. Хансұлудың айтқаны шындық еді. Насихаттанқырап жіберген “теңдігі” бүйтіп бір күні оз шекесіне тиер деп ойламаған ғой. Жаман қиналды, не дерін білмей ызалана бастады.

— Ал неге үндемейсің? — деді Хансұлу әдейі қажап. Шеге бұрқ етті.

— Сен! Сен! — деді. — Менің әйелімісің бе, әлде сол... “слабоданың” әйелісің бе? Соны айтшы, сен?!

— Сенің, әрине.

— Ендеше сөзді доғар! — деді Шеге. Хансұлу жасқанғандай үнсіз қалды. Содан екеуі тымырайысып ұзақ отырды. Ала күшік “бұлардың ұрыстары қашан бітеді?” дегендей құмға иек төсеп жатып алған.

Ауыл жақтан кемпірдің:

— Хансұлу! Шеге! — деген айқайы шықты. Сүйретіліп екеуі де орындарынан тұрды. Үн-түнсіз үйге қарай жүрді.

Ала күшік қуанып кетіп шауып ала жонеді ауыл қарай.

Осы уақиғадан екі жеті өткеннен кейін елден Шәріп келді бұларды іздеп.

Желкем түн еді. Бүріккен салқын жаңбыр бар. Көше лайсаң. Шеге Хансұлу екеуі мектептен шығып, ауылдың өзен жағындағы пәтер үйіне қарай бүрсеңдеп келе жатқан. Аяқ асты көрінбейді. Келіншегін Шеге қолтықтап алған.

— Иша! — деп қояды Хансұлу бүрсеңдеп. — Мына жел қайтеді?

— Қарға айналса қатыратын болды-ау!

— “Жана жол” бізді ұмытты ғой.

— Мәссаған! — деді Шеге қорасына жақындай беріп іркіліп: — Біреу келіпті ғой біздің үйден!

— Не көрдің? — деді Хансұлу таңырқап.

— Біздің үйдің бақырауық жарбайы емес пе анау жатқан?

Сол екен, ықтасында жатқан жазылы түйе “бақ!” етіп үн шығарды.

— Көкем болар... — деді Шеге іркіліп. “Не істейміз?” дегендей келіншегіне қарады. Келіншегі бұған қарады. Қарын ұстаған терезеден май шамның жарығы сығыраяды. Іште дабырлаған дауыс.

— Қой, кірейік!.. — деп Шеге ішке жол бастады. Хансұлу ізінен ерді. Есік алды тар шоланда жатқан алакүшікті аттап өтті. Киізбен қаптаған алба-жұлба есікті ашты Шеге. Үйдің ыстық лебі сыртқа теуіп бетке үрды. Әкесі төр алдында көпшікті шынтақтап шалжиып жатыр екен. Басында — кара тақия.

Қазанның сорпасын сапырып пеш жанында тұрған керек кемпір:

— Көтек! Ал келді балаларың! Ал сазайын бер!— деді тісі кетиіп, самбырлап күліп.

Шәріп басын кекшең еткізіп, тіктеліп есіктен сопайып кіре берген ұзын күпілі Шегеге ажырайып қарады. Баласының тасасында — қызыл көйлегінің етегі көлең етіп жүзін көлегейлеп қырындай берген жас әйел тұлғасы.

— Ассалаумағалейкум! — деді Шеге, ырсия езу тартып.

“Жүдеп кеткен бе, қалай, өзі?” Шәріп буын-буыны қалтырап орнынан тұра берді. Келіні ақырын тұрып бір тізесін сәл бүгіп сәлем берді атасына.

— Көп жаса! — деді Шәріп дауысы қобалжып. Көзіне жас айналды. Қолын ұсынып амандаса берген баласының арық, арбиған саусақтарынан сүйді. Көз жасы ыршып-ыршып кетті Шәріптің. Бешпетінің қалтасынан көлдей орамалын алып көзін сүртті.

— Қарғам-ау, аман жүрсің бе?— деді кемсендеп.

— Сол ма “көрсеткен сазайың?”— деп, керек кемпір тісі кетиіп, кеңкілдеп күлді.



ДҮРБЕЛЕҢ

1

*А*рттан қуған ызғу жел бар. Бүрсең қақтыра айдап келеді. Нарқамыстан шығып сонау Хан-төрткілге қарай беттеген іркіс-тіркіс атты, түйелі жолаушылар. Теріскейге жота беріп соқтырта тартады. Топ соңында шабдар бестісін тепендетіп Жорға Күрең келеді. Көңілді, топтан қалыс. Өкшау. Алдарақта бақырауық жарбайын солқ-солқ желдіріп Шәріп барады. Тымағының құлағы желпілдеп бос даланы басына көтеріп шақалақтап күледі. Лепіруін бәтшағардың. Әлгінде ғана тарқаған кедейлер конференциясынан ең көңілді шыққан сол. “Пах! Пах! Ай, аузыңа май! Әп, бәрекелді! Сөз-ақ!” деп Шәріп клуб үйін басына көтеріп бастықтарды қолпаштап айқайлағанда бұл: “Мына шіркін қайтер екен, ұшып кетер ме екен!” деп отырды іштей жиырылып. Осы Шәріпті суқаны сүймейді. “Өкімет” десе көл қорғаған қызғыштай шақылдап шыға келеді. Дес бермейді. Өзге жұрт, құдды, өкіметтің өгей баласындай. Жорға Күрең әлдеқашан ауылнай болса да, бұған кеуде бастырғысы жоқ. Иліккісі жоқ. “Мен белсенді кедеймін!” деп кеудеге ұрып тұрғаны. Әттең, күні туып тұр ғой осындай жамандардың.

Бүгінгі конференция Жорға Күреңге ұнамады. Калашников тұрып: “Құлақтарды тап ретінде жоямыз!” деді. Баяғыдан бері жойғандары аздай-ақ. “Көшпелі ауылдарда отырықшыландыруды бір

аптаның ішінде аяқтаймыз! Жаппай коллективке кіреміз. Жеке шаруаны аластаймыз! Көшпелі ауылды аудан болсақ та, бұл науқанды отырықшы орталық аудандардан ерте бітіреміз!” деп ұран тастады. Сонда Сұранышов деген біреу орнынан қарғып тұрып: “Семен Харитонович! Сіз өте дұрыс айтасыз! Біз коллектив болу жөнінен әлі-ақ Ресейдің орталық аудандарын басып озамыз!” деп едірендеді. Шәріп сияқтылар ду қол шапалақтап елірді.

— Дұрыс! Дұрыс! Тездету керек!

— Несіне үш жыл күте тұрамыз!— деп шолақ белсенділер қомпандасты.

Жорға Күрең тасада отырып мырс күлді. Аузымен орақ орған мына пысықтарға күлді. Жиналғандардың бәрі жергілікті жағдайға емес, Калашниковтың аузына қарап жатқаннан кейін бұл да жымсиып күліп отыра берді. “Жарайды, білгендеріңнен қалмандар!” деп.

Осы жиын үстінде Қозбағар солым басқармалықтан алынды. Оқуға кететін болды. Жорға Күрең орнына баласы Ждақайды қойғысы келген. Комсомол десең комсомол. Бандиттермен айкасқан. Бұдан басқа еті тірі жас жоқ. Шеге анау Пахраддиннің қызымен шатасып, қаңғып жүрген.

Содан Жорға Күрең іске кіріссін. Таныстарын жағалады. Сөйтіп жүргенде алжасқан Шегені Апанастың қасынан көріп сезіктене қалды. Күдігі дәл келді. Конференцияның аяғында бұларды Апанас шақырып алып “Жаңа жол” серіктігіне басқарма болып комсомол мүшесі Қаспақов Шеге барады” деп хабарлады. Ол ол ма, “Алжасқан бала” бұныңмен сол жерде тізе қағыстыра отырып партияға кіретін өтінішін де жазды. Осының бәрі Апанастың қолдауымен болып жатқанын бұл білді. Іштегі ызасын кімге айтып, кімге

шағынбақ?! Калашниковке барайын десе ол бір асау аттай ытырынып тұрған орыс. Қазақшанды татып алмайды. Жүрісі қалай тік болса, мінезі де солай тіп-тік. Өзінің киген кителінің жағасы да тіп-тік, қысқалау қырыққан шашы да тіп-тік. Бұл сияқты ел қазағымен мәмілеге келер сиқы жоқ. Жорғанын нәшәндік мелиса Сүржекеймен сәлемі түзу еді. Бір қағаберісте “Жәке!” деп жымсиып сәлемдесті. “Бұл өзі қалай? Біздің ауылдың құлағының туған күйеуі баласы басқарма болады. Жеке, бұл қалай?!” деп сыр тартты. Илікпей тұрған сап-салқын Сүржекейдің таңқита бастырған қырма қоңыр мұрты жыбыр етті. “Да-а!” деп сұрлана түсіп махоркасын орауға кірісті. Дорба аузын томпайтып ойланып қалды. Бірақ тіс жармады. Жорға Күрең Сүржекейге сөйтіп ой тастап кетті. Ендігі қалған үміті — Сүржекей. Сол бір тірлік жасамаса мына түрімен Шеге деген бала тым алысқа беттеген сынайы бар. Күшейтпеу керек бұларды.

Арттан қуған ызғу жел. Аспанда сірескен бұлт. Бақырауық жарбайын майпаң-майпаң желдіріп тымағының құлағы желпілдеп алда Шәріп барады. Келін, баласы қасында. Көңілі хош. Әндетеді. Оның дауысы саңқылдап естілген сайын іштей жиырыла түсіп, сырттай езу күлкісін жимай жымсия күліп Жорға келеді.

2

Бүкіл ауыл бүгін Шәріптің үйінде. Хансұлудың ең бақытты күні бүгін. Шеге екеуінің тойы. Өткен жаздағыдай күллі елді дүрілдеткен салтанат болмағанмен, Хансұлудың өз басы үшін шын қуаныш, шын мереке осы.

Шеге де сондай күйде. Төңірегін қоршаған жолдас-жора, үлкен-кішімен сұқбаттаса отырсадағы көп жұлдыздың ішіндегі шолпандай Хансұлуға назары түсе береді. Тіптен қарамаса да келіншегінің қайда жүргенін, не істеп жүргенін біліп, сезіп отыр.

Кешкісін жастар оңашаланып ойын-сауық құрды. Ждақай түйе жүн күпісінің қойын қалтасынан бір “Чекушкенің” басын қылтитты. Өзі қырк-қырк күлді. Жұрт гуілдеп кетті.

— Өйбай, әкел Ждеке!

— Қайран Ждекең табады.

Ждақай мақтанып кетті:

— Қасқа Ждақайдың таппайтыны бар ма? Кеше сіздер кәнперенселетіп жүргенде мен не бітірді дейсің? Ал кәне, өзіміз отырғанда тездетіп жіберейік! — деді лепіріп.

— Кемпір-шалдар біліп қалмасын! — деді Шеге.

— Өй, атасы нәлет, теңдікті не үшін алдық? Дұрыспа, Сәке? — деді Ждақай жұлқынып.

Серікбай деген бадырақ көз жігіт:

— Жәкең дұрыс айтады! — деді қошеметтеп.

Жастарға да керегі сол.

...Сырт козге түртсе көргісіз тастай қараңғы. Түннің аязын буы бүрқыраған Ждақай елер емес. Есіл-дерті тірі жесір Рәш. Соның үйі. Көзі еш нәрсе көрмесе де аяғы солай алып келеді. Рәш “Жаңа жолға” көшіп келгелі бері Ждақайдың көңілінен де, көзінен де таса болған емес. “Бандиттің әйелі” деген атқа іліккен келіншекті Ждақай қорғаштаған боп жүреді. Өзбергеннен, сірә, хабар жоқ. Жалғыздық көрген Рәшқа комсомол Ждақайдың бұл қамқорлығы да кәдімгідей тірек.

Рәш жатпаған екен. Үйге отын кіргізіп, от жаққалы күйбеңдеп жүр екен.

— Кеш жарық! — деп көзі жылт етіп кіріп келді үйге Ждақай. Батыл.

— Ақырын... — деді мойыл көз, жұмыртқадай ақ келіншек Рәш. Тойдан жаңа ғана келіп суып кеткен үйін жылытқалы жатыр еді. Оты бықсып жанбай жатыр.

— Былай түр... Қасқа Ждақай қатырады...

Ждақай бөркін қолтыққа қысып бықсыған отқа еңкейді. Ұсылмен отты үрледі. Қоламта бір кезде лау етті. Үй ішінде сәуле ойнап жалын табы бетті шарпыды.

— Ие, бұ не жүріс? — деді Рәш.

— Е, бүгін той емес пе? Тойлап жүрміз? — деді Ждақай кірпі басын сипап ыржаң етіп.

— Тойып жүрмін десейші...

— Құдайға шүкір... аздап... иқ... — Ждақай ықылықата бастады. — Той көбейетін болды ғой...

— Ие! Ол неғылған той? Тағы біреу үйлене ме?

— Ждақай деген біреу... ық... үйленеді...

Рәш мойыл көзі жарқ етіп жігітке қарай қалды. Сенбей қарады.

— Иқ... сенбейсің бе?! Атын айтайын сенбесең... болашақ катынымның! Иқ...

— Ие... Өл кім? Біз де біле отырайық!

— Нарқыз деген... иқ.

— Нар-қыз?!

Таң қалған Рәш тарғыл бет Ждақайдың кірпі басына қарап отырды да, кенет сақылдап күліп жіберді. Өз даусынан өзі шошып кетіп, іле аузын баса қойды.

— Қатынға жарыған екенсің... — деді Рәш қос иығы бүлкідеп. Көзінен жас аққанша күлді. Ұмтылып сыртынан келіп қалған жігітті аңғармай қалды.

Ждақай бетін басып күліп отырған келіншекті ту сыртынан қапсырып құшақтай алды. Еңкейіп келіп Рәштің бетінен, көзінен шолп-шолп сүйді.

— Жетпе-гі-rrrr, бұның не?! — деп Рәш бұлқынып сыбырлап ұрысты.

— Бар, одан да ана алатын қызыңды сүй! Жетпегірі!!!

Ждақай Рәшті тас қып құшақтап, басын келіншектің алқымына тығып алған. Жабысып алған тас кенедей қадалып. Үн жоқ.

— Жетпегірі! Неткен ұятсызсың, жап-жас болып!..

Рәш олай бір бұлқынып, бұлай бір бұлқынып түк шығара алмады. Ждақайдың ыстық ерні алқымын шоқтай қарып, оттай күйдіріп жатыр.

— Қояншық екенсің... өзінде бір! — деді бір кезде дауысы дірілдей жуасып.

Екеуінде де үн жоқ. Тым-тырыс.

Әлгі от сөнуге жақындағанда Рәштің аппақ жұмыр білегі кірпібас Ждақайдың мойнына оратылды.

3

Тойдан кейін, арадан күн өтіп те үлгерген жоқ, ел тірлігі тағы да бықпырт тигендей бөрлікті. Ел аралап өкілдер жосыды. Ауылды дүрліктіріп жандайшап белсенділер жүйткіді. Бәрінің аузында уәделесіп қойғандай бір-екі ауыз сөз.

— Құлақты жою керек!

— Жүз процент коллектив болу керек!

— Сірәгі бір жеті! Жоспар осы!

— Көнсең — сол! Көнбесең — көндіреміз!

Қайсымыз “күлак” боп кетер екенбіз деп жұрт үрпиді. “Жасаған ие!” деп кемпір-шалдар Аллаға жалбарынды.

“Жаңа жолға” қызыл іңір әлетінде дүрсілдеп құла ат мінген батық мұрын, бітік көз гүлбан қара келін түсе берді. Қыстың қара дауылындай екпінді. Атының шылауына жармасып бәйек қағып ауылнай Күрең жүр. Өкіл — баяғы Бұқарбай. Әншейінде ат белінде қалбиып отырып қалғып келе жататын Бұқарбай бұл жолы шапшаң. Бұйрығы шалт. Өңі өрт сөндіргендей...

— Давай, ауылнай жолдас, елді жина! Сходу, Тез! — деп дігір салды.

Жорға Күрең:

— Ау, Бүке-ау, алдымен үйге кіріп дегендей... дәм татып дегендей... — деп дағдылы мәймөңкесіне баса берген-ді.

— Кәкой дәм?! — деп арс етті Бұқарбай бұқа көзін алартып. — Давай елді жина! Уақыт жоқ балтай-шалтайға!

“Бұқаның” томырылған мына түрінен қатты шошыған Жорға Күрең:

— Дұрыс... Сіздікі дұрыс! — деп үйіне қарай тұра жүгірді. — Ждақай! Шық далаға!

Маңдайында “Асан Айтжанов атындағы мектеп” деген жазуы бар кірпіш үйдің алдына жұрт жиналып жатыр.

Төрде қызыл мата жабылған үстелді құшақтап томырылып Бұқарбай отыр. Ұбап-шұбап мектепке кіріп жатқан халыққа қабағының астынан түнеріп қарайды. “Жинал!” дегенде жинала қоймайтын осынау тәртіпсіз надан елге жыны қозып жарылғалы отыр. Өйткені, Бұқарбай шаршаулы еді. Екі күн болды жарғақ құлағы жастыққа тимей шабуылмен жүр. Соны бұл ел түсіне ме? Түсіну қайда. Түсінбек тұрмақ үстіңнен арыз жазады... “Арақ ішті”, “Қызымызды оятты” деп. “Ау, ішпейтін болсам,

жемейтін болсам, күн-түн демей шапқылап менікі не? Ау, “қыз оятсам” бойдакпын. Бойдақ кезінде қыз оятпаған қазақ бар ма екен?” Бұқарбай осылай ойлайды.

Мектепке ел лықа толды. Алабажыр көп жұрттын ішінен Бұқарбайдың көзі бір талшыбықтай бұралған сұлу келіншекке түсіп отыр. Бетінің ұшы албырап, қызарып, кірпігін көтергенде, алыстан бейне бір түн жұлдызы шұғыла бергендей. Хансұлу екен атақты. Баяғы Нарқызды да танып отыр. Сол уақиға еске түскен сайын біртүрлі жәбірленіп, жер болып қалады. Қазір де түсі қабарып “Жиналысты аш давай” деп Жорға Күреңді тақымдап дігір салды. Сол түні түмсығына Нарқыздың ауыр жұдырығы сарт ете түскені өлсе есінен кетер ме? Бұқарбай Игенсартов өмірінде бұндай қорлықты көрді ме екен...

— Жолдастар! Тынышталыңдар! “Жаңа жол” ауылының жалпы жиналысын ашылсын деймін! Ал ағайын, енді жиылысымыздың төр ағасын, басқарушысын сайлайық! — деді, Жорға Күрең жұртқа жымсиып күле қарап.

Алдыңғы қатарда отырған Ждақай орнынан қарғып тұрды.

— Ұсынысым бар!

— Айт!

— Жиналыстың төр ағасы болып ауылнай жолдастың өзі сайлансын. Қалған екі мүшесіне серіктік бастығы Қаспақов Шеге мен белсенді кедейіміздің бірі Қауқашты ұсынамын, — деді Ждақай.

— Ал Қауқаш! Төрле! Заман сенікі!

— Дүрілдет жиналысты! — деген дабырлар естілді.

— Әйелдерді де көтерейік! Бір әйел сайлансын прездемге! — деп күңк етті өкіл.

— Жолдастар! Ұсыныс бар! Біз бір мәселені ұмытып барады екенбіз. Ол — әйел мәселесі. Біз әйел жолдастарды да ұмытпауымыз керек! Шеге тұра тұрсын одан да оның орнына бір әйел сайлансын!

— Ендеше, оның орнына Хансұлу сайлансын! — деп, Ждақай тағы атып тұрды орнынан.

— Е, несі бар, болсын!

— Көтек, жас емес пе? — деп қалды бір кемпір.

— Қайта, сол жасты көтеру керек! Саясат солай!

— Ал енді осы жолдастар сайлансын дегендерің қолдарыңды көтеріңдер!

Жұрт жапа-тармағай қолдарын көтерді. Жалғыз ғана Торқа кемпір қолын көтермей тымырайып тұйіліп қалды. Бұқарбай Торқа кемпірді иегімен нұскап Жорға Күренге:

— Әне бір кісі қолын көтермеді... — деді.

— Жеңеше! Сіз неғып бүйрекпен сирақ шығарып отырсыз?! Оу, жеңеше! — деп, дауысын әндете созып жымыскы күлді Күрен. Бір адамның бұра тартқанына іші қуанып тұрған еді.

Торқа кемпір шолтаң етіп түрегелді. Жұрттың гу-гуі сап тыйылып, бәрі шүйкедей сары кемпірге қадалды.

— Адыра қалсын, қарсымын! Ал түге... — деді Торқа кемпір қолын шолтаң еткізіп.

— Ойбай, жеңешекеу!.. — деп, қикылдап біраз күлді Жорға Күрен. — Соны енді... ашып айтпайсың ба?..

— ... Не айтатыны бар, жаңағы төрге отыратынның бірі Хансұлу ма?

— Ие, Хансұлу.

— Сәбетски власт бар ма осы елде, әлде жоқ па?

— Ойбай, бар!.. “Жоқ” деп кім айтты?

— Әй, сен күлме өйтіп! Сәбетски власт бар болса бай-құлақтың қызын жиылыстың төріне шығар деген заң бар ма, сен соны айт! О несі кеп ыржалақтағаны...

Осы жерде Бұқарбай манаурап басын көтерді.

— Кім ол “Хансұлу” деген жолдас? Көріңсін! — деді әдейі танымағансып, танауынан сөйлеп.

Жұрт жапа-тармағай бұрылып кейін қарады. Қыз-келіншектердің ден ортасында бой жасырып отырған Хансұлу ұяттан қысылып бетінің оты шықты.

— Түр келін! Көрін жұртқа! — деп қалды шырылдауық Шәріп, астына су шыққандай қыбыжықтап.

Хансұлу ұяла созалаңдап орнынан түрегелді. Өңінде ұят оты мен кейіс оты қоса шарпысқандай.

Бұқарбай жас келіншекке назар ірікті де, жанындағы Жорға Күреңге еңкейді. Жорға Күрең елге қарап:

— Кәне, жаңағы аты аталған жолдастар төрге шығыңдар! Келін бала, сен де шық! Біз жеке адамдардың емес, көпшіліктің пікіріне құлаймыз! Тәртіп солай! — деді дауысын әдейі саңқылдатып.

Торқа кемпірді жеңіп шыққанына Хансұлу іштей қуанып-ақ кетті. Рұқсат өтінгендей ата-енесіне жәутеңдеп еді, Шәріп елп етіп:

— Бар, қарағым, бар! Көптің қалауы ғой, — деді. Жайбасқан да бас изеп жатыр. Шолпысы күлдіреп-сылдырап Хансұлу төрге қарай ұяла басып келеді. Әсіресе, кілбиіп қараған Бұқарбай өкілдің жабысқақ назарынан қашып құтыла алмай келеді. Содан аулағырақ отырайын деп еді Жорға Күрең қақпақылдап әкеліп дәл соның қасына отырғызды. Қасына сылдырап-күлдіреп келін кербез сұлу жас келіншек отырғанда ап-ауыр Бұқарбай копандап кетті. Дәл, сол бүйіріне сән-салтанатымен, бұлбұл бағымен келіп

ұрмақ қонғандай жүрегі лүп-лүп соқты. Жас сүлудың хош жұпары танауына ұрып таза мас болуға айналды. Бір сәтке мына дабыра науқан, жиылып отырған елді ұмытып, ойын Хансұлу билеп алды.

— Сөз, өкіл жолдас Игенсартовқа беріледі, — дегенде ғана үстіне мұздай су құйып жібергендей тітіркеніп, есін жиды. Түрегелді. Түсіне ызғарын жинап, толған жұртқа кілбиіп әукесі салбырап сүзіле қарады.

— Так-так... — деді кібіртіктеп. — Жолдастар, так кешегі өткен конференциядан сіздер хабардарсыздар. Онда болған әңгіменің шет жағасын мына ауылнай жолдас, сонсын анау серіктік бастығы Қаспақов Шеге жолдас сіздерге жеткізген шығар. Сондықтан мен сіздерге мәселенің тоқ етерін айтамын. Та-ак, былай. Бұл науқан. серьезный науқан. Политический значениесі өте күшті. Бүгін біз атамзаманнан еңбекші халықтың қанын сүлікше сорып келген боржойлардың тамырына балта шабамыз. Құлақ контра-лардың көзін біржолата жоямыз. Оларға біз “Давай комшанды көтер!”, “Тайып тұр, арамыздан. Тәртіп солай!” дейміз. Сөйтіп, ел ішін бай-кулактан жым-жылас тазартамыз. Түсіндіңдер ме?

— Түсіндік! Түсіндік!

— Ол кім сонда боржайымыз?

— Әй, Алла-ай, өзін сақтай гөр! — деген дауыстар естілді.

— Ә, от, мәселе қайда жатыр. “Боржойымыз кім” дедік пе? Бәсе, со боржой кім, — деп ежірейді аңдаған жұртқа қарап Бұқарбай. — Оны сіз бен біз табуымыз керек. Тауып тамырына балта шабуымыз керек! От так! Тәртіп солай! Сол үшін жиналып отырмыз, жолдастар.

— Астапыралла! Құдай зекет!

— Тағы не таптық, жаратқан!

— Сактай гөр, жасаған ием! — деген дауыстар молайып, жұрт тіксініп шоши бастады. Абыр-сабыр, гу-гу.

— Оу, бір боржойды өткен жылы құртқан жоқ па едік? — деп, ұзынтұра Уәп дыбыс берді, екі ұрты бүлкілдеп.

— Бү қайсың, тұрып сөйле! — деді Жорға Күрен жақтырмай.

— Өкіл жолдастан сұрайын дегенім ғой, — деп намаздігердің көлеңкесіндей созылып түрегелді Уәп. — Оу, өткен жылы Мажан байды көмпеске еттік. Боржойдың көзін құрттық дедік. Сонда қалай, ол өзі боржой дегеніміз жыл сайын туындап тұратын нәрсе ме?

— Мынауың кім еді? — деді Бұқарбай жиіркенгендей Уәпты танауымен нұсқап. Күрен шыр ете түсті.

— Әй, сен... Уәпеке! Шатпа тілдің керегі не осы?! Одан да жөнге көш!

— Жоқ, менікі қалжың емес! — деп, көзін текенің көзіндей ежірейтіп, ышқынып кетті Уәп. — Оу, менің білгім келсе несі айып? Өкілді осы, біздей наданның көзін ашсын деп жіберетін болар аудан. Ал енді нақа үн шығарма десендер, қойдық...

— Бұл жолдастың пәмилесі кім? — деді өкіл.

— Жартыбасов.

— Жолдас Жартыбасов! Та-ак, осы ауылда қанша түтін бар?

— Түтін бе? Түтін қырықтан асады.

— Соның нешеуі серіктікке кірмей отыр?

— Бес үй ғой. Жұртқа мәлім.

— Так... так... Жартыбасов тоқта енді! — деді Бұқарбай саусағын шошандатып. — Соның бірі ана отырған Пахраддин. Так, солай ғой, табарыш?!

Алыстау көпшіліктің тасасында отырған Пахраддии қозғалақтап қалды. Жұрт назары сонда ауды.

— Пахраддин Николай заманында би болды — раз! Ірі демесек те кәдімгідей дәулетті болды — два! Есігінде жалшы ұстады — три! Өтірік деңізші!

Өкілдің сұрауына ешкім дыбыс шығармады.

— Пахраддин кеңес тілегіндегі кісі болса баяғыда-ақ серіктікке жазылар еді. Так? Әлде не так?!

— Өкіл жолдас?! — деп артқы қатардан Пахраддин бой көтерді. Басында — құндыз бөрік, үстінде кең елтірі ішік.

— Өкіл жолдас! Сіз, асасы, өйтіп партия саясатына қайшы келмеңіз!.. Партия саясаты бұлай болмауға керек!

— Так... так, неге олай дедіңіз! — Бұқарбай сүзіле қарап қамауға түскен қабандай тықыршып кетті. Кілбік көзі жылтырап тұр.

— Кәллективке кірмесек те кәзит оқитынымыз бар, өкіл мырза! Кәллективке кіру, кірмеу кісінің өз еркі деп Сталин айтқан. Мен серіктікке кірмегенім үшін, асасы, кінәлі бола алмаспын!

— Зәкүншілін өзінің... пәдумаеш... — деп та-науының астынан күңк етті Бұқарбай түнеріп, ашуға тығылып. — Жарайды, Пахраддин жолдас, сен се-ріктікке кірмегенің үшін кінәлі емессің дейік, ал сенің кәмпескеге дейін үш жүздей аса майда малыңның, жүзден аса ірі қараңның болғаны және жалшы ұстағаның өтірік пе?

— “Жалшы” деп тұрғаның малшы болуға керек, асасы... — деді Пахраддин дауысы саңқылдап. — Ал

малшы деп тұрғаның, сірә, Қозбағар болуға керек. Түн жамылып отырмыз. Мен ешкімді “малымды бак” деп зорлағаным жоқ. Өтірік десе мына Уәп пен Торқаның көзі отыр, айтсын! Кешегі 21-дің аштығында жуан жіңішкеріп, жіңішке үзілді. Бала-шағасын жетектеп осы Уәп пен Торқа қаңғуға айналды. “Өле жегенше бөле жейік” дедік, асасы. Ауылдан бір адамды шашау шығармадық. Жаяуға көлік, жалаңашқа тон ашқа ас бергіздік. Шүкір Алла, соның арқасында түндігі жабылып, түтіні өшкен үй болған жоқ аулымызда.

— Рас.

— Рас. Би ағаның осы айтқанының бәрі рас, — деп жатты халайық түс-тұстан.

— Ал енді малымды үш-төрт жыл Қозбағар баққан шығар. Бақса сол ішкен-жегеннің өтемі болар, асасы. Оған мен неге айыптымын? Ағайын, Тәңірдің тал түсінде қиянатқа қиятындай менен не жамандық көріп едіңдер? Әділет болуға керек! — деп, әрең іркілді Пахраддин.

— Әб... бәрекелді! Сөз-ақ! — деп, елден бұрын сүңк етті Шәріп. Әділет десе жанын беруге дайын ғой Шөкең.

— Рас!

— Дұрыс, Би ағандікі!

— Би қайнымның айтқанының бәрі рас... — деп Торқа кемпір шолтаң етіп орнынан тағы түрегелді. — Жақсылығы Алладан қайтсын! Би қайнымның өз басына тағар кінәм жоқ! Қиналған кезде қол ұшын бергені рас. Тілім тисе жастарға тиеді-дағы, түге.

— Тынышталыңдар! Дабырламаңдар! — деп безек қақты жиылыс басқарушы Жорға Күрең.

Көпшіліктің назары енді Бұқарбайға ауды. Бұқарбай бар ашуын жанындағы ауылнайдан алып

жатқан сияқты. Танауы делдиіп кетіпті. Пахраддинге шакшырайды.

— Сен... сен Пахрадин жолдас! Сен... не істеп отырғаныңды білесің бе?— деп сұқ саусағын шошайтты. — Сен іске мешайт жасап отырсың! Жиылысқа іріткі салдың! Бұл — сабатаж! Бұл — боржойлардың ісі. Сен боржой болмасаң бүйтіп жиылысты бұзбас едің. Көрдіндерме, от так, жолдастар! Бұл науқанның ен гәлеуный значениесі — ішіміздегі осындай іріткі салғыш боржайларды аластау. Олар жаңа өмірдің іргесін қалауға мешайт жасайды. Сондықтан бай-құлақ, қожа-молда тәрізді шорт-морттарды түгел аластауымыз керек! Тәртіп солай! От так, жолдастар!

Жұрт тықыршып қобалжып қалды.

— От так! Калашников жолдас бастаған аудан қызметкерлері үстеме міндет алды. “Артта қалған шалғай аудан болсақ та, құлақты аластау науқанын біз бір жетіде бітіреміз, жаппай коллектив болу жоспарын үш жылда емес, үш айда орындаймыз” деп. Бұл жолдастар, үлкен төңкеріс! Ауыл өмірін түп-тамырымен өзгертеміз. Үш айдың ішінде жаппай отырықшылыққа көшіп, түгел коллектив болып жаңа өмірге жаппай бет аламыз. Ескі өмірдің тамырына сөйтіп, біржолата балта шабамыз. От так жолдастар!

Осы арада Ждақай едірендеп ыршып тұрып шарт-шұрт қол соқты. Оған біреулер ілесті.

— Әй, жарадың! Басс! Аяма! — деп Шәріп те шырқай созып үн қосып жіберді.

— От так, жолдастар! Социализм алға отарбамен зымырап барады, сәулетті өмірге қарай. Біз, тез-детпесек, оған түйемен салпақтап жете алмаймыз!

— Жете алмаймыз! Зымырау керек бізге де! Зымырау керек! — деп жұдырығын көтере сілтеп айқай салды Ждақай.

— Ал давай, мен болдым, енді кедей-батырақтарға сөз берейік, — деп Бұқарбай орнына отырды.

Ждақай сөйледі. Көзінен де, сөзінен де үшқын ата от шаша сөйледі.

— Өкіл жолдастың айтқанының бәрі рас. Патша құлап Кеңес өкіметінің орныққанына аттай он екі жыл болды. Дүниенің бәрі өзгеріп жатыр. Қалалар, зауыттар, темір жолдар салынып жатыр. Ал осы біз неге қасқайып өзгермейміз? Бітіргеніміз қалқитып бір мектеп салдық. Жертөле қаздық. Адамның күлкісін келтіріп. Өкілдің айтқаны ып-ырас. Атасы нәлет, үш жылда емес, боламыз үш айда коллектив! Несі бар! Болғысы келмейтіндерді болдырамыз!

— Жолдас! Токтай тұр! Так, саған бір сұрақ! — деді Бұқарбай. — Бұрыннан бар ақбарға сүйене отырып мен бұл ауылдан екі-үш құлақтың тізбесін жасадым. Оның бірінші орнында — анау Хантөрткіл де отырған Құлатай, үшінші орнында Жұмаш тұр.

Жұрт тағы да гуілдеп толқып кетті. Арт жақта отырған Жұмаш деген кісі баяғы, Нарқыздың әкесі шырылдап ұшып түрегелді.

— Әй, інім... “Жұмаш құлак” дедің бе? Сен шатасып тұрған жоқсың ба, осы?!

— Пәмиләң Қойбасов па?

— Қойбасов болса несі бар?! Орташа десең бір жөн. Бұның қып-қызыл жала, інім! Сенбесең әне, қорамда тұр, малымды сана! Ау, бұ не бұл?!

— Так, сенің қорандағы малың 30 қой, 6 ешкі, тайлағымен қосқанда 3 түйе, 1 ат. Так? — деді Бұқарбай Жұмашқа сүзіле қарап.

— Ешкінің біреуін жақында сойып жедік. Қалғаны бесеу, — деп безектеді Жұмаш.

— Так, тоқта! Доңызтаудағы қарындасыңның малына қосып қойған боталы інгенің бар. Так! — деді Бұқарбай, Жұмаш бебеу қаққан сайын жаны кіре түсіп.

— Қосып қойғаным емес, сүтсіз отырғасын басыбайлы берген малым! — деп күйіп-пісті Жұмаш байғұс.

— Ол өтірігіңе біз сенбедік, табарыш! Қорандағы малға сол боталы інгенді қосып есептедік. Сонда сіз орташадан өтіп, “кұлақ” дәрежесіне жеттіңіз!

— Бұнығыз әділет емес! Жала! Ол інгенді менің атыма жазғанығыз — жала жапқанығыз! ... Жұрттың ағайын-туысқа берген малын түгендей беретін болсаңыз, онда, осы отырғанның бәрін зерттеңіз!.. — деді әлжуаз арық Жұмаш қолын сермеп шырқырап.

— Жүмеке, ойбай, жұртта неңіз бар?!

— Өзгені іліктірмей сойленіз! — десіп көпшілік шу-шу етті. Бейшара Жұмаш қапелімде жүнделген тауықтай болды. Жанындағы Нарқыздың өңі шүберектей қуарып, ішінен окіл “Бұқаға” лағынет айтып отыр еді.

Сөз алуға ешкімнің дәті бармады. Осы арада Жорға Күрең Бұқарбайға ақыл қосты. Әрі елге естірте дауысын мипаздап созып:

— Осы ортамызда жаңадан бастық болған Шеге бар емес пе? Соның бүгін дауысы неге шықпайды? Бұндай қызу науқан үстінде бастық болғасын сөйлеуі керек! — деп жымсия күлді.

— Е, тыңдайық, сөйлесін! — десті көпшілік. Жорғаның жымсиған күлкісінін, астарын сезген Шәріптің ызадан қаны қайнап кетті. “Әй, арам! Әй, өзәзіл! Сайқалдануын... Андығаның мен ғой сенің!”

Шеге орнынан тұрғанда ине шаншар жер жоқ кісіге лықа толы мектеп іші сілтідей тынды. Хансұлудың жан-дүниесі аласұрды. Қазір бүлінеді, Бү дүние ойран болады. Шыға кашқысы келді, мына бірін-бірі талап жатқан жиыннан. Кісінің қоры болып әкесі отыр. Шеге тұр, екі оттың ортасында. Шеге! Хансұлу ендігі қалған жалғыз сенімі, тірегі Шегеге қарады! Сөйле, Шеге!

— Өкіл жолдас айтқандай бұ науқанның саяси маңызы үлкен екені рас... — деді Шеге ширығып, өткір көзі оттай жанып. — Құлақтарды тап ретінде жою саясатын қолдаймыз! Мен де қолдаймын!

Жорға Күрең мәз болып отыр.

— Шеге, сен мынаны айтшы! — деп, алға итініп, жымсия күлді. — Сен мынаны айтшы! Пахраддин құлақ па, жоқ па? Соны айтшы?

Жорға Күрең жымсиып күліп, насаттанып шалқайып отырды.

Хансұлудың беті ду жанды. Шеге Жорға Күреңге жалт қарап, ашулы жанарымен атып жіберердей:

— Құлақ! Ал құлақ! Сол ма еді естімегіңіз? — деп ышқынып қалды.

Ары қарай дүние жыңылдап бара жатты. Тынып отырған жиылыс жел соққандай теңселіп, шайқалғандай. Біреу-біреуге ұмтылып ілінісе кеткендей. Хансұлу көзін жұмды.

— Әй, әй, Жорға!.. Сен... сен өйтіп арандатпа! Арандатпа! — деп шырқырап, төрге қарай айқайлап ұмтылып Шәріп барады. Біреудің аяғын басып, біреудің бөркін ұшырып отырғандарды қыран жапқандай шулатып барады. Президиумның алдына ышқынып тұра қалып, өзінен үлкен тымағын жерге былғап ұрды. Жер шаңын бүрк еткізді.

Бұқарбай селк етті. Жорғаның да түсі күренітіп кетті. Шәріпке де керегі сол еді.

— Сен... сенің істеп отырғаның қастандық! Жаулық! Сен... сен науқанды арқаға танып, кедей-кембағалдың қанын соруға кірістің! Орташаны құлақ қылып жатсың! Сенің таптық перденді ашайын, ендеше! Сен... Сен тап жауымыз Мажан байдың базарға мал айдайтын саудагерісің! Ал! Ал саған шындық керек болса! — деп жалаңбас, шеке тамыры шоттиып кеткен Шәріп Жорға Күреңге қарап шақшақ етті.

— Дұрысс! Дұрыс айтады.

— Міне, сөздің турасы!

— Е, бәсе! — деген айқайлар шықты.

— Сен... сен, Жорға, аш таптық перденді! Рушылдығыңды мойында, сен кеңес ағасы болғалы бері кім таяқ жеп жатқан? Таяқ жеп жатқан ажым мен жалпақтіл! Өтірік деші!

— Рас

— Рас айтады!

— Әрине, рас! Рас болмаса бүгінгі спесекте неге бір қаражон жоқ? Неге бір ағайының жоқ?

— Міне сөз?

— Әңгіме енді түзелді, — деп дүрлікті жиылыстың бір қанаты.

— Спесекте қаражон жоқ. Өйткені, сенің соғып отырғаның кедей-кембағалдың емес, бір атаның сойылы! Өтірік деші!

— Рас! Ып-рас!

— Ауылнайда әділет жоқ!

— Жолдас Қаспақов! Сіз жиылысты бұздыңыз! Сіз іріткі салдыңыз! — деп столын тоқпақтаған өкіл сөзін де қыстырған жоқ Шәріп, желмаядай есе түсті.

— Уа, жұртым! Жалпактіл, ажым, қаражон деген үш атаның баласы едік! Билік қолына тиген қаражон, басы ауылнай боп, жалпактіл мен ажымды таза қыруға айналды! Өтірік пе! Осы әділетке жата ма? Өкімет болсаң, ал сен турасын айт, Бұқарбай!

Жұрт шулап кетті.

— Әділет емес!

— Құтырғанын қойсын қаражон! Қойсын!

— Атасының көрін! Қан бөламыз, қоймайды екен!— деп білек сыбанып Қиқымбай тәрізді қисықтар едірендеп төбелес тілеп атып-атып тұрды.

— Қаспаков! Бұның барып тұрған сабатаж! Сабатаж!! Бұл делаң үшін сен зәкүн алдында жауап бересің — деп бурадай бүркыраған Бұқарбайдың иегінің астына Шәріп ызғып жетіп барды. Өзі шынашақтай болғанмен Шәріптің айбаты жаман еді. Қалалған жерінен қан алар шақар еді. Шеке тамыры шоттиып, қып-қызыл боп сасық күзенше шақ-шақ етті.

— Тұт-ақ! Өй, жаман Игенсарттың баласы! Сен бе, мені қорқытатын? Әукең салбырап аңдығаның қыз-келіншек, ішкенің арақ, сөйтіп жүріп сен бе маған зәкүн үйрететін?! Мына қаптаған кедейді ізіңе салмай тұрғанда жөніңді тап, шатпай! От солай! Ойының келген екен сенің Шәріппен!

— Шәкеңдікі дұрыс!

— Өкімет кедейдікі!

— Қайтпа, кедей! — деп әзіл-шыны аралас жұрт дүрлігіп қиқу салды.

— Е, енді, белсенді кедей айтпағанда кім айтады?

Жердегі тымағын алып қағып-сілкіп, басына мильқтата киді де, Шәріп енді басын тіп-тік ұстап есікке беттеді.

— Оу, Шәке отырыңыз! Жиылыс біткен жоқ! — деген Жорға Күреннің мәймөңкесінен кейін Шәріптің тіптен дәрежесі көтеріліп кетті.

Күренге пысқырып та қарамай қолды бір-ақ сілтеді. Есікті сарт жауып шығып жүре берді.

— Е, бәсе... — десті жұрт.

— Сиязынды көрген адам қорықсын ба жиылысыңнан?!

— Белсенді кедеймен сіздердің ойындарың келмесін...

Шәріп кеткесін көп ұзамай Пахраддин мен Құлатайды құлақ қып, Жұмашты орташалығында қалдырып жиылыс тарқады.

4

Сырт тас қараңғы, түн желкем. Көкесінің әлгінде жиылыстан сусып шығып кеткенін байқап қалған Хансұлу ауыл шетіне қарай сүріне аттап келеді. Бүкіл ойы — әкесі. Ел көзінде жер болған әкесінің, қор болған әкесінің тезірек қасына жетуге асығады. Ызғырық аязды қатқыл жел бетті қарып ішік шалғайын кеулеп суық далаға қарай итереді. “Құлақ! Құлақ!” деді-ау Шеге. Бар сенгені, бар тірегі — Шеге! Ол сөйдеді. Өзге жұрт не демесін. Хансұлу мен көкесінің жылт еткен жалғыз үміті Шеге еді. Ол сөнді. Жалғыз тірегі Шеге еді. Ол сынды. Опырылып үстінен аспан құлағандай. Жер жылжығандай... Дүние не боп барады? Не боп барады? Төңіректегі иттің үргені, желдің ысылы емес естіп келе жатқаны. Естіп келе жатқаны “бүлінді”, “ойран болды” деген өз үні, аласапыран өз ойы.

Ауылдан шеткері жалғыз үйдің ашық түндігінен от сәулесі байқалады. Хансұлу кеудесінен итерген

есірік желмен алыса жүріп сипалап есікті ашты. Ішке аттады.

Үй іші жарық. Ортада гүрлеп жанған от. Отқа мандайын беріп төрде бүк түсіп әкесі отыр. Оң жақта шешесі отыр. Айтылар сөз айтылып енді екеуара тоңторыс бір үнсіз хал орнағандай. Сырға бәйбіше де, Пахраддин де бейуақта жалғыз кеп есік ашқан қызына шошына, серпіле қарады.

Ақ бөкебайы мойнына лықсып, жалаңбас түр Хансұлу. Көзінде үрей. Әкесіне бір, шешесіне бір қарайды. Гүрілдеп жанған от. Үйдің туырлығын сабалап, сыртта ұлыған жел. Аңтарылып бір-біріне қараған үшеу. Қорқынышты ертектен кейін тылсым түнге құлақ түріп үрейлене қалған балалардай. Әлден уақытта шешесі көсеуді алып от шоғын ысыра беріп:

— Сұлужан! Былай шық!.. — деп тіл қатты.

Әкесі еңсесі түсіп отқа үңілген тұйық қалпына түсті.

Хансұлу ұмтылып кеп шешесін құшақтай алды. Құшақтай алды да солқ-солқ жылады.

Пахраддин қабағын шытынды. Бірақ қыбыр етпеді. Үндемеді.

Сырға бәйбіше көсеу ұстаған оң қолымен оттың шоғын қағыстыра отырып, сол қолымен қызын басынан сипады. Хансұлу кашан өксігін басқанша не әкесі, не шешесі тіс жарып ештеңе демеді.

Есік тықырлап, іле ашылып үйге тағы біреу кірді. Құтжолдың үрмеуіне қарағанда ауыл-үйдің кісісі сияқты. Үйдегілер үриісіп бастарын көтерді. Шеге екен. Кірді де есік алдында состиып тұрып қалды. Назары — Хансұлуда. Хансұлудың көзі домбығып, ісіп кеткен. Ашулы. Отты.

Шеге не дерін білмей дағдарып аяқ үстінде теңселді.

— Сені... іздеп жүрсем... — деп күмілжіді.

— Іздемей-ақ қой! — деді Хансұлу көзі жарқ етіп. Оған қарауға Шегенің дәті шыдамады. Танау астынан түсініксіздеу міңгірлеп теңселе тұрып, есікке бұрылды. Ауыр киіз есікті серпіп ашып шығып кетті. Үй ішінде тағы зілдей тыныштық орнады.

Отқа карап көкірегін қорғасындай ой басып мүлгіген Пахраддин. Қасын керіп сабырлы сыр бүккен Сырға бәйбіше. Шегенің ту сыртынан сүзіле карап қалған Хансұлу. Тысырлап зулап жанған от. Туырлықты ұрғылап сыртта азынаған жел. Қабағы түйіліп келе жатқан бір жаманаттың хабаршысындай ұлып, сарнап дүниені құлазытады. Берекені қашырады.

— Сұлужан! Қой! Үйіңе бар! — деп ысырылып орнынан тұрды бір мезгілде Сырға бәйбіше. Болыскей кереуетке төсек салуға кірісті.

— Бармаймын. Барғым да келмейді, — деп Хансұлу тағы да торсаң етті.

Пахраддин жұмулы көзін ашты. Еңсесін көтерді. Аларып кеп қарады қызына. Іш толқынын әрең іріккен ашу бар назарында. Хансұлу әке жүзіне тіке карауға бата алмай жасқанып ығысып қалды. Тағы да шешесі килікті.

— Қой өйдеме! — деді ақылғой үнмен қызына. — Сіздерді ешкім зорлап қосқан жоқ. Біз үшін ұрыспай-ақ қойындар! Шегеде не кінә бар дейсің! Құдайдан шығар. Заманнан шығар. Бар! Үйіңе бар!

Хансұлу назарымен жер шұқып үндемей отыра берді. Көпті көрген сабырлы Сырға бәйбіше келіп қызының басынан сипап, арқасынан қағып біршама жібітіп алды да, содан кейін үйіне шығарып салды.

Хансұлу отауына кірсе, Шеге теріс карап жатып қалыпты. Ошақтағы тезектің шоғы сөнуге жақын.

Өлімсіреп жылтырайды. Бөлек жатуға төсек жоқ. Лажсыз, Шегенің от жағын ала төсекке кіріп теріс қарап қисайды. Шеге ұйықтамапты. Күрсіне береді. Хансұлу да қалың ойға шомды. Көз алдынан бүгінгі уақиға тізбектеліп өтті. Бәрін кешіруге болар еді. Бірақ көкесін, бүкіл ел ағасы көкесін Шегенің “құлақ!” деп айқайлағанын қалай кешірер? Ызасы қалай келмесін. Бұны оңашада “күйдім-сүйдім” деп үздігіп, енді іске келгенде, қимылға келгенде турашыл комсомол бола қалуын... Жақтап бір ауыз сөз айта алмауын... Жақтай алмағанымен тұрмай “құлақ!” деп айқайлауын, шаршы топтың көзінше.

Хансұлу Шегені осы сәт жаудан жаман жек көріп жатты.

Шеге күрсініп шалқасынан аударылып жатты. Көзін ашып алды. Үй іші тас қараңғы. Сырт жел. Азынап тұр. Ойы да сол тұлдырсыз түнгі медиен кезген ызғырықтай жүйткіді. Кеудесін қысқан бір ыза. Сол қордаланған ызаны кімге төгерін білмейді. Турасын айтқаны үшін бұл неге кінәлі болды? Әлде, “құлақтың” қызын алған өзі ме кінәлі? Әлде бұны қақпақылдап отқа итерген Жорға ма кінәлі? Әлде, дәулетті болғаны үшін Пахраддин бе кінәлі? Әлде, шындықтың емес, әкесінің жағына шығарып алған Хансұлу ма кінәлі? Кім кінәлі осы сорға? Кім кінәлі осы топалаңға? Кім кінәлі?

Апта бойы Үстірт үстіндегі қалың ел дүрлігумен болды. Күндіз-түні жиылыс. Ат белінен түспей оңды-солды шапқылаған өкілдер. “Құлактарды тап ретінде аластау” жөніндегі партия саясатына біреу қарсы, біреу жақ. Әлі көші-қонмен жүрген қарапайым қараңғы

халық үрпиіп, түймедейді түйедей етіп гулеткен ел өсегінен белең алып, толықсып толқып жатты. Шолақ белсенділер мен әпербақан өкілдердің асыра сілтеуінен талай ауылдар серіктіктерден шыға қашты. Белсенділер оларды қуып әкеп коллективке қайта тықты. Елді көшіріп жүрген кертартпа ақсақал, көксақалдарды еңкілдетіп мелиса ауданға айдады. Кең далада құрық көрмей өскен күр асаудай ел тентектері, қару алып селтендеп атқа мініп “баспашы” атанды. Жол торып өкілдерді өлтіре бастады. Олармен күрескен Кеңес өкіметінен басқа сыйынары да, сүйенері де жоқ “қызыл таяқ” атанған қаудыр тонды қаратабан кедей болды. Байлар, құлақтар лек-легімен көшіріліп, қиян шет алыс өлкелерге бала-шағасымен ұбап-шұбап жер аударылып жатты. Сықырлап алыс станцияларға арбалар бағыттады. Ел іші жылап-сықтау, қоштасу.

“Жаңа жолдан” шығып бел асып сырдаң жазықпен Нарқамысқа тартатын жалғыз аяқ жолменен бұлкектеп жаяу желіп Пахраддин келеді. Соңында атты мелиса — Сүржекей. Күн ашық. Сәске түс. Үп еткен жел жоқ. Алыс жақынның бәрі алақанға салғандай жадырап айқын көрінеді. Анау оң жақта Ақшоқы, сол жақта Хантөрткіл төбе. Саржағал, қарасұрланып сүлк жатқан көзге таныс өлке. Сай қуалап өскен баялыш, жон қуалай шашыраған изен, жусан, бидайық сирек курайлар демдерін ішіне тартып селтиіп қарап қалғандай. Бала күнінен көз көріп бірге өскен Пахраддиннің неге бүйтіп пенде болып мелисаның алдында келе жатқанын түсіне алмай, ұға алмай таңырқап далырып қарайтын тәрізді бұта біткен. Осынау үлкен, кішілі алқаптар, сай-жыралар, сүрлеу-соқпақтар, құлақтары едірейген жатаған

бұталар аяқ астында ұйысқан ебелек, киік оты, рандар Пахраддинге де етене ыстық таныс, осы өлкеде құлдырап өткен балалық шағының, жігіт кездерінің көз куәсіндей өткен-кеткенді тірілтіп еске салады. Бүткіл өмірін еске түсіреді. “Қай қылығымнан жаздым?” деген ой қамшылай түседі санасын. Кішкентайынан билікке араласты. Әділдігімен алдымен ауыл балаларының арасында беделі өсті. Балалар Пахраддиннің айтқанына тоқтады. Балалар өсті, ел болды. Ел бар жерде дау бар, жанжал бар. Зорлық-зомбылық бар. Соты жоқ, түрмесі жоқ дала жұртына алдымен әділет қажет. Жұрт өзі білетін, өзін білетін Пахраддинге барды. Пахраддиннің айтқанына бас шұлғыды. “Би” деген атақты берген де сол жұрт. Сол көпшілік. Рас, кедей болған жоқ. Әкесі Мұса марқұмнан қалған орташа дәулеттің арқасында жоқшылық көрген жоқ. Өз төңірегіне топтанған кембағал ағайынға да жоқшылық көрсеткен жоқ... Заман өзгерді. Бай мен кедей теңгеріледі деді. Дұрыс деді Пахраддин. Теңдік керек деді.

Байларды кеңірдектен алған өкіметтің шойын шеңгелі бұның да жағасынан үстар-ау деп күте қоймаған. Ол шеңгел байларға жармасса мыңғырған малы үшін жармасты. Байлығы үшін жармасты. Орташа ғана дәулетті Пахраддин тәрізділерге жармаспауға керек еді. Асасы, бүгінде саясат та бір, күніне мың құбылған жел де бір. Біресе, оңыңнан соғады, біресе, солыңнан соғады. Мінеки, бір жиналыстың нәтижесінде бұл “кұлақ” болды да шықты. Ал құлақты тап ретінде Сталин жой деп отыр...

Таңғы шайын ішіп бола бергені еді. Аспаннан түскені де белгісіз, жерден шыққаны да белгісіз Сүржекей кіріп келді. Түсі орт сөндіргендей. “Ауданға

жүресің!” деді, сәлем жоқ, сауқат жоқ. Сырғаның зәресі ұшып кеткен. Бұл ажырайып қарады мелисаға. “Бол, тез!” деп Сұржекей дорба аузы томпайып. “Ау, інім, жайша ма?”. “Барғасын көресің! Алға түс!” Сөзі сол болды.

Пахраддин үн-түнсіз, шапанын жүре киіп есікке беттеді. Сырға әлдене деп жатты. “Көлігімді әкелейін!” деп еді. “Жоқ!— деп ақырды мелиса,— жаяу жүресің!”

Міне содан бүлкілдеумен келеді. Сәл аяңға басса “марш!” деп көкжелкеден ақырады Сұржекей. Қолында қамшы. Ұруы да мүмкін ғой. Мелисаның аты мелиса. 18-ші жылы мына Ойыл жақта ірі байларды далада атып та тастады ғой. Терлеп келеді Пахраддин. Борша-борша терлеп келеді. Иығында — қоржын. Қоржыны ауыр емес. Сырға байғұс асығыс-үсігіс, орамалға орап нан ба, бұның іш киімі ме, қоржынға бір нәрселерді тығып жатқан. Ырс-ырс етіп желіп келеді Пахраддин.

Ат үстіндегі Сұржекейде үн жоқ. Пахраддин ырсылдап деміккен сайын, қиналған сайын жаны рахаттанып келеді. “Мен жетім кезімде Есенейдін қойын жалаң аяқ баққанмын. Күнде өстіп жүгіріп жүріп баққанмын. Көзімнен жасым тамшылап жүріп баққанмын. Сонда сендер шалқайып ат үстінде бара жатушы едіңдер. Қой шетінде көз жасын жұтып тұрған қаршадай балаға көз қиықтарыңды да салмаушы едіңдер. Енді еңкілдендер сол жетім Жекейдің алдында. Сұржекей дейді халық. Ұнатпағаны ұнатпаса қойсын. Сұржекейдің етінде де, жанында да мәңгі жазылмастай жара бар. Ол жараны тек сендей жібек шапандылардың көз жастарымен жуса ғана жазылар. Есенейді де айдады өстіп жаяу. Екі қолын артына байлап айдады. Май бөксе неме жүргісі келмей қиқандап еді, қамшымен қақ мандайдан тартты. Бала

күнгі көрген бүкіл қорлығы еске түсіп Сүржекей со күні жаман екіленіп кетті. Қанына қарауытып алды. Наганын кабурден суырып алғанда, көлбақадай қара кісі Есенеидің дызаттап қорқып кеткенін көрсеңіз. Соны еске алған сайын мырс күліп Сүржекейдің жаны жай тауып қалады. Наганды суырып алып “Иттің баласы, өмір бойы сенен көрген қорлығымның есесі маңдайыңды жалғыз оқпен қақ жармай қайтпас!” деп наганның құлағын қайырып тұра маңдайдан көздеді Есенеиді. “Жекей, қарағым, түз-дәмімді татқан жоқ па едің! Сені оқытқан мен емес пе едім?” деп сонда Есенеидің дізерлей қап еңкілдегенін керсеңіз. Сүржекей атпады. Наганын кабурына салды. Бүган керегі Есенеидің дізерлегені еді. Жылап ит болғаны еді. Сол арманына бір жетті сонда Сүржекей. Қазір Есенеі түрмеде. Мына алдында жон арқасынан қара тері шығып бүлкілдеп келе жатқан Пахраддин бай да емес, кедей де емес, ескіше жақсы сауаты бар, сөйлесе елді аузына қаратқан би адам. Осы елдің бір сыйлы адамы. Әділетшіл деп өзін үлкен де, кіші де мақтайды. Бұл ауылдан Сүржекейге керегі бұл емес еді, Сүржекейге керегі Әзберген еді. Әттең залым тықырды ерте сезіп қолдан шығып кетті. Керегі сол еді. Еңкілетіп соны айдау керек еді түрмеге. Бірақ мынау Пахраддин халық алдында кінәсі жоқ дегенмен сол бандиттің ағасы гой...

Сүржекей Пахраддиннің шып-шып тер шыққан желкесіне қарап келе жатып жыны қозып кетті.

Атты тебініп қалды, Пахраддинді омыраулатып. Ат ыршып кеткенде, жақын келе жатқан Пахраддинді омырауымен қағып өтті. Пахраддин етбетінен құлады.

Ыршып текіректеп алға шыққан атының басын тартып Сүржекей бұрылып құлап түскен Пахраддинге қарады.

Пахраддин екі қолымен жер тіреп “тфә, тфә” деп аузына кіріп кеткен топырақты түкіріп, жеңімен бетінің шаңын сүрткіштеп түрегеле берген екен.

Сүржекей атының басын тартып көлденеңдеп тұр. Көзі де, құлағы да Пахраддинде. Не дер екен дейді.

Қоржынын жерге қойып Пахраддин қалқиып түрегелді. Үсті-басын сілкіштеді. Әлі бір туралап қараған жоқ Сүржекейдің бетіне.

Сүржекей канын ішіне тартып сұрланып алған. Үндемейді. Көзін октай қадайды.

— Інім! — деді бір кезде Пахраддин, үсті-басын реттеп болғаннан кейін тіктеліп. — Асасы, осы мені қинап қайтесің? Сірә, түбі бір өлім ғой. Бүйтіп ит көрлық көріп ертең сасық түрмеде өлгенше, мен осы кең даламда-ақ жатайын да! Тілегім сол өзіңнен! Ат та, мені осы жерге тастап кет, қарағым!

Сүржекей тырс етіп дыбыс шығармады. Үн-түнсіз атынан түсті. Атын түсады. Наганды қолына алды. Асықпай аударып-төңкеріп қарап шүріппесін қайтарды.

— Дұрыс, сөйт, інім! Ағаңның бір тілегін орында!— деп Пахраддин бес-алты қадам жерге барып, сабаны қалың ұйысқан алақандай алаңға өтіп, Сүржекейге бір қырын беріп тұрды.

Сүржекей дорба аузын томпайтып, қоңыз мұрты жыбыр етіп бір кезде наган ұстаған қолын көтерді. Пахраддиннің құлақ шекесін нысанаға алды.

Бір сәтке жым-жырт тыныштық орнады.

Мелисаның атына шейін құлағын тікірейтіп одырайып қарап қалған.

Пахраддиннің көкірегіне түк қорқыныш кірген жоқ. “Қорлықпен өткен өмірден, көсіліп жатар көр артық” деп Абай айтпақшы, бүйткен өмірден

шынынан да “көсіліп жатар көр артық” еді. Назары сонау алыста, жайпақ далада қарауытып көлденең көсіліп бұлдыраған Қаражон кезінде. Соның ары жағында қалған ауылды, Сырға байғұс бен қызын ойлап тұр. Әсіресе, көз алдында Сырға. Соның шырқырап жылаған дауысы құлағына жеткендей. Байғұс Сырғасы Құдай қосқан жалғыз қосағы сол сорлайтын болды ғой. Бұның түгі де кетпес, өлер де кетер.

Әлдеқайдан аспан түстан молда торғай құйқылжиды. Жусан арасынан шегірткенің шырылы естіліп тұр. Әне “тарс” етер, міне “тарс” етер деп сіресіп күтумен тұр Пахраддин. Мылтық атылмағаннан кейін жауына бұрылып қараса, әлдеқашан бұны ұмытып аузы томпайып махорка орауға кірісіп кетіпті. Наганын кабурге салып қойған. Бұнда ісі жоқ. Жайбарақат.

Құлағының шыңылдап, жүрегі аласұрып тұрғанын сонда сезді Пахраддин. Сіресіп, ширыққан буын-буыны тарқатылған жіптей босап болбырап қоя берді. Сылқ түсіп отыра кетті. Дәл құмырсқаның жолағының жанына отырыпты. Ерсілі-қарсылы жүйткіген құмырсқалар, е Жасаған Ие, дәл сол баяғы қалпымен өмірде түк болмағандай сапырылысып жатыр. Мына қозғалыс, мына күйбін тіршілік Пахраддин әлгінде өліп кеткенде де түк бүлк етпей сол баяғы ескі арнасымен жылжи береді екен да, асасы. О, опасыз жалғаншы!

Құдай ондаи Нарқамыстың көшесінде кездейсоқ Апанастың көзіне түспегенде, Пахраддиннің осы түңғиыққа кеткені кеткен екен. “Арыстыбайлардың” арасында балшық илеп, кірпіш құйып жатқан Пах-

раддинді көшеден өте берген Апанас көріп қалады. Тани кетеді. Кабинетіне барады да, дереу Сүржекейге тапсырма беріп, түс қайта Пахраддинді РИК-ке шақыртады.

Балшыққа түсіп кірпіш құйып, түрмеде жатып екі күннің ішінде әпшері қашып жадап-жүдеп қалған Пахраддин РИК кеңсесіне мелиса бұны неге алып келе жатқанын түсінбеді. Тек есікті ашып төрде столды “құшақтап” отырған шұңкиген арық Апанасты көргенде ғана, көзі жарқ еткендей болды. Шұңкиген арық мосқал Апанасты Пахраддин құшақтап көрісті. Көзіне жас айналды. Патша қысымымен оныншы жылдары Темірге аударылып келіп мұғалімдікпен айналысқан Апанас қазақ арасын жақсы білетін. Енді ісіне Апанас араласқаннан кейін жағдайы онғарылатынын сезді. Екеуі оңаша қалғаннан кейін, бүкіл сырын Апанастың алдына ақтарып салды. Өкіметке өкпесін де жасырмады. Әсіресе Жорға Күрең, Бұқарбай, Сүржекей дегендердің ел ішін бүлдіріп жатқанын басып айтты. Бұлардың іс-әрекеттері Кеңес өкіметі жайлы Ленин берген нұсқауларға қайшы деп айтты. Бү бағытпен бұлар елді апатқа соқтырады деді. Апанас қатты ойланды. Жасынан бұрын қартайған кісі ғой. Беті шалбарланып кетті. Пахраддинді тыңдап болып бөлме ішін кезін біраз теңселіп жүріп алды. Айтқаны мынау болды:

— Е, достым Пахраддин... Мәселе тек Бұқарбай, Сүржекейлерге ғана тіреліп тұрса... жарасы жеңіл ғой. Мәселе оларда болмай тұр ғой...

Орындыққа отырған Пахраддин ошарыла бұрылып Апанастың аузына қарады. Апанас сөзін жалғады.

— Төңірек толған жау. Мемлекетте күш жоқ. Күш болуы үшін завод керек. Техника керек. Оны салу

үшін нан керек, ет керек жұмысшыға. Ет пен нан кулакта. Кулактан сатып алуға мемлекетте ақша жоқ. Не істеу керек? Кулакты тап ретінде жойып соның астығын, малын алу керек.

— Ау, сонда бәрін жиып-теріп өкіметке беріп кулак аштан өле ма?

— Во... во... Совет өкіметі де аштан өлгісі келмейді. Ешкімнің де аштан өлгісі келмейді...

Бұл Пахраддин үшін тосын жаңалық еді. Зәресі ұшып түсі бұзылып сұлқ түсіп отыр.

Апанас бөлме ішін кезіп әлі теңселіп жүр.

— Ашы да болса ақиқат осы... Пахраддин достым... Өкіметке астық керек, ет керек... Бұл ситуация шамалы уақытта өзгереді деп айта алмаймын. “Аша түяк қалмасын, Голощекин заңына қарсы тұру болмасын” деген тақпақтың шығуы бекер емес. Басы артық астық пен малды өкімет алады. Кім болмасын, қазір қолында малы, азығы бар шаруаның үстінен бұлт арыла қоймас... деп Апанас дағдарып ойланып тұрды.

— Қолымнан келер жақсылығым — қалаған жағыңа жер аударуға рұқсат қағаз берейін... Қолымнан келері сол ғана... — деді Апанас күрсініп.

...Сол қағазды алып Пахраддин босап “Жаңа жолға” келді. Қағаздағы Апанастың қолын көріп, Жорға желкесін қасыды. Коллективке түсіп кеткен Шойынқараны Жорға бөрібір қайтармады. Өның есесіне қоғамдық малдан екі жуас түйе берді көшуге. Дұшпанына бас иігісі келмей Пахраддин де көп қажап сұрай алмады Шойынқараны. Сөйтіп, қарашаның 29-ы күні сәске түсте жесір әйелдің көшіндей қикиып Пахраддиннің шолақ көші ауылдан шеттеп шыға берді. Пахраддинмен бірге көшкен Бұлыштың шешесі Дәу апа ғана болды.

— Сізге рұқсат жоқ көшуге, Дәу апа! Ол үшін қағаз керек ауданнан! Қағаз! — деп еді Жорға Күрен.

— Әй, Күрен! — деді Дәу апа, зор ашық дауысы саңқылдап. — Қағаз керек болса саған керек шығар... Маған керегі жоқ ондайдыңның! Осы жасыма шейін қағазсыз-ақ күнелткем!.. Енді, ешкінің жасындай жасым қалғанда... алатын Құдай мені сол қағазсыз-ақ алар!..

Сүйекті ірі, ер пішінді кара кемпірдің осылай дерін білген Жорға Күрең. Біле тұра әдейі айтқан жұрт естісін деп. Кеңес ағасы ретіндегі міндетінен құтылды ғой. Жорға Күреңге керегі сол-ақ еді.

Ауыл-үйдің бас көтергені қазір сыртта. Пахраддин көшінің маңында. Би ағаны сыйлайтын жұртшылық қоштасып қалуға шыққан. Жүк артқан түйелері орындарынан тұра бастағанда, әйелдер жағы жапырылысып қоштасып, жылап-сықтауға кірісті. Дәу апаны кемпірлер алма-кезек құшақтап “Қандай-қандай күн болады, көре алмай кетсек бақыл бол!” десіп, аңырап, әндетіп жұрттың топсасын босатты. Жаулық ұшымен көзін сүрткіштеп тұрған Торқа кемпір шойнадап келіп “Түз-дәмінді талай татып ек, тілім тисе кеше гөр!” деп сұңқылдап кеп Пахраддинді құшақтағанда көрілер жағы кемсеңдеп:

— Ой-хой, дүние-ай! Көзі қимайды да... Бірге өскеннің аты бір өскен ғой, — десті.

Көш іркіліп тұр. Қыс басының аспаны бұлыңғыр. Кара сұр дала қыбыр ете алмай құлақ түреді зарлы үндерге. Хансұлу “Апашы, апалап” жас балаша еңкілдеді, шешесін құшақтап. Сырға бәйбіше екі иығы бүлкілдеп үнсіз жас төкті.

Пахраддин буынып-тартынып қалың киініп алған. Үн жоқ. Ел қалып барады. Жер қалып барады. Қазы-

ғын айналып балпаң-балпаң басқан Шойынқара қалып барады. Іші ит жыртқандай. Мұрты қырауланып, қабағы түйіліп тұр. Алыс жол, жат жұрт, қатал тағдырмен беттесуге шырығып бекінген түрі байқалады. Кешелі-бүгін ата қоныстан ірге бөлеріне анық көзі жеткелі бері жанының ескі жарасы қайта сыздаған. Жалғыздығын ойлаған. Осындай басына іс түскенде ізіне ерер ұл болмай, күйрық-жалсыз сымпиғаннан жаман нәрсе жоқ екен. Соған көзі жетті. Баяғы шешектен кеткен титтей қарашықтары Әли, Қалилары тірі болғанда ғой бүгінде бүйтіп жалғыздық көріп жабықпас еді. Төңірегі толып тұрар еді. Сұм тағдыр-ай...

Қызы келіп “көкелеп” ботадай боздап құшақтағанда Пахраддиннің кең иығы дір-дір етті.

Шөріп:

— Ай! Ай! Қойыңдар! Қарақалпақ деген мына тұрған жер емес пе?! Бұларың не түгел боздап?! Пай, пай, біздің ауылдың қатындары-ай!.. — деп қатындарға басу айтып жортақ қағып дызаттап жүр.

Пахраддин көшімен “Жаңа жол” осылай қоштасты.

Боз қыраулы жүдеу созылған бос алап. Сүлқ түсіп көлденең көсілген жондар. Қызуы жоқ, сонау қиян шет көкжиектен жадау сығалаған күн.

Солай қарай бір шоқ көш барады. Қылтиып бұлыңғыр көкжиекке сіңіп барады.

Шойынқараның үстінен жазы, басынан нокта түспегелі талай заман. Үйір-үйір малменен, арқа толы жүкпенен сонау ескі қыстау Самға тағы тартып келеді. Құм арасы сексеуілді түлей жылы жақты мал екеш мал да болса сағынады. Соярлық соғым малдарынан

өзгесін айдап, басы Шеге, Ждақай болып, малшылар — Қауқаш, Серікбай үйлері ғана кошiп келедi. Шеге малшыларды қыстауларына қондырғаннан кейiн ауылға қайтпақ. Ждақай шопандарға бригад боп құмда қыстап қалмақ. Бригад болған күннен-ақ Ждақай Шойынқараны иемдендi. Жүрiсi жайлы шоктығы биiк атақты нарға бүт артысымен Ждақайдың көңiлi көтерiлдi. Сақ-сақ күлкiсi естiлдi.

— Ай, қасқа! — деп, айқайлап жүгi ауыр нарды сабалап ызғытып бара жатады. — Ай, қасқа, жаса слабода! Бiрiмiз — Пахраддиннiң қызына, бiрiмiз — нарына мiндiк пе?! Қалай Қи-и-и! Шу, қасқан!

Бақырауық жарбаймен қой соңында итiндеген Шеге ойын-оспаққа жоқ. Зауықсыз. Үнi шықпайды. Екi жағы суалып, көзi кiртиiп жүдеу келедi. Ауылдан шыққалы берi мына көкжиектен кокжиек асып жеттiрмей қажытқан ұзақ жолдай тұңғиық бiр ойдың теңiзiнде малтумен келедi. Қанша малтыса да шетi көрiнбейтiн мұхит. Әнеугi жиылыс, Пахраддиннiң жер аударылуы, жар төсегiнiң суып, Хансұлу екеуi арасына түскен кiрбiң.

Хансұлудың бетi қатты. Тiлдескiсi келiп: “Сұлу” десе болды, “Немене!” деп шақ етiп әп-әдемі көзiн ажырайтады. “Өй... сөйлесуге болмай ма?” дейдi бұл. “Болмайды. Құлақтың қызымен” дейдi келiншегi қаңылтырдай шытынап. Жатқанда терiс қарап жатады. Бұл арқасынан құшақтаса, қолын қағып тастайды. “Құшақтама, құлақтың қызын! Зияны тиедi!” деп. “Арашаламадың көкемдi. Қарақан басынды ғана қорғадың” дейдi. Бүкiл окпесi сол. “Оу, мен тұрмақ көкендi арашалауға Апанастың күшi жетпедi емес пе?” дейдi бұл мыңыншы рет ақталып, Хансұлу жауап қатпайды... Кiмдiкi дұрыс, кiмдiкi

бұрыс? Шеге осы жағын жатып та ойлайды, тұрып та ойлайды. Бірақ бұл жұмбақтың шешуін таба алмайды.

Батыр Барактың басына мал айдағандардан бұрын салт көшпен Ждақай, Рәш, Сарқытбай күн бата жетіп іркілді. Шеге кейіндеп малмен келеді. Әлгі үшеуінің мақсаты — қонаға орын, ықтасын ыңғайлау.

Қой селеулі шағын қырка басына таман тұрған төрт құлақты там батырдың өз бейіті. Одан томен — әр заманда қойылған осы елдің игі жақсылары. Ойпаң толған мол қойымшылық. Барак бейітінен де жоғары биіктеу шағыл үстінде арбиған кәрі сексеуіл тұр. Шақаларына байланған быжынаған шүберек. Киелі сексеуілі дейді жұрт оны. Киелі сексеуіл төбенің ұшар басында батар күннің қиғаш сәулесіне малынып қырмызы нұрланып аспандап тұр. Мәңгі жым-жырт ұйқыдағы бір қауым өлі аруақтың тиышын күзетіп тұрғандай.

— Уа, қайран бабам! Жатсың ба? — деп айқайлады анадайдан Ждақай лепіріп.

— Өй, мынаны жын қаққан шығар! — деді алдырақта келе жатқан Серікбай Ждақайға бұрылып.

— Әй, андап сөйле! “Жын қаққаның” не сенің?! — деді Ждақай көзі текенің көзіндей ежірейіп, Серікбайға ұмтылып.

— Көтек, мыналарға не көрінді?! — деп Рәш атын тепендеп қапталдаса берді.

Ждақай тіпті құтырынып кетті.

— Әй, “жындың” не сенің?! Андап аш аузыңды! Бұл жерде сен бригад па, мен бригад па?! Көзінді ашып қара! — деді Ждақай Серікбайға төне түсіп.

— Не болды сіздерге? Қойындар, ұяттары-ай-и! — деп, Рәш бетін сызды.

Ждақай ашумен Шойынқараны қамшылап сар желдіріп зираттың қасынан өте берді.

— Бетім-ай, мынаны кара! Бата оқымаймыз ба, түсіп?— деп Рәш атының басын тежеді.

— Әй, оқи беріндер сіздер-ақ! Мен молда емеспін!— деді Ждақай бұрылмастан.

Ана екеуі іркілді. Ждақай сәл оза түсіп бұрылса, Серікбай мен Рәш көліктерінен түсіп бастары түйісіп сөйлесіп тұр екен. Бұны жамандап тұрғаны айдан анық. “Тұра тұр, сен ала көз” деп тісін қайрады Серікбайға.

Әулиеден көп ұзамай ақ селеулі бұйраттың ық жағына түйесін шөгерді ызалы Ждақай. Жүкті түсірді. Қоржында, әке-шешесінен жасырып салған екі шиша арағы бар еді. Біреуінің ауызы ашық. Түйе үстінде тоңғасын мана бір-екі жұтқан. Тағы екі-үш жұтты сол ашық шишадан. Сол-ақ екен, күн жылып қоя бергендей болды. Серікбай мен Рәш бұның “жындылығын” айтып, сылқ-сылқ күліп қыр астында ауыз біріктіргендей көрінді. Бригад екені, бастық екені есіне түсіп, Ждақай одан бетер түлданды.

Ызадан бүркырап Ждақай жүгі түсірілген Шойынқараның арқасына ырғып мінді. Иесінің ұрыншақ мінезіне тәнті болған Шойынқара тұщы етіне ащы қамшы тиместен ытқып кетті. Ждақай кейін қарай әлгі “құран оқығыш” тақуасымақтарға қарай соқтырта жөнеді. Көліктерін жетектеп әңгі-мелесіп қатар келеді екен “Ала көз” бен Рәш. Анадайдан-ақ айқай салды Ждақай:

— Ал бү не жүріс сіздердікі? Әлі отын әкелінген жоқ! Күрке тігілген жоқ! Бү не жайбарақатшылық!

Бастықтың аты бастық. Екеуі бүлкетеп сала берді:

— Әй, сен! — деді Ждақай қапталына келе берген Серікбайға. — Сен, давай, отын жина! Үсіп өлетін жайымыз жоқ! Тез!

Серікбай балтасын алып отынға кетті. Ждақай Рәш екеуі үнсіз жүріп әлгі ықтасынға кереге жайып күрке тікті. Бір қаға берісте:

— Ана ала көзбен енді оңаша сөйлескеніңді көрсем, олда-білдә, бауыздаймын! — деді Рәшқа. Рәш сылқ-сылқ күлді.

— Оны ана Нарқызға айтарсың келесі жылы! — деді.

Бір құшақ дүзгеннің жалпылдағын көтеріп, аяғын сүйретіп Серікбай келді. Бұндай суықта жалпылдақ отын бола ма.

— Тпу... қаскигты-ау, мына атаңның көрін... Әй, жалпылдақ отын болама бұндай суықта?! — деп айқай салсын Ждақай. — Сексеуіл неге әкелмейсің?

— Жоқ болса қайтем?!.. — деп бағжаң етті Серікбайда. — Азғантай сексеуіл бар екен, ол да моланың ішінде. Оны қалай алам?!

— Неге алмайсың? Моладан қорқып... енді мола боламыз ба?!

— Құдай сақтасын... — деп ыршып түсті Серікбай.

— Қой, құрысын әулиенің сексеуілін алмандар! — деді Рәш те. Ала көзді жақтап тұрғанын қарашы.

— Дүзгеннің жалпылдағы отын бола ма? Мына ызғыған құла дүзде?! Айда кеттік? Жүр! Әкелеміз! — деп, балта, жіпті алып жұлқынып өзі шықты Ждақай.

— Ойбай, қой, жолама! Тәштидің баласы құсап аузың қисайып кетіп жүрер! Аруақпен ойнама! — деп шыр-пыр болды Рәш.

— Қожа-молдалардың шығарып жүргені ол. Ештеңеде жоқ. Кеттік, Серікбай, айда!

— Мен бармаймын. Қорқамын! — деп, безектеп ат-тонын ала қашты Серікбай.

— Әй, сен қатынсың ба қорқып?! Жарайды, қал онда... Қатынмен қатын болып...

Балтаны беліне қыстырып, Ждақай шөгіп жатқан Шойынқараның арқасына қарғып мінді.

Шойынқараны көсілте тапырактатып Ждақай әулиенің басына жетіп келді. Ждақай тастай қараңғы түнде де талай рет мола аралап өткен. Қорқатын түгі де жоқ. Мола дегенің де бір үйме топырақ.

Артына бұрылып көз салса, әлгілер шағылдың басына шығып соңынан бақылап қарап тұр екен. Күн ұясына қонып сай-салаға көлеңке ұялай бастаған. Танауы көріктей шуылдаған Шойынқараның басын тартпай тура киелі сексеуілге кидірмелетіп іркілді. Ойдағы сексеуілге қарайлағысы да келмеді. Алғаннан кейін енді тура киелі сексеуілдің өзін алайын деді. Ана қарап тұрғандардың өстіп бір зәресін ұшырайын деді. Мандайында айы бар төрт құлақты кара тас бейіт Барақ ата бейітіне көз қырын ғана салып өтті. Тіке қарай алмады. Қырқаның ұшар басында қалқиған “үсті-басы” шүберектен жалбыраған киелі сексеуіл жанына Шойынқараны шөгерді. Ана жақта тұрғандар айқай салған тәрізденді. Бебеу қағып төбе үстінде қозғалып кеткен тәрізденді. Ждақайға да керегі сол. Шырылдасын.

Кендір арқанды алып арбиған биік сексеуілдің төңірегін айналды. Сексеуілдің түбірі бура санындай. Балтамен шапсаң қикалап қараңғы түскенше отыратын түрің бар. Сондықтан көз байланбай тұрғанда тездетіп ана сужүректерге күдіретін көрсеткісі келді. Кендір арқанды сексеуілдің түбіріне шалып байлап екінші жағын Шойынқараның беліне шандыды. Ал керек болса!

Қарандар енді! Дүңкиіп жатқан жардай нарды қамшымен тартып жіберді бөкседен. Нарбура ышқынып ыршып тұрды. Алға ұмтылғанда кеудесін арқан қиып “ыңқ” етті. Бірақ сексеуіл былқ етпеді.

— Өй, әкеңнің... — деп ызадан жарылып кете жаздап қамшысын тағы көтерді Ждақай. Таяктан запы болған Шойынқара байғұс тағы жытқыды алға қарай. Бүкіл дырау күш шомбал тұрқымен жапырылып құлап ұмтылды. Сексеуіл дір етті. Бірақ омырылмады. Ждақай жынданып кете жаздады. Ана тұрған Рәш пен Серікбайдың көзінше қас маскара болғаныма-ай!

— Уа атаңның... Шу! Бір сексеуілді құлата алмайсың!.. Нар болғаныңды сенің!.. — деп Ждақай жынын шақырған бақсыдай зіркілдеп қамшының астына алды Шойынқараны. Шойынқара әлдене дегісі келгендей қамшыдан жасқаншақтап, бұрылып иесіне қарап еді, басына сақ етті дойырдың ұшы кеп. Қамшы тиген оң козін аша алмай мәңгіріп басын сілікті Шойынқара.

— Ол аз болса... мә! “Құлақ” иттің малы! Мен саған қикандағанды көрсетейін! Ал! Ал!

Дойырдың қорғасынды ұшы біресе кабақтан, біресе кеңсіріктен, біресе қарақұстан тиіп жатыр. Тиіп жатыр. Тиген жерін тіліп түсіп жатыр. Жарылған қабағынан аққан жылымшы қан нарбураның қамшы тиген көзіне құйылды. Нарбура азды-көпті ғұмырында зәбір көрсе тек осы екі аяқты пендеден ғана көретін. Бірақ сонда ол не үшін зәбір көріп жатқанын болжайтын. Қазір мына әумесер әңгүдік иесінің неге бастан, көзден төпелеп жатқанын түсінбеді. Шонданайдан, жамбастан үрса бірсәрі, онда “тарт”, “сүйрет”, “кират!” дегені ғой. Бастан неге ұрады? Көзі жұмулы нарбураны өн-бойын өрт шалғандай бір сұрапыл ашу, ыза, дырау күш кернеді. Ыңыранып, жауар бұлттай түнерді. Астау басын қайта-қайта сілкіп шиыршық ата теңселіп сексеуілді айналды. Әулекі мінез иесі балағат сөздерді бұршақша боратып жүр. Басқаны

ұқпаса да осы екі аяқты пенденің құлақ шағар балағатын ұғатын. Шойынқара долырып құрсанып азуын қарш-қарш қайрады.

— Ә, солай ма екен, сабазым! — деп есалаң иесі сақ-сақ күлді. — Ол, осы сексеуілге әлің келмесе! Ол!

Қамшы тағы да тілді қара саннан. “Сүйрет” дегенін түсінді. Шойынқара бұ жолы не әрі, не бері болуға ыңғайланды. Мына делқұлыға бүйтіп таба болғанша не сексеуілді, не өзін қиратып тынғаны абзалды. Ішінен алапат жойқын күш дүрк көтеріліп, жапырылып жұлқыды томарды.

— Әппп! — деп екі санын сабалап ыршып-ыршып айқайлап жіберді Ждақай. Шойынқара “Шойынқара” болғалы бұндай ширығып жойқын егеске түспеп еді. Алапат жұлқуға шынында да не томар қирап, не өзі қиары анық еді, табан тіреуге жер шыдағанда. Бірақ жер шыдамады. Жер опырылып, нардың артқы оң аяғы тілерсегіне шейін ойыққа кіріп кетті. Нар сұрапыл екпінін ірке алмай алға қарай ошарылып құлады. Әлдене шарт сынды. Омырылған сексеуіл екен деген Ждақай. Сөйтсе, қасқайып қарап тұр сексеуіл. “Аяғы сынды-ау нардың”. Ждақай денесі дір-дір еткен нарды айнала бергенде, көзі түйенің омырылып кеткен артқы жіліншігіне түсті. Сүйегі ырсиып тұр. Ернін тістеп үңіліп отыра бергені сол, ызалы нарбураның “аф!” дегенін бір-ақ есітті. Иықтан қарпыған бір дүлей күш бұны жерден жұлып алып бұлғап лақтырды. Жер қауып құлады ылдидан төмен қарай. Шойынқараның ызғарлы суық жанарын көрді. “Өлдім” деп ойлады. Нарбура қазір ырғып кеп шайнап тастайтын тәрізденді.

— Ой-бай! — деп бажылдап тұра қашты. Бірақ Нарбура қумады. Қозғалмады орнынан. Жардай

дүңкиіп жатыр. Ждақай былайырақ шығып қараса иығы аман. Нардың тісі қалың күпісінің бір иығын алып қалыпты. Зәресі ұшып дір-дір етті Ждақай. Төңірегіне қараса ымырт қараңғысы үйіріле бастаған. Мал айдап келе жатқан малшылардың да төбесі көрінді теріскей жақтан. Саудырап түйелер келеді. Ждақай не істерін білмей аласұрды. Шегеге не дейді? Тпу, қас масқара болды-ау! Қап!..

Төбеге қарай өрмелеп жүгіріп Серікбай келеді. Тісі ақсиып күлетін сияқты. Тоқтап артындағы Рәшқа қолын созды. Рәш қолын берді. Бірін-бірі сүйреп бұны табалауға асығып келеді. Ждақай намыстан күйіп кетті. Ортеніп кетті.

— Не болды? — деп ырсылдап жетті екеуі еліріп.

— Нар мертікті... Бітті... — деді мойып қалған Ждақай.

Шойынқара бір бөксесі қисайып құлап шөккен күйі, астау басы қалқиып ызалы ыңырсып қояды. Басы қан-қан. Оң көзі жұмулы.

— Байғұс... жануар-ай!

— Обал-ай... — десіп Рәш пен Серікбай нарды айналды. Сынған сүйегі ырсиған жіліншікті де көрді. Бастарын шайқады.

— Енді мал болмайды, — десті. Ждақай шырт етті:

— Жарайды! Болды! Бітті! — деп, ақырды бір кезде жазықсыз Серікбайға. — Отын шабу керек! Уақыт жоқ аза тұтуға!

— Сенің шапқан отының осы ма? — деді Серікбай да ала көзімен бұған ренжи қарап.

— Не дедің, әй? — деп, шап ете қалды өзі күйіп тұрған Ждақай.

— Шапқан отының осы ма, деймін! — деп шақшырайды алакөз.

Ждақайға да керегі сол еді. Тұра жүндеді Серікбайды. Көзді ашып-жұмғанша арық сопақ Серікбай ирелеңдеп жерде жатты. Байғұстың үстіне Ждақай қонжиып мініп алған. Жынданып басқа-көзге төбелеп жатыр. Рәш “ойбайлап” кеп Ждақайдың қолына жабысты.

— Ойбай, қойыңдар!

Ждақай Рәшті де аямады. Салып кеп жіберді маңлайдан. Рәш бұты серең етіп шалқалап барып құлады.

8

Түс әлеті еді. Таң атқалы түйіліп тұрған аспан қабағы ашылмай түнеріп тұрды да, ақыры жапалақтап қар түсе бастады. Кештетіп жауған алғашқы қар еді бұл. Малдарын қыстаудың қасына жақындатқан қойшылар, түйешілер түстік ішуге үйге жиналған. Кеше сойылған Шойынқараның өркеш майы дірілдеген үйме табақ еті ортаға келгенде, сырттан Бөрібасар абалады.

“Бү кім болды екен?” десіп үйдегілер елеңдесіп тысқа құлақ тікті. Ат тұяғының дүрсілі тура есік алдына жетіп іркілді де, иттің шабаланғанына қарамастан есікті айқара ашып ішке еңгезердей біреу баса-көктеп кіріп келді. Қолында — мылтық. Бет-аузын жүн басқан, құлақшыны түсірулі, бөтшағардың түсі өрт сөндіргендей суық. Үстінде томар бояулы ескі тон. Қар-қар. Аяғында саптама етік. Етігінің басы да қар.

— Қозғалмандар! — деді кісі гүрр етіп, мылтығын сығымдап. “Қозғалмандар!” дегені “Қозғалсандар атам” дегені еді. Қозғалуға жұртта онсыз да шама жоқ болатын.

Кісінің көзі керегеге ілулі тұрған ескі мылтыққа түсті. Шеге мына келген кісінің өңінен әлдекімді шырамытқандай ауыз ашып үлгергенше, бейтаныс кісі:

— Ана мылтықты алып жібер бері! — деді Рәшқа. Таным дауыс.

— Бұлыш аға! — деп ыршып түрегелді Шеге.

— Бұлыш!

— Ойбай, Бұлышсың ба?

— Ассалаумағалейкум, Бұлыш аға! — десіп үйдегілер жамырап қоя берді.

Бірақ кісінің түсі жылымады.

— Әкел бері! — деп, іркіле берген Рәштің қолынан мылтықты ала беріп.

— Кімнің мылтығы? — деді сосын гүр етіп.

Жұрт Қауқашқа қарады. Қауқаштың бұлтаруға шамасы келмей:

— Мал күзетуге берген... өкіметтің мылтығы ғой... деді екіұштылау.

— Оқ-дәрісі қайда?

Жұрт әрі-сәрі. Есік алдындағы мылтығын сығымдап шабынып тұрған кісінің түсі — Бұлыш та, ісі — тым жат, бұларға бейтаныс қатал жанның ісі. Неге де болса бекінген жан аямас баскесердің ісі.

Қауқаш қалбалақтап жүріп екі теннің арасынан бума түйіншекті суырып алып Бұлыштың қолына ұстатты. Бұлыш оқ-дәріні қойнына сүңгітті де, Шеге мен Ждақайға:

— Сен екеуің... Мына екі қапшықтың біреуін тысқа шығарындар, — деді.

— Інім-ау, аштан қырасың ба?! — деп қалды, қазан-аяқ жақтан Қауқаштың қатыны.

— Өй!.. — деді Қауқаш қатынына.

Бұлыштың сүп-суық назары Қауқаштың қатынына қадалды.

— Өкіметтерің өлтірмес... Қалған қапшық та жетулі сіздерге! — деді Бұлыш есікке бұрыла беріп.

Бұлыш үйден шығып көлденең тұрған атына қарғып мінді. Қар ұйтқып тастап тұр. Дүние төңірек аппақ. Есік алдында жаңа сойылған түйенің терісі жатқан.

— Шойынқараны... сойғансыңдар ма? — деді Бұлыш.

— Ие, — деді Шеге.

— Басқа мал табылмады ма?!

— Мертіккесін сойдық!

— Әкеліңдер! — деді Бұлыш қапшықты иекпен нұсқап. Шеге мен Ждақай қапшық толы тарыны көтеріп Бұлыштың алдына берді.

— Біздің кемпірдің күйі нешік? — деді Бұлыш Шегеге сынай қарап.

— Қалпақ жағына жер ауған Пахраддинге еріп көшті, осы жуырда, — деді Шеге.

— Мені іздеп әлек болмандар! — деді Бұлыш. — Бұл төңіректен таба алмайсыңдар! Шу!

Ждақай мен Шеге жүріп кеткен Бұлыштың соңынан есеңгірей қарап тұр. Ұйтқыған қарға араласып жота беріп ұзай берген атты кісі талтүсте қораға түсіп бір қойды иыққа қағып салып жонеп берген сұр көкжалдай. Қалың түлей сексеуілге кіріп кетті.

— Қасқитты-ау... — деді Ждақай, манадан қарысқан жағын әрең ашып. Басын шайқап. Бойын билеген сұрапыл үрейді енді ғана жеңгендей. Ждақайдың жалғыз қорқатын адамы бұл өмірде Бұлыш еді. Өзі тұрмақ Бұлыштың басып кеткен ізінен қорқатын.



ЗОБАЛАҢ

1

Соңғы кездері Шәріптің қуанышында шек жоқ еді. Қалай қуанбасын. Етікші деп етекпен тартып жатқан ешкім жоқ. Жалғыз жауы Жорға еді. Оның да ақылы кірсе керек. Бас иіп өзі келді. Ауыл арасында беделі, одан сайын өсе түсті Шәкеңнің. Тағы бір қуанышы — жалғыз ұлы Шегесі. Тпә, тпә, осы жаман немесі соңғы кезде козге түсіп жүр. Тіл-көзден сақпағай Құдайым! Осы жаман немесі бастық болды дегенде бұл, астапыралла, өз басын әрең алып жүр, оның қай жерінен көсемдік шығады деп тіксініп қалған. Сөйтсе, бала тақ-тақ сөйлеп дөңгелетіп барады шаруаны. Әсіресе, көмөнес болғаннан кейін есейіп кеткендей. Сөзі де, жүріс-тұрысы да салмақты. Пыт, жаман неме, кімге тартқан өзі! Соңғы кезде Тентексайды байлап, бөгет жасаймыз, Сарыжазыққа су жіберіп жайқалтып егін егеміз дегенді тауып алыпты. Өнеукүні ауданнан Апанас земотделдің бір адамын ертіп келіп “Жана жолдың” төңірегін айналып көріп кеткен. Тентексайға да барған. Әйтеуір, содан бері көктем шыға Тентексайды бөгейміз деп шулап кетті ауыл жастары.

Жұрт біраз ду-дабырдан кейін екі бригадаға бөлінді. Бірін — Жорға Күрең, екіншісін — Шега басқаратын болды.

Сонымен, сайдың екі жағына өтіп екі топ тұра қалып кетпен сілтеді. Ойын-күлкі, қысыр әңгіме

доғарылып жалт-жұлт қимылдаған жұрт бірауық піларқа алып жотамен үнсіз айқасқандай. Қара жерге кетпенді “кірш”, “кірш” ұрады кеп. Күрекпен тепкілеп ылғал топырақты додалап бұлғап лақтырып жатыр жас келіншек, жалаң қаққан жігіттер.

— Қи-и! Жабыл кедей, жабыл! — деп Шәріп жұрттың делебесін қоздыра ұрандап қояды. Сөйткенше, назары сырғақтап барып боз төбенің күнгеіін ала шоғырланған алақандай аулына тоқтады. Бір қызыл көйлекті қыз бала ауылдан шығып бұларға қарай тұра жүгірді. Көйлегінің етегі делендеп ұшып келеді.

— Біздің Гүлжан емес пе жүгіріп келе жатқан? — деді Шәріп, қолымен көзін көлегейлеп, шұқшиып.

— Ай, ай, не болды!

— Ағамды... ағамды... екі мелиса шақырып жатыр! Тез келсін деп жатыр! — деп шінгірледі анадайдан тұлымшағы желпілдеген Гүлжан. “Ағасы” — Шеге.

— Мелиса дейсің бе! — Шәріп қайталап сұрады.

— Мелиса! Екі мелиса! — деді Гүлжан. — Біреуі Қозбағар ағам. Оның да қылышы бар. Ағамды тез келсін деп жатыр.

Шега әкесіне:

— ...Барып келейін! — деді. Шәріп баласының қасына жақындай түсіп, ешкіқұйрық сақалын тұтаптап:

— Астапыралла, не шаруа болды екен?! — деді ойланып.

Шега үйге жеткенше әрі ойлап, бері ойлап өкімет алдында не кінәсінің барын біле алмады. Сонда да, жүрегі құрғыр секем алып қалтыранып есікті ашты. Аяғына оратылған қара күшікті итеріп тастады. Бірден көзі төр алдында құс көпшікті шынтақтап шалжиып

жатқан нәшәндік мелиса Сүржекейге түсті. Сырлы тостағаннан сыздықтатып айран жұтқан Сүржекей бұның кіргенін көзі шалса да айылын жимады. Одан төмендеу компиып Қозбағар отыр. Үстінде — мелиса форма. Қозбағар мелисаның оқуында еді осы қыста. Бітірген екен ғой. Өзіне бірақ мелиса форма жараспай тұр.

— Ассалаумағалейкум! — деді Шеге. Қозбағар қалбақтап түрегеп бұған қол беріп амандасты. Шұбат құйып отырған шешесі жалтақтап екеуінің бетіне қарады. Сүржекей басын сәл тіктеп қол ұшын ғана ұсынды. Қол ұшы сүп-суық екен. Сүржекейдің сазарған өңі анау қабырғаға сүйеулі қылыш, мылтықтардың сұсындай ызғарлы.

Бұл тізе бүкті. Үй ішінде тыныштық орнады. Бұл қалыпты бұзуға Сүржекейдің ғана хұқы бар еді. Жұрт соның аузына қарады. Сүржекей әдейі сол ауыр күйді соза түсіп, тостағанды кейін асықпай ысырып дастарқанның шетін қайырды. Өрамалмен ернін сүртті. Содан кейін Шегеге қарады.

— Жолдас Қаспақов... ауданға жүресің... Жинал! — деді. Әңгіменің шамамен осылай боларын іштей әлгінде есіктен бас сұққанда-ақ сезген Шеге.

— Ауданға дейсіз бе? Жарайды... — деді бұл.

Сүржекей енді Қозбағарға жүзін бұрды. Қомпиған Қозбағар жылан арбаған көжектей тықыршып кетті. Бастығына бір, Шегеге бір жалтақтап шекесі тершіп:

— ...Шеге, — деді дауысы божырап. — Мәселе былай...

Жайбасқан мен Шеге Қозбағардың аузынан тағы бір сұмдықты есіткелі құлақ түрді.

— ...Мәселе былай... факті бар. Пахраддин құлақтың алтын-күмісі осы сіздің үйде тығулы көрінеді.

Күйеу баласы болғандықтан сізге тапсырып кетіпті деген арыз бар. Соны тексеруге келдік...

— Не дейді жазған Құдай! “Алтын-күмісі” несі?!— деді Жайбасқан.

— ...Тексеріндер! Тексеріндер! — деді Шеге өңі сәл қуқыл тартып.

— Апа, ендеше кебеже, теңдердің аузын ашыңыз!— деді Қозбағар желкесін сипап.

— О, жазған Құдай, тағы не таптық?! — деп, Жайбасқан кебеже, теңдердің үстіндегі көрпелерді лақтыра бастады. Алдымен қара кебежені ашты. Кездеме, мата, киім-кешектен өзге нәрсе шықпады қара кебежеден. Қасындағы теңнің де аузын шешті. Бір қалы кілем мен текемет бар еді онда. Бойжетіп қалған Балжанның жасауы еді, Жайбасқан камдап жүрген. Мелисалардың іздеген алтын, күмісі одан да шықпады. Енді сыртын өрнектеп ақ киізбен қаптаған жалғыз темір сандық қалды ашылмаған.

— Ана сандықты неге ашпайсыз! — деді Сүржекей қоңыз мұрты жыбыр етіп аузын томпайтып.

— Ибай, ол келіннің сандығы! Кілті менде жоқ! — деді Жайбасқан бет бақтырмай.

— Келіндерің қайда ол? — деді Сүржекей аузын томпайтып.

— Жұмыста. Бөгет салып жатыр.

— Давай! — деді Сүржекей Қозбағарға. — Давай, алып кел!

Қозбағар есікке ұмтылған, сол арада одан бұрын есіктің өзі ашылды. Екіқабат Хансұлудың бойы көрінді. Хансұлу астан-кестені шығып жатқан үй ішіне қарап, аңырып тұрып қалды.

— Мінеки, өзі де келді. Келін, кел, сандығыңды ашшы! Мына жұрттың бір іздегені бар көрінеді! — деді Жайбасқан дауысы қобалжып.

Хансұлу екі аттап ішке кіріп тағы іркілді. Әлі ештеңені ұға алмай тұр.

— Кілтін әкел сандықтың! — деді Шеге шырт ашуланып.

Сонда ғана Хансұлу селк етіп ес жиғандай арқасында жатқан шолпысын бір ырғап алдына түсірді. Шашбауынан кілтті шешіп алып енесіне берді. Жайбасқан әшекейлі ақ киізбен қапталған сандықтың кілтін тетікке сала алмай:

— Ит жегір! — деп сілкіп, түйгіштеп әрең ашты сандықты. — Ал көріндер, түге!

— Давай, давай тексер! — деп Сүржекей тартыншақтап тұрған Қозбағарға иек қақты. Қозбағардың мұрын ұшы тершіп қоя берді. Өңі алабұртып ұялды, әйелдің затын ақтаруға. Бірақ бұйрықтың аты бұйрық. Сандықтың бетінде жатқан Хансұлудың жаз киетін қосетек ақ көйлегінен бастап, орамал, бешпет, камзол, ішкіімдеріне дейін қопсытып шығарып текеметтің үстіне тастай бастады. Сүржекей шылымын бүркыратып шеткерірек теңнің үстінде қайкайып отыр. Екі көзі — сандықта. Кенет Қозбағар сандықтың түбінен кішкене, алтын жалатқан ағаш сандықшаны суырып алды. Хансұлу ышқынып қалды.

— Тиме! — деп шыр етті.

Сол арада Сүржекей шіреніп орнынан тұрды. Шылымы бір езуінде.

— Бері әкел! — деді. Қозбағардың қолындағы кішкене сандықшаны өзі алды. Салмақтап көрді.

— Хм... Бұның кілті қайда? — деді, танауының астындағы қоңыз мұрты жыбыр етіп.

— Кілті жоқ оның! Оны қайтесіз? — деді Хансұлу жұлып алғандай.

Сүржекей сандықшаны құлағына тақап сілікті. Әлденеге көзі жеткендей аузы томпайды, мұрты тағы

жыбырлады. Содан кейін сандықшаны басына көтерді де, жерге тартып ұрды.

— Ah! — деп қалды Хансұлу, бетін басып. “Әлдеқандай күн болады, әлдеқандай заман болады. Қысылсаң керегіңе жарар” деп көшерде шешесі тастап кеткен асыл тас, алтын, күмістен соққан зергерлік бұйымдар еді. “Ешкімге көрсетпе!” деп еді. Содан, бұл Шегеге де көрсетпей сактап жүрген.

Сандықшаның быт-шыты шықты. Текемет үстінде асыл тасты күміс алқалар, алтын, күміс білезіктер, сақина, жүзіктер, мойынға тағатын толып жатқан моншақтар, Мекалайдың басы бар күміс теңгелер шашылып жатты.

Бір шылымы езуінде, жүрелеп отырған Сүржекей ап-ауыр алтын білезікті алақанына салып салмақтап корді. Басын шайқады. Танауынан оскырынып күңк етті:

— Коммунистпін дейді еше...

— Ініңіздің жазығы жоқ, аға! — деп без-без етіп бетін басып отыра қалды Хансұлу. — Ол білмейді! Мен... Мен...

Қозбағар бастығының айтуымен текемет үстінде, шашылып жатқан әлгі асыл бұйымдарды жинап теріп былғары сомкеге салды.

Шеге тілден айрылған адамдай. Өң жоқ, түс жоқ.

— Қаспақов!.. Кеттік! — деді Сүржекей, шылымы езуінде.

Шеге жейдесін ауыстырды. Бастық болғаннан кейін алған драп пиджагін киді. Шешесінің “Айран іш, ең болмаса!” деп бәйек болғанына қарамады. Документтерін қалтасына салды да үйден шығып жүре берді бір ауыз тіл қатпастан түнеріп барып мелисаның арбасына отырды.

Шешесі ізінен апыл-ғұпыл ере шығып ораулы бір нәрсені әкеп қойнына тықты. Нан екен.

— Шу! — деді делбе ұстаған Қозбағар. Арбаға жегілген қос айғыр ауыздығын сүзіп дүсірлей жөнелді, “Жана жол” аулының бала-шағасы, кемпір-семпірі түгел сыртта. Аңдап қарап тұр. Анау Тентексайды бөгеп жатқан жұрт та қарай қалыпты жұмыстарын іркіп. Ауылға қарай қалбақтап жүгірін Шәріп байғұс келеді. Әлдене деп айқайлап шырылдайды. Оны тек Жайбасқан ғана естіп тұр. Арқыраған қос айғыр жеккен мелисалар қаперіне де ілер емес. Шандатып теріскейге қарай құйғытып барады.

— Күдай, не жаздык? Не жаздык? — деп күңіренді қапелімде ғаріп болған Жайбасқан. Үйінен алтын шығып талайдың басы кетіп жатқан заман емес пе?

Ойламаған жерден өстіп, Шәріптің от басының ойраны шықты.

2

Шегелер аудан орталығына түс ауа жетті. Апанас бұны кабинетінде күтіп отыр екен.

— Ал мынау не? — деді, ә дегеннен латын әрпімен жазылған табақтай хатты алдына қоя беріп. Шеге қағазды қолына алды. “Арыз” делініпті. Калашниковтың атына жазылыпты.

— Оқы! Оқы! — деді Апанас. Өзі орнынан тұрып, махорка орауға кірісті.

Шеге бөркін стол үстіне қойып арыздың әрбір әрпіне үңілді. Шегені бүге-шігесіне дейін жақсы білетін адам жазыпты кім болсада. Мәселені әріден қозғапты. Шегенің Хансұлуға үйленуінен бастапты. “Таптық көзқарасы бұлыңғыр, былқылдақ болғандықтан Кеңес өкіметінің тап жауы, Пахраддин

кұлақтың қызын алды, Сөйтіп, боржоймен ауыз жаласты” депті. “Соңғылықта таптық пердесін ашқан Бұлыш бандиттің, сөйтіп, бажасы болды” депті, Бұлыштың өлген әйелі Әйтіштің Пахраддинге қарындас болып келетінін көрсетіп. “Шегенің Бұлыш бандыға іші бұратынын Мажанның кәмпескесінде тамам жұрт көрген” депті. “Сөйтіп, қой терісін жамылған қасқыр Шеге осы қыста тападай талтүсте Бұлыш бандыға малшыларды тонатып бездиіп қарап тұрды” депті. “Жәй қарап тұрса бірсәрі, өз қолымен бір қапшық астықты бандиттің алдына өңгеріп берді” депті. “28-ші жылы Пахраддин кәмпескеленгенде өкіметке алтын-күміс өткізген жоқ. Өкіметке бермеген алтын-күмісін туған күйеу баласы Шегеге өткізді деген кәуесет бар. Жолдас, аудандық секретарь! Әлде-қашан жоғарыда көрсетілгендей, тап жауларымызбен ауыз жаласып партия жолынан ауытқып Тротскі жолына түсіп алған Қаспақов сынды оңшылардың таптық бет пердесін ашатын мезгіл жетті” депті. Астында “Бір топ белсенді кедейлер” деп қол қойыпты.

Шеге хатты оқып болып басын көтерді. Апанасқа қарады.

— Ал кім жазған дейсің бұны? — деді Апанас бұрылып.

— Күрең... Күрең болар, — деді Шеге.

— Мен де солай ойлаймын.

— Бірақ жазуы оныкі емес, Афанасий Васильевич! Апанас қолын сілтеді.

— Ой-й, жазғыштар табылады гой. Одан да сен қазір бюрода қалай жауап беретініңді ойлан. Бүгін қаралатын мәселенің бірі — сенің мәселен. Жарай ма, ойлан! — деп Апанас Шегенің қолындағы “домалақ” арызды алып есікке беттеді. Шеге естен-түстен

айрылғандай шұңкиген арық Апанастың соңынан аныра қарап отырып қалды.

— Мен қазір келем! Семен Харитоновичке кіріп шығамын! — деді есік алдында сәл іркілген Апанас.

Шегенің миына түк кірмеді. Өзінің адал екенін біледі... Ақ екенін біледі. Әлгі арыздағы “оңшыл”, “солқылдақ” дегеннің жала екенін біледі. Бұлышты сыйласа оның адамгершілігін сыйлады. Оның қылмысты істерін қашан құптап еді? Астықты алса тартып алды, қарудың күшімен. Бұл не істемек мылтықты адамға қарсы?

— Жүр! — деді біраздан кейін Апанас есікті ашып. — Жақсылап, дәлелдеп айт ойыңды! Сасқалақтама!

Шегеден бұрын Калашниковтің кабинетіне бесалты кісі кірді. Олардың ішінде Шеге танитындардан — аудандық комсомол хатшысы, мейіздей қатқан арық кара қыз Нұрила, аудандық прокурор Сұранышев, Сүржекей бар. Қалғандарын білмейді. Аздасын есіктен Сүржекей басын қылтитты:

— Кір! — деді.

Калашниковтың алдында ұзынша столдың екі жағына ала отырған бір қауым кісі Шегеге жапа-тармағай қарады. Кейбір коздер ажырайып тесіле қарады.

Сталиннің үлкен суретінің астында отырған Калашников шашы тікірейіп есіктен кіре тоқтаған Шегеге шаршаулы назар ірікті. Қаламсаптың ұшымен қабырғаға жақын тұрған орындықты нұсқады. “Отыр!” дегені еді.

Шеге отырды.

— Читайте!¹ — деді Калашников манағы табақтай арызды Нұриланьң қолына ұстатып. Нұрила орны-

¹ Оқы!

нан ыршып тұрып дауысы саңқылдап арызды әп-заматта оқып шықты. “...Қаспақов сынды оңшылдардың таптық бет-пердесін ашатын мезгіл жетті” деп барып бір-ақ іркілді. Кең бөлме ішінде біруақ зіл тыныштық орнады.

Калашников Сүржекейге иек қакты.

— Ну-ка!¹ — деді. Сүржекей газетке ораулы нәрсені столдың үстіне қойды да, орауын ашты. Шегенің беті ду жанды. Стол үстінде жайнаған алтын-күміс бұйымдар. Ұяттан, намыстан, нақақ жаладан өртенді, жанды, зығырданы қайнады.

— Это — анонимка! — деді Калашников, хатты көрсетіп, — А это... факты!..²

3

Орысшаға шорқақ Шеге одан әрі Калашниковтың не дегенінің бірін түсінсе, бірін түсінбеді. Әйтеуір, бұны ондырмай төпеп жатқанын білді. Бір кезде, Калашниковтің тік қабағы астындағы тұздай көзі бұған қадалды. Шегенің жүрегі суылдап қоя берді, Онбойына сүп-суық үрей жүгірді.

— Өрныңнан түр! — деді Нұрила хатшының сөзін қазақшалап.

Шеге түрегелді, аяқ буыны қалтырап. Көздер бұған тағы да жапа-тармағай қадалды.

— Мына арызға байланысты не айтасың деп отыр сенен Семен Харитонович! — деді Нұрила тағы да,

Шеге озіне сөз соншалықты шапшаң тиеді ғой деп күтпеп еді. Терезеге қарады.

¹ Көне!

² Бұл — домалақ хат, ал мынау — дәлелдер.

Кіші бесінге еңкейген мұнарт күн. Неге екені белгісіз, көзіне Хансұлу елестеді. “Жаңа жолда” ол да осы күнге қарап күтіп отырғандай елестеді.

— Хат — жала, — деді Шеге. — Оны жазған белсенді кедейлер емес! Оны жазған сол “белсенді” деген атты жамылып жүрген кісі. “Бұлышты қорғады” дейді. Бұлышты қорғасам мен, бандит болмай тұрған кезінде қорғадым. Қате жолға түспесін дедім. Ал “бір қапшық астықты бандиттің алдына өңгеріп берді” дегені шындық. Бірақ бұл жағдаят басқаша болған. Мен оның қалай болғанын кезінде Афанасий Васильевичке баян еттім.

— Айтқан... айтқан, — деп шапшаң бас шұлғыды Апанас.

Шеге сөзін жалғады.

—...Бұлыш мылтығын кезеніп тұрды. Алдымен, жалғыз мылтығымызды тартып алды. Содан кейін біз не істейміз? Қарулы адамға қалай қарсы шабамыз? Лажсыз бердік астықты.

— Бұлышпен бажа екенің өтірік пе? — деді Сұранышов. Әйел дауысты кісі екен.

— Бұлыштың маған қайынбике болып келетін ол әйелі баяғыда өлген... — деді Шеге, бұған теріс қарап отырған Сұранышовтың қызарытқан желкесіне қадалып. “Иттің баласының желкесіне бір қояр ма еді. Әттең!..” — деді, іштей бір үні бұлықсып тұншығып.

— Құлақтың қызын алғаның да өтірік пе? — деді Сұранышов сол желкесін беріп теріс қарап отырған күйі жіңішке дауысы ызындап.

— Рас... Өтірік емес, — деді Шеге дүңк етіп. Шегенің сезін Нұрила қолма-қол Калашниковке аударып отырды.

— Сонда, тап жауымызбен ауыз жаласқаның емей немене? — деді әйел дауысты Сұранышов.

— Кешіріңіз! — деді сол арада Апанас тықыршып, Сұранышовтың сөзін бөліп, Калашниковке қарап. — Разрешите!¹

— Мен ешкіммен ауыз жаласқаным жоқ! — деді Шеге дауысы шығыңқырап. — Құлақтың қызын алсам да, құлақпен ауыз жаласқаным жоқ! Сіз өйтін жала жаппаңыз!

Калашников тықыршыған Апанасты ишарамен тоқтатты.

— Әй, сен өзің неменеге қызарақтайсың? Кімді ақымақ қылғың келеді? — деп ап-ащы дауысты Сұранышов Шегеге қарай жалт бұрылды. — Немене, мына, алтын-күміс үйіңнен шыққан, бұл да жала ма?

— Во, во! — деді өңкиген Калашников, орындығын сықырлатып серпіле түсіп. — Что ты скажешь, насчет этого! Это — факты, товарищ Қаспаков!²

Шеге осы арада тосылып қалды. Сөзіне ешкім сенбейтін тәрізденді, қалай айтса да.

— Бұл нәрселерді, Құдай ақына, мен корген де емеспін, білген де емеспін. Милиция келіп сандықты ашқанда ғана көрдім. Келіншегім жасырып келіпті менен, — деді дауысы бәсеңсіп қоңырланып.

Сұранышов мырс күлді, осы арада басын шайқап. Мына асау жігіттің сөзінің божырап, өзінің қобырағанын көріп көңілденген еді.

Калашников Апанасқа қарады.

¹ Рұксат па екен?

² Әне, әне! Сен бұ жайлы не дейсің? Бұл — дәлел, жолдас Қаспаков!

— Пожалуйста!¹ — деді.

Афанасий Васильевич құлшынып түрегелді орнынан.

— Семен Харитонович! Дорогие товарищи!² — деп бастады сөзін Афанасий Васильевич. Шегеге жалтақ-жалтақ қарап тұрып. Апанас сөзін орысша сөйледі. Шеге толық түсінбесе де оның не айтып жатқанын болжады. Мен Шегені жақсы білем дейді Апанас. Жауынгер ретінде өткен жылы бандымен айқаста көзге түскен, ер жүрек жауынгер деп жатқаны байқалады. Кеңес ісіне шын берілген жас деп айтып жатыр.

— Афанасий Васильевич! — деп бір бүйірден қойып қалды, кенет Калашников. — Это мы знаем... Вы лучше скажите...³

Шеге одан ары Калашниковтың не дегенін тағы түсінбей қалды. Нұриласы құрғыр да Калашников пен Апанастың арасындағы болған қақтығысты аудармай тым-тырыс отырып алды. Калашниковтың тегеуріні қаттылау. Апанас әлгі жоргасынан жаңылыңқырап қалды. Стол үстінде жатқан алтын, күміске қарап кібіртіктенкіреп қалды. Шеге доспейіл Апанастың бұл үшін отқа түсіп жеңіліс тауып тұрғанына бір қорланса, орысша айтылып жатқан пікірлерге жете түсіне алмағанына екі қорланды.

Апанастың сөзін Калашников тағы бөлді.

— Я Вас понимаю. Это вы дали ему рекомендацию в партию. И вы обязаны защищать его... Но, товарищи!⁴ — деп, гүрілдеп орнынан тұрып кетті Калашников.

¹ Айта беріңіз!

² Қымбатты жолдастар!

³ Оны білеміз. Сіз, дұрысы, мынаны айтыңыз...

⁴ Мен сізді түсінемін. Оны партияға ұсынған сізсіз, сондықтан қорғау міндетіңіз. Алайда, жолдастар...

Серейген ұзын борбай. Дауысы да зор. Суырылып қызу сөйлеп кеп берді. Енді әлгіден бергі әңгіменің бәрі түкке татымай қалғандай. Тіпті, Шегенің көзінде күдіретті кісі саналатын Апанастың өзі бір тұтам боп шүңкиіп шөгіп кеткендей. Қалған жұрт Калашниковтың аузына қарап, әрбір сөзін қылғытып “жұтып”, бас шұлғысады.

— Но, где наша партийная принципиальность!¹ — деп, гүркіреп айқайлады бір кезде жұдырығын жүре түйіп сөйлеген Калашников, тура Апанастың тұсына келіп іркіліп.

Апанас қозғалақтап жөткірінді. Әлдене дегісі келгендей. Бірақ Калашников кең адымдап барып орнына шұғыл отырды да:

— Товарищи! Вы прекрасно знаете, что по всей стране идет чистка партии...² — деді. Деді де сәл үнсіздіктен кейін қаламсабын Шегеге қарай шошайтты.

— ... От таких сорняков...³ — деді. — Хорошо, что он у нас пока кандидат⁴. Иначе, бы он нас, дорогой Афанасий Васильевич⁵, — деп тағы созып кетті. Ол сөйлеген сайын Шеге өзінің кінәсі ауырлап бара жатқанын сезді. “Опозорил бы” деген сөзді де есітті. Калашников сөйлеген сайын бұл өзін қараптан-қарап отырып құбыжыққа айналып бара жатқандай сезінді. “Шыннан да бүлдірген екенмін ғой...” деген окініш тырнады жанын. “Бүлдірген екенмін ғой... Әйтпесе, мына бірінші хатшы бұнша ашуланбас еді ғой...”

¹ Ал біздің партиялық қағидатымыз қайда?

² Жолдастар! Сіздер елімізде партия қатарын тазалау жүріп жатқанын жақсы білесіздер...

³ Осындай арамшөптерден.

⁴ Оның әзірше үміткер болғаны қандай жақсы.

⁵ Масқара еткен болар еді...

Басын көтерсе тағы біреу сөйлеп тұр. Сұранышов. Күлдібадам орысшасымен төпеп тұр Шегені.

— ... Совершенно согласен с Вами, Семен Харитонович! У нас пережитки много... Много вот таких. Даже среди молодежи. Когда он был комсомолцем... женился на кулацкую дочь!! Называется еще активист. Какой активист он? Гнать надо, таких... политически неграмотных... из наших рядов!¹

— Короче Ваше предложение?²

— Исключить из кандидатов в партии... Освободить с работы,³ — деді Сұранышов іркілместен ышқынып.

— А, вы что скажете?⁴ — деп Калашников Нұрилага мойын бұрды.

— ... Тоже согласна... исключить...⁵ — деді Нұрила да түрегеле беріп. — Он не оправдал наше доверие⁶.

Шеге мәселенің бұны партия қатарынан шығару жайлы болып жатқанын ұқты. Соңғы, сөйлеушілер бір ауыздан “шығару керек” деп жатқанын ұқты.

— Тогда, товарищи, переходим к голосованию! Большинство членов бюро вносят предложение исключить товарища Каспакова из кандидатов в члены партии. Кто за это предложение? Прошу поднять

¹ Сізге толық қосыламын. Бізде ескілік жетеді. дәл мынандай. Тіптен, жастар арасында да. Комсомол кезінде кулактың қызына үйленді. Белсендімін дейді. Қайдағы белсенді? Бұндай саяси сауатсыздарды қуу керек қатарымыздан...

² Қысқасы, сіздің ұсынысыңыз?¹

³ Партия қатарына үміткерліктен шығару керек, жұмыстан босату керек!

⁴ Сіз не айтасыз?

⁵ Мен де келісемін. Шығару керек.

⁶ Ол біздің сенімімізді актамады.

руки! — деп, Калашников алдымен өзі оң қолын көтерді. Апанастан өзге отырғандар түгел қол көтерді.

— Предложение принято. Товарищ Каспаков вы свободны! Вашим делом теперь займутся следственные органы.

Шеге Калашников өзіне қарап сөйлей бастағаннан-ақ орнынан тұрған. Бірақ бірінші хатшының сөзінің соңғы жағын ұқпай қалды. Осы арада мейіздей қатқан Нүрила тақылдап қоя берді.

— Партиядан шығарылдың, жұмыстан шығарылдың, түсіндің бе? Енді заң алдындағы ақ, қараңды шешу үшін, ісің тергеу орындарына берілетін болды.

Қос қолдап бөркін мыжғылап сопайып тұрған Шегенің жүзі ду-ду жанды. Күн қаққан, жел қаққан шекесінен, самайынан тері ақты.

— Жүр!— деп қалды Сүржекей күңк етіп. Сол дауыс Шегені есікке қарай жалт бұрды. Сүржекейдің дорба аузы томпиып, коңыз мұрты жыбыр-жыбыр етті. Бұған “Алға түс!” дегендей иек қақты. Мелисаның алдына түсіп дәлізбен емпендеп келеді. Етігі еденге рабайсыз дүрсілдейді. “Арыстыбай” (арестованный) болған деген осы екен ғой. Есіне баяғы Әзберген түсті. Мелиса еңкілдетіп айдап бара жатқанда бұлар бүкіл ауыл боп сыртынан қарап тұрып еді-ау.

Көшеге шыққасын таныс біреу кездесіп қалмаса екен деп тіледі. Сүржекей ту желкеден “Олай жүр”, “Бұлай жүр!” деп бұйрықты беріп келеді. Ауылдын ортасындағы жалғыз көшеге түскен. “Мелисахана” көшенің арғы шетінде еді, сонда апарып қамайын дегені ғой. Жан-жаққа қараса, жарықтық ерте көктемнің исі аңқып, қырқа, сайлар түлегелі жатыр. Жемнің жағасының көгі көтеріліп те қалыпты.

Әлдеқайдан үйіріліп самал еседі. Сонау маңдай алдында нарттай қызарып күн еңкейіп барады қабаққа.

Өткен жылы Хансұлу екеуі тұрған керең кемпірдің үйінің тұсына да келіп қалды. Таныс аула. Таныс қора. Жыпырайған балшық үй. Жүрегі шымырлады. Естен кетпес қызық күндер екен-ау! Бірде ұрысып, бірде табысып жүргендерінің өзі қызық екен-ау!

“Мелисахана” төбесі қаңылтыр ұзынша барак үй. Сонда жеткесін Сүржекей “арыстыбай” Шегені Қозбағарға тапсырды. Қозбағар Шегеден көзін ала қашып өз-өзінен абыржып құты қашты. Қолында бір бума кілт, үйді айналып қомпаңдап Шегені алып жүрді.

— Сотқа дейін жатады екенсің... — деді үнінен Шеге үшін қиналатынын сездіріп.

— Солай... — деді Шеге болған іске көнгендей. Бала күннен бірге өскен мына Қозбағардың мелиса болса да мінезі өзгермепті. Сол, баяғы Шегенің бетіне келмей жасқанып өскен қалпы. Тіптен, қалыңдығы Хансұлу қашып кетіп, одан кейін Шегенің жары болғанда да Қозбағар күйінен өзгермеген. Кішкентайдан Шегені жақсы көріп, оның әділетшіл мінезіне тәнті болып өскен қалпынан танбаған. Шеге Қозбағардың сол айнымас адал пейілін жақсы біледі. Оның мына тұста, Шеге ұсталар тұста қысылатын себебін де түсінеді.

— Тергеуші таныс жігіт еді... Сөйлесіш көремін... — деді тағы сәлден кейін Қозбағар.

Шеге үндемеді. Бірақ өзінің қаншалықты мүшкіл халге түскенін сезді осы арада. Іштей үнсіз қорланды.

Қозбағар барактың екінші басындағы темір құрсаулы ауыр есікті екі кілтпен ашты. Есік ашылғанда

алакөленке іш жақтан ызғар лебі аңқып. тұрды танауға. Шөп төселген екен еденге. Алакөленке бұрышта жатқан кісілердің сұлбасы байқалады.

— Осында... жата тұрасың!.. — деді Қозбағар тағыда өз-өзінен қысылыс тауып.

— Жарайд... — деді Шеге ішке аттап ене беріп. Он жақта жалғыз терезе бар екен. Оның өзі торлаулы. Желке тұсынан карап тұрған Қозбағар сықырлатып ауыр есікті жапты. Жердің астына түскендей ап-ауыр меніреу тыныштық орнады. Қараңғы бұрышта жатқан адамдар бастарын қалқитты. Ұйқыларын әрең ашып қараңғы түкпірден тесіле қарады. Ін түбінен қараған жыртқыштардай. Денесі түршікті. Жерге төселген қалың селеу төсек үстінен тізе бүгер орын көздеді. Терезенің алдынан орын сайлап сылқ түсіп отыра кетті. Қарағандар қарай берсін. Шөп төсек тысырлады.

— Өй! — деп бір жалпақ бет қара дәл қарсы алдына кеп жүрелей берді. Азуы ақсиып, бітік көзі жұмылып күледі. Бір кездегі мелиса, соңғылықта өкіл болып кеткен атақты Бұқарбай.

— Өй! — деп келсаптай қолымен бұны иықтан дүрс еткізді. — Шеге! Жолдас Қаспаков! Бұнда неғып жүрсің?

Шеге ызалы көкжалдай езу тартып:

— Бұнда нағып жүруші еді? — деді кекесінмен.

— “Асыра сілтеу” ме?

— Жоқ, — деді Шеге. — “Ауыз жаласу”.

— “Құлақтың қызын алдың” дейді ғой, баяғы.

— Солай дейді.

Келсаптай алақанымен иықтан дүрс еткізіп тағы періп қалып Бұқарбай тіктеліп қарқ-қарқ күлді. Бүкіл

семіз денесі де селкілдеп өзімен бірге “күлді”. Жалаң етіне сырма күпі киген екен. Қарны жылтырап көрініп тұр.

— Нешауа. Жасыма! — деді Бұқарбай енді сабасына түсіп, Шегені мүсіркегенсіп. — “Нелер келіп, не кетпес ер жігіттің басына”. Атасына нәлет, мені де екі-үш күн болды осында тығып қойғалы. “Асыра сілтедің” дейді. Бәрі қырт осындағы басшылардың. Біресе, “план давай, план давай!” — деді. “Жүз прәсент! Ойбай, жүз прәсент!” деп жанымызды қуырды, Калашников бас болып. Тұра келе шаптық. Қарап жатқан елге қасқырша тидік. Піркәздің аты піркәз. Көнбегенді көндірдік. “Жүз прәсент кәллектип боласың” деп. Надан халық саясатқа түсінді ме? Бытырап қашты. Бірі Иран кетті. Бірі — Ауған. Бірі Қалпаққа қашты. Енді оған кім бинауат? Тағы да Бұқарбай бинауат! ! От, кебенемат!

Бұқарбай ашудан бүрк-сарк қайнап бір орында бәйек таба алмай оңды-солды зыр қакты.

— От кебенемат! Қалай да Бұқарбай бинауат! Ол бола қоймас. Ерегіскесін мен арызданам!.. Ана жакқа арызданам!!!— деп Бұқарбай бұның алдына кеп шабынып тұра қап айқайлап аспанға саусағын шошайтты.

Доңызтаудағы бір адай ауылына барып Бұқарбай ішіп алып қас маскара болыпты деп естіген. Ішіп алып Құдай ұрып, біреудің уыздай жас келініп “Бұқа” тәңірдің тал түсінде қол салады. Адайдың ақкөз жігіттері аясын ба, Бұқарбайды мес қылып сабайды да, атына теріс мінгізіп келген жағына қарай айдап жібереді. Өздері ауылды дүрк көшіріп ұланғайыр түрікпен құмына кіріп кетеді.

Сөйлеп тұрған Бұқарбай кілт тыйылып Шегеге иек қақты. Терезені нұсқады.

— Әкең келді ғой!

Шеге терезеге бұрылса бөркі жыпырайып әйнектен ішке үңіле қарап әкесі тұр. Шеге бой тіктеп үлгергенше қапалақтап әлдеқайда жүгіріп те кетті. Тірсегі майысып есік алдындағы мелисаға қарай жортақтап барады екен. Аулада бақырауық жарбай тұр, торанғылға байлаулы. Әкесі танертең іздерінен тура шапқан екен ғой.

Қозбағар есікті ашып Шегені әкесімен кездестіруге сыртқа шығарды. Ымырт үйіріліпті сыртта.

Шәріп байғұс бір күннің ішінде өңі солып, жағы суалып жүдеген баласын көріп, жүрек еті езіліп, құшақтап бауырына басты. Көз жасы бырт-бырт үзілді. Ары қарай еш нәрсе дей алмай теріс айналды:

— Бері жүр! — деді оңаша бұрышқа қарай бастап.

— Болған істі есіттім... Апанастан, — деді оңашалағасын.

— Тергеу болады. Сот шешеді... енді қалғанын, — деді Шеге.

Әкесі жер шұқып ойланып ұзақ отырды. Әудем уақытта басын көтеріп ешкікүйрық сақалын тұтамдап:

— Ымм... қаражат... қаражат керек... — деді. — Тергеуші дейсің бе, сот дейсің бе, бәрі адам баласы ғой. Көмейіне күймай болмас.

Көп ұзамай әкесі бақырауық жарбайының беліне қайта отырды. Түйенің басын түстікке қарай түзеп алып бақыртып-шақыртып соқтырта жөнеді.

Сөйтіп, Шегенің ісін тергеу басталды. Тергеуші сөмкесін салаңдатып “Жаңа жолға” екі рет барып қайтты. Естіген-білгенін шұбыртып ала қағазға жазумен жүр. Соңғы екі айдың ішінде “Жаңа жол” мен Нарқамыстың арасын Шәріптен көп таптаған адам жоқ. Шәкең астындағы бақырауық жарбайдан өзге мал біткенді осы екі айдың ішінде сатты, сауды, әйтеуір жоқ қылды. Бетіне жылы қараған “бастықпын” дегеннің үйіне ең болмағанда бір қойдан апарып тастады. “Қарақтарым, етсіз отырмандар! Баламның жолына садаға!” деп. Тіпті, жылы қабак бермеген Сүржекейдің үйіне де өзі жоқта қысқы соғымнан қалған екі жілік ет апарып тастады. Аузы дорбадай Сүржекей содан кейін ғана Шәріппен қол беріп амандасатын болды.

Қолдан келген қарлығаш көмегін Қозбағар да аяп жүрген жоқ.

Қомпиған Қозбағар Хансұлуды қанша сүйсе де, оған өзін теңмін деп ойламаған ғой. Тікбақай, тарпаң мінез Хансұлу бұны есек қылып, иығына мініп алып екі өкпесіне күнде тепкілер де отырар еді ғой. Қозбағар осыны ойлағанда бір қателіктен күтқарған тағдырға кейде мың рет шүкіршілік етеді. Бірақ жүрегі құрғыр соны түсіне ме? Талшыбықтай бұралып Шегенің үйіне кіріп-шығып жүрген Хансұлуды көргенде жүрегі құрғыр жұртта қалған иттей ұлиды-ау, ұлиды. Осындай күйде жүргенде бастығы Сүржекей: “Анау Шеге кімің сенің, ағаң ба, інің бе, білмеймін. Ескерт! Келіншегін бір жаққа асырсын... мына істің ізі суығанша...” деп қалды бір қаға-берісте, дорба аузы томпайып. Не айтса да тегін айтпайтын адам ғой Сүржекей.

Содан Қозбағар сасып-салбырап жаман абдырады. Май күні соншалықты қыздырмаса да маңдайынан тері шықты. Әлгі сөздің жаны бар. Бай-құлақтың қызы, әкесінің алтынын жасырған. Зәкүн енді оның маңдайынан сипамауға тиіс.

Онсыз да арық Шеге бұл кезде мүлдем еттен сытылып, жағы сорайып жүдеп кеткен еді. Қозбағардың хабарын үнсіз тыңдады.

— Осындай боларын сезіп едім... — деді қабағын шытып.

— Көкем бүгін кешке келуге тиіс... — деді аздасын. Көкесі күн батпай тұрып-ақ жетті. Жарбайын бақыртып-шақыртып ауладағы тораңғылдың қасына шөгеріп жатты. Соңғы кезде түйесін керен кемпірдің ауласына байлап, бұнда жаяу келіп жүретін. Әкесінің бұ келісінде бір төтенше сыр бар тәрізді. “Не хабар әкелді екен?” — деп Шегеден тағат кетті. Қозбағарды ертіп, дауысы шығып үйді айналып келеді әкесі. Әрі-беріден кейін ауыр есік айқара ашылды. Көкесінің жирен мұрты жазылып көзінде қуаныш нұры ойнайды. Шеге табалдырықтан сыртқа аттады. Көкесі қалбалақтап еңкейіп бұның қолын ерніне апарып сүйді де:

— Ал сүйіншіі — деді күлегештеп. — Келін босанды. Түгелхан деген бір жаман немелі болдық! Кеше босанды...

Лып етіп бетіне қаны тепті Шегенің. Екі езуі екі құлағына жетті.

— Басымыз түгел болсын деп атын Түгелхан қойдық. Мінезі нағашыларына тартып кеткен бе, білмеймін, жатқан бір жайсаң, әйтеуір...

Аздасын Шеге бүгінгі болған әңгімені айтып еді. Шәріптің шат көңілі су сепкендей басылды. Еш-

кікүйрық сакалын уыстап тұрып ойланды. Шеге бір шешімге келіп қойған-ды.

— Көке! — деді. — Әке-шешесіне апарып таста Хансұлуды!.. Басқа амал жоқ.

— Ау, ертеңгі сотқа... сонда мен...

— Жоқ көке! — деді Шеге. — Ауылға қайт!.. Басқа салғанды көрерміз.

Содан, Шәкең бақырауық жарбайдың беліне отырып ауылға қайта шапты.

Түн қараңғысы сұйылып алакеугім тарта бастаған шама. Алып дала көкжиегі сәл-пәл білініп алысқа шақырып алдарында жол жатыр. Ескі керуен жолы. Сарғая бастаған таңғы аспанның шекесінде жарқырап Шолпан тұр. Сол жұлдызды сол иыққа алып итінген бір ат, бір түйелі жолаушылар. Түйе үстінде — Хансұлу. Құндақтаулы баласы бауырында түйе жүрісіне ырғала түсіп отыр. Жанары боталап, ұйқысынан енді ояна бастаған кең дүниеге назар салады.

Алда жол жатыр. Ұлы Үстіртті басып өтіп, сонау итарқасы қияндағы Бесқалаға, қарақалпақ, түрікпен елдеріне алып баратын ұзақ жол.

Осылайша бөпесін құшақтап Шегесіз қалған Хансұлудың аумалы-төкпелі жылдардағы ұзақ та шырғалаң сапары басталды.



ҚҰМ АРАСЫНДА

1

*А*й сүттей жарық. Түннің бір уағы. Ай нұрын ұрымтал құм қойнауда ұйқыға бөккен бір қауым ауылға құйып тұр. Желі де күйіс қайырып дуадақтай теңкиген түйелер. Үй іргелерінде қарауытып теңбілденіп шоғырланып қой-ешкілер жатыр. Жөткірініп пысқырынады. Ауыл бой тасалап қазаншұңқырға қонған. Төңірегі бытбылдақ шағыл құм.

Сол таңғажайып кең дүниеге жал құмның басында тұрып жалғыз адам назар салады. Ұйқыдағы ауылды, ұйқыдағы жалпақ әлемді жалғыз күзеткен сақшыдай шошайып төбе басында, ай астында тұр. Бұл жалғыз жан кең иығына жібек шапанын желбегей жамылған көкірегі қаяулы Пахраддин еді. Баяғы Пахраддин, елден жерден көшіп кеткен. Сол кешкеннен мол көшіп Пахраддин Қырдан Ойға — қарақалпақ жеріне аяқ басқан. “Ауызы күйген үрлеп ішеді” дегеннің керімен қалалы жерге жуымаған, өкіметтің көзіне тасалау жер іздеген қонуға. Бұл жақтың жері Қырдың жылмиған құла даласына ұқсамайды. Бос топырақты камысты, жыңғылды, жиделі, тоғайлы болып келеді. Аракідік актеңбіл сорлар кездеседі. Аракідік осы мына Айтудың құмындай шағыл құмдар кездеседі. Тоғайында қаптаған аң — жабайы шошқа, қарақұлақ, шағалдар бықып жүреді. Сол аңдай жортып жұрттың мазасын алып тіміскіленіп ұры-қары, бөлек-салақ банды, баспашы дегендерің де тыным таппай жортуыл қағады.

“Қарақалпақ жактың тәртібі босаңдау екен” деп, баяғы ен даладағы еркіндіктерін аңсап келген Көшпенділердің алдынан бұ жерден тағы да “кәлектіпке кіріндер” деген үгіт-насихат шықты. Соңғы екі-үш жылда әр түрлі жоспар, салық, салғырттың тұсында “тапсыра”, “тапсыра”, қазір бұл ауылдарда жартымды мал да қалмап еді. Байы, кедейі, орташасы түгел қатар деңгейленіп қолды жұқартқан еді. Айтудың құмына кіріп бой тасалап отырған қырық-елу үй тағы үрпиі. “Енді қайттік?” деп. Сөйтіп отырғанда жазғытұры Қоңыраттан бір топ белсенді сау ете түссін. Бірі — “дайындау бөлімінің агентімін”, бірі — ауылсоветпін”, бірі — “мелисамын” дейді. Малдың артығын тағы сыпырып алды, өкімет бағасымен ақша төлеп. “Қызыл ет” деген жоспар екен. Ол уақиғадан ес жиып үлгіргенше тағы бір өкіл келіп, адамның бәрін тізімдеп қағазға түсірді, “бірігіп артель боласындар” деп. “Енді не істейміз?” деп ауыл ақсақалдары дағдарып отырғанда, ақ түйесін желдіртіп қыс алдында Әмударияны жағалап жер іздеп кеткен Лабақ ахун оралды сапардан. Лабақ ахун бұл сапарында Хорезмнен, түрікпен, тәжік елінен қазаққа қоныс теберлік жер кездестіре алмай жылыстай-жылыстай Ауғанстанға жетіпті. Ауғанстанның бергі шетінде отырған кешегі төңкерістен қашқан түрікпен обаларында болыпты. Баяғыша малын бағып, отын жағып, етек-жеңі кең жатқан елді көріпті. Ауған өкіметінің бұларда, бұлардың Ауған өкіметінде шаруасы жоқ екен. Пұштун деген ауғанның көшпелі тайпасымен көрші-қолаң екен. Садағаң кетейін мұсылманның аты мұсылман ғой, ауыздарында — дұғасы, қолдарында — Құраны, көшіп-қонған осы қазақ-түрікпен тәрізді халық екен. “Көшіп келіндер!” деп күшақ жая қарсы алыпты

ахунды. Лабақ ахун саңқылдаған ашық әуезді дауысымен осылай әңгімені жырдай төккенде тыңдаған жұрттың аузынан сілекейі ақты. Малын бағып, отын жағып, тек жатқан елді көз алдына келтіргенде шаруа ауылға Ауған жері бейне Асан қайғы іздеген Жерұйықтай елес берді. “Кеттік!”, “Көштік!” деп біразы салғаннан елпілдеп қоя берді. Шалдар жағы ойланып, толғанды. Қанша айтқанмен көбі көрсауат. Елден, жұрттан безіп, атасы басқа Ауған асуға жүректері дауаламады. Оқыған, тоқығаны бар, заманында би болып алдынан топ таратқан көзі ашық, көкірегі ояу ел азаматы Пахраддиннің аузына қарады бәрі. Пахраддин болса тұжырымды ештеңе айтпай жұртты тыңдады, жұртқа құлақ түрді. Құлақ — сөзде, көзі — әріпте, өзі соңғы төрт-бес жылдан бері жинап-теріп жазып жүрген шежірелеріне үңілді. Сүйтіп жүргенде сонау қиянда қалған елден — Оймауыттан Хансұлу келді атасымен, жарты ай жол жүріп арып-ашып. Шегенің істі болғанын ұзынқұлақ жеткізсе де қызының босанғанынан бейхабар еді. Шегенің жыл кесілгенінен бейхабар еді. Бұның бәрінен де қызының жайы қатты батты қабырғасына. “Маңдайына — күн, бетіне жел тимеген” Хансұлуы, қыз да болса ұлдан артық әспеттеп өсірген Хансұлуы... жалтақтап, жасқанып қалыпты өмірден... Байғұс бала! Сөйлегенде де жәутендеп жұртқа қарай беретін болыпты. Баяғы паң, еркін мінезі жоқ, жасып қалған.

Қудалау көріп қолына қызы келгеннен кейін-ақ Пахраддин еңсесін көтерді. Күрт өзгерді. Шежіре дәптерлерін жинап, қара қалтаға салып кереге басына іліп қойды. Ауыл алды құмсақ төбе үстіне Лабақ ахун бастаған кәрия ер-азаматтарды жинады. Мынау ойдан-қырдан құралған құрама ауыл ертең бір іске

бел бұған шақта жағама жармаса кетпесін деп, алдымен тағы да жұрттан сыр тартты. Аз сөйлеп көп тыңдай отырып әлім, адай, табын — үш атаның баласы түгел бір пәтуаға келгенше әліптің артын бақты. Қарсылығы жоқ, бас изеп қана отырды. Қауқылдаса келе көпшілік көші-қонның біраз қыры-сырын өздері-ақ шешкендей болды. Көшті Лабақ ахун бастап алып жүрмек. Жүргенде Әму бойымен емес, Ауғанға мына көлденең жатқан түрікпен құмын белден басып тіке аспақ. Жұрт, не айтар екен деп енді мұртын ширатып отырған Пахраддиннің аузына қарады. Бұлыш сияқты жастар сес беріп:

— Би ағаң айтсын!

— Би ағанды тыңдайық! — десті. Айтудың құмында бой тасалаған бұл құрама ауылға осы қыс аяғында Балқиясымен келіп жалғыз үйлі Бұлыш та қосылған. Сөйтіп шешесімен табысқан.

Пахраддин көп созбады. Төбе басында түн жамылып дөңгеленіп отырған жас-көрісі аралас бір шоғыр қауымға қарап еңсесін көтеріп:

— Ал ағайын... онда ақсарбасты шалуға керек... Құдай жолына, боз ала таңнан! — деді.

— Аумин! — деп ақ сақалды, ақ шашты аққудай Лабақ ахун бет сипады.

— Аумин! — деп, гу ете түскен жұрт бет сипап ниет байласты. Сонымен талай күнгі кеңестің түйіні жасалып, таңертеңмен қимылдайтын болып жұрт төбе басынан тарасқан.

Жалғыз Пахраддин ғана күм үстінде бөгелендеп тұрып қалған. Еркіне салса бір табан аттап шығар ма еді ел арасынан. “Иранға көшейік” деп Әзберген, “Түркияға көшейік” деп Ермағамбет үгіттегенде былқ етпеген Пахраддин енді Ауғанға өзі тартты-ау. Беу, дүние-ай! Сұрқай заман, сұм тағдыр-ай.

Ай сәулесі сықырлауық есіктің саңылауынан, түрулі босағадан үй ішіне еніп тұр. Кең тосекте керіліп жатып ұйықтайтын күндер жоқ. Пахраддин мен Сырға бүгін түн көз ілмеді.

— ...Қызыңа ауыз салған өкімет... Енді тыныш қоймауға керек... — дейді Пахраддин. — Құрық салуға керек мойнымызға.

— Құрысын... көшсек көшейік. Абақтыдан тәуір шығар... жат жұрт демесең... — деп Сырға да қолдап, қостап қояды.

Әлден уақытта бөпесі жылап Хансұлу оянды. Бесікке сүйене отырып баласын емізді.

— Сұлужан! ... — деді Сырға бәйбіше шымылдыңтың бұрышын ысырып.

— Ау, апа!

— Хабарың бар ма? Көшкелі жатырмыз ғой!

— Ауғанға ма? — деді жұлып алғандай Хансұлу. — Мен ше? — Мен қайтем?! — деп қалды Хансұлу ышқынып.

Үй ішін өрт шалып, қапас қапырыққа толғандай.

— Балам-ай, сабыр етші! — деді дауысы дірілдеп, Сырға, төсегінен ысырылып шыға беріп.

Хансұлу түншығып жылап та жіберді, бесікке маңдайын сүйеп. Оған баласы қосылып “іңгалап” үйдің ішін әп-сәтте азан-қазан етті.

— О, пәруардіға-арр! — деп күңіреніп, Пахраддин сыртқа сусып шығып кетті.

Ай батыс аспанға қарай жантайып, сәулесі солғын тартыпты. Шығыстан таң саз беріпті. Құмандарын ұстап сыртқа шыққан бірлі-жарым шалдар қараңкүраң көрінеді. Ауыл алдындағы құм төбенің үстінде шошайып біреу отыр. “Кім?” деп қараса, басында ақ сәлдесі таңға қарап жүгініп отырған Лабак ахун!

Үй ішінен Сырғаның үні шалынды:

— Қайт дейсің енді, қайт дейсің? — деді шарасыз күй танытып. Пахраддин шыдамады. Үй сыртына таяу келіп, тамағын кенеді де:

— Әй! — деді, бұл сөзін бәйбішесіне арнағаны еді. — “Қайтемізін не сенің?! Одан да шетірек көшіп бұ жақтағы жағдайдың аңысын аңдаймыз демейсің бе? “Ауған” дегенмен ол сонша жәһаннам емес. Ел іші тынышталғасын қайта көшерміз! Тым құрыса, өзінді әкеліп тастармыз демейсің бе? Солай деуге керек қой!

Салмақты әке сөзіне кім ден қоймаған. Үйдегілер де бірауық толас тауып тыншығандай болды.

Таң астынан Лабақ ахунның азан шақырған әуезді үні шарықтады.

— Аш-шадан, ла-иллаһул, ил-Алла!

— Аш-шадан, ла-иллаһул, ил-ал-ла-ау!

Шыныдайын таза ауада мақамды әуен күллі өлкеге тарап тұрды.

Көкжиектен бас жарып күн көрінгенде ауыл көші де тізіліп қоңыраулатып ойпаңнан шыға берді. Танды сол бүйірге ала отырып көш түстікке маңдай түзеді. Көш алдында үркердей топ атты — Лабақ ахун, Пахраддин бастаған ауылдың ер-азаматтары. Көлденен біреу кездесе “Мал жаюға ыңғайлы қоналқалық жер іздеп барамыз” деп айтуға сөз байласқан.

Жез қоңыраулары күңгірлеп маң-маң басқан нар түйелердің үстінде ақ жаулықтары кекірейген кемпірлер. Әжелерінің төңірегінде балапандай бастары қылтиған балалар. Көш бастаған сандық бас, салпы ерін қызыл нар үстінде — Сырға бәйбіше. Белін қызыл түрмемен шарт буған. Қасындағы бесікке ауық-ауық еңкейіп қояды. Бесіктегі — Хансұлудың бөпесі. Одан кейінгі нар үстінде қоршау ортасында отырған қау-

қиған қара кемпір — Дәу апа. Бұлыштың анасы. Оның алдында да бір баланың басы қылтияды. Балқиядан туған немересі.

Балқияның өзі салт атпен келеді. Анау Хансұлумен қатар келе жатқан жирен үстіндегі ақсары келіншек сол.

— “Кебін киген келмейді, кебенек киген келеді”, сол айтқандай, сінлім, сен жаси берме, үміт үзбе ертеңнен! — деп, Балқия басу айтты Хансұлуға алғашқы күні-ақ.

— Әке-шешем Ауғанына барып алғаннан кейін Сәбет өкіметінен қорқып кім біледі, күйсеуін өзгертіп жүре ме? Бірақ мен тірі жүріп о жақта қала алмаймын. Қайтсем де келемін! — деп Хансұлу сыр ашты Балқияға.

Балқия атын тебініп Хансұлуды қапталдай беріп:

— Ол сырың іште болсын, — деді құпия күбірлеп.

“Жаман айтпай жақсы жоқ” ондай күн туа қалса сені елге жеткізіп тастайтын кісің Бұлыш болады. Бұлыш жезден. Сені мен Шеге дегенде, ішкен асын жерге қояды.

Балқияның мына айтқаны Хансұлудың қам көңіліне медет болды. Шегеге қайтып қосылатын жолы кеңейе түсіп, көкірегінде үміт таңы сәулеленгендей.

Жолдың үшінші күні дегенде бұлар құм арасында ақбас, жантақ, шырмауығы қалың өскен ойпаңға түнеді. Жүктерін жайратып тастап ас-суларын ішкеннен кейін ауыл шырт ұйқы құшағына енген. Аңадай жерде бір шоғыр топ боп күйсеп түйелер жатыр. Ауылдың арқа тұсындағы ранды, селеулі сайға арқандалған жылқы малдар ғана аңда-санда пысқырынып жайылады. Салдыратқан ұзақ жолдан байғұс иттер де шаршағанға ұқсайды. Жақтары семіп,

жұмсақ құм баурайында көсіліп жатып ұйықтайды. Ояу Бұлыш соның бәріне үнсіз назар жібереді.

Елден безін бұл екі қыс құм арасында қаңғыды. Елсізде жүріп Балқия екеуінің шекпеген бейнеті қалмады, Аштық, жалаңаштықты да сауды бастан. Содан “Жалғыз жүріп жол тапқанша, ауылыңмен адас” деп, Айтудың құмына ойдан, қырдан жиналып жатқан осы ауылдың үстіне Балқиясымен бұ да келді. Ақылшы аға Пахраддинге, аңыраған шешесіне қосылып, бүгінде төрт жағы түгелденгендей еді Бұлыштың. Ендігі жерде тағдыр алдан не тосса да осы Пахраддин тәрізді азаматпен, ахун тәрізді көпті көрген кәриямен бірге болып, бірге көруге бекінді. Шалдардың маслихаттаса келе баяғыдай кең жатқан қоныс іздеп Ауғанға қарай бет алғанын да мақұл тапты.

Өстіп, әр нәрсені ойлап жатып Бұлыш түн ортасы ауа көзі ілініп кеткен екен. Шуылдап қоя берген иттің дауысынан шошып ояңды. Киімшең жатқан қалпы, алас-қапас ырғып тұрды орнынан. Жастық астындағы бесатарын ала түрегелді. Ұйыған таң қараңғысы. Еш нәрсені анық байқап болмайды.

— Ойбай, жау!

— Жау тиді! — деген, қатындардың ап-ащы айқай-ұйқайы шықты иттің шуына араласа. Желіде жатқан түйелер өре үркіп, екі-үш атты кісінің алдында шоғырланып жөнкіп барады.

— Атқа!

— Атқа жүгіріндер! — деп Пахраддин тұра айқай салды. Сөйткенше, үріп тұрған иттердің иек астынан құм шағылдың арасынан шаңқ-шұңқ мылтық атылды.

— Ой-бай!

— Ойбай! — десіп қатын-қалаш шуылдасып арқа тұстағы сайға қарай лықсыды.

— Сайға! Сайға құландар түгел! — деді Пахраддин шолақ, бұйрық етіп. Аласапыранның ішінен:

— Бұлыш! — деген Балқияның ышқынған дауысы жетті құлағына. Бірақ қарайлайтын мезгіл емес еді. Жеңіл шекпенді жалаңбас, жалаңаяқ Бұлыш қараңғыға сұңги жүгіріп барып ербиген бір бұта тасасынан жауға қарап мылтық атты. Қоралы түйені қуалап ызғып шауып жүрген бір шөгерме бөріктіні аттан ұшырып түсірді. Төңірек ызы-шу, қым-қуыт. Бала-шағамен қоса корпесіп бүркеніп қашып бара жатқан еркектер де көрінеді. Қарсы бетте селеулі бұйрат тасасында тығылған жау “тарс та тарс” оқ жаудырды. Жүгіріп ырсылдап Пахраддин келді. Жалаңбас.

— Бұлыш! Кейін шегін! Жұрттың бәрі сайға түсіп кетті! Жалғыз қалдық! — деді ырсылдап.

— Аттар қайда, Би аға! Атқа жүгіріңіз! Ат керек! — деді Бұлыш түйені айдап бара жатқан екінші атты кісіні нысанаға ала беріп. Тағы гүрс етті мылтығы. Алақтап сайға қарай ұмтыла берген Пахраддин осы арада артына жалт қараса түйе қуалаған дұшпанның тағы бірі ат жалын күшқан екен.

— Я, Алла! — деді Пахраддин, қараңғы сайға қарай бүлкілдей түсіп. — Я, паруардігер!

Жолында алакөлеңке, ию-қиюдың арасында “Я, Барак!”, “Я, Барак” деп сұңқылдап тірі аруақтай қалқиып Лабақ ахун тұр. Үстінде — боз шапаны, басында — ақ сәлдесі, қолында — аса таяғы, аузында — дұғасы, түс-түстан жауған оқтың ортасында ұзарып, ақ жалаудай желбіреп тұр. Сайға түсіп кеткен ауылдың жаман-жәутік еркектері енді қайырылып жата калып жауға қарсы мылтық ата бастапты. Жан-жақтан атылған оқ-дәрінің исі сасиды. Дүние азан-казан. Қыңсылаған ит. Үркіп жүрген қой-ешкі.

— Ахун бауа! Сайға түсіңіз! Сайға! — деді Пахраддин даңғырлап, екпіндетіп жақындай беріп. Шал аса таяғын көтеріп шолтаң еткізді. Пахраддинге “Жолыңнан қалма!” деген ишарасы еді. Қараңғы сайға ауыр денесін әрең алып жүгіріп Пахраддиннің құлай бергені сол, сайтабандағы алажабыр сапырылысқан көп халықты аралап әжептарқы айқайлап сүріне аттап далақтап келе жатқан Қықымбайды көрді.

— Ат жоқ! Ойбай, аттар жоқ! Би аға, ойбай, аттарды айдап кетіпті.

— Ай, қырсық шалды-ау! Қырсық шалды-ау бізді!— деп, әншейінде тау қозғалғанда қозғалмайтын Пахраддин зар иледі. Шарасыздықтан не істерін білмей тықыршып кетті. Не қолында мылтық жоқ. Мылтық болғанда да атып келістіре алатын жан емес қой Пахраддин. Шыдап тұра алмай қаптаған жаудың отінде жалғыз қалған Бұлышты ойлап кейін қарай тұра ұмтылды. “Оққа ұшам-ау” деген қорқыныш жоқ, сірә, жүрегінде.

...Бұлыш бұта-бұтаның тасасымен бүкендеп тура желкесінен келіп қалған еңгезердей жаудан бихабар еді. Тізерлей отырып дүзген тасасынан тағы да оқ атқалы үмсына бергенде құлақ түбінен мылтық гүрс етіп оң иығына бір соққы тигенін сезді. Мылтығы ұшып түсті. Ұшып түскен мылтығына жармасып, еңкейе беріп жалт бұрылды. Үстіне төніп келген Әзбергенді көрді. Әзберген “Әкеннің!..” деп бесатардың дүмімен құлаштап сілтеді. Бұлыш тек басын жасқап үлгірді. Мылтықтың ауыр дүмі сол иықтан тиді. Жанұшыра ыршыды. Қайдан келгенін білмейді, тура алдынан Мажанның Мотаны шыға келіп қылыш сермеді. Одан кейін серпілем дегенде дәл қарақұстан әлдене “сақ” етті. Көз алдында бір оттың жарқ еткенін

біледі, одан әрі не болғанын білмейді. Дүние түгелімен қап-қара тамұқ түнге сүңгіді.

Бұлыш жатқан жерде үш-төрт кісінің сұлбасы қараң-құран үймелескенін көріп Пахраддин қалт тоқтады. Бұлыштың қолға түскенін сезді. Қанша айтқанмен жан тәтті ғой. Бұта тасалап отыра қалды Пахраддин. Сөйткенше:

— Бұлыш! Бұлыш! — деген жан түршігерлік әйел дауысы шықты. Қараса, сай тұстан көкала түтінді қақ жара зымырап Балқия келеді. Жалаң аяқ, жалаң бас. Жаулығы қолында, антүрганның жүйрігін, шашы жайылып, балтыры жарқылдап зымғап келеді.

— Қашты! Жау қашты! — деп сайдан мылтығы бар ауыл еркектері де ере шықты.

Бү кез таң қараңғысы сұйылып, шығыс көкжиек мүлдем бозарып, құмды өлке бедері көзге айқын малына бастаған шақ еді. Шағыл арасынан суырылып шығып, 20—30 аттылы бұлардың үрейін алып желе-жортып бел асып бара жатты. Оқ жетер жер емес.

— Бұлыш! Ойбай, Бұлыш! — деп ышқынған Балқияның табаны жарқылдап жанынан құстай ұшып өтті.

Буын-буыны дірілдеп бұта тасасынан Пахраддин да бой тіктеп “Сорладық кой!” “Сорладық” деп күніреніп Балқияның соңынан бүлкілдей жүгірді. Бұлыш құлаған бұта түбіне жеткенде Балқия ойбайлап шырқырады да қалды.

Бүлкілдеп келе жатқан Пахраддиннің көзі жұмылып, жұмылған көзінен жасы ыршыды. Аяқ буыны қалтырап енді жүгіре алсашы.

— Боздағым-ай! Азаматым-ай! — деп еңкілдей берді. Балқияның “ойбайы” ағарып атқан таңның күйқа тамырын шымырлатты. Оған сай тараптан аңырап жүгірген Дәу апаның боздау дауысы қосылды.

Етбетіпен жер құшып сұлап жатқан Бұлыштың жанына Пахраддин де жетті ырсылдап, екі иығынан дем алып. Алдымен байқағаны — көл-көсір қан Бұлыштың төнірегі. Шашын жайып Бұлыштың үстіне құлай зар илеген Балқияны қос қолдап жұлып алып былай тастады да, дереу Бұлыштың жарасына үнілді. Қаракұсы оңбай опырылыпты. Сол иығы шабылыпты. Оң жауырынын күл-талқан етіп оқ тиіпті.

— Боздағым-ай! Боздағым! — деп күніренген Пахраддин көз жасы бұршақтай жүріп Бұлыштың денесін аударып шалқасынан жатқызды да шапанын шешіп алып өліктің бетін жапты. Қабағын түйіп тістеніп қалыпты Бұлыш. Пахраддин енді байқады — Бұлыштың оң қолы жоқ, білегінен шауып түсірген сияқты қылышпен. Атаңа нәлеттер, неге өйтті екен? Әлде саусақтары қарысып қалып, мылтығын алу үшін шапты ма екен қолын?

Аңырап, боздап Дәу апа жетті бір кезде. Улап-шулап қатын-қалаш, ауыл жұрты жетті топырлап. Сол-ақ екен, Балқия ағарып атқан таңның астына қарай тұра қашты. Етінен ет кесіп алғандай құлын дауысы шығып зар қақсап безіп барады құла дүзге қарай. Жалаң аяқ, жалаң бас, ақ табаны жарқылдап зытып барады.

— Құлыным! Ой-бо-ой, үзілді ғой жұлыным! — деген Дәу апаның зор қаралы дауысы таңғы аспанға әуелеп көтерілді.

Хансұлуда ес жоқ, түс жоқ. Боп-боз боп қалтырап мына табан астында ойраны шыққан тірлікке шошып қарайды. Ұлардай шулаған халық. Тоналған ауылдың жұртында сендей соғылысқан қозы-лақ, қой-ешкі. Елеуреп қыңсылай үрген иттер. Ауылдың айбаты мен сәніндей нарлар жоқ. Аттар да жоқ.

Жау жақтан екі кісі шығын болған екен. Бірі — құм етекте жер қауып құлаған Мажанның Қапаны да, екіншісі — шөгерме бөрікті жас түрікпен жігіт.

Бұлышты ертесіне түс қайта ауылдың құбыла жағындағы дүзгенді төбе үстіне апарып жалғыз жерледі.

Бұлыш өлімі күллі ауылдың қабырғасын қайыстырып, сансыратып жіберді. Ауылдың жас-кәрісі түгел егілді. Байғұс Балқия қайта-қайта талып қала берді есін жоғалтып. Дәу апа қос қолдап белін таянып, теңселіп отырып боздаумен болды. Бір күнде шашы ағарып, шөгіп кеткендей көрінді ер пішінді кәрі ана.

Ауыл ойламаған жерден жауға шабылып, көлік, малдан айрылғаннан кейін ендігі жердегі тірлік жоспары да күрт өзгерді. Төрт-бес жігіт ауылдың құбыла жағынан Бұлыштың көрін қазып жатқанда, бір топ кісі сайланып шығып, сай табаннан құдық қазып жатты. Ауылдың кешегі бет алысы — алыс Ауған-станға әзір көшпейтіні енді балаға шейін аян болды. “Өлгенмен бірге өлу жоқ” жол дағдысымен Бұлышты тездетіп жерге бергеннен кейін: “Үйлерінді тігіңдер, осында отыратын болыппыз, әзірше” деген жарлық тарады, қатын-қалаш арасына үлкендер тарапынан. Содан жылап-сықтау азайып, жұрт жүктерін жайратып шешіп, кереге жаятын орын тегістеп шаңырақ көтеріп абыр-сабыр үйлерін қалқыта бастады. Жалғыз ғана Балқия ес жия алмады. Қоянсүйектің коленкесінде біресе талып, біресе “Бұлыш!”, “Бұлыш!” деп сандырақтап бұралып жата берді. Басын сүйеп Хансұлу отырды.

Дәу апа күңіреніп жүріп шүңкиген шұрық тесік үйінің керегесін керді. Ағайын-туыс жиылып қара жамылған кәрі анаға көмектесіп шаңырағын көтерісіп уықтарын байлап беріп жатты.

Кешкісін ауылдың бас көтерген бес-он ақсақал-қарасақалы Пахраддиннің ақ боз үйінің көленкесіне кең текемет жайдырып алқа-қотан отырып жалпақ маслихат құрды.

— Жолымызды байлап арғы жаққа жібермей тұрған Құдайдың ісі шығар! — деп, бүгінгі болған хикматты кәрілер жағы түгел Құдайдан көрді. “Ал ендігі тіршілік не болмақ?!” деген сауалға тірелді, содан кейінгі сөз жүйесі.

— Қолда бар ақша, алтын-күмісті түгел жинап, базар шығып, мал алып, ілекерлеп сол бұрынғы алған бағытымызбен Ауғанға қарай жылжи берсек қайтеді,— деген пікір шығып еді, оған қалғандары дүрсе қоя берді.

— Ау, штанымызға дейін сатып, Ауған жеткенде не абырой таппақпыз?! Жалаңбұт келген ауылдың кімге қадірі болмақ?! — десті есі барлары.

Бұл кеңестің тұсында Лабақ ахун көзін тарс жұмып басы салбырап, ерні күбірлеп, тасфих санап, бейтарап отырды.

Мәжіліс ай туа тарқады. Пахраддин бас болып ертесіне төрт-бес кісі осы тұстан Қоңыраттан гөрі жақындау түрікпеннің Көне-Үргеніш шәріне жол тартатын болды. Колхоз, артель дегенге кірмей уақытша көлік алып келісім шартпенен істейтін кәсіп іздейтін болды.

Төнірек сағым жортқан, күйын кезген қызылқия шөл. Еңсені басқан дел-сал тыныштық. Шулы дүние қайдағы бір қиян шет алыста өз арнасымен ағып жатқандай. Бұларда құм ішінде ұмыт қалған жалғыз

ауылда тірі жанның шаруасы жоқтай. Баяғыдай есігінді сілкіп ашып “салығынды өткіз!” деп діңкілдеп үйіне кіріп келетін өкімет жоқ. Тек жеті сайын сексеуіл тиеп осы ауылдың түйелі керуені ғана сағымға сініп көкжиек асып бара жатады. Жеті сайын сол керуен ғана тырнадай тізіліп сағымнан шығып келе жатады. Алыста қалған шулы өмірден хабар әкелсе солар ғана әкеледі. Бірақ қалашылар алажаздай Хансұлу күткен, сарыла күткен хабарды әкелген жоқ. Шегенің хабары еді Хансұлудың күткені. “Аманмын” деген, Шегенің жалғыз ауыз сәлемі еді. Сол сәлем ақыры күзде, қайтқан күспен бірге келді.

Ауылдың Лабақ ахун бастаған шал-шауқандарына шейін сыртқа шығып түйелі керуеннен көз алмай қарап тұр. Түгелханын көтеріп есік алдында шешесі де тұр.

Түйе үстінде жарбиып отырған қалашылар. Жол соғып, қаталап шөлдеп келе жатқан түрлері бар. Қызыл нардың үстінде көкесі — Пахраддин.

— Көтек, анау артқы түйенің үстіндегі кісі шырылдауық қайнағаға үксайды ғой!

— Жасаған ием-ау! Шәріп қой мына келе жатқан?

Хансұлу өз көзіне өзі сенбеді. Қалашылардың соңын ала баяғы бақырауық жарбайымен атасы келеді. Өзі тұрқы кішкентай кісі ғой. Жапалақтай жарбиып отыр түйе үстінде.

Лабақ ахун Шәріпті Дәу апаның үйіне алып кірді. Дәу апа боздап біраз жоқтау айтты. Шалдар құран оқып, бет сипасты. Үйде Балқия жоқ еді. “Қолында қапшығы бар, мана бір әзірде тезек теруге кеткен” десті қатындар. Хансұлу тысқа самаурын алып шықты. Самаурынға от сала жүріп ішке құлақ түреді. Шегенің хабарын айтар ма екен деп. Шалдар кем-

пірлер қауқылдасып әрқайсысы өз керегін сұрап Шәріпті ортаға алып жатыр.

— Құда, Шегеден не хабар бар? — деген шешесінің үні естілді. Хансұлу жүгіре басып кеп босағаға құлақ түре қалған. Осы арада атасы:

— Келін! Ау, келін, қайдасың? — деп дауыстады үйден. Хансұлу үй толы үлкендерден ұялып, қырындай қозғалып ішке кірді. Атасы төрде Түгелханды алдына алып басынан емірене иіскеп малдас құрып отыр екен,

— Отыр, айналайын! — деді, — Аман жүрсің бе?

Шәріп сөйдеді де дауысы бұзылып жанқалтасынан орамалын алып көзіне апарды.

— Шеге де аман... орысятқа барыпты. Хаты келді. Ор деген қаладан. Мынау хаты!

Шәріп мыж-мыж болған үшбұрыш қағазды Хансұлуға ұсынды. Одан әрі сөйлей алмай сықсыңдап жылап көз жасы алдында отырған немересінің басына тамды. Оны көріп Хансұлу да бордай езілді.

Шай үстінде Қықымбай қисық:

— Уай, Шәке, айтпақшы кәллектібіңіздің ахуалы нешік, гүділдігүтпан? — деп сауал қойды Шәріпке. Ыстық шайдан тұқшындап терлеп-терлеп сораптай берген Шәкең кекшең еткізіп басын жұлып алды, Сауал қойған кісі тілінің қотыры бар таңқы танау Қықымбай қисыққа бағжаң етіп бір қарады. Еңсесін көтерін аузына қараған шаршы топқа назарын тастап өтті. Қықымбай қисық дегенмен шиқанға тиер сауал беріпті. Маңдайының терін сүртті Шәкең. Тісі ауырғандай қабағын шытып:

— Несін сұрайсың, кәллектиптің ... атаңа нәлет Жорға түбіне жетті ғой, жетті, — деді.

— Ал?! Ие?? Сонда қалай, тарап кетті ме, “Жаңа жол”?

— Тарамағаны бар болсын... күйі кеткен соң... — деді Шәріп. — Елде мал қалған жоқ. Тартып алды, “Ашатұяқ қалмасын, Гөлощекин заңына қарсы тұру болмасын” деп ұран салып өкілдер. “Салық” дегеннің Жорға күнде бір түрін ойлап табады. Малды бітіргеннен кейін енді “тері-терсек, жүн-жүрқа, бақай-тұяқ тапсыр” дегенді шығарды әнеугүні. Берсең бергенің. Бермесен сенен жаман адам жоқ. “Жау да” сенсің, “контр да” сенсің. Қит етсең “түрмеге тығам” деп зіркілдейді. Қазір “Жаңа жолда” 16-ақ үй қалды. Жұрт кәлектіптен тағы қашып жатыр. Айтары жоқ...

— Ойпырмо-ой?!

— Аллаһ сақтағай! — деп ел күңіреніп толқып кетті.

— ...Сіздерге өтірік, маған шын, — деп Шәріп жалғастырды әңгімесін. — Анау тұрған жаман жарбай ма? Ендеше, жалғыз сол, біздің үйде мал атаулыдан қалған. Оны алған күні аштан қырылатын шығармыз.

Қықымбай қисық жылтыр қара кесе иегін уқалай отырып:

— Ау, сонда бұл, гүділдігүтпан, өкімет саясаты ма: әлде бері жағындағы Жорға тәрізділердің асыра сілтеп жүргені ме? — деді.

— Қайдан білейін... жоғарыдағылардың “шаш ал” десе төменгілердің бас алатын әдеті емес пе?!.. Әйтеуір, тонап жатыр ғой... — деп Шәріп тағы да көз жасын сүртті.

— Ау, Шәке-ау, гүділдігүтпан, дүрілдеп тұрған “белсендісіз”, неге байбаламды салмайсыз жоғарыға барып?!

Шәкенді шын ашу қысқанда аузына сөз түспей тұттығып, қылғынып қалушы еді. Қазір де көзі бадырайып шеке тамыры шодырайып аузына біразға дейін сөз түспей:

— Атасы нәлет, б... б... барғаннан бітетін болса... барып жатырмыз ғой... — деді шытырлап кейіп. — Калашников бізбен сөйлеспейді, надан көреді. Орысшасы бар көзі қаракты, тілі майда Жорғаны тыңдайды қазір. Бұл “жағымпаздың өтпейтін тесігі, кірмейтін есігі болмайды” деуші еді. Рас екен. Кеңес өкіметін де алатын болды бұ жағымпаз...

— Ау, Апанас кайда жүр? Елдің күйін бір кісі түсінсе түсінетін адам Апанас еді ғой!

— Апанастың үнін өшірді ғой Калашников. Қызметінен алып тастады айтыса бергесін.

— Е-е-е... — десіп мұнайып қалды жұрт.

Алыс жолдан қаталап шөлдеп келген Шәріп шайға қайта бас қойды. Бірауық шыныаяқтың сыңғыры ғана естіліп, үй ішінде аз-кем тыныштық орнады.

Қиқымбай қисық мырс күлді. Бір тал қыл бітпеген қара жылтыр көсе иегін сипап қойды. Сөз бағып отырғандар елең етіп Қиқымбайға күлімсірей қарады.

— Е, сіздікі, Шәке, бері жақтың әңгімесі екен ғой, гүділдігүтпан, ары жақтың әңгімесін айта ма деп отырсам... — деді.

Шәріп түсінбей Қиқымбайға тағы да ажырайып қарады.

— Ендеше мен сізге... Шәке, бір қызық айтайын, тыңдаңыз! — деді Қиқымбай қисық, жұртқа естірте дауысын саңқылдатып. Жұртқа қызық керек. Емініп, ынтыға түсті.

— Гүділдігүтпан, жақында Гәләшөкін Сталинге барыпты дейді, гүділдігүтпан, мына ми далада андай өрген көшпенді халықты көллектипке кіргізе алмай шашым ағарды деп... Сталин бір тауықты ауланың ішіне жіберіп “ал ұста!” депті Голошекинге. Голошекин олай қуып, былай қуып тауықты ұстай

алмапты. Күн суық екен. Сталин тауықтың жүнін жұлдырып аула ішіне қайта жіберген екен, жүні жұлынған тауық Голощекинге өзі келіп тығылыпты. “Қазақты қолға ұстаудың тәсілін енді түсіндің бе? депті Сталин. “Түсіндім” депті Голощекин.

— Қаска, біздің Қиекең де білгіш-ау, әңгімені тек әріден қозғайды!

— Ойбай, бері жағыңды неғылсын Қиекең. Бері жағыңның әңгімесін Байтақ та біледі, — десіп, шайға терлеген жұрт гу-гу етеді.

— Заманақыр жақындағанда һәммә йер йүзінде емге тұяқ қалмайды деп жазылған-дүр, кітапта, — деп сөз қозғады Лабақ ахун, тосыннан.

Жұрт күлкіні тиып Лабақ ахунның аузына қарады.

— Ұшқан құс, жортқан аң, судағы балық һәммәсі һарап болмақ Сонда, мұсылман баласы, лекин, бұта басында ілініп қалған бір шөкім жүнді көрсе соны отқа тұтатып исінен ләззат алар болмақ. Баяғы мыңғырған мал айдаған күндерін сөйтіп еске алар болмақ... деп жазылған-дүр...

Лабақ ахун жұрттың зәресін ұшырып Адам ұрпағының жер бетіндегі ұзақ тірлігінің зауал шағы — ақырзаман туралы құдды көзбен көріп келгендей әңгіме шертті.

Дәу апаның жыртық үйіне жиналған қауым бір етті жеп, одан кейін шұбат ішіп жұлдыз көріне тарқады.

Ертесіне Шәріп құлқын сәріден бақырауық жарбайының беліне отырып елге қайта жүріп кетті. 1932 жылдың күзі еді бұл.

Сонау Қыр үстіндегі Қарымбеттің сорынан Қоңыраттың базарына есекпен тұз тасуды кәсіп еткен ауыл еркегі үй жүзін, бала-шаға жүзін айлап көрмейтін. Өткен жетіде Пахраддин мен Қиқымбай келді. Алыста жүрген ер-азаматтарының хабарын естіп, азын-аулақ қант, шай, бидай тары сияқты сәлемдемелерін алып, қатын-қалаш дүрлігіп қалды. Хансұлу осы жолы әкесінің қас-қабағынан, салбыраңқы иығынан, аты белгісіз бір жаманшылық хабардың салқынын сезгендей шошынды. Мол келген кеудесін шалқақ ұстап, балпаң-балпаң басып жүретін әкесінің баяғы кербез қалпы жоқ. Мұқап, можайып иығы салбырап шөгіп қалыпты. Дастарқан басында да көбінесе төмен қарап, ұйқылы-ояу кісідей тұнжырайды да отырады. Еңсесін басқан бір ой бар. Оның себебін соң шешесінен есітті.

Барған сайын базарда астық қымбаттап бара жатқан көрінеді. Итшілеп сонау қырдан тасыған тұздары ішер асқа жетпей қала ма деген қаупі бар. Соны айтып “Анау теңіздің жағасында “Қызыл қайыр” деген колхоз ашылып жатыр екен, балық аулайтын, соған кіреміз бе!” — деп, Лабақ ахунға ақыл салса ахун бет бақтырмапты. “Колхозға барсаң, тізімге тұрасың, тізімге тұрғаннан кейін бірің бай, бірің кедей, бірің молда, бірің құлақ, бірің контр болып бөлінесің” депті. “Содан не істерін білмей әкеңнің шақша басы шарадай қазір”, — деді шешесі.

Арада және екі күн өтті. Жұтаған ауылдан алдымен ит кетеді екен. Тышқан аулап дала кезіп кетті ит біткен. Дәу апа бастаған қатын-қалаш жиылып қыр басында мойны салбырап күнұзын намаз оқумен отырған Лабақ ахунның алдына келді. Тірі аруақтай

қуарған ахун бет сипап халайық пікіріне құлақ тосты. Дәу апа арқасына жабысып ұйықтап жатқан немересін түсірместен, сәл еңкейіп тұрған қалпы сөз қозғады.

— Қайнаға-ау, не ойлағаныңыз бар? Бір тіршілік жасау керек шығар. Ау, жаман айтпай жақсы жоқ, күтіп отырған ер-азаматымыз келмеген күнде не істейміз? Өлеміз бе осылай?

— Осы бүгін түн шыдайық! ЕншАлла бір хабар болар...— деді ахун тақуа кейіпке еніп, сақалын тарамдай түсіп.

Түн желкемдеу болды. Айсыз. Тас қараңғы. Ауыл жатып қалған. Тынымсыз жел қозғап жабық сытырлайды. Кейде желдің екпінімен шаңырақ, уық сықырлап, үй құлайтындай кісінің зоресін ұшырады. Ұйықтап жатқан Түгелханын қымтай түсіп гүлдеген, ысылдаған, сыңсыған, ұлыған сырт дүниеге, демін ішіне тартып, құлақ түреді Хансұлу. Ұйықтаған желмен бірге қосыла шауып мына дәрменсіз ауылды аралап небір қорқау құбыжықтар жүйткитіндей. Жиналып келіп іргені тіміскілейтіндей. Борбайдан тартып жейтін өлімтік іздеп үй арасын кезетіндей. Саңылаудан сығалап мына ұйықтап жатқан қаршадай ұлына көз тігетіндей. Көз алдына жан түршіктірер суреттер елестеп Хансұлудан ұйқы қашты.

Сөйткенше, ірге жақ дүсірлеп қоя бергені.

— Апа! — деп ыршып кетті Хансұлу.

— Бісміллә! Бісміллә! Не болды? — деп шешесі басын көтерді.

— Ух, іргеде бірнәрсе жүр!

— Тышқан да, Құдай, не болушы еді?!.. Шешесі оттық тұтатып іргені айналып қарады.

— Тышқан дағы... — деді есінеп.

Ұлының шүңкиген бет-әлпетіне назары іркіліп, бір сәт жүрегі езіліп кетті Хансұлудың. Көз шарасы жасқа толды. Күшіктің мұрны, қасы, маңдайы, о жасаған ие, әкесінен аусайшы! Көрпеден шығып жатқан кіп-кішкентай аяғына еңкейіп жыбырлаған майда башайларынан сүйді еміреніп.

Түндік бауларды тысырлатып жел сыртта толассыз гүлдейді. Ағып жатқан көшкіндей. Соның табанында нәрестесін құшақтап бір уыс боп бүрісіп бұл жатыр. Қалғып барады екен әлден уақытта. Тағы да тысыр оятты. Қараса, шешесі тұрып оттық тұтатып жатыр.

— О, не, апа! — деді.

— Әкең келді ғой! — деп шешесі барып есікті ашты. Үйге мол шидем күпілі әкесі кірді. Үнсіз, бөркінің астынан жағын орамалмен байлап алыпты, тісі ауырған кісідей. Жүзі түтігіп домбығып іскенге ұқсайды. Етігі шаң-шаң.

— Көкесі, аман келдіңдер ме? — деп, шешесі бәйек болып әкесінің қолындағы қоржынды алды.

— Келдік қой... — деді әкесі әрең сөйлеп, қабағын шығып.

— Көп кешіктіңдер ғой... — деді шешесі. Әкесі сөйлеуге зауқы жоқ, басы ауырып тұрғанға ұқсайды.

Сырға шалының отыра калып, етігін тартты. Пахраддин сөзін үзіп-үзіп, қабақ шыта отырып хабарын айтты.

— Тұзымыз өтпей, өтсе де ол-пұл алуға жетпей... айналып калдық. Бидай тұрмақ жүгерінің өзі қат базарда. Кіләсі 2 сомға көтерілді. Тұз сатып мандытпайтын болғаннан кейін, әнеугі тай-тұяқты өткіздім, бір өзбекке, 3 кілә жүгеріге. Анау қоржындағы сол, — деп Пахраддин демі дірілдеп шекесін ұстады. Сырға лып түрегеп барып ерінің басын уқалады.

— Қыр елі шұбырып, қалаға құйылып жатыр... .
Аш-жалаңаш... Өлім-жітім де жоқ емес...

Хансұлу қара шәйнекке су құя бастап еді, әкесі шай қойдыртпады, жатып дем аламын деп. Сырға төсекті кеңейтіп салды. Пахраддин ескірген шидем күпісін шешіп жатып:

— Асасы, азанмен қозғалармыз... — деді. — Жағаға қарай... Заманның түрі жаман...

Сырға ерінің басын сүйеп жастыққа жатқызды. Шамды сөндірді.

— Демінді ал, ұйықта! — деп, ерін айналып обектеп жүр.

Хансұлу “қозғалармызы” қалай деп таңырқады.

Ауылда тұқымдыққа түйе жоқ, немен көшеді. Әр үйде бір-бір есек, кейбіреуде ол да жоқ, сонда қалай қозғалмақ?

Әкесі таңертең үйдің ортасына от жақтырып, тонға оранып, маңдайын отқа бере отырып терлеп шай ішті. Сөйтіп отырғанда Лабақ ахун кірді. Қолында аса таяқ. Сөзге сараң. Төрге шығып, ерні күбірлеп әлдебір батаны шапшаң оқыды да көзін жұмып бет сипады. Ақ сақалын тарамдап біраз үнсіз отырды. Ой-қиялы дүниені шарлап жүргендей. Пахраддин де үнсіз, еңсесі салынып тонға оранған күйі Сырға бәйбіше күйған ыстық шайдан сораптап отыр.

— Ә-ә-ә, — деп ахун іште булыққан ойын сыртқа шығарғандай көзі жұмулы қалпы бас изеді. — Кейін қарай қайтудан басқа амал қалмады де?!

— Қалмады, — деді Пахраддин.

— Ә-ә-ә, — деп, жауапқа қанған Лабақ ахун, ұзақбас шұлғыды. Содан кейін, қалай келсе дәл солай, қолында аса таяғы, басында ақ сәлдесі ұзын боз шапанының етегі жер сызып тік басып есікке беттеді.

Бү кезде көрші-қолан сыртқа шыға бастаса керек. Әңгіме, дабыр, қатындардың шаңқылдаған үні, жылаған бала дауыстары естіле бастады сырттан.

— Бү Құдайдың күні де не жаумады, не қоймады...— деп, Сырға бәйбіше ашық түндікке, аспанға қарады. Таң атса да жел әлі басылмаған еді, аспан таза емес, шағырмақ тартып тұр. Пахраддин кесесін төңкеріп, сүлгімен терін сүрте отырып:

— ... Тек керек нәрселерді алыңдар! Көрпе-төсек, қазан-табақ, киім-кешек дегендей. Қалғаны қалсын. Бір есекке не сыймақ? Ана дорбаны алып берші, — деді Хансұлуға керегенің басын нұсқап. Керегенің басында қара мақпал дорба ілулі тұрған. Дорба ішінде Пахраддиннің өзі қолымен талай жыл жазып толтырған ескі шежіре дәптерлері бар тұғын.

Ол дәптерлердің ішіне не жазылған? Ол жайлы Пахраддиннің ең жақын деген адамдары да білмейтін. Жазатайым: “Мынауыңыз не?” деп сұраған жанға “Шежіре ғой, тарих қой...” деп қысқа ғана жауап қайыратын.

Әкесінің сол қара дорбасын Хансұлу кереге басынан алып берді. Пахраддин асықпай сарғайып кеткен дәптер беттерін парактап үнсіз толғанып біраз отырды. Ала қоржынға кесе-аяғын орастырып тыққыштап жатқан Сырға, көрпе-төсекті жинауға кіріскен Хансұлу да отағасының мына аласапыран таңда ала қағазға үңіле қалғанын оғаш көріп жалтақтай береді, “Бұнысы несі?” дегендей.

Араб әрпімен әдемілеп жазылған ақ сары парактарды аударыстырып, төңкерістіріп отырды да Пахраддин, кенет, дәптерді ортасынан “дар” еткізіп айырды. Қақ айырылған дәптерді додасын шығарып жыртты да ошақтағы отқа бір-ақ атты. Қағаз лау етті.

Хансұлу да, Сырға да тұрған жерлерінде сілейді де қалды. Пахраддин кара дорбадан құтылуды ойға алған беті бар.

Аздасын Пахраддин тысқа шықты. Дала ызғыған жел. Жаяу шаңыт іргенің құмын суырып, онсыз да қиюы қашқан тірліктің ұсқынын кетіріп-ақ тұр екен. Ауыл арасы сапырылысқан қатын, бала-шаға. Түйіншек, кәкір-шүкірлерін сыртқа шығарып жол жүруге қамданған қым-қиғаш қарбалас. Бұл көшудің кескін-келбеті бұл елдің бұрынғы көшулерінен бөлектеу еді. Бұл көшу — көшу емес, көтергенді қолға алып үй-орман, жиған-тергенді айдалаға тастап қаңғу еді. Ыпындары кеткен кәрі-құртаң, аш-жалаңаш бала-шағаның кеспірлері соған келеді. Кеше қала жақтан келген бұл ауылдың Пахраддин бастаған ер-азаматтары тарығып отырған қатын, бала-шағаларына бұл шұбырындының сыр-сипатын жұмсартыңқырап айтқан. Сонау дария бойында Қазақстаннан өкілдер келін жатыр-мыс. Мақсаттары — осы ауыл тәрізді коллективке кірмей ата жұрттан ауып кеткен, ашаршылыққа ұрынған бөлшек-бөлшек ауылдарды жинау-мыс. Дария бойына жинап кемеге салып сонау кең байтақ қазақ жеріне қайтару-мыс. “Көшпелі елдің ата мекеннен безініп түс-түсқа бытырып кетуі — жергілікті белсенділердің асыра сілтеуінен, коллектив жөніндегі партия саясатын бұрмалауынан” деп Сталин Гөләшөкінді қатты сынға алыпты-мыс. Содан Қазақстан өкіметі өкілдер жіберіп, Қытайға, Иран, Ауғанға, көршілес орыс, өзбек, қырғыз, түрікпен, қарақалпақ жеріне лықсып жатқан ауылдарды ірку, кейін қайтару мақсатында-мыс.

Үй-орманын, жиған-тергенін жапан дүзде қалдыратын сәт туғанда қатындар жағынан ши шыға бастады.

Бұндайда Қиқымбайдың үйіндегі Қатира келінінің “көш бастайтын” әдеті ғой. Есектің үстіне сыймай жатқан түйіншектерін түйгіштеп:

— Осы біздің еркектерде бас жоқ, түге! — деп бастап, соңын айқайға ұластырған еді бір кезде. — Бүйтіп қайта күйсейтіміз бар, әу баста неміз бар еді кәллектиптен қашып? Ау, сірә, қайтып баратынымыз бар, ел ішінде неге отыра бермедік, түге?

— ...Өшір үніңді, атаңа нәлет! Өшір! — деп жатты Қиқымбай әйеліне тап-тап беріп.

Қатира келіннің әлгі айқайы Пахраддинге ғана айтылған қарғыстай, лағынеттей еді. Сұр жебедей жанына қадалып етінен өтіп, сүйегіне бір-ақ жетті. Одан арғы ауыл арасының у-шуына құлақ тоспады. Ұяттан беті өртеніп, салпы етек қатынның шайпау тілі жанына камшыдай батып, иттей қорланды. Сырға мен Хансұлу сыртқа шығарған қос қапшық, көрпелік, аяқ-табақ салынған ала қоржынды да салды. Сұр есектің арқасы соныңмен сықап толып қалып еді. Бұдан артық нәстенің сыймайтынын көре тұра әйелі мен қызы күйбендеп үйден шығар емес. Оларға салсаң тіпті нәрсе тастағысы жоқ. Пахраддинді бір ыза буып тұр. Талайдан қақпақылдап әкеп осы тығырыққа таяған тағдыр сұрқылтайға ма, әлде кеш қимылдаймын деп кеңірдегінен дұзаққа ілініп тұрған өзіне ме, әлде болған істі тек біреуден көретін Қатира тәрізділерге ме, әйтеуір, бір бунаған ыза бар. Шарасыздық ызасы. Осы кезде Пахраддиннің өңі қабарып сақал-шашы түгел қырау шалғандай еді. Әйелі мен қызы оны аңғарған жоқ. Ана нәрсені бір ұстап, мына нәрсені бір ұстап үйге кіріп-шығып жүйткіп жүр. Сөйткенше, Сырға бөйбіше:

— Ой-бұй-и, көкесі-ау! Қазанды ұмытып барады екенбіз ғой!— деп есік алды жерошақтағы дәу қазанға қарай ұмтылды. Қызы да жүгіріп барып үлкен қара қазанның бір жақ құлағынан ұстады. Пахраддин дәу қазанды көтеріп дедектеп келе жатқан әйелі мен қызына қарап шатынап тұр. “Қазанды таста!” деп айтуға тілі барар емес. “Алайық!” деуге сұр есектің арқасына сыяр емес.

— Сыймас... — деп, сыпайы айтып еді, әйелі мен қызы естімеді. Қара қазанды түкшындап көтеріп әкеле берді жанына.

Сол-ақ екен талағы тарс айрылды Пахраддиннің:

— Таста!!! Сыймайды! — деп ышқынып дауысы шығып кетті. Пахраддин “Пахраддин” болғалы осы шығар бала-шағаға айқайлап тұрғаны. Қызы мен әйелі шошып кетіп, қара қазанды түсіріп алды қолдарынан. Ондері қашып кеткен.

Пахраддин түсі түтігіп, теріс бұрылды. “Ө, шұнақ Құдай! Шұнақ Құдай! Көрсетпегенін осы ма еді? Осы ма еді маған!” деп іштей күңіреніп, бұлыңғыр лайсаң көкжиекке қарап жыларман боп өксік атты Пахраддин. Бірақ көзінен жас шықпады. Тұл дүниедей бұ да қаңсып қалыпты. Құлағында — ысылдаған жел.

— Болыңдар! — деді, өзі не істерін білмей әуре-сарсаң сенделіп.

Біраз жұрт есектерін алдына салып айдап, ұбырынып-шұбырынып жолға шығып та барады. Қырық жамау жұпыны үйінен байғұс Дәу апа шыға алмай жүр айналсоқтап. Құлақ тосса үйінің ішінде сәмпылдап ол да біреуді тілдеп жүр. Көліксіз үйдің бірі осы Дәу апанікі еді.

— Әкел ана Дәу апаның жүгін! — деп Хансұлуды жұмсады. Дәу апа екі-ақ түйіншек нәрсе алған екен

жолға. Бірінде кішкентай қазаны бары байқалады. Сол екі түйіншекті салды сұр есектің беліне. Дәу апа үйіне қайта кіріп кеткен, бір кезде дауысы шықты саңкылдаған:

— Қасқа Құдай, менің сорыма бұ қатынды да ауыртып қойды ғой!.. Енді қайттым?! — деп, үйінен шығып келеді. Ізінен немересі жылап жүгіріп қалмай келеді.

— Пахраддин-ау, енді не істедім? Ана ауыш келінім жүретін емес. Жәй айтсам түсінбейді. Қатты айтсам жылайды. Енді қайттым, тақа?!

Пахраддин Хансұлу мен Сырғаға бұрылды.

— Алдастырып алып шығындар? — деді.

Шашы бұрқырап керегені тас қып күшақтап теріс карап бүрісіп отыр екен үйінде Балқия. Есіктен кірген Хансұлу мен Сырғаны көріп одан бетер жиырыла түсті. Үстінде жыртық иық ескі көйлек. Хансұлу: “Мен сойлесіп көрейінші...” деп, Дәу апаны, шешесін сыртқа шығарып жіберіп үйде оңаша қалды. Балқияның қасына келіп тізе бүкті:

— Балқия, — деп иығына ақырын қол салып еді, Балқия дір етіп жалт бұрылды. Көзінде сана жоқ. Танымай тұр.

— Хансұлумын ғой мен!

Балқия енді есіктің маңдайшасына қадала қарады. Хансұлу бешпетінің қалтасынан айна, тарақ алып алдына қойды. Айна, тараққа назары ауды Балқияның. Бұрын да өстіп алдаусыратып, талай рет басын жуып беріп, шашын тарап жүрген ғой.

— Әкел... шашынды тарап берейін! — деді Хансұлу Балқияның енді икемге көнетінін сезіп.

Аздасын Хансұлу Балқияны қолынан жетектеп үйден алып шықты. Бұл кезде, бұлардан басқа тірі

жан жоқ, ауыл құлазып қаңырап бос қалған еді. Иесіз қалған үйлердің арасында шаң борасын сумаң қағып күлді ұшырып қағаздарды қуалайды.

Шұбырып, жаяу-жалпылап бел асып бара жатқан жұрттың артын ала бір топ болып жүк тиелген сүр есектің соңына еріп, Пахраддин, Дәу апа, Сырға, Балқия, Хансұлулар қозғалды.

Шұбырған қауым мен ауыл арасында бір үйір ит селтең қағады. Тышқан аулап қаңғып кетіп, қайтып келген ауыл иттері. Адамдардың тайлы-тұяғы қалмай ауылды тастап әлдеқайда бет алғанын көріп бұ пақырлар дал. Не істерлерін білмей жұрт соңынан бүлк-бүлк ере түседі де іле тоқтап, шақиып отырып, қалып бара жатқан ауылға қарап қыңсылайды. Ұлиды.

Шаң суырған желге қырындай қозғалып келеді Пахраддин. Бұта біткенді теңселтін өтіп жатқан ұлы көшкін тозаңға әлдебір гуіл қосылып бүкіл дүние зор күңіреніп тұрғандай. Бір хикмат, әлемді астан-кестен етер бір хикмат бас көтеріп келе жатқандай. Күн көзін кіреукелеген шаң перде, мына жарық әлемді көлеңкелеуге бет бұрған. Аспан қызыл мұнарттанып қиямет-қайым хабаршысындай азынау жел сарнайды. Түзде қалған ұядай иесіз қаңырап қалып бара жатқан үйлерге, жұртта қалған иесіз жетім ауылға қарауға Пахраддиннің дәті шыдар емес. Енді не де болса көзді жұмып, алға, тек алға тарта беру керек еді.

Әйелдер жақтарын жаулықпен таңып алған.

Ауылдан шыққан жол алғашқы көлденең құм-шағыл белге көтеріліп әрі асар тұста, алдарақта, ауыр қозғалып демігіп келе жатқан мол денелі Пахраддин маңдай терін сүрткіштеп сәл іркілді. Бірақ кейін карамады. Түйілген әлі сол тұйық қалпы.

Ізіне ерген әйел, бала-шаға осы жерде түгел бұрылып, лажсыз кейін қарады.

Орасан шалқар ойдым-ойдым күм өлкесінің ортасында аядай алаңға үрке ұйлығыса сығылыса отырған ауыл. Есік, түндіктері жабулы томпиған қоңыр үйлер, тападай-тал түсте жетім қалған жазықсыз үйлер. Шаныт дауыл бүркеп алған ауыл үстін.

Балқиядан басқа әйел біткеннің бәрі бырсылдап жылауға кірісті. Сырға бәйбішенің көзіне кең бүйірлі ақ боз үйі мен есік алдында ноқаттай қарауытып қалып бара жатқан қара қазаны, әсіресе, оттай басылды. Ыстық жасы бетін жуып, дауыс етуге Пахраддиннен қорқып жаулық ұшын тістелеп үнсіз егілді.

Дүзген, қараған бастарын жұлқылап толассыз боздаған жел сарыны Пахраддинге бір сәт аспан асты жер үстін керелеген әйел зарына ұқсап кетті. Содан тұла бойы түршікті. Көздерін жаспен шылап, бырсылдап жылауға кіріскен мына төрт-бес әйелдің бетіне туралап қарай алмады. Қолындағы жыңғыл шыбықпен:

— Шу! — деп, құлағы салпыып мүлгі қалған үлкен сұр есектің сауырынан ызаланып тартып жіберді.



ҒАРАСАТ МАЙДАНЫ

1

Аспанда күн тұтылғандай. Лабақ ахун көп айта-тын “ғарасат майданы” басталғандай. Көзі жас, көңілі пәс Хансұлу құмсақ жолменен ілбіп келеді. Арқасында — бөпесі. Артта, бел астында моладай қаңырап ауыл қалды. Алда — шаң буып мұнартқан беймағлұм көкжиек. Белгісіз тағдыр. Бұлар жаяу-жалпылап шұбырып келеді. Алыстан, арқа тұстан жұртта қалған иттердің созылтып ұлыған үндері естіледі. Жаманат хабаршысындай аспан астын құлазытып күңірене ұлиды. Хансұлу енді бұрылып кейін қарауға жүрегі дауаламады.

Сәскеге көтерілген күн көзі шағырмақтанады. Шөл даланың әр тұсынан шаңыт бүркылдайды. Бұта біткен боздап уіл салады. Көзге қиыршық құм ұрады. Жалпақ дүние бір уыс тарылып тұр. Бір ғаламат қалайда басталды. Жүрегі қалтырап қорқып келеді Хансұлу.

Құмайт шағыл аралап ирелендеген аяқ жолменен үздік-создық шұбырған ел. Жыңғылды алаптан ете бергенде жол жиегінде біреудің ағаш сандығы қалды аузы аңкиып. Жақындай бере таныды, Күлзипаның кара кебежесі екен, әспеттеп төрінде сақтап жүрген.

Жол шетінде жатқан әшекейлі сүйекті кара кебежеге бұлар бір-бір қарады да жұмған ауыздарын ашпастан өте берді. Не әкесінде, не шешесінде, не Дәу апата тіл қатуға деген құлық болмады. Жалғыз ғана, арқасындағы Түгелхан шыдамады, сұқ саусағын шошайтып:

— Ап! Ап! — деп кебежені көрсетті.

Хансұлу соң білді. Күлзипаның көрі әкесі бар еді, аузы ұрадай опырылған. Сол шал жүре алмапты. Күлзипа сол әкесін есекке мінгізін, қара кебежесін лақтырған екен.

Ұзақ жүрте шама қайда, іркіс-тіркіс шұбырған жұрт түске таман жолшыбай кездескен шоқ жыңғылдың арасына кіріп ығын паналап шоғырланып іркілді. Жүктерін түсіріп, төңіректен шөпшек жиып, бықсытып әр жерден от түтетті. Шәугім-шәйнектеріне су толтырып отқа қойды. Жұрттың соңын ала жеткен Хансұлулар да іркілді. Жыңғылдың түбіне жүк түсіріп, ықтасынға алаша жайды. Әр бұтаның түбінде түстенгелі жатқан бір үйлі жан. Ескі дағдымен түскі ас қамына кірісіп жатыр. Айтудың құмында отырғанда Хансұлу сығандардың тобырын көргені барды. Қазіргі мына шұбырған елдің жыңғыл арасына кеп түстеніп жатқан кейіптері дәл сол сығандардан аумай қалыпты.

Қыз-келіншек, қатындар әр жерден бықсытып от жағып, шәугім көтеріп жатса да танауға бәрібір ет иісі, сорпа иісі келмейді. Содан болуы керек, қатындардың шаңқылдап бала-шағаға ұрысқан ашы үндері жиі естіледі.

— Қағынды келгір, әрі тұр, отқа түсе-ай мына қояншық! — деп жатыр Қатира ошақ басына емінген балаларын қарғап-сілеп.

— О, шұнақ Құдай! Шұнақ Құдай! — деп бір қатын зарланып, Құдайды қарғыстың астына алып жатыр.

Желкем күн ашық аспан астында Хансұлу жайған шағын дастарқанды қоршап, екі үйдің төрт-бес жаны қуырылған жүгері, зағра нан, ақ су шайға апақ-жапақ бас қоя берген. Сөйткенше Дәу апа дауысы дірілдеп:

— Ой-бұй, жазған-ай! — деді. Сөйтсе, бөлек-бөлек дастарқан басында отырып қалған жұртшылықты аралап, қолында тостағаны бар бір бала келеді екен. Майлыбай мүсәпір деген бар еді. Қой аузынан шөп алмас, момын еді. Бала-шағасы тоғыз ба, он ба, көп болатын. Ас-суы таусылатын реті бар еді пақырдың. Қайыр сұрап келе жатқан соның баласы екен.

Әркім дастарқанынан бір нәрсе шымшып алып баланың созған тостағанына салып жатты. Кейбіреулер көзін алартатын болуы керек, бала жылыстап өте береді. Қолында жамаулы тостағаны бар, жалаң аяқ, жалаң бас, бұтындағы дамбалы өрім-өрім, он екілер шамасындағы ер бала бұлардың жанына қелді. Жазған баланың назары төменшектеп, кісінің бетіне тура қарай алмайды. Төмен қарап тостағанын созып тұр.

— Ау, жақындау керек! — деді Пахраддин, дастарқан үстінен бір уыс қуырылған жүгеріні ұсына беріп. Бала үрке басып жақындады. Пахраддин тостағанға үңіліп қарады. Тостағанға Хансұлудың да көзі түсті. Баланың бүкіл ауылдан манадан бері жиған тары, жүгерісі бір уысқа да жетпейді екен.

— Манадан жиғаның осы-ақ па? — деді Пахраддин, танауы шуылдап өз көзіне өзі сенбегендей.

Бала бас изеді.

Пахраддин Сырғаның тізесінің астында жатқан шүберек қалтадан және бір уыстай жүгері алып, баланың тостағанына тастады. Бала ұстап алатындай шапшаң бұрылып бүлкілдей жөнелді. Сырға шаршаулы назарын отағасыға қадап, сәл қабақ шытқандай болды.

Пахраддин бәйбішесін түсінді. Түсінді де шарасыз күй кешіп:

— Е-е! Е-е -е!!! — деп ауыр бір күрсінді. Еңсесі күрт түсіп ойға кетті.

— Әнеки, тағы келеді, таратып бер, енді мына қалған бір уыс бидайды да!.. — деді Сырға. Ақырын айтса да күйініп айтты. Пахраддин басын көтерді. Қараса жетім қозылардай жан-жақтан өріп келе жатқан өңшең жоқ-жітік балалар.

— Ей, қарақтарым! Қайда келесіңдер ентелеп, түге?! — деп қалды зор дауысты Дәу апа. Балалар үрпиісіп тоқтай қалды.

— Келіндер! Келіндер! — деді Пахраддин. Дауысы қатқыл.

— Көкесі-ау!.. — дей беріп еді Сырға, Пахраддин:

— Жә, доғар! Өлсек бірге өлдік! Осы нәрестелердің жанынан артық емес менің жаным! — деді ширығып.

Әңгіме осымен бітті. Пахраддин әр баланың жайған алақанына бір-бір шөкім бидай салып жатты.

Осы жұртта Күлзипаның кәрі әкесі үзілді. Үн шығармай тез жерледі оны ел. Түс ауа тағы шұбырды.

...Хансұлудың бір қорыққан адамы Балқия еді. Бұрынғы күйіне басса, кез келген уақытта, басы ауған жаққа тұрып жүре беруі керек еді. Жоқ, Балқия өйтпеді. Жетекке ерген ботадай томпаңдап қалмай келеді қатардан. Жат қылығы болмағаннан кейін Дәу апа да, Хансұлу да оны аңдуды қойды. Бірақ қызықты қараңғы түскесін көрсетті Балқия.

Іркіс-тіркіс шұбырған ел түс қайтқасын да екі-үш бел асқан. Кеш түсе қойселеуі молдау күмсақ бір шағылды қоналқыға таңдап іркілді. Есектерді жайылсын деп селеуге арқандап, оздері шөпшек жинап от жағып, жүктен ықтасын жасады. Айсыз қою қараңғы түнде шағылдың түс-тұсынан от лапылдап, адам қыбырлап төбе үсті пері қонғандай құжынап жатты.

— Ойбүй! — деді бір кезде от жанында отырған Дәу апа, орнынан түрегеле беріп. — Құдай безгелдек, келін қайда әлгі?!

Бұлар жүктерді шешіп жұмсақ құмның үстіне төсек жайып күйбендеп жүргенде Балқия жандарында сияқты еді.

— Балқия! — деп дауыстады Дәу апа. — Балқия-ау-ууу?!

Тым-тырыс. Пахраддин бастап бәрі түгел өре түрегелді. Оттан қашықтап түн ішіне таман барып, бәрі қосылып: “Балқия! Балқия!” деп айқайға басты.

Аспан бұлтты. Көзге түртсе көргісіз қараңғы. Хансұлу отыра қалып үңілді көкжиекке. Не көп, жан-жақта бұталы шағылдар көп. Кенет түн түкпірінен сықылықтаған әйел күлкісі шықты. Хансұлудың тұла бойы түршігіп кетті.

— Мына жақта! — деп әкесі далпылдап тұра жүгірді түн ішіне қарай. Әлгі есалаң күлкіден кейін Хансұлу қостан көп ұзауға қорықты. Пахраддинмен бірге ауыл еркектері де кетті дүрсілдеп жүгіріп.

Балқияны қуған кісілердің айқайы түн ішіне қарай кем-кемдеп ұзай берді.

Хансұлу шешесі екеуі түн жамылып бірауық тұрып кейін қайтты. Түнгі даланы бастарына көтеріп, қанша айқайлағанмен бұл түні Балқия таптыртпады. Таң сәулесі жерге түсісімен сүр есектің беліпе отырып Пахраддин Балқияны іздеп кетті. “Ашыққан елді іркуге болмас, алға қозғала беріндер!” деп тапсырды Лабақ ахунға. Дәу апа, Хансұлу, Сырға бәйбіше жүктерімен осы шағылдың басында күтетін болды Пахраддинді.

Пахраддин із кесіп әлектеніп жатпады. Кешегі келген жолға түсіп ескі жұртқа қарай тартты. Көп

ұзамай жерге жарық түсті. Күн шықты. Таң алдында ғана сәл-пәл сіркіреп өткен жаңбырдың иісі бүрқырайды. Топырақ, жас шөп иісі кеңсірікті жарып барады. Сеңдей соғылысып алажабыр бұлт көшін жатыр аспанда. Жалғыз аяқ жолға көп ұзамай Балқияның да ізі келіп қосылды. Балқия жолменен жалаң аяқ ызғып тартып отырыпты. Тіптен кідірмепті. Бүлкілдеп жүгіріпті әлсін-әлсін. Пахраддин да аямады есекті. Ызғытып айдап отырды. Содан екінді әлетінде ғана жақындады кешегі іркіліп өтетін көлденең белге. Оған шықса ескі жұртта қалған ауыл көрінеді.

Сүр есек мамырлап құмсақ белге тырмысып шығып келеді. Осы арада Пахраддинді бір сезім биледі. Күтпеген сезім. Ол — жұртта қалған ауылға қараудан сескенген, белгісіз үрей еді. Қайта айналып келмеуі керек еді жұртқа, қанырап қалған қара шаңырағын көрмеуі керек еді.

Есегі, сойтсе, асудың үстіне де шығыпты. Есектің аты есек емес пе, иесіз ауылға қарап құлағын тіктейтіп ал кеп ақырсын.

Құм арасы қазан шұқыр ойпанда үйректің жұмыртқасындай томпиған қоңыр үйлер. Есектің дүниені көшірген дауысынан кейін сыртқа адам қара жүгіріп шығатындай қарай қалды Пахраддин. Бірақ ауыл селт етпеді. Жабулы есіктер жабулы күйінде тұра берді. Қаңғыбас құйын ғана шайқақтап жер ошақтардың күлін көкке ұшырып ауылды аралап өтіп барады.

Шағыл төбенің басындағы Бұлыштың томпайған жалғыз моласына қарай бүрды есегін. Жан-жағы да қоршалмай, басына қадау ағаш шаншылған жалғыз ғана төмпешік боп жатыр баяғы Бұлыш. Есіл Бұлыш.

— Боздағым-ай! Есіл азаматым-ай! — деді есегінен түсе берген Пахраддин. — Сен бар екенсің ғой! Сен жатыр екенсің ғой!

Пахраддин жүресінен отыра калып көз жасы бетін жуа отырып, аят оқуға кірісті.

Жануар сұр есек иесінің мына тосын халін түсінбей құлағы салпыып тұра берді.

Әлден уақытта Пахраддин көзін сүртіп тізесінің құмын қаққыштап орнынан түрегелді. Байқаса, моланың төңірегінде Балқияның жалаң аяқ ізі жатыр. “Өй, антұрған-ай!” деп еңсесін тіктеп таң қалып жан-жағына көз жіберді. Кенет көзі анадай жерде шок дүзгеннің тасасынан сығалап тұрған келіншекті шалып қалды. Сол-ақ екен Балқия жалт берді.

— Балқия! Өй! Қашпа! Өй! — деп Пахраддин тұра ұмтылды кеп.

Балқия байғұс қобырап тарқатылып кеткен шашы арқасында лықсып, ақ табаны жарқылдап зытып барады, тап-таза құм бетімен. Үстінде өрім-өрім ескі бөз көйлек, тәңір алғырдың тоқ балтыры жарқ-жүрк етеді.

— Ай! Хай! Ұрып кеткен, тоқта! — деп аяғында етігі, үстінде шапаны жүгіре алмай қорбандап келеді Пахраддин. “Тәңір алғыр, жабайы болып кеткен бе, киіктей жүйткуін!”. Балқия артына жалтақ-жалтақ қарап қойып қайқайып тартып барады.

— Балқия! Сәл кідірші, айналайын! Балқия! — деп айқайлап келеді Пахраддин. Бірақ жалаңаяқ есалаң келіншек сөйткенше қыр асып та кетті. Пахраддин жүгіре алмады. Демікпесі ұстап ырсылдап қалды. Кеудесін әрең сүйреп сусыма құм төбеге де көтерілді-ау итшілеп. Қайда, бұл кезде Балқияның әлдеқашан қарасы батқан-ды.

— Қап, мына бейбақтың азабы-ай! — деді, төбе үстінде іркіліп, ұшы-қиырсыз шалқар құм әлеміне көз жіберіп тұрып. Қайда қарасан да жал-жал құмдар.

Балқияның ізіне түсіп сөлпектеп жүгіріп және бір төбеге шықты.

— Бұ қараң батқырдың қарасы қайда батты? — деді күйініп. Сөйтіп, тұрғанда есегі ақырды, манағы қалған тұстан. Бұрылып караса, тұсаулы есегі ары қарай шапшып секіріп қашып барады. Оның ізінен ит пе, қасқыр ма, әйтеуір, бір қос көлеңке тақымдап қуып барады. Бұл ес жиып үлгіргенше, есегі сол ытырынып қашқан күйі ойпаңға құлап көрінбей кетті.

Пахраддин есенгіреп сәл тұрды. “Қасқыр!” деген ой сап етті басына. Сол-ақ екен, тұла бойы мұздап қоя берді. “Бұлар қайдан тап болды?” Сөйтсе, байғұс есек мана ақырамын деп басына пәлені шақырған екен ғой. Тұу, атаңа нәлет, енді көрмегені осы еді! Балқия болса құрыды құм арасына тастай батып, судай сіңіп. Өзінің тұрысы мынау сөлпиіп. Бұ кезде қос қасқыр сұр есектің кеудесін үңгіп жеп жатқан да болар. Есекті жайғап болып, атойлап қос қасқыр сайдан шыға келсе не істемек? Пахраддин ауылға қарай елпең қақты.

Ырсылдап борша-борша терлеп қоя берді. Бойынан әл кеткендей. Үйлерге дейін жүгіре алатын шамасы жоқ. Жөнді ас ішпегендіктен болар, көз алды қарауытқа береді. Аяғы да ап-ауыр, ырқына әрең көнеді.

Ауыл отырған аңғарға құлады. Қаңырап жетімсіреп тұрған үйлер. Қылт еткен тірлік нышаны жоқ. Жымжырт тыныштық. Жалғыз-ақ өзінің аяқ дүрсілі дүниені көшіріп келеді.

Шетте тұрған Қикымбайдың үйінің есік алдына ырсылдап жақындай бергені сол еді, кенет іргеден

тоқтыдай бір нәрсе ытқып шығып бажылдап тұра келе кашсын. Тұу, атаңа нәлет, балпақ тышқан! Өмірінде бүйтіп қорықпаған шығар. Иманы тас төбесінен шықты. Үйдің іргесінен шырқырап шығып және екі-үшеуі безді. Аяғының буыны ұстасыншы енді. Тышқан жайлап кеткен мына иесіз үйге кіру, қасқырдан да қорқынышты еді. Көзіне тер құйылып басы айналып теңселіп Дәу апаның жұлым үйіне қарай өте беріп аяқ астындағы жер ошаққа түсіп кетіп өнбай құлады. Қолымен жер таянып түрегеле беріп, басына бір ой келді. “Біткен жерім осы екен” деген ой. Шалғайының күлін қағып буын-буыны қалтырап әрең тіктеліп Дәу апаның қауашадай үйіне қарай тәлтіректеп аяқ басты. Одан сәл әрі есік, түндігі түмшалаулы өз үйі. Есік алдында төңкеріліп жатқан дәу қара қазанның төңірегін тышқан қазып тастапты. Жоқ, өз үйіне өлсе жолагысы келмеді. Дәу апаның үйінің есігі сыртынан байланбапты. Ашық есікті ашып, ішке бас сұғуға келгенде Пахраддин тағы жүрексінді. Үй ішінде әлгіндей азынаған балпақ тышқандар толып жүргендей елестеді. Найсап, неткен жиіркенішті мақұлықтар еді!.. Ақыры, лажсыз ішке бас сұқты. Қаракөлеңке үй ішінде еш нәрсе байқалмайды. Сәл тұрып ішке кірді. Көзін жұмып теңселіп біраз тұрды үй ортасында. Ес жинады. Қаракөлеңкеге көзі үйреніп үй ішіне назар қыдыртты. Тірілей молаға кіргендей түршікті жаны. Адам кеткен үйде не жылу, не ұсқын болсын. Әйтеуір, қаңқиып тұрған бір қуыс.

Төрде алашаның үстінде қырық құрау ескі көрпеше қалыпты. Сықырлауық есікті іштен ілдіріп әлгі көрпешенің шаңын сілкіп торге қайта төседі. Соның үстіне отырды. Шаршаған, әлсіреген денесі ұйып,

тыныш демалыс аңсайды. “Тынығайын, көп ұзамай күн батар, атасына нәлет, таңазанда-ақ жүрермін” деді ойы. Сыртқа құлақ түріп қалжырап жатып көзі ілініп кеткенін де байқамады.

...Түннің біруағында оянды. Тұла бойы тоңазып қалған екен. Түндіктің жыртығынан жайнап жұлдыздар көрінді. Үй іші қараңғы. Бірақ жүрегі неге екені белгісіз, дүрс-дүрс соғады. Қорқыныш бар бойында. Қартаяйын дегені ме, қорқа бергені несі? Сол-ақ екен, назары көлеңке ұйыған есік тұсқа іркілді. Жабық есіктің әрі жағында әлдене жасырынып тұрған сияқтанды. Пыс-пыс тыныс алғанын анық шалды құлағы. Дереву төңірегін қарманды. Түнде шешіп жатқан етігі ілінді қолына. Есіктің бармақ сиғандай саңылауынан бұған қарап бақшиған жалғыз көзді көріп қалды. Содан:

— Ай! — деп, ақырып айбат шегіп, қолындағы сыңар етікті есікке қарай жіберсін. Есік жақ сатырсұтыр етті. Бұны аңдыған жын ба, пері ме, әйтеуір, бір пәле апыл-ғұпыл тұра келе қашты.

— Айт! — деп тағы ақырды Пахраддин бұ жолы орнынан ыршып түрегеп. Мақұлықтың аяқ дүрсілі ұзап бара жатты кем-кемдеп.

— Астапыралла! Я, пірлерім!.. — деп Пахраддин жатқа білетін аяттарын бірінен кейін бірін шұбыртып жатыр. Ұйықтау қайда енді? Тар үйдің ішінде теңселіп көрер таңды көзбен атырды. Құлқын сәріден тысқа шығып дәрет алды. Есік алдында отырып таң намазын оқыды. Жүруге халы бар сияқтанды. Қолына таяқ алды.

Төңірек алакөлеңкелене бастағанда иесіз ауылдан жаяулатып жолға шықты.

Пахраддиннің жолын тосып айдалада қалған Хансұлу, Дәу апа, Сырға бәйбіше екі түн ұдайы ұйқы көрмеді. Шағыл құмның басына от жақты. Айқайлады. Пахраддин адасып жүр ме деп.

— Адыраң қалғыр, осының бәрі ана қаншықтың әлегі! Өлсе өрем қапсын, неміз бар еді соны іздетіп?!— деп, күйінеді Дәу апа ашық үні саңқылдап.

Сырғада үн жоқ. Иығына ішігін жамылып отқа карап түнжырап отырады да қояды. Ауыл, үйді тастап шұбырған күннен бері төңірек дүниеден бөлініп өзінше бір тұңғыық қалыпқа түсіп жүр еді. Бұрыннан да сөзге сараң, тілі майда, жұмсақ мінез шешесі соңғы күндері, тек, көлеңкедей қозғалып жүргені болмаса, үндеуден, сөйлеуден мүлдем қалғандай еді.

Күн көтеріле Хансұлу жақын маңай шағылдарды аралап көсік қазды. Жуа терді. Осындай тіске басатын нәрселер болмаса қалта түбінде қалған азғантай бидай жүгеріні бұлар бір-ақ күнде жеп бітетін түрлері бар еді.

Құмжуаны жұлып аузына салды Хансұлу. Қуат кеткен бойына ол да болса едәуір нәр, едәуір жұғын. Ал көсік дегеніңіз, кәдімгідей ас. Соны іздеймін деп Хансұлу шағыл аралап қостан ұзаңқырап кеткен екен. Әлден уақытта қыр астынан Дәу апаның айқайы шықты. Хансұлу етегіне сүріне аттап төбе басына ұмтылды. Дәу апа таң саз берісімен ескі жұртқа қарай жүріп кеткен.

Қырқаға шықса күн астынан ақ жаулығын бұлғайды Дәу апа. Шақырып тұр.

Хансұлу жүгіріп келеді. Көкесінен бір белгі болған ғой.

Қырқанын күнгеі баурайында керіскідей созылып біреу жатыр, шалқасынан түсіп. Қасында жаулығы қарқарадай боп Дәу апа отыр. Қарасұр шапанынан таныды жатқан кісіні — көкесі. Хансұлу жақындай бергенде басын көтерді. Пахраддин сырқаттанып қалыпты. Беті-аузы ісініп, көзі жасаурап, гүрк-гүрк жөтеле береді. Дәу апа мен Хансұлу екі жағынан сүйемелдеп қосқа әрең жеткізді.

— От жағындар! — деді Пахраддин. — От! От! Отты лаулатып жағып, суды қайнатып алаша керіп қалқа еткен қос ішінде дереу дастарқан жайылды. Пахраддиннің ерні жарылып тобарсып кеткен. Бір кезде тұз салған ақ су шайдан тіктеліп отырып ұрттады. Зағра нан, қуырылған бидай, жүгеріден шымшып алып аузына салды.

— Оуф! — деп қояды Пахраддин, ыстық шайдан ұрттаған сайын.

— Я, Алла!

— Я, Барақ ата! Я, Бекет ата! — деп Дәу апа аруақты сарнап шақырып отыр.

Пахраддинде үн жоқ. Көрпені бүркеніп алып маңдайы жіпсіп ақ су шайдан сораптай береді. Сораптай береді.

Түске таянған көктем күні шақырайып шекені шағып барады. Аспан тараптан молдаторғай күйкылжиды. Айнала ызындаған шыбын-шіркей. Босаң топырақ күм көгі ерте көтерілетін әдеті. Қайда қарасаң да қаулап өскен көк раң, жантақ, мия, түйетабан, қойселеу, ақшатау. Алыс-жақын ой, қырлардың арасында молдіреп кілкіп тұнған көгілдір ауа. Дала жарықтық құлпырып жатыр. Табиғаттың мына мамыражай қалпына назар жіберіп демі дірілдеп күрсінді Хансұлу.

Қуырылған бидайды қытырлатып, ақ су шайды үнсіз отырып ұзақ ішкен Пахраддин ақ тер, көк тер терлеп, аздасын көзін жұмып сұлқ жатты. Сырға бәйбіше жік-жапар боп Пахраддинді қымтаумен жүр.

— Ау! — деді бір кезде Пахраддин.

— Не? — деді Сырға елп етіп.

— Тіске басатыннан не қалды?

Сырға үндемеді. Кішкентай кара шүберек қалтаны қоржыннан алып Пахраддиннің алдына тастады. Қолдағы кішкентай бидайды талтүсте жұртқа үлесітіріп берген әпенді еріне не десін.

— Осы-ақ па? — деді Пахраддин.

Сырға тағы да тіс жармады. Теріс қарап отыр.

— Үм... м, — деп сағы сынып қалды Пахраддиннің. Көзін жұмып сәлкем үнсіз жатты. Ойланды. Әйелдер отағасыдан бір лебіз күткендей түгел тым-тырыс.

— Су қанша қалды? — деді Пахраддин. — Жарты мес... Дәу апа! — деді Пахраддин, қымтанып жатқан қалшы.

— Айта бер! — деді Дәу апа.

— Дәу апа! Былай етуге керек! Мен бүгін... асасы, жүре алмаспын... Ал сіздер Хансұлу екеулерің жүре берулерің керек! Іркілуге болмас... Менің қасымда... Сырға қалсын. Аман жүрсек, жетерміз іздеріңнен! Суды торсықтарға құйып екіге бөліндер! Жүгеріден бір қос уыс тастандар! Қалғанын алыңдар! Көтергендеріңше көрпе-жастық, киім алыңдар! Ал қимылдандар!

— Бөлінбей-ақ, бірге болсақ қайтеді, көке?! — дей беріп еді Хансұлу, Пахраддин:

— Болды! Сөз қысқа! Қозғалыңдар! — деп кесіп тастады.

Манадан үнсіз отырған Сырға бәйбіше теріс қарап көзінің жасын сықты. Дәу апа:

— Інімдікі жөн ғой, қарақтарым!.. — деп бет әжімі қалындап күнірене күрсінді.

Содан Хансұлу мен Дәу апа екеуі екі баланы жетектеп жолға шықты. Дәу апаның иығында — ала қоржын. Хансұлудың қолында — су күйған торсық, киім-кешек.

Иен дала. Селеулі шағыл басында шошайып қалып бара жатқан әке-шешесіне жалтақ-жалтақ қараумен Хансұлу кетіп барады. Дүние бұлдырап көздің ыстық жасымен жидіп еріп үгітіліп көк жиектер қорғасындай балқып, төңірек көлкіген сұйыққа айналғандай осы сәт. Аспан асты, жер үсті Хансұлудың шарасыз түншығуға айналған ғаріш халына қарап қантарылып тұрғандай. Тірлік доғарылғандай. Жапырақтай жалғыз жүрегі қасырет айдынында малтыған Хансұлу басқа ұрған балықтай дал. Еш нәрсені үкпай, әйтеуір, бір сергелдең далбаса күйде кеудесін сүйретін келеді. Омір кәдуілгі көктемнің қызыл суындай жайыла аққандай. Ештеңе ұға алмайды, ештеңе байыптай алмайды. Бар білетіні — жетегінде томпандап келе жатқан құлыншағы, бөпесі. Бар білетіні — содан айрылып қалмау. Білегінен қыса түседі ұлының.

Біраз ұзап шыққанша баласының да, өзінің де көздері жастан құрғамады.

Қолында ұзын сырық таяғы, иығында ауыр қоржын, еңкейдеп тартып келеді жалғыз аяқ жолменен Дәу апа. Үн жоқ іштей түйіліп тістеніп алған. Әлден уақта:

— Е-е, балам-ай, “болған іске болат бол” деген. Аллам душар қылмасын... де! Бұдан да зорын көрген, мына алдында келе жатқан бейбақ апаң!.. — деді Дәу апа зор қоңыр дауысы күңіреніш.

Жалғыз аяқ жол біресе құмсақ шағылды аралап ирелендеп, біресе тегіс сортаңға шығады. Жүрген

сайын жантақты, ақбасты, жыңғылды, шилі алаңдар кездесе бастады. Алдан саяқ өскен биік торанғыл ағаштары көрінді. Құм аймағы артта қалғаны байқалады.

Кіші бесін шамасында, балалар нан сұрап қын-қылдауға кірісті.

Жол екі жағы жыңғылды, шилі ажырығы қалын сортаңмен келе жатқан. Лүп еткен леп жоқ. Кісі бойы жыңғыл арасы бұйығы тыныш ықтасын.

Дәу апа иығындағы ала қоржынын ажырық үстіне тастап, ұйып қалған белін жазып, тіктелді.

— Ал балам, кәне, не бар, шеш түйіншегіңді! — деді.

Мана түсте жүрерде Сырға ас-суды өз қолымен екіге болген-ді. Дәу апа ол кезде араласпай сырт беріп күйбендеп жүрген-ді.

Хансұлу жарты күлше зағра нан мен қос уыстай қуырылған бидай түйілген орамал түйіншегін шешіп Дәу апаның алдына қойды. Нанды көріп балалар тамсанып ұмтыла беріп еді, Дәу апа:

— Тәк! Тәк! Сәл сабыр етіндер! — деді. Күс-күс қолын созып, алдымен шаршы орамалдың жиырығын жазып кеңірек жайды. Арбиған саусақтарымен орамал үстіндегі шөкім бидайды бірнеше топқа бөлді.

— Сәл, сәл, сабыр етіндер, балақайларым! — деп танауынан сөйлеп, бидайды алдымен төрт, одан кейін сегіз, одан кейін он екіге бөлді. Құмалақ ашып отырған балгердей. Хансұлу да, балалар да Дәу апаның не істеп отырғанын түсінбеді.

— ...Асып кетсе, Қоңыратқа дейін екі түнерміз... ымм... Мынауың былай, — деп қабырғасымен кеңесіп отырған Дәу апа, енді қалған жарты күлше нанды да ортасынан сындырып, екіге бөлді. Нанның исі

танауды қытықтап барады. Хансұлудың аузынан сілекейі шұбырды. Дәу апа екі бөлінген жарты күлшені және екі рет сындырып төртке бөлді. Балалардың қолына бір-бірден жапырақтай ғана нанды ұстатты.

— Балаларым, өстіп жеткізбесек болмас, жол ұзақ. Шыдандар! — деді Дәу апа. Піскен қызыл бидайдан Хансұлу аузына салды. Қатты бидай емес, тандайына бейне бір сары май түскендей түшынды. Іш-дүниесі қасқырша ұлып қатты ашыққанын осы сәт сезінді Хансұлу. Зағра нан, піскен бидайдың исі танауын жарып барады-ау. Жарып барады. Дәу апа орамалды жинады. Жақсылап түйді. Бәрінің көзі сол түйіншекте. Түйіншекті Дәу апа қоржынға ықтияттап өз қолымен салды. Содан кейін, жүктерін иыққа алып жолға түсті. Жол жыңғылды, алаптан шығып дүзгенді, қарағанды құмсақ адырларды аралап ирелендеп алға тарта берді.

3

Түс көріп жатыр Пахраддин.

Ел іші бұзылмаған баяғы кездер екен дейді. Көл жағалай қонған өңшен ақ шағала үйлер. Ауыл іші құжынаған адам. Той ма, мереке ме, әйтеуір бір қуанышты күн. Жұрттың бәрі Пахраддиннің аузына қарайды. Жұрттың бәрінің құрметтегені Пахраддин. Пахраддин билік айтуға тиіс екен дейді. Сөйлеуге тиіс екен дейді. Тәйірі, шаршы топ алдында сөйлеуден, сірә, Пахраддин қашқан ба? Бүгін әңгімені әріден бастағысы кеп жиылған дүйім қауымды көзбен шолады. Бүгін әңгімені тіптен әріден бастамақ. Мынау алаш ұранды халықтың ата тегі жайлы, түп-тамыры жайлы сөз қозғамақ. Тегін білмегеннен тексіз шығады. Талай жыл шежіре ақтарғаны содан емес пе?

Соны көкірекке түйген көкірегінде сайрап бұлбұл оянғандай, ағарып таң атқандай. Жағын ашса көмейден күмбірлеп сөз ақтарылардай, оқыс бір шабыт үстінде тамағын кенеп, халқына жүзін бұрып енді... енді тіл шеше бергенде... оянды да кетті.

Шалқасынан жатқан Пахраддин басын сәл көтеріп төңірегіне қарады. Ми далада ашық аспан астында жатқан қалпына сенер-сенбесін білмегендей бір әуресарсаң күй кешіп отыр. Құй сен, құй сенбе, жанбасында — кара жер, төбесінде — жұлдызы жылтырай бастаған алқаракөк кешкі аспан төніп келеді. Өттеген-ай! Түсі болып шықты-ау әлгінің бәрі. Бір жағынан — түс әсерінен арыла алмай, екіншіден — мына шындыққа, кескіні суық өмір шындығына көндіге алмай біраз есеңгіреп отырды. Тері қайтып, бойы әлдеқашан тоназып қалған екен.

“Уф” деп күрсініп басын жастыққа қайта қойды. Ұйқысы шайдай ашылды. Бүгінгі күннің суреттері, тіптен, үй-орманын тастап қалаға қарай шұбырғаннан бергі уақиғалардың бәрі көз алдынан тізбек-тізбек етті. Тағдыр шіркін бұны ілгерілі-кейінді дірдектетіп, қуалап айдай жүріп, ақыры міне, жапан дүздегі қайдағы бір құмсақ жайдақ төбе басына әкеп тастапты. О, паруардігер! Анау-мынау емес, алпыс жылға тарта созылған бұл фәнидегі сапарының соңы осы төбе басы болғаны ма? Бү не жатыс? Жүргенде не бітірмек? Барғанда қайда бармақ? Барар жері, басар тауы қайсы!

Шырағдандай сирек жұлдыздары жылтырап далиған каракөк аспанға қарайды. Сол баяғы атам заманнан таныс зеңгір көк, таныс жұлдыздар. Пахраддиннің бала кезінде сол қалпы еді, әлі сол қалпы. Түк өзгермепті. Бұл неткен кеңістік? Бү неткен меңіреу әлем? Мынау жер бетін құмырскаша шимай-

лап, шым-шытыр тағдыр соқпақтары жатыр шатысып, ию-кию араласып, шиеленісіп. О, паруадігер! Соны шешемін деп, соны бір қалыпқа келтіремін деп кісі ғұмыры өтеді арпалысумен. Қанша бас қурап, қанша шаш ағарады. Бейне өзі жерді тіреп тұрғандай, бейне өзі мәңгі сол жер бетінде алшаң басатындай тойымсыз, қанағатсыз, кісі арманы әлемді шарлайды. Құлқынның да қомағайлығында шек жоқ. Талай бас соның құлы болып-ақ қурайды. Соның қанағатын толтырамын деп оңды-солға соқтығады. Алдайды. Арбайды. Иіледі, бүгіледі. Жағынады. Жалбарынады.

Тыныш ымырт қараңғысында жұлдызды алқара көк аспанға қарап осылай ой кешеді Пахраддин. Ойын бір көлденең тысыр бөліп жіберді. Мынау жым-жырт кешкі өлкеде өзінен басқа тірлік барын ұмытып кеткен екен Пахраддин. Тіксініп, тұла бойы түршікті. Кебісі сырпылдап біреу жақындап келеді.

— Сырға, сенсің бе? — деді дауысы біртүрлі алабұртып.

— Мен ғой, — деді Сырға өлсіреп әрең ғана дыбыс білдіріп.

Пахраддин бәйбішесінің үнінен шошыды. Үлкен күйзеліс үнін есіткендей құлағы.

— ...Қайда жүрсің... жаным-ау! — Лықсып көмейіне тығылған бір ыстық толқынды әрең ірікті.

— Жуа тердім, Сен ұйықтасын дедім.

“Алла-ай, Алла-ай!” деп ет-бауыры езіліп кетті Пахраддиннің. Жасаурай қалған көзін төңкерін, бәйбішесіне ұзақ қарады. Сырға жаулығын жағына орап алыпты. Иығындағы жуа салған ескі кенеп дорбаны алып, ақырын жерге қойып жатыр. Өзінде үн жоқ. Баяу, биязы қозғалады. Жүрегі шымырлады Пахраддиннің. Жан дүниесі алай-дүлей болды. “О,

кер заман! Кер заман!!!” — деп іштей күңіреніп кетті. Мына Сырға аяғын керіліп басатын кербездің өзі емес пе еді?! О, кер заман, көрмегенді көрсеттің-ау, сен заман! Қайран асығым, асылым, Сырға! Әйел затының падишасы — Сырға! Қыз күнінде сені жұрт бейіштен үзіліп түскен гүл ме деуші еді. Сәнінді, салтанатыңды көрген, сыңғыраған күлкінді естіген жан қараптан қарап тұрып, шырын жаннан кешкендей еді. Сені қолға түсіру көктегі жұлдызды көксегенмен тең еді. Саған бас қосқанда Пахраддин аспанның гауһар жұлдызын алақанына қондырғандай байтақ сахарадағы жалғыз бақытты жігіт өзі болып еді. Содан бері мінеки өзінмен талай сәулелі жылдары бірге өтіпті. Сенің жанарыңның, жаныңның шұғыласы мынау сұрқай тірлігіне жарығын түсірумен келген. Қайран кермиығым, кербезім! Керілген кер маралым! Кенеп дорбаны иығыңа салғаныңды көргенше, Пахраддиннің шыққыр көзі неге шықпайды!

Пахраддин жаралы арыстандай ыңыранып, бұлықсып күрсін атты.

— Не болды, көкесі? — деп Сырға лып етіп отыра қалды қасына. Үздігіп молдіреп қарайды кеп бұған. Өзі көлеңкедей әрең қозғалып жүрсе де аяйтыны Пахраддин. Қайран Сырға, асылым-ай, аяулым-ай! Сөйткен қосағың, тәңірдей табынып жүрген азаматың не көрсетті саған? Не әуселе көрсетті? Иығыңа кенеп дорба ілгізіп жуа тергізгені ме көрсеткен?

— Уһ! — деп көкірегі қарс айрылып кетті Пахраддиннің. Дөңбекшіп кетті.

— Бісміллә! Бісміллә! — деп үстіне түсіп жыламырап бебеу қақты Сырға. — Көкесі, не болды?!

— Уһ, Алла-ай! Не жазығым бар еді?! Уһ! — деп ышқынып жастықтан басын жұлып алды Пахраддин.

Екі иығынан дем алып, дір-дір етін, көзден жасы бұршақтап кеп берді.

— Қай қылығымнан жаздым! Не қиянатым болды адам баласына! Не жазығым бар еді?

— Бісміллә! Бісміллә! — деп, зәресі ұшып кеткен Сырға зар илеп Пахраддинді құшақтай алды. — Не болды, сабыр етші, көкесі!

Сырға ерінің кең иығынан қапсыра құшақтап, ашылып қалған омырауын қымтап әлек. Пахраддин шағын денелі Сырғаны қармай құшақтап алдына отырғызып алды.

— ... Асасы, маған лағынет неге айтпайсың?! Мен... қарабет болдым ғой... кешегі қаңғыған дүйім ел алдында... сенің алдында... бала-шаға алдында... сенің обалыңа, жұрттың обалына қалдым... мен.

— Көкесі, қойшы енді... Құдайдың ісі шығар...

Пахраддин Сырғаның сезіне жұбанғандай байыз тауып ойланғандай болды. Сырға ерін тас қып құшақтап жабыса сүйеніп отыр.

— ...Елді көшірсең... мал-жанына жайлы қоныс іздедің... Жамандық ойлаған нең бар? Көшпеген жұрттың да көріп отырған әуселесі белгілі ғой...

— Білмеймін... “Қырсық бір айналдырса шыр айналдырадының” кері ме. Әйтеуір, бір шырғалаңнан шыға алмай-ақ қойдық қой... Ақыры, мынау... тозғынға түскеніміз...

Содан кейін екеуі жайдақ төбе басында түн жамыла отырып ұзақ ойға шомды.

— Ел дейсің-ау... Сол елің қайда қазір? Жапан дүзде шойырылып отырған сені неге сол елің қазір іздемейді? Аузындағыны жырып берген жұрттың неге сені іздемейді?— деді Сырға ашынып.

Пахраддин таң қалды. Сөзге сараң, өмірде үні шықпайтын Сырғаның, міне, тұңғыш рет ашынып

сөйлегенінің куәсі болып отыр. Айтып отырғанының бәрі рас. Бірақ Пахраддин кешегі шұбырған елден Сырға тәрізді қайырым, жәрдем дәме етіп иегі қышымас еді. Өзгеге қарайламақ тұрмақ, ол жазғандар өз бастарын аман алып ел шетіне жетсе екен. Сөйтіп, өкіметтің назарына ілігіп, әйтеуір, аштық зұлматтың құрығынан құтылса екен.

— Бәйбіше! — деді Пахраддин бір кезде.

— Ау! — деді Сырға.

— Қозғалайық!

— Шамаң бар ма жүре алатын? — деп қуанып сұрады Сырға.

— Бар-ау деймін...

4

Кісі арып-ашқанда қарға адым жер мұң болатын әдеті ғой. Ертесіне түске таман тіптен естен тануға айналды Хансұлу. Жапырақтап үзіп беріп үнемдегенмен нан да бітті. Баласы нан сұрап қақсағанда алғаш жын қағып кетермін деп еді. Бірақ оған да көнді. Еті үйренді. Балалар қақылдап-қақылдап ақыры, нәтиже шықпағасын олар да тыншықты. Біресе арқалап, біресе жаяу жетелейді баласын. Балапанды жемдегендей ауық-ауық аузына бидай салып қояды. Бала соны талмап жатып, кейде арқасында ұйықтап та кетеді. Өз өзегі талып, көзінің алды қарауытсадағы сылпытып келеді. Әйтеуір, сылпытып келеді. Алдында таяғы тырсылдап, өңкеңдеп адымдаған Дәу апа. Дәу апа... Япыр-ау, бұ неткен қажырлы кісі. Шаршағаннан, қалжырағаннан Хансұлудың кейде тізесі бүгіліп, бүгіліп кетеді. Сондайда отыра кетейін десе Дәу ападан қорқады, Дәу апаның түсі өрт сөндіргендей ызбарлы. Іштей

ширыққан, жаныққан қолбасшыдай айбатты. Шаршағанын айтуға Хансұлу сескенеді.

“Жас басыңмен бұ не, тақа, камырдай езіліп! Көне кимылда, бас аяғыңды!” деп тастауы ықтимал. Өмірінде кісіден сөз естіп көрмеген Хансұлуды намыс камшылай түседі. Жас басымен жетпіске келген кемпірден кем соққысы келмейді. Бір жағынан, арқасына жабысқан қаршадай нәрестесін ойлағанда кеудесінде жан барда қыбырлай беру керек екенін біледі. Божырауға, босауға хақы жоқ еді Хансұлудың.

— Балам, шаршадың ба? — деп қояды Дәу апа. Үн қатуға шама жоқ Хансұлуда. Дыбыс катпайды.

— Жә, шыда, қазір дем аламыз! — дейді тағы да Дәу апа жұбатып.

Жиде, тораңғыл, тал өскен үлкен бір ұзынша аңғар сайдың шетіне жетіп іркілді түске таяу. Жар басына қоржынын қойды Дәу апа. Хансұлу арқасында ұйықтап жатқан баласын жерге түсірді. Байгүс балада үн жоқ. Әлсірегенге ұқсайды. Екі баланы жерге көрпеше төсеп соның үстіне отырғызды. Алдарына орамал жайып, орамал үстіне азғана бидай шашты. Балалар бидайды балапанша шұқып теріп жеуге кірісті. Бәрінде де үн жоқ. Дәу апа да, Хансұлу да қытыр-қытыр шайнайды бидайды. Жарықтық қуырылған қызыл бидайдың исі-ай. Дәмі балдай ериді таңдайда. Арандары ашылып өңірендеп жалмап барады дастарқандағы бидайды, түйіріне дейін теріп жеп. Әсіресе, екі бала шүйкілдеп өліп барады.

— Жә, болды! Қанағат! — деп, Дәу апа орамалды жинады. Екі бала еріндерін жалап, жұтынып жәутен қақты. Баласының түріне одан әрі қарауға дәті жетпей, көзіне жас айналып назарын шөл далаға бұрды Хансұлу. Аспан таза, ашық. Жазғытұрғы жалпақ

әлемге күн нұрын риясыз төгіп тұр. Көгеріп, түлеп жатқан қырлар, сайлар, алыс-жақын көк сағым көлкіген алаптар.

Тұла бойы зіл тартып, шаршаған Хансұлу отырған жерінде қоржынды жастанып қисайды. Сол-ақ екен күллі денесі маужырап ештеңені ойлатпай ұйқы шақырды. “Ух” деп жаны жай тауып күрсінді.

5

Пахраддин мен бәйбішесі түнделетіп біраз қозғалды. Аспанды бұлт бүркеп, аяқ жолдарын әрең көріп қана отырды. Түн ортасына таман бұлар бір кең айтақырға келіп тірелді де сокпақ жолдан адасып қалды. Бірақ іркілмеді. Келе жатқан бағыттарын өзгертпей ілби берді. Шығыстан таң сібірлей бастаған шамада қалың раң өскен үй орнындай тегіс көкшөптің, үстіне корпеше төсеп жатып дем алды. Күн жерден тұсау бойы көтеріле қоржынды иыққа салып, тағы алға қарай тағы қозғалған.

Сәскеге таман қарағанды, тырбық дүзгенді көк шөбі тұнып тұрған құмайт шағылға кезікті. Осы жерде Пахраддин ойланып іркілді.

— О, не көкесі? — деді, діңкелеп әрең келе жатқан Сырға.

Пахраддин сонау алыс, сағым кілкі бастаған көкжиекке екі оқтылау ойланып кеп қарайды.

— Ух, — деп Сырға жұмсақ құмға отыра кетті.

— Ымм... о парурдігер? — деп жалпақ алақанымен мұртын сылап тұрып дағдарды Пахраддин. — Менің шамалауымша бұ кезде біз “Есек өлгеннен” өтіп Жиделі сайдың о жақ бұ жағында жүруіміз керек еді. Ендігі жерде бағытымызда мынандай құм шағыл кездеспеуі керек еді... бұ қалай?! Астапыралла!

Сырға бәйбіше сөйлесуге шама жоқ отырған жерінде басын қоржынға сүйеп көзін жұмған. Пах-раддин өз көзіне өзі сенбей биігірек бір төбешікке шығып тағы назар жіберді, сағым тола бастаған төңірек атырапқа. Уай, әттеген-ай. Түнделетіп бекер жүрген екен. Жарықта болса ғой, соқпақ жолдан шығар ма еді. Тіптен, жолсызбен жүрген күннің өзінде де бұншалықты бағыттан көп ауытқымауы керек еді. Бұған не көрінді адасып? Әлде мана таң алдында көз шырымын алып ояңғанда, басы айналып басқа жаққа жүріп кетті ме екен? Ұқса бұйырмасын, Сырғаға не дейді енді? Қай бетімен айтады “адастық” деп? Жетпегені осы еді енді...

6

Хансұлулар “Ел қарасын көреміз-ау” деген үміттен күдер үзе бастаған. Жол жеткізетін емес. Әбден титықтады.

— Балам, — деді алда келе жатқан Дәу апа. Бұл — мезгіл кіші бесінге таяған шама еді. Айнала кісі бойын жасырғандай қалық жыңғыл, тал, ши. Соның арасымен ирелендеп жалғыз аяқ соқпақ қашады.

— Балам, көріп келесің бе? Ел шетіне де жетіппіз-ау!

Хансұлу еңсесін көтерді. Оң қапталда, әудем жерде қабырғалары жартылай құлаған ескі кесек там тұр. Одан әрігеректе де қалқиған сыңар қабырғалар байқалады.

Және сәл жүргеннен кейін Дәу апа:

— Естіп келесің бе? — деді. Тоқтап тың тыңдады. Хансұлу да іркіліп құлақ түрді. Есектің ақырғаны естіледі алыстан.

Күн ұясына еңкейген шамада қозыкеш жерде түтіні шүйкеленіп иірілген қала көрінді. Қоңырат деген қала.

Жыңғыл арасындағы бұлтиған шағын бір төбешікке шығып қарап тұр бұлар. Аштықтан, жол азабынан ит сілікпесі шығып аяқ үстінде әрең тұрған Хансұлуға Қоңырат о шеті мен бұ шеті көз жеткісіз үлкен шаһардай боп елестеді. Біріне-бірі мінгескен үйлері де көп сияқты. Әйтеуір, көзге тығыз, жыпырлап көрінеді. Ғұмырында қала көрмеген Хансұлуға анау көрінген кесек үйлі Қоңырат қыры-сыры беймағлұм бір жат дүниедей.

— Қала дегенмен... бізді онда құшақ жайып күтіп отырған жан жоқ, балам! — деді Дәу апа, қабак шытып, арқасында ұйықтап жатқан немересін әлдилегендей теңселе түсіп. “Бәсе, — деді іштей Хансұлу. — Бәсе, осылай боларын сезген. Сонда бұлар танымайтын қалаға итінін неменеге сонша асықты?”

— Бейтаныс қала ғой... түнде кірмей-ақ қоялық... ұры-қары, аш-арық көп дейді ғой, — деді Дәу апа, батыс жаққа мойын бұра беріп. — Балам, мына тұрған зират — “Дәуіт ата” зираты. Басында кісі түнейтін жері бар. Сонда барайық!

“Дәуіт ата” зираты Үстірттің бергі бір мүйісінің үстінде екен. Төрт құлақты бейіттер батар күннің жалқын нұрына малынып тұр.

— Балам, хабарың бар ма, жоқ па, білмеймін?.. — деп, әңгіме бастады Дәу апа. — Мына алдымыздағы зират жарықтық қасиетті бабамыз Дәуіт батырдікі. Барақ, Барақтан — Асау, Асаудан Дәуіт туған ғой. Барақ батырдың әруағы өзінен кейін ұлы Асауға, Асаудан кейін осы немересі Дәуітке дарыған дейді. Әруағына бас иіп барайық басына! Жалбарынайық...—

Дәу апаның дауысы дірілдеп сөзінің соңын жұтып үнсіз қалды.

Кімге мұңын шағарын білмей келе жатқан Хансұлуға ұнай кетті мына ақыл. Бұның қасіретіне құлақ түрер әулие-әнбиелер бар болса, Хансұлуда оларға айтар мұң-зар аз емес-ті.

Жайдақ төбе үстінде екен Дәуіт ата зираты. Көз байлана жетті. Ою-өрнекті сандық тастармен қоршалған төрт құлақты бейіттердің сән, салтанаты бірінен бірі асады. Меніреу ымырт қараңғысына еніп бара жатқан қойымшылық маңайы жан үріккендей зіл тыныштық.

Төбенің батыс жақ құлай берісінде төбесі шым сылақ, қоңыр кесек үй тұр. Дәу апаның айтқаны рас болып шықты. Есігін күрекпен тірей салған иесіз үй. Мінәжат етуші келім-кетім жүртқа арналып салынған үй. Балаларды жерге түсіріп, иықтан жүктерін алып Хансұлу да, Дәу апа да “ух” деп белдерін жазды. Балалар да төңірекке қарап аң-таң.

— Балаларым! Көрдіңдер ме? Үйге келдік... — деп қояды Дәу апа балаларды алдарқатып. Дәу апа есікке тіреулі тұрған күректі ала бергені сол еді маңдайша түс сатыр-сұтыр ете қалды.

Құс екен. Қанаты сусылдап қараңғыға сүңгіп жоғалды.

— Тфә! Тфә! Жүректеріне түкіріндер, қорық-сандар! — деді Дәу апа.

Тіреулі күректі алғаннан кейін сықырлауық есік шыңғыра шиқылдап ашылды. Үңірейген қараңғы ішке кіруге Дәу апаның да жасқанып тұрған қалпы бар.

— Е, садаған кетейін... — деп қояды Дәу апа. — Осы әулиенің өзінің киелі құсы бар деуші еді. Сол екен ғой әлгі жарықтық.

Дәу апа дегенмен жүректі кісі еді. “Бісміллә!” деп қараңғы үйдің табалдырығын жалғыз аттады. Жан дүниесінде үміт пен күдік шарқ ұрып, екі баланы білегінен ұстап шеттеңкіреп тұр Хансұлу. Сыртта жел қотеріле бастаған. Аспанды жапқан бұлт бар. Жауын жауып кетпесе неғылсын... Дәу апа шырт еткізіп оттық тұтатып қараңғы жайдың ішін ала көлеңке жарық етті. Іле-шала кемпірдің:

— Е, садаған кетейін! Бәсе! — деген қош көңіл үні естілді. — Хансұлу, Балам, бері кел!

Хансұлудың жүрегі лүпілдеп кетті. Құдды жаюлы дастарқан, мөл тағамның үстінен шыққандай Дәу апаның дауысында шаттық бар. Балаларды сүйрей-сүйрей есікке ұмтылды. Бірақ ала көлеңке үй ішінде босаға тұста май шамға от тұтатып сопайып тұрған Дәу ападан басқа назарға әлі кісі қуанарлықтай еш нәрсе ілінер емес. Хансұлудың назары дастарқанды, нанды іздегіштейді.

— Көрдің бе, балам, майшамды?! — деді Дәу апа, жарық түскен иесіз бөлме ішіне өл да енді айнала қарап. Төрде қамыс төсеніш үстінде ескі текемет жатыр. Босаға жақта қазан, тұтқыш, құман тұр. Дәу апа “Бісміллә!” деп қазанның қақпағын ашты. Үңіліп қарады. Міне су бар екен, балам!— деді, дауысы ширап.

Хансұлудың күткені бірақ басқа еді. Нан бар ма, сол еді білгісі келгені. Есеңгіреген күйі тек нанды іздейді. “Нан” деген ғажайып үнді естігісі келеді.

Дәу апа үй ішіне үрпип үнсіз назар қыдыртқан Хансұлудың, көздері жаутаң қаққан нәрестелердің нені іздеп, нені көздегенін түсініп-ақ тұр. Озі де көлеңкесімен қоса ербендеп тінтіп жүр бөлме ішін. Іздеп жүр. Балалардан маза кетті.

— Әже, ол не нан ба? — Едігенін таңдайы тақ-так етеді.

— Ой, балаларым, көне, сәл шыдаңдар! Қазір отты жағып өйдейт, шайды қайнатамыз! Өйдөйт, ыстық шай ішеміз! — деп, кенет, Дәу апа дауысы самбырлап бала-шағаға қайрат бере, жігер бере сөйледі. Өзі құманды алып сүріне аттап сыртқа беттеді. Бидай салынған кішкентай қалтаның ыркы Дәу апада болатын. Дәу апа айтпайды қанша ас қалғанын. Үнемдеп келеді әйтеуір. Хансұлудың шамалауынша бүгін бидай бітуте тиісті. Шайға Дәу апа не бергелі отыр, о жағы жұмбақ. Дәу апаның ажарына қараса үміт оты жылтырай түседі. Қазір дастарқанға Дәу апа қалайда бір жейтін дәм тауып қоятын тәрізді.

Отта тұрған қара құман, ақыры, сақырлап қайнай бастады.

— Қайнады ғой! — деді Хансұлу.

— Қайнады, — деді Дәу апа. — Сен құманды ішке алып кіре бер.

Хансұлу қара құманды тұтқышпен көтеріп ішке беттеді. Бірақ Хансұлуға керегі қара құман емес еді. Анталап отырған балалардың аузына қазір не тауып салады Дәу апа! Сол еді аңдығаны. Буы бұрқыраған ыстық қара құманды көтеріп бара жатып ошақ жақта айналсоқтаған Дәу апаға жалтақ-жалтақ қарай кетіп барады. Қараңғыда жанған отты айналып Дәу апа әлдене іздейтін тәрізді.

Хансұлу буы бұрқыраған қара құманды алып үйге кіргізді. Иықтарына күпі, бешпет жамылып, ұяда отырған балапандардай екі бала шүйкілдеп қоя берді.

— Нан!

— Нан!

— Шыдаңдар! Шыдаңдар! — деп жаны қуырылып ышқынды Хансұлу, есікке қайырыла қарап. Дәу апа тезірек бір амалын таппаса мына екі бала бұны түтіп жейтін түрлері бар. Балаларды алдарқатайын деп, кесе алып дастарқанға қойды. Түз қалтадан бір шымшым түз алып құманға тастады. Сыртта әлдене “дүрс”, “дүрс” етті. Балалар есікке жалтақтады. Дастарқанға қоятын енді еш нәрсе болмағасын Хансұлу бір сәтке лажсыз дағдарып қалды. Аш нәрестелерге қарауға беті шыдамай бір қырын есікке бұрыла отырды.

Есік алдын орап жел есті. Іле кір-кір жаулығы қарқарадай боп еңкейіп, ішке Дәу апа кіріп келе жатты. Дәу апаның қолында бір ораулы шүберек. “Ия, Алла!” деп Хансұлу көзін жұмғанда дүние теңселіп кеткендей болды. Балалар мойындарын созып ұшып кете жаздады.

Дәу апа дастарқанның бұрышына кеп тізе бүкті.

— Бісміллә! Мінекиі,— деді ескі сұр шүберекті жаза беріп. Хансұлудың көзіне бөлшектелген ақ кесек құрт оттай басылды.

— Тандайларыңа салып талмап сорсаңдар бұдан өткен ас жоқ. Тек асықпаңдар! — деп Дәу апа әрқайсысының қолына бармақ басындай құрттан ұстатты.

Балалар құртқа бас салды. Қақала-шашала шайдан да ұрттап жатыр.

— Асықпаңдар!

— Сорып ішіндер!

Тілінің астында жатқан бармақ басындай тастай қатты құртты ақ су шаймен қоса талмап отыр Хансұлу. Жарықтық болмашы түз қатқан ыстық шай тандайында еріген құрттың сүт дәмін бүкіл тұла бойына жайып таратып, күллі алпыс екі тамырына жол тартқандай. Маңдайы жіпсіп қоя берді. Көзі жарқ

етіп ашылып, санасына бір сәуле құйылғандай. Хансұлу осы кезге дейін мынадай дәмді құртты көрмеп еді. Бейне таңдайына майлы шырын сүт құйылып жатқандай. Бейне таңдайына бейіс тағамы тамып жатқандай.

Шым-шымдап бойға ас нәрі жүгіре бастағаннан-ақ, енді шаршағандары сезіліп, сүйектері ауырлап отырған жерлерінде қисая кеткілері кеп маужырай бастады.

Дәу апа бір кезде барып есікті жапты. Бармағын сорып ұйқыға кіріскен бөпесін құшақтап Хансұлу текеметтің үстінде ұзынынан түсіп сұлық жатыр. Кірпігі айқаса береді. Денесі қорғасындай зілмауырланып бір шырын масаң күйге көшіп барады ақыл-санасы. Қайдан келіп, қайда жатқанын, ертеңгі күні не болады, о жағын ойлаудан қалған.

7

Көзін ашса босаға тұсы, төбесі күйе-күйе болған қаңыраған ескі жайдың ішінде жатыр шалқасынан. Таңғы салқын жайлап алған бөлме ішін. Оң жағында бүрісіп тоңып Түгелхан жатыр, аштан бұралып. Киімі кір-кір. Оған тығылып Едіге жатыр. Оның ұсқыны Түгелханнан да әрі. Байғұс балаға қарауға аяйсың.

• Дәу апа орнында жоқ.

Сыртқа шықса Дәу апа Дәуіт ата мазарының алдында түкшиып, шарт жүгініп құран оқып отыр екен. Қасына барып Хансұлу да тізе бүкті. Екеуі сарғайып келе жатқан таңға жүз беріп ата-баба аруағына сиынды.

Аздасын бет сипап орындарынан тұрды.

Екеуінің де назарлары төбе үстінен бейне алақанға салғандай ап-айқын көрініп жатқан әудем жердегі

Қоңырат қаласына қадалды. Қала әлі ұйқыдан ояна қоймаған. Бірақ тұс-тұсынан тауықтар шақырып жатыр. Бір-біріне иін тіресе быжынаған кесек үйлер. Қарауытқан шоқ-шоқ тұт ағаштары.

Қалаға дейінгі аралық тегіс. Айқыш-ұйқыш аяқ жолдар көрінеді. Ақ теңбілденіп тақыр жатыр.

— Ал балам, бір Аллаға сиынып, кимылдайық!— деді Дәу апа таң астында жатқан қаладан қоз алмай.— Біз барғанша таң да атып, күн де шығар...

Содан ұйқылы-ояу, балаларды арқалап жүктерін қолға ұстап екеуі алакеуең таңменен қыбырлап қозғалып кетті қалаға қарай.

Әудем жердегі қалаға жеткенше көкжиектен шашырап күн де шықты. Әр жерден селтендеген адам қара көрініп, қаланың қыбыр-қыбыр тірлігі басталғандай. Иті үріп, сиыры мәңіреп, есегі ақырады. Көшеде ерсілі-қарсылы жаяулар. Есек жеккен жаман арбасын сықырлатып әнебір шөгерме бөрікті өлмелі шал шөп алып келеді. Орипек жамылған бір тобыр қыз-келіншек, иықтарында кетпендері шуылдасып қаладан шығып барады. Бригат болса керек жұмысқа беттеген.

— Ал балаларым, мінеки Қоңыратқа да келдік. Қазір базарға да барамыз. Кәнеки, енді өздерің жүре қойыңдар!— деп Дәу апа балаларды көңілдендіріп, жерге түсіріп жаяу жүргізіп қойды. Балалар көрінген нәрсеге бір қарап аздап та болса жұбанып, жетекке еріп келеді. Түнде жауған жаңбырдан жер бусанып жылы топырақ исі шығады.

Жан-жағы дуал тар көшеге келін кіре берді. Бейне бір ертек дүниесіне енгендей қатты әсерленді Хансұлу. Үйлердің бәрі кесек дуалдың ар жағында. Корінбейді. Түтіндері шығып жатыр ошақтарынан.

“Қала дегеніміз осы екен ғой!” дейді Хансұлу іштей үркініп. Дәу апа бір рет Қоңыраттың базарында болған екен, ертеректе. Ғұмырында қала кормеген Хансұлу көшеге кірісімен-ақ басы айналғандай. Дәу апа болмаса мәңгіріп тұрып қалатын түрі бар. Орипек орамал жамылған әне біреулер қалпақтың әйелдері ғой. Ал мынау басына шапан бүркеніп беті-аузын түмшалап алған өзбек келіншектері болар, сірә.

Өстіп, әр нәрсеге бір алақтап келе жатқанда бүрк етіп, піскен нанның исі шықты қаптал тұстан. Жасаған ие-ау, тура оттан енді суырған піскен нан исі, танауды жарып барады.

— Нан?!

— Апа, нан?! — деп балалар жамырап қоя берді. Нанның исі келген тарапта дуалдың ішінен түтін будақтап жатыр екен. Балаларда ес жоқ. Жемге ұмтылған арық қойдай топырласып сол үйдің есігіне қарай жүгірді. Дәу апа артта қалды. Мына аяқтарын әрең көтеріп келе жатқан балалар енді жетім қозыдай томпандап шауып барады қақпаға қарай. Есікке Едіге бұрын жетті. Бала есіктің саңылауынан сығалады. Есіктің саңылауынан ішке Хансұлу да үңілді. Қателеспепті. Есікке жақын тұста орипегін жамылған қалпақтың бір келіншегі еңкейіп, тандырдан нан алып жатыр. Жап-жалпақ тандыр нанды оттан суырып, жердегі ағаш табаққа салды.

— Нан!

— Апа, нан! — деп шүйкілдеп қоя берді, балалар. Осы кезде Дәу апа:

— Былай тұрыңдар! — деп келіп есікті тарс-тұрс ұрды. — Осы үй ме анық нан жауып жатқан?

— Осы үй, — деді Хансұлу.

— Әне! Әне! — деп, іш жақты нұсқады Едіге. Сөйткенше есік те ашылды. Орипек орамалды әлгі

сұңғақ бойлы қара сұр келіншек есікті жартылай ашып бұларға таңырқай қарады.

— Балам, мұсылман баласы екенсің?! Наныңнан сат бізге!— деді Дәу апа, келіншектің қолына мыж-мыж болған қағаз ақшаны ұстата беріп. Келіншек алақанындағы ақшаға бір, көзі жәутендеген балаларға бір қарап бөгелендей берген. Дәу апаның:

— Құдай үшін, балам! Сата ғой наныңнан! — деген жалбарынышты үні шығып кетті.

— Яхшы! — деп келіншек бұрылды да әлгі табактың бетіндегі орамалын сыпырып үстінен бір тандыр нан алды.

— Балаларым, жүріңдер! Сыртқа шығайық! — деп нанды алған Дәу апа, сыртқа беттеді. Опыр-топыр бәрі сыртқа ұмтылды. Шыға салысымен Дәу апа қоржынын жерге қойып дөңгелек жұқа тандыр нанды екіге, іле төртке бөлді.

— Маған!

— Маған! — десіп шүйкілдейді балалар. Оңды-солды ағылған жұртта шаруасы жоқ. Бұлар енді дуалдың түбіне жүктерді қойып отыра қалып жұмсақ нанды ауызға бұрап соғып жатыр. Осы дуал түбінде отырып жеген мына ыстық нанның дәмі таңдайында өмір бақи қалар-ау деген ой кірмеп еді Хансұлудың басына. Бұндай хош иісті дәмді нанды Хансұлу бұрын-соңды жеп көрмеген сияқты. Тіске тиісімен жұмсақ нан таңдайында өзінен-өзі еріп бара жатқандай. Осы кезге дейін өмірдің бір ақиқатын түсінбей келгеніне таң. Қызыл бидайдың наны дастарқанда жатса, тіршіліктің өзге тауқыметі тауқымет емес екен ғой! О, жасаған ие! Өмірдің осы ақиқатын бұрын неге түсінбеген?!

Балалар әлгі алақандай нанға тоймай қалып еріндерін жалап, жалмандап тағы қыңқылдайды.

Хансұлу да, Дәу апа да қолдарындағы нанның қалғанын балаларға берді.

— Қой, балам, қимылдайық! — деді Дәу апа.

Жүктерді иыққа қағып салып көшені бойлап қозғалып кетті. Анда-санда “Базар қайда” деп қарсы кездескен жұрттан сұрастырып қояды. Көше ирек-ирек. Тар. Есек мініп митындап бара жатқан біреу. Базарға қарай ағылған жұрт.

Біреу ешкісін сүйреп, біреу қойын айдайды. Қаланың ішіне ұзап кірген сайын әртүрлі иіс-қоныс молайғандай. Өздері сияқты, арып азған қыр қазақтары көріне бастады. Балаларына қайыр сұратып қойып өздері дуалға арқа сүйеп әрең отырғандар көп. Сұлап жатқандары да көрінеді.

Ағылған жұртпен қабаттасып, ақыры, базар алаңына да келіп кірді-ау. Абыр-жабыр әңгіме. Ығы-жығы адам. Біреу сатып жатыр. Біреу алып жатыр.

Балаларының қолынан жетектеп құжынаған елдің арасымен келеді бұлар.

— Алыңыз! Түшпәра! Түшпәра алыңыз!

— Қатық бар! Айран! Бері келіңіз!

— Ыстық самса! Ыстық самса!

— Зағра нан! Зағра нан ал!

Едіге мен Түгелхан самса сатқан әйелдің жанынан кегежектеп өтер емес.

— Әже! Нан!

— Ал балаларым, әжелеріңнің ақшасы әлгінде біткен! — деді Дәу апа балаларға айтқан боп Хансұлуға естірте. Хансұлу түсіне қойды Дәу апаның нені меңзеп тұрғанын. “Ақшаң болса сауатын жер келді” дегені.

Құлағындағы алтын сырғасы мен қолындағы жалпақ күміс білезіктен басқа Хансұлуда нәрсе жоқ еді.

Дәу апаны шеткерірек шығарып кұлағындағы сырғасын шешіп қолына ұстатты.

— Апа! Осыны сатыңыз! Нан-пан алайық! — деді.

— Ақша жоқ па еді? — деді Дәу апа, күректей алақанында жылтыраған алтын сырғаға қарап. Іле:

— Жүр! Енді бұның бәсін білейік, қанша тұрады екен! — деп Дәу апа жайма базарға қарай жол бастады.

— Құдай сәтін беріп, бүгін базар күнге тап келгенімізді қарашы! — деп қояды Дәу апа. — Жан-жағыңа қарай жүр, таныс біреу кездесіп қалар!

Базардың бір шетінде түйелерін шөгеріп қойып отын сатып жатқан түйе жүн шекпенді, елтірі бөрікті қыр қазақтарын Дәу апа танымады. Дәу апа жақындап жөн сұрап еді, ернінде бұлтиған насыбайы бар ала көз шермек сары:

— Қошай атам-ау, сол ауыл шіждей ме едіңіждей? Құмның ішінде башпашы шапқан? Қошай атам-ау, ол ауыл шөйтін аштыққа ұшыяды деңіш? Шеше! Шіж ол туыштайыңызды жағадан іждеңіж! Қажакштаннан өкіл келіп жатый, Ашылбеков деген. Ол шондай ауылдайды жинап жатый, кемемен алып кеткелі жатый. Шолай, шеше!

— Ай, інім, жағалауынды біз қалай табамыз? Соны айт сен! — деді Дәу апа.

— Қошай атам-ау, міне тиіп түй! Былай жүйе бейіндей! Суға байашындай, көп ұжамай! — деді шүлжің шермек сары көзі бақырайып.

Сөйткенше арт жақтан шаң-шұң айқай шықты.

— Мелиса шақырың! Бай-бай!

— Мелиса! — деген байбалам үн естілді.

Хансұлу шүлжің қазақтың аузына қарап тұрған кезде Едігеден айырылып қалыпты. Жаңа ғана қасында тұрған.

Базардың шетіндегі шаң-шұң айқайдың ортасында бір бала көрінеді. Самса сатушы әйел әлгі баланы білектен ұстап алыпты.

— Ойбай, менің балам ғой анау! — деп, Дәу апа тұра ұмтылды. — Кызым-ау, қалай айырылып қалдың?

Хансұлу да қоса жүгірді.

Самса сатушы әйел Едігені білектен ұстап тұр. Төңірегі — үймелеген кісі.

— Ұстатыш керек!

— Тапсырыш керек мелисаға!

— Шундақлар көбейіп кетті! — деп бір томпақ саудагер қолын ербеңдетеді. Қорқып кеткен Едіге шырылдап тұр жылап.

— Адыраң қалғыр. Әй, жібер баланы! — деп ұмтылып келеді Дәу апа, қалың жұртты жарып.

— Тапсырыш керек мелисаға, шундақларны! — деп байбалам салып, әлгі томпақ қарын саудагер мұрты ербиіп, Дәу апаның алдын кес-кестеді.

— Адырам қалғыр, былай тұр жолымнан! — деді еңгезердей Дәу апа, томпақ, қарын саудагерге төніп келіп төбесінен еңкейіп.

— Яқ! Яқ! Болмиды. Мелиса! Мелиса! — деп томпақ қарын саудагер Дәу апаны өңменінен итерді. Сол-ақ екен қаһарына мінген Дәу апа:

— Мә саған “мелиса!” — деп кестапандай жүдырықпен томпақ қарын саудагерді құлақ шекеден қонжитты. Томпақ қарын саудагер төрттағандап ұшып түсті. Сәлдесі домалап кетті. Көріп тұрған халық қыран-топан күлкіге батты. Самса сатушы әйел қара кемпірдің екпінінен қорыққаннан Едігені босата салды. Едіге бақырып кеп әжесінің кең құшағына тығылды.

— Қой! Қой! Құлдық етейін, жылама! — деп жатыр Дәу апа немересін көтеріп бауырына басып.

— Вай, бұ қырады, ә! — деп сәлдесін қаққылап тұра берді таяқ жеген саудагер, қып-қызыл боп.

— Мелиса қайда бұ, вай! — деп бажылдаумен тұр самса сатушы әйел.

— Мында! Мен боламын “мелиса!” — деп топ ішінен қара былғары кепкалы, қара былғары плащты ортабойлы бір сары кісі алға шыға берді.

Самса сатушы әйел өзіне туралап келе жатқан оқыған төрені көріп сасқалақтап қалды.

— Қанша самсаңызды жеді бала? — деді, әлгі кісі қалтасына қолын сұға беріп.

— Бітта! Бітгасын жеді, — деді әйел қаймыжықтап.

— Мінеки, ақшаңыз! — деді кісі. — Және сегізін беріңіз!

Қолына ақша тиген самса сатушы әйел тұқшындап алдында тұрған өкімет адамының өтінішін орындауға кірісті. Кісінің соңында екі қызыл әскері бар екен. Олар да жақындады. Кісі сегіз самсаны кәзитке орап алды да Дәу апаның құшағында өксігін баса алмай тұрған баланың қолына ұстатты. Жұрт аң-таң. Дәу апа да, Хансұлу да аң-таң.

— Бері жүріңіз, апа! — деді кісі базардан шығатын есікке қарай жол бастай беріп. Әлгі екі қызыл әскердің бірі — Дәу апаның, бірі — Хансұлудың жүгін қолынан алды.

— Апа, қай жақтансың? — деп былғары плащты кісі сыр тартты Дәу ападан.

— Е, балам-ай, қай жақтан дерің барма бұл апаңның?! Кезінде көлектіптен қаштық. Сөйтіп жүргенде баспашыға тоналдық. Одан қалған малды індет алып ақырында жұтап, қаңғып жүрген бейбақтар боламыз! — деді Дәу апа.

— Бәсе... біз де солай шығар деп топшылап едік... — деді былғары плащты толықша, қой көзді сары кісі. — Былай, апа! Қазір, мына жігіттер сіздерді жағаға алып барады. Ас та, баспана да бәрі сонда бар. Қарсы емессіз ғой!

— Қалқам-ау, неге қарсы болайық! Ас берсеңдер, баспана берсеңдер неге қарсы болайық?!

Көшеде ат жеккен екі арба тұр екен. Соның біріне бұларды отырғызды. Делбеге қызыләскердің бірі отырды. Мұрты енді тебіндеп келе жатқан жап-жас жігіт екен. Дәу апа да, Хансұлу да арбаға мінгеннен кейін әлгі “өкімет адамы” берген самсаға қол ұрды. Қашан самса ораған кәзит босағанша бұлар да үн болмады. Біркезде бойға нәр тарап ес жиған Дәу апа делбеде отырған қызыләскер баладан там-тұмдатып сыр тартты.

— Балам, әлгі төреңіздің ныспы кім болды?

Қызыләскер мырс күлді.

— Шеше, ол “төреңіз” Абдолла Асылбеков деген КазЦИКтің секретары. Алматыдан келген, — деді.

Арба бұл кезде қаланың арқа тұсындағы сортаң жазыққа шыға беріп еді.

— Садаған кетейін... кім бөлсе о болсын, әйтеуір бір иман жүзді бала екен өзі, — деді Дәу апа.

Қызыләскер:

— Кешегі асыра сілтеудің кезінде, апа, өздерін сияқты жан-жаққа қашқандар көп болды қазақ жерінен. Бүгінде аштықтан шұбырып кетіп жатыр елден, жерден. Соларды жинап елге көшіруге келдік, — деді тағы да.

— Е, жөн екен, балам! — деді Дәу апа бас изеп, риза болып.

Жан-жаққа күн сәулесі мол түсіп тұрған алаптарға, жыңғылды тоғайларға, тегістеп тастаған егінжай-

ларға, тұт ағаштарынын арасына жасырынған балшық үйлерге қазір Хансұлу өзгеше бір өміршен көзбен қарайды. Әлгінде базарда, бір түпсіз тұңғыққа түскен екенбіз ғой, адам болудан қалған екенбіз ғой деп аспанын мәңгі түнек басқандай жүнжіп еді жаны. Бір күшті күдірет келіп сол күлдырап құрдымға кетіп бара жатқан жерлерінен суырып алғандай, тұңғыықтан жарық дүниеге алып шыққандай қазір.

Дәу апа қызыләскерден жағадағы елдің ішінде “Пәленше деген бар ма, түгенше деген бар ма?” деп жөн сұрап еді, қызыләскер айтқан кісілерін танымайтын болып шықты.

Көкжиекпен астасып жатқан сұрғылт тегістік шалынды көзге.

— Қайсы, жарықтық Әмудариямыз сонда анау ма? — деп шүкшіяды алға қарап Дәу апа. Дәу апаның да, Хансұлудың да Әмударияны тұңғыш көруі еді бұл. Балалар:

— Ол не? — десіп, арбадан бастарын қылтитты. Хансұлу:

— Апа, бұл дария неге сүп-сүр? — деп таңырқады.

— Арнасына сыймай аққандықтан шығар лайытып жатқаны.

Алыс көкжиекпен түнере тұтасып жатқан орасан жойқын дария бұларды ә дегеннен сұсымен сескентті. Лайытып, көбіктеніп жал-жал толқындары аунап төңкеріліп арнасына сыймай толықсыған дарияны жаны бар су екен дерсіз. Сол суға, күдіретті жойқын күш иесіне тіке қарауға дәтің шыдамайды. Бойына біртүрлі үрей шапқандай Хансұлудың.

— Апа, мана сіз саудагерлермен шайқасты бастаған кезіңізде мен біреуді көрдім топ ішінде... — деді Хансұлу. Дәу апа Хансұлуға қадады көзін.

— Қолында таяғы бар Лабақ ахунды көрдім топ ішінде. Тура, әпенді, түрі.

— Е, балам-ай, болса болар... “Тұрымтай тұсына, балапан басына” кеткен заман ғой... Оған таң қалатыны жоқ... — деді Дәу апа бет әжімі қалындап ауыр күрсініп. — Сен оны айтасын... Әлгі базарда мен бір сұмдықты көрдім ғой... Қыз баласын базарға салып тұрған байғұс ата-ананы көзім көрді ғой... Өзіміз сияқты қырдың қазақтары...

Дәу апа одан әрі сөйлей алмады. Тілін жұтып Хансұлу да үнсіз қалды...

Жағада от түтетіп, қостанып жатқан алабажыр бір қауым ел көрінді. Жаулықтары ағарып арасында әйелдер жүр. Бұттары сидандап балалар жүр. Қаратал, шігілдік, бояуы қалың оскен жағаның тегістеу алаңқайына орныққан бір қауым ел. Екі-үш жұлым үй көрінеді. Оншақты қоңыр брезент шатыр тұр. Бесалты жерде от түтеп мосыға шәугім, шелектер ілініп қойылыпты. Түс әлеті кез еді. Шамасы, жұрт ас қамына кірісіп жатса керек. Қатындар от басында күйбеңдеп әлденені турастырып, еркектер отын бұтарлап от жағып жүр.

Алдымен бұлардың арбасын балалар қоршап алды. Одан кейін жұмыстарын тастап әйелдер жүгірді.

— Ойбай, Дәу апа ғой мына келген?!

— Аман жеттіндер ме? — деді шуылдасып.

— Оздерің де амансындар ма? — деп Дәу апа түсіп жатыр арбадан. Назарлары төмен, сүдіндері жоқ еркектер де біртіндеп жақындады.

— Ойбай-ау, би қайнағалар қайда?

— Балқия табылды ма? — деп сұрақты жаудырып жатыр әйелдер үсті-үстіне.

— Е, қарақтарым-ай, жетпіске жетсекте бұл фәниде көрмегеніміз көп екен. Несін сұрайсыз, көрдік

кой көресіні. Ух, — деп қапсағай тұлғалы Дәу апа белін жазып қабақ шытып ауыр күрсінді. — Анау... біздің “қаншықты” іздеймін деп Пахрадин сырқаттанып жолда қалды. Сырғасы қасында. Мына екі баламен біз де әйтеуір, итшілеп Қоңыратқа бүгін жеттік-ау. Несін сұрайсыз, абырой болғанда, Құдай оңдап мына өкімет балаларға ұшырасып...

Содан ашық аспан астына алаша, сырмақ төселіп қадірлі қонақ болып бұлар төрде отырды. Бұларды қоршай кемпір-шалдар жайғасты. Қатын-қалаш дастарқан жайды ортаға. Күлзипа қуырылған бидай төкті дастарқанға. Қатира шақпақ қантты пышақтың қырымен ұрғылап жатыр.

Хансұлу қарап отырса жағадағы халықтың ішінде бұл танымайтын да біраз қожалық бар екен. Дастарқан басына олар келген жоқ. Өздерінше бөлек-бөлек топ болып от түтетіп қазан көтеріп дербес тіршілік етіп жатыр. Және құлағы шалғаны Қатираның шешесі аштан ісіп өліпті жолда. Біраз бала шығын болыпты. Ішінде — Майлыбай мүсәпірдің үш баласы бар. Бұлардан екі-үш күн бұрын келген өз ауылдастарының да кәдімгідей райы өзгеріп қалған. Едәуір ес жиып тойынып, тыныққан сыңайы бар. Сөйлеген дауыстары да қаттырақ шығады. Өңгімелерінің де түрі бөлектеу. Өздері кешеден Арал тараптан келетін кемені күтулі екен. Сол кеме енді бүгін келер дейді. Қазақстаннан келген өкіл бұларды сол кемеге тиіп, теңіз арқылы пойыз аяғына әкетеді-мыс. Содан, жер түбіндегі Әулиеата деген қалаға дейін тартады-мыс. Әулиеатадан түсіріп сол төңіректегі колхоздарға бөледі-міс.

— Ей, жарайды да. Әйтеуір аш қылмаса болды да! — деп кемпір шалдар шүкірана етті.

Астан соң Дәу апа қисайып жатып дем алды. Хансұлу екі баланы ертіп, өзен жаққа барды. Жаға кісі бойы тік жарлауыт екен. Су төменде шылпытып жағаны ұрып жатыр. Ағыстың екпіні жақыннан қарағанда кісі шошырлық. Көз алмай тұрсаң бас айналғандай. Әредік-әредікте шұқыр иірімденіп, лайытып жөңкілген мол су. Балалар лақтырған жоңқаны шырқ көбелек айналдырып әкетеді. “Бұл неткен күдірет. Бұл неткен мол су?” деп жар басында таңырқаумен тұр Хансұлу. Ту, алыс жағада бір қайық көрінеді. Қайық үстінде шошайған екі кісі. Соған карап отырып көз жасы бүрк етті. Әке-шешесі түсті есіне. Құла дүзде қалған қос мұңдар! Күндері не болды екен? Тірі ме екен? Әлде... әлде бір бұтаның түбінде қарға-құзғынға жем болып жатыр ма екен? Не болды екен? О, арсыз тіршілік! Әлгінде ғана бұл өз жұмырына жұғын барғанға мәз болды-ау. Дүниені ұмытып есіл-дерті дастарқанның үстіндегі дәм болды-ау. Со кезде ғой, жарты жолда қалған байғұс әкесі мен шешесі миына кіріп те шыққан жоқ. Мінеки, енді есіне алды, әбден қарны тойып болғасын... О, арсыз тіршілік! Айтпақшы, бұған не көрінді? Әке-шешесін тастап қайда барады? Әке-шешесінің өлі-тірісін білмей тұрып жер түбіндегі Әулиеатаға қалай кетпек?

Манағы қызыләскер жігіт бұны іздеп жүр екен, қоймадан азық-түлік алып берейін деп. Киіз үйдің біреуі есігі құлыптаулы қойма екен. Төрт кісінің атына ширек қалтаға жуық бидай, бір тақта шай, екі қос уыстай шакпақ қант, бір шиша мақтаның майын берді. Хансұлу осы нәрселерді алғанын растап бір қағазға қол да қойды. Хансұлудың қуанышы қойнына сыймай ширек қапшық бидайды мықшындап сүйреп, Едіге мен Түгелхан қалған нәрселерді көтеріп

Дәу апа жатқан алаңқайға қарай мәз болып келеді. Едіге: “Әже! Әже!” деп жүгіріп барып қолындағы тақта шайды корсетін әжесін оятып жіберді. Түгелхан барып қантын көрсетіп жатыр. Дәу апа үрпиіп басын көтеріп балалар әкелген нәрселерді қолымен ұстап көріп танырқады.

— Апа, ал, бидай керек болса! — деп қапшықты кемпірдің алдына сылқ еткізді Хансұлу. Дәу апа өз көзіне сенбегендей қалтаның аузын ашып ішіне үнілді.

— Садаған кетейін, мұнша байлықты да көретін күн бар екен-ау! — деп, күректей алақанымен қып-қызыл бидайдан көсіп алып қарады.

Содан Дәу апа екеуі ұйқыны қойып балаларға шөпшек жинатып от жағып табаға бидай қуырды.

Анадайда ойнап жүрген ересек балалар дүркірей жүгірді жар басына қарай. “Солдаттар келді! Солдаттар!” деп. Жағада жатқан алабажыр бір қауым ел үрпиіп мойындарын созды. Қалың боян, шігілдік, қаратал ар жағынан екі-үш атты қызыләскердің бастары қылтиды. Жарау аттар мінген қызыләскерлер аздасын бұтаның тасасынан саудырап шыға келді. Іздерінше шықырлап, шиқылдаған атты арбалар көрінді. Төрт арба толған ақ жаулықты әйелдер, ки-мешекті әжелер, құлақшынды, бөрікті ер-азаматтар, қызыл орамалды қыздар, тебетей-тақиялы балалар.

— Осылардың ішінде келе жатпасын біздің адамдар, — деп Дәу апа қолымен көзін көлегейлеп күн астына қарады. Хансұлу арба керуені жақындағанша шыдамы жетпей алдынан жүгірді. Арбадағылар бұларға, бұлар арбадағыларға қарайды үрпиісіп.

Алдыңғы арба палаткілер тұрған алаңның шетіне келіп іркілді.

— Осы маңайға жайғаса беріндер! — деп бұйрық беріп жандарынан жирен қасқа атты Асылбековтің өзі өте берді.

Жұрт арбадан түсе бастады жапырлап. Хансұлу мына келген төрт арба көпшіліктің ішінен өз әкешесін жалтақтап іздейді кеп.

— Жок қой... — деді Дәу апа күдер үзгендей.

— Гүділдігүтпан, сіздерді іздеуге кеткен екі қызыл-әскердің екеуі де келді, — деп жандарына Қикымбай қисық жақындады, жылтыр көсе иегін сипалап. Хансұлу да, Дәу апа да Пахраддин мен Сырғаның тағдыры енді осы Қикымбайдың қолында тұрғандай қарай қалды.

— Гүділдігүтпан... — деп шойын кара Қикымбай кесе иегін сипай түсті. — Гүділдігүтпан... таба алмай оралыпты. Шамамыз келгенше іздедік дейді.

Хансұлудың көз алдына құла-дүздің бір қалтарысында бұта түбінде бұралып жатқан байғұс ата-анасы елестеді. Не істерін білмей көзі алақтап жаны қыдырды.

Дәу апа:

— Ау, ахун қайда? Содан сұрайтын... — деді.

— Ие, бәсе, ахун қайда?

— “Қоңыраттың базарында айрылып қалдық” дейді. “Қазір келемін” деп кеткен. Содан тостық, тостық келмеді,— дейді.

— Ымм, — деп Дәу апа әлденені түсінгендей бас изеді.— Ахун енді келмейді. Осы өлкеде қалайын дегені ғой...

— Апа, енді қайттік? — деді Хансұлу абдырап дегбірі кетіп.

— Сабыр... сабыр ет, балам! — деді Дәу апа қабак шытып ойланып. Алыс көкжиекке еңкейген күнге сығырайып қарап тұрды Дәу апа. Қайратты, жігерлі,

өмірде көрмегені жоқ Дәу апа бұл жерден де бір жол тауып шығатын тәрізді Хансұлуға. Остіп тұрғанда қозы-лақша жар басында ойнап жүрген балалар тағы да шуылдап қоя берді.

— Кеме! Кеме келе жатыр!!!

— Алақай! Кеме! Кеме! — десіп.

Кеме балалардың қуанышына орай жауап бергендей алыстан үн қатты. Жар басындағы балалар одан бетер дуылдап мәз болып қалды.

Дарияның төменгі жағынан түтіні будактап қарауытып кеме келеді. Дәу апаны қайдам, Хансұлудың тұңғыш көруі еді кемені. Көз ала алмай қарайды. Дарияның ағысына қарсы жүзіп кеме жақындай түсті. Бұл кемеге отырды бітті, әке-шешесін, Шегені енді қайтып көре алмайтындай көрінді Хансұлуға. Жер түбіне шығандап кететіндей. Әулиеата қайда, біреу қайда?

— Апа, мен кемеге мінбеймін... — деді.

— Балам-ай, мен де соны ойлап тұрмын.

8

Қараңғы түсе кемеге отыру басталды. Бұл кеменің шын аты “Баржа” екен. Қарауытып түнеріп қолбел түр жағада. Ішіне ауыл аймағыңмен, бота тайлағыңмен кірсең де тарлық етер түрі жоқ. Асылбеков басқарған қызыләскерлер алдымен кеменің үстіне шығып аралап көрді. Сөйтіп жүргенде ымырт жабылды. Жұрт бұ кезде жағада жүктерін буып-түйіп балаларын қолға ұстап өкілдің бұйрығын күтіп тұрды.

Заттарын буып-түйіп жол жүретін адам тәрізденіп Дәу апа мен Хансұлу да қамданған. Шындығында бұлар абыр-сабыр қараңғыны пайдаланып қалың бұтаға қойып кетуді көздеп тұр. Ақыры реті келді. Жұрт дабырлап тұрғанда:

— Ал мініңдер! — деген бұйрық болды. Содан копшілік бірін-бірі басқылап кеме мен жарлауытты жалғап тұрған ағаш баспалдаққа қарай таласа-тармаса ұмтылсын. Қызыләскер айқай салды. Оны тыңдайтын халық па, у да шу, опыр да топыр. Кеменің ішінен қараң-кұран етіп және екі-үш кісі жүгіріп келді. Қарақойдай топырлап ішке ұмтылған жұрттың алдын кес-кестеді.

— Тәртіп сактандар! — деген айқай әрең естіледі мол нөпір ызы-шудың арасынан. “Бүгін кемеге сыймай қалғандарды келесі кемеге қалдырады екен. Ол келесі кеме отырғандарды суық жаққа әкетеді екен” деген қауесет тарап кеткен мана. Қазір елдің бірін-бірі басқылап, басқа, көзге қарамай кемеге таласа-тармаса мініп жатқан себебі содан-ды.

— Ал, балам, осыдан ыңғайлы сәт тумас!— деді Дәу апа.

Содан екеуі ығысып шеттей беріп түнерген қалың бұтаның арасына қойды да кетті. Ақ жаулықтарын қоржынға тыққан, кешкі ымыртта ағарып көзге шалынбасын деп. Балалар — арқасында, түйіншектер — қолдарында, қалың шігілдік, боянның арасымен тартып барады, сарғайған шапағы бар батысты бетке алып. Іздерінен біреу қуып келе жатқандай. Жортақтап, бүлкектеп бұтасы қалың бұдыры көп жолсызбен сүріне аттап келеді. Үн жоқ. Жаңа бір әзірде, Едіге:

— Әже, неге мінбедік... кемеге? — деп қыңқылдап еді. Дәу апа:

— Ошір үніңді! — деп бір перді күйырықтан. Балаларда, жүк те ауыр көтеріп кашуга, ақ тер, көк терлері шығып ырсылдап қалды Дәу апа да, Хансұлу да. Енді құтылдық-ау деген шамада алда келе жатқан Дәу апа “Ух!” деп іркілді. Токтаған жерлері кісі бойы

калың боянның арасы еді. Балаларды, жүкті жерге түсіріп екі иықтан дем алып тұр ырсылдап. Бұрылып сондарына қарайды, терлерін сүртіп. Боянның тасасынан не көрінсін. Аулақ қалған жаға тараптан сол ызы-шу, қым-қуыт кемеге мініп жатқан жұрттың дабыры жетіп тұр.

— Мәссаған! — деді түнеріп түн басқан төменгі ағыс жаққа бұрылған Дәу апа. — Жалт ойнап келеді, адыраң қалғыр, жауын жауып кетер ме екен?

Сойткенше, арқа тұстан жел гулеп бұта бастарын сыбдырлатып шайқап өтті.

Хансұлу өкпесін соғып еңтігіп отыр. Жүрегі кеудесіне сыймай дүрсіл қағады. Көзіне кұйылған ащы терін қайта-қайта сүртеді. Алдында тәлтиіп тұрған кішкентай Түгелінің басынан сипай береді. Шеғені айтам-ау, Хансұлу мен мына Түтелхан қазір түн жамылып қалың бұта арасында бұғып отырғанын білмейді-ау. Баласы мен жарының дауыл қуған қаңбақша дірдектеп жүргенін білмейді-ау. Шеге! Қайда екенсің? Алыссың-ау! Жете алмай жүрсін-ау! Бұл тағдыр сірә көрісуге жазса жарар еді... Осы айрылғанымыз айрылған, сен дүниенің бір бұрышында, бұлар дүниенің бір бұрышында қаңғып кетпесе жарар еді... Сондай бір сұмдық ой келді басына. Жаны түршікті. Мына бұта бастарын теңсеген жел уілі сол мазасыз ызғар ойға қозғау салғандай. Мына тірліктің опасыз бейнесінен хабар бергендей. Сұсы жаман шындықты сыбырлап айтқандай.

Дәу апа екеуінің ендігі мақсаты — Қоңыратқа жетіп Пахрадиннің ескі тамыры Шамұрат деген қалпақтың үйін тауып алу еді.

Қараңғы әбден қоюлады. Бұлар жүріп келеді. Аяқ асты көзге еміс-еміс шалынады. Қуалай соққан жел бар. Күн жауатынға ұқсайды. Манадан, кокжиектің

ар жағында күн күркіреп келе жатқан. Кенет, тура көк желке тұстан аспан шатыр-шұтыр етті. Оңбай шошыды бұлар.

— Бісміллә!

— Бісміллә!

— Қап, қалаға жетпей жаңбырдың астында қалатын болдық-ау! — деді Хансұлу, иығында қапшық, еңкейдеп.

— Неғылар дейсің, балам! Жазғытұрдың жаңбыры ғой... — деді Дәу апа.

Майда құрақ оскен тақырлау сортаң жерменен келеді. Құрақ судырлап аяқты қағады.

— Балам, әнебір қарауытқанды көріп келесін бе? Жассың ғой, қарашы, неге ұқсайды өзі? — деп Дәу апа алға еңкейіп көкжиекке көз тікті. Жаңбыр да тамшылай берген бұ кезде. Қалтаны иығынан түсіріп Хансұлуда отыра қалып батыс көкжиекке шүкшиды.

— Ағаш тұр қауқиған... Қасында құлаған қабырға ма, бірнәрсе көрінеді...

— Дұрыс... — деді Дәу апа. — Неде болса сол қалқиған нәрсені паналайық... Балаларды жауратып алармыз.

Қайта қозғалды әлгі белгіге бет түзеп. Дәу апа жол қысқарсын деп бір әңгіме бастады.

— Е-ей, балам-ай, жаңбыр дейсің бе, қар дейсің бе, жоқшылық дейсің бе, тоқшылық дейсің бе, бұл апаң көрмеген не қалды дейсің бұ дүниеде. Иен далада талай жападан жалғыз түнеп те шыққан бұл апаң!

Дәу апаның әңгімесі біткенше түн жамылып түнерген ағашқа да жақындады. Ағашқа таяу балшық үйдің құлаған қабырғасы. Бұлар тұт ағаштың түбіне тығылып, бұ кезде сабалап жауып берген жаңбырдан бой тасалады. Өздерінің үстеріне көрпешелерді жамылып, балаларды күпіге орап бауырларына қысты.

Күн тағы, да бірер рет дүниені дүңгірлетті де соң біржола тынышталды. Содан суылдап жылы жаңбыр күйсын кеп. Жапырақтар, бұта бастары — төңірек түгел қыбырлап, сыбырлап сыбдыр қақты. Жаңбырдың ғажайып иісі бүркырады. Күдіретті жаратылыс үніне ден қойып бірауық бәрі қыбырсыз үнсіз қалған. Жаңбыр толастар емес. Әлден уакта балалар ашығып нан сұрады. Сол бүркеніп отырған күйі бәрі күнжыңдасып бидайдың нанынан ауызға бұрап соғып отыр. Балалар қарындары тойғасын қалғи бастады.

Хансұлу баласын күйіге орап, бауырына қысып жатты. Тұттың жапырағы қанша қалың болғанмен бір кезде тысырлап үстеріне тамшы тамды. Көрпеше су болуға айналды. Хансұлу ұйықтап қалған Түгелін бауырына қымтап қыса түсті.

— Қалайсың! — деп қояды бұған арқасын беріп немересін бүкіл денесімен жауып жатқан Дәу апа.

— Тамшы тама бастады, — деді Хансұлу.

— Шыдайық! Жерге жарық түссін. Сосын қимылдармыз. Оған шейін мүмкін, жаңбыр да басылар, Көз шырымынды ал!

Ит сілікпесі шығып шаршаған Хансұлудың көзі ілініп кеткен екен. Бір кезде тура жауырын ортасынан құйылған мұздай судан тітіркеніп оянды. Түрегеп малмандай су болған көрпешені сілікті. Көйлегінің етегі, оң иығы, жауырыны су болыпты. Жаңбыр саябырлай бастаған. Баласын қымтаңқырап, балапанын бауырына басқан тауықтай үстін ылғалдан көлегейлеп қайта жатты. Киімінен өткен ылғалдан денесі түршігіп, қайтып көзі ілінбеді. Дәу апа ұйықтап жатып солықтап құрғақ өксіді. “Құлыным!” деп қалды. Көкірегі қарс айырыла “ah” ұрды. Қайран Дәу

апа! Қасіретіңнің бәрін ішке жиып жүрген болдың-ау! Бұлышыңды жоқтап жатсың-ау, байғұс ана!

Хансұлу тым-тырыс жатыр. Дәу апа жаулығын тартып, көзін сүртіп, орнынан тұрды. Бү кез төңірек түс айқындала бастаған шақ еді. Жаңбыр да толастаған, Дәу апа жөткірініп:

— Хансұлу! — деді ақырын.

— Ау! — деді Хансұлу басын көтеріп.

— Қимылдайық, балам!

Таң атып қалыпты. Жүктерін буып-түйіп ұйқылы-ояу балаларын арқалап алып, аздасын жүріп те кетті. Жер балшық. Шөп ылғал. Күн шыға көлденең үлкен сайға жолықты. Ары жағында қала да көрініп тұр.

— Су жүріп кеткен бе, балам-ау? — деп таңырқады Дәу апа. Мәссаған, лайытып жаңбырдың суы ағып жатыр сайменен, кішігірім өзендей.

— Ымм... адырам қалғыр... Су кешетіп болдық-ау! — деді Дәу апа.

Не десін Хансұлу. Үндемеді. Аздап басы ауырып, еті ысып келе жатқанын айтпады. Топырақ, қоқым аралас аққан лай судың жағасына жеткесін көк тырбық ажырықтың үстіне жүктерін қойып, етіктерін шешті. Ұйқыдан енді оянған балалар айналаға жалтақтап таңырқайды. Баласы аркасында жүктерін, етіктерін қолға ұстап жалаң аяқ Дәу апа суға бастап түсті.

— Бісміллә! — деп қою лайсаң кешті Дәу апа. Су ені он бес қадамдай-ақ жер. Дәу апа ортасына таман барды. Хансұлу бір қолымен етігін көтеріп қырындай қозғалып, ылай суға бұл да аяғын батырды. Су тастай екен. Тура мидан шықты. Ұн шығармай еңкейіп еппен басып балтырдан келетін мұздай суды жалаңаяқ кешіп келеді. Жұмсақ табанына су астының қиыршық тасы батады. Қабағын шытып тістенеді.

Судың ызғары етігінен өтіп сүйегіне жетті. Ақыры жағаға да шықты. Жағаның құмын басқан кезде табанының біртүрлі жаны жоқ сияқтанды. Қоржынның үстіне отыра қалып аяғын кептірді. Сұртті. Шұлғауын орап жылы етігін кигесін барып қана аяғына жан енгендей болды.

Бү жақ беттің жерінің “миы шығып” жатқан балшық екен. Сайдан шыға алсашы, жүкпенен. Арқасында бала. Дәу апа балшыққа қарайтын емес, тайған сайын:

— О, адырам қалғыр, тақа! — деп қарғанып немересін сүйрей-сүйрей қолымен жер таянып сай кенересіне жақындап қалды.

Қайта-қайта тайып құлап Дәу апаның киналғанын көріп Хансұлу сайдан шығатын басқа жылға көздеді. Судың ағысына таман бұрыла түсіп бір шағын жылғамен сайдан шығуға ыңғайланды. Бұл жылғадан да су жүріп өткен екен. Көк өскіндердің үстімен аттап басып орге тырмысты Хансұлу. Арқасында — баласы. Қырқаға шығып алған Дәу апа:

— Балам! Ау, қайдасың? — деп қақылдап дауыстап тұр.

Хансұлу екі бүктетіліп алға басқан аяғы кері кетіп сары балшығы иленіп етікті ұстаған баураймен өрлеп келеді. Кей жерде қолымен жер таяп торттағандайды. Көзіне тері құйылып аяқ астын әзер-әзер кореді. Көз алды қарауытып дым көрмей басы айналып тұрып қалады кейде.

— Апа, қара! — деді, бір кезде арқасындағы баласы.

— О, не? — деп бұл теңселіп тұр. Көзіне құйылған ащы терін сұртті.

— Әне! Әне! — деді Түгелхан. Оң жағына қарай назары түскені сол, жүрегі су етті. Үйілген балшық тобешіктің астынан қатар-қатар тізілген адам аяқтары

шығып жатыр. Хансұлу сіресіп қатты да қалды. Бір жағын жаңбыр суы шайып кеткен топырақ астынан ырсиып жалаңаш кісі аяқтары шығып жатыр. Дені шілпиген бала аяқтары. Әйелдің аяғы да көрінеді, балтыры толықтау. Шала көмілген аштар екенін көріп тұр.

— Өліп қалған ғой, — деді Түгел. Сонда барып Хансұлу есін жиды. Тұла бойы дірілдеп енді аяғын көтере алсашы. Еңбектеп өрмеледі.

Иттің азабын көріп, ақыры, қырқаға да көтерілді. Хансұлудың қос шекесі солқ-солқ етеді. Қара терге малшынды. Жаны көзіне көрінді. Қаланың бергі тұсында қалың тұттың арасында жалғыз там үй көрінеді. Бір сең-сең бөрікті шал қой-қозысын өргізіп жүр. Түрікпен болар, үстінде қызғыш шапаны.

— Апа, басым... шағып барады, — деді Хансұлу, өң жоқ, түс жоқ көзіне тері құйылып.

Дәу апа бұның маңдайын ұстап көрді.

— Ой-бұй, етің күйіп тұр ғой...

Дәу апа бұны жүктің қасында қалдырып, өзі көгалда қой шетінде таяғына сүйеніп қалкиып тұрған түрікпен шалға қарай беттеді. Біраздан кейін сеңсең бөрікті шал бұлардың жүгін өзі көтеріп үйіне қарай бастап алып жүрді. Хансұлу мең-зең. Бір баспана болса, тек құлағалы келеді.

Есік алдында шағын тоқал там бар екен. Ас үй тәрізді. Сонда кіргізді бұларды шал. Жерде қоғадан тоқыған шыпта жатыр. Басында гуппалы қызыл жаулықты кемпір келіп, алаша тоседі әлгі шыпта үстіне.

— Пешті қыздырайық? — деді Дәу апа.

— Хава, хава, гыздырыш керек! Гыздырыш герек өйни!— деп шал Дәу апаны мақұлдай кетті.

Пеш жағылды. Үй қызды. Дәу апа жез легенге ысыған су құйып “Аяғыңды мал!” деп Хансұлудың

касына қойды. Аяғын ыстық суға малып көзін жұмып бұл біраз отырды. Хансұлуға осының бәрі көрген түстей. Судың ыстығы шым-шымдап бойға тарады. Төңірегіндегі күбір-күбір әңгіменің бірін естісе бірін естімейді. Шал үлкен бір тонмен үстін жапты. Кемпірдің аты Огултәч әже екен. Огултәч әже кесемен, ерітілген азғана қойдың құйрық майын әкелді, аяғын сылауға. Дәу апа әлгі маймен Хансұлудың аяғын тізесіне дейін сылады. Аздасын Огултәч әже май қатқан ыстық сүт әкелді. Оттың қызуынан ба, әлде ыстық сүт ішкесін бе, Хансұлудың мандайынан тері бүрк етті.

— Енді тырп етпей жат! — деп Дәу апа, бұның үсті-басын түгел қымтады. Киімнің бәрін үстіне үйіп тастады.

— Мен Шамұратты тауып алайын!.. Сен жат, кимылдама!— деді.

Хансұлу бас изеді. Жүктерді қалдырып, балаларды ертіп Дәу апа қалаға кетті. Хансұлудың жатқан жері пешке жақын, іші-сыртын саз балшықпен сылаған тауық кетегіндей, төбесі аласа тап-тар ас үй. Ішінен от жаққаннан кейін қыз-қыз қайнады. Хансұлу қара су боп терлей бастады. Огултәч әже кіріп-шығып жүріп:

— Гызым, хәл нечик? — деп қояды.

Сырттан Қақабай ата да бұның жағдайын ауық-ауық кемпірінен сұрап қояды. Түрікпен тілін түсінбесе де мына ұлты басқа екі кәрінің мол шуакты пейілін сезеді. Ішкен сүт, жанған оттан да бөлегірек шипа — мейірім сәулесі жан түкпіріне жарық түсіргендей.

Таңертең кеткен Дәу апа кешкісін бір-ақ оралды қаладан.

— Балам-ай, жолымыз болады екен! — деп ер пішінді еңгезердей Дәу апа ас үйдің есігінен екі

бүктеліп сөйлей кірді.— Шамұратты тауып алдым. “Шамұрат” десем базардағы саудагерлердің бәрі біледі екен. Үйін де, жұмысын да көрсетіп жіберді. Содан екі баламды жетектеп үйіне барсам Шамұратым отыр төрде, садаған кетейін. Ал, балам, бас қалай?

Хансұлу тауықтың жас сорпасын ішкенін, үй иелерінің зор қонақжайлық көрсеткенін айтты.

— Шамұратым бір пысық пәле екен... — деп Дәу апа әңгімесін жалғады. — Мені ертіп “Інкібі” дегеніне алып барды. Олар түгел жазып алды Пахраддиннің, Сырғаның, Балқияның аты-жөнін, жас шамасын, табылса хабарлаймыз деп. Сөйтіп, Шамұраттың арқасында, балам, ол шаруаны бір жайғадық. Одан соң Шамұратым енді менің жағдайымды да бір жақты етуге кірісті. “Інтірнат” дегеніне алып барды. Өзі сонда “забхоз” дей ма, бір қызметті істейді екен. “Інтірнатында” жоқ-жітік, жетім балалар толы екен. Оңшен қыр қазағының балалары. Солардың асханасында ыдыс-аяқ жуатын болып істей түр деді маған. Тамақтарың тоқ болады деді. “Е, жарайды” дедім. Сол “інтірнаттың” отын жинайтын қорасынан баламыз екеуімізге бір қоналқалық орын да тауып берді, садаған кетейін. “Бала-шағанның рахатын көр! Маған істеген жақсылығың Құдайдан қайтсын!” дедім. Осы, міне, кешке дейін айналып қалған себебіміз. Құдай сақтасын, аштан бұралып жатқан көп екен көшеде... Бәрі өзіміз сияқты қырдың елі...

— Кокемдер жете алмағаны-ау, — деп күрсінді Хансұлу, балшық сылақты ас үйдің қарауытқан ыс төбесіне қарап жатып.

— Қайткенде не лаж бар?..— деп Дәу апа да камырықты, өлі-тірісі белгісіз Пахраддин, Сырға жайын ойлап. Бірауық алакөлеңке ас үйдің ішін зілмауыр тыныштық басты. Үнсіз налып отыр екеуі.

Сыртта тауықтар қыт-қыттайды. Екі бала ойнап жүр есік алдында.

9

Дүзген түбінде әлі құрып талықсып жатқан Сырға көзін ашса Пахраддин келіп отыр екен жанына. Сырға ыңырсып қозғалды. Сексеуілдің шарпысындай жіңішке әлсіз саусақтарын дірілдетіп ауа қармап әлдене іздеді. Неде болса тіске басатын нәрсе іздеді. Жұмырына жартымды нәр қонбағалы қанша заман. Біліп болмайды. Күннің, түннің есебінен жаңылған Сырға. Сағыздай созылып бітпейтін бір бейнет мезгіл. Бар үміті — Пахраддинде. Пахраддин тірі тұрғанда Сырға бүйтіп бейнет шекпеуге керек еді. Өмірде білмейтіні жоқ, қолынан келмейтіні жоқ асқар таудай отағасының шынымен-ақ жол таба алмай шағылды айналып шырғалғаны ма? Сырға көрген Пахраддин бүйтіп ойламаған жерден дәрменсіз күйге түспеуге керек еді. Қой бастаған ай мүйізді серкедей ел бастаған Пахраддин емес пе? Не болды? Неге сонша бұ тығырактан шыға алмады?

Сырға, бұған сырт беріп отырған ерінің жауырынына қарады. Еңсесі түсіп отыр ерінің. Үстінде жалаң ақ жейде. Басында қара тақия. Сақал, шашының ағы қалындаған. Сұрайтын несі бар. Шарасы таусылып отыр.

— Көкесі!.. — деді Сырға, жатқан күйі. Пахраддин қыбыр етпеді. Жел ғана сақал-шашын, койлек етегін үлбірете үрлеп қояды. Шыбын-шіркейдің ызыңынан өзге дыбыс естілмейді. Күн тал түс. Төңірек түс әуірлеп ысып тұр. Алыстан орағытып бұлаңдап құйын өтіп барады.

Сырға арық әлсіз қолын созып ерінің арқасынан сипады.

— Адамқанымыз ба?

Пахраддин жауап қатпай, беті шалбарланып алыс көкжиекке шаршап құлазып қарады. Шағыл төбенің үстінен жарты әлем көрінеді. Сағым кілкіп жатқан ойқыл-шойқыл шөл дала. Бірақ қылт еткен тірлік белгісі жоқ.

— Аспан ашық қой бүгін... Жұлдызға қарап қозғалармыз... кешкісін... — деді әлден уақта Пахраддин Сырғаны жұбауратып. Ерінің үнінен сөне берген үміт оты қайта тұтанғандай. Пахраддин айтты — бітті. Оның сөзіне өмірде шүбә келтіріп көрген жан емес қой Сырға. Үміт үзбеді тірліктен.

Шайқақтап билеп алыстай берген жалғыз құйыннан көз алмай тебіренеді Пахраддин. Жанына у себіліп күрсінеді. Алдамшы... жалған дүние... Бұның да басынан өткені-ау... Өткені-ау... Бір күнгідей болған жоқ. Кеп-кеше еді. Бала боп тайға шапқаны, жігіт боп ат жалын тартып мінгені, түн баласы ұйқы көрмей қызды ауылды торығаны, соның бәрі кеп-кеше еді. Одан беріде есі кірді, ел қамын ойлады. Әділет құды, дау-шарға араласты. Би атанды. Ірілік емес, бірлік іздеді. О да бір заман екен-ау. Киіз туырлықты көшпендінің келмеске кеткен заманы екені-ау. Көрген түстей өтті кетті. Зым-қайым. Бәрін айт та бірін айт, басын ақ шалып жасы алпысқа таяған шағында бүйтіп аштан өлермін деп ойламап еді Пахраддин. Ит құзғынға жем болып далада көмусіз қалармын деп ойламап еді. О, паруардігер, сонша итқорлықпен өлтірердей не жазығы бар еді бұның? Ең болмаса күнәсін біліп неге өлмейді? Не үшін, қай қылығы үшін бұндай зауалға ұшырады? Қай қылығы үшін?

Өзегі талып өлім халінде отырған Пахраддиннің көкірегін осындай запыран ащы ойлар торлайды. Оқта-санда еңсесін көтеріп қаңырап сұлық жатқан

жапан дүзге шаршаулы назар жібереді. Адам-кара көрінбес пе екен дейді. Арқа тұсы бірсыдырғы тегіс сыңсыған раң, жусанды кең жасыл алап-ты. Аракідік сағымға қалқи жүзіп бұлтиған ақ селеулі құмайт шағылдар да кездеседі. Назары сондай бір шағылдан ысырылып өтіп күнпығысқа қарай жылжи берген. Көк сағымы көлдей көлкіп бұлдыраған жайпак жотаны қыдыра берген. Сол-ақ екен, я, паруардігер, көзіне сенсін бе, сенбесін бе, әлгі ұзыннан шұбак сұлық жатқан жотаның үстінде томпиған бір үй тұр. Сағымнан жартылай шығып үлкен ақ боз үй тұр. Пахраддин ал кеп шүкшисын. Жоқ, айна қатесі жоқ, ақ күмбез үй тұр. Астапыралла, бұ кашан келіп қонған үй? Жүрегі өрекіп кетті Пахраддиннің.

— Бәйбіше! — деді, қуанышын ірке алмай.

— А! — деді Сырға көзі жұмулы қалпы.

— Бәйбіше, әне... Әне үй тұр.

— Не?..— деп көзін ашты әлсіз Сырға.

— Әнеки... О құдірет! Үй тұр... Біздің үй!

Сырға көзін ашып, мойнын бүрды.

Бұ кезде Пахраддин тәлтіректеп тұрып кеткен еді орнынан. Есалаң жандай қолын алға созып, алыс көкжиектен көз алмай екі-үш аттай беріп іркілді.

— Әнеки! Ана белдің үстінде тұр! Біздің үй...

Сырға қолымен көзін көлегейлеп сығырайып көп қарады, көлденең белге. Көзіне еш нәрсе түспеді. Дүниенің бәрі бұлдыр көк сағым. Көкжиек жидіп еріп бұлдырайды. Құбылып қыбырлайды.

Пахраддин тіктеліп теңселе тұрып буыны жоқ адамдай аяғын әрпіл-тәрпіл басып қозғалды.

— Қайсы?— деді Сырға сыбырлап.

Бірақ дауысы шықпады. Пахраддин жейдесін жел кеулеп, жалаң аяқ қозғалып барады. Соқыр адамдай екі қолымен ауа қармап, біртүрлі ебедейсіз аттап

басады. Осы сәт Пахраддин Сырғаның көзіне тәйтәй басып бара жатқан бір үлкен сәбидей елестеді. “Құдайым-ау, құлайды-ау” деп қылпылдайды іші.

— Я, ата-баба? Я, Барақ! — деп әулие-әнбиелерге жалбарынып құламауға әрекет етіп, қалт-құлт басып құмбаурайдан ойпаңға түсе берді Пахраддин. Тізесі құрмағырда әл жоқ. Салмағын ұстай алмай біресе оңға, біресе солға ауытқиды. Бірақ кеудесінде жан барда іркілуге жоқ Пахраддин. Құласа да қайтпас, қажымас ұрынып өлер. Бү тірліктегі соңғы үміт, соңғы сәуледейін көз ұшында бұлындаған сол бір үйге жетпей шегінбес. Төбе басында қалды, жалғыз қалды, Сырғаны құтқарындар дер. Соны айтып өлер. Сырғаны құтқарып өлер.

Жан-жағы қоянсүйек, дүзген, селеулі ойпан алаңға түсті. Тегіс құмсақ бетінде иретілген қоңыз, кесіртке ізі. Жұмсақ құм бетінде Пахраддиннің де ойдым-ойдым ізі қалып барады. Құм арасының мәңгі ұйыған зілмауыр тыныштығын Пахраддиннің жүрек дүрсілі, ыр-ыр еткен тынысы ғана үркітіп, серпілтіш келе жатқандай. Тым ауырлап кеткен кеудесін осы ойпаңнан алып шыға алар ма енді... Көзіне тері құйылып төңірек түнеріп, қарауытып кеткендей болады. Аш өзегі талғандықтан шығар... Санасы да божырап біртүрлі түс көргендей алмағайып кейіпте. Таңдайы құрғап тілі аузына сыймай тобарсып ісінгендей. Соның бәріне қарайлатпай, тоқтатпай сүйрейді бір күш. Алаңнан шығар ернеуде дізерлеп қолымен жер тірей жүріп көтерілді қырқаға. Бой тіктеп көзіне құйылған терді сүртіп, назары әлгі сағым бұған көлденең дөң үстіндегі ақшаңқан үйді іздеді. Көгілдір айдын судай көлкіп жатқан көк сағым. Ұй зымқайым жоқ, жер жұтып қойғандай. Астапыралла, елес болғаны ма? Пахраддин өз көзіне өзі сенбей тұр. Тағы

да әрпіл-тәрпіл аттап әрегірек барып, тағы да бір төбешікке шығып назар салды. О, жасаған ие, не көрінген бұған, талтүсте алжасып?! Ауыл қайда әлгі? Әлгі ақ боз үй қайда?

Жым-жылас шөл дала қатыгез тағдырдай мелшиіп сазарып жатыр. Сағымға алданағаны-ау бұның. Онбай алданды-ау. Озін ғана емес, Сырға байғұсты да алдады-ау, о, алжыған!

Пахраддин бұрылып кейін қарады. Құмсақ төбе үстінде дүзген түбінде қалған Сырға көрінбеді. Басы қылтиып бұның соңынан қарап отырған тәрізді еді, жатып қалғаны-ау.

Көз алды қарауытып, басы айналып теңселіп кетті Пахраддин. Одан арғысын білмейді. Қанша мезгіл өткенін білмейді. Есі кіріп бір кезде көзін ашса күн ыстығы қайтып көлеңке басы ұзарып қалған екен. Бет-ауызы дуылдайды. Құмырсқаның жолағына құлаған екен, бет-аузын оңдырмай шағып тастапты. Еріндері көнектей ісік. Еңсесін көтеріп тіктеліп отырып ес жинады. Аштықтан да жаман шөл өртеп барады өзегін. Көзі көк шөпке түсті. Тырбық дүзгеннің әрегірек қалың раң, мияға араласа өскен жуа сабағы көзге оттай басылды. Бір тал жуа. Түрегеліп бару қайда. Оған әрекет те еткен жоқ. Шөп арасындағы тал жуаға қарай тырбандап еңбектеді Пахраддин. Жуадан назарын алмайды. Бұ жолы да елес болып кете ме деп қорқады. Жоқ, елес емес, қолына жуа сабағы ілікті. Жұлғанша шыдамай еңкейе құлап қарш-қарш шайнады. О, паруардігер! Тал жуаның өзінен-ақ кәдімгідей өмір нәрі тамғандай таңдайына. Құлшынып, ындыны ашылып, көк шөпті аралап еңбектеп келеді. Тағы да, тағы да қарш-қарш шайнағысы келеді, көк жуа сабағын. Ашқарақ назары аласұрып тағы да іздейді құм жуаны. Сөйтіп, ең-

бектеп, шашағын жайып сәукеленіп тұрған қоян-сүйектің түбіне де жетті. Раңы тұнып тұрған үй орнындай алаңда, о, құдіреті күшті Құдайым, самсап тұрған мол жуаға кезікті. Ие, берейін десе бұ Жаратқан Иеннің шапағаты мол ғой. Содан кіріссін шетінен Пахраддин. Төрттағандап жүріп алаңды аралап көк жуаны тіспен орып қарш-қарш шайнайды кеп. Осы сәт өзге дүние-тірлікті түгел ұмытқан Пахраддин көксегені тек, ылғалы бар жуа сабағын талмау. Бар білгені сол ғана. Көбірек талмау, көбірек жұту. Пахраддин сөйтті. Есі кіргенше көк жуадан орып асай берді. Есі кіргенде өзінің жуа емес, кәдімгі мал жейтін көк раңға жайылып жүргенін бірақ білді. Аузы толы қышқылтым шөп... Түкіріп тастады. Еңкейіп төрттағандап тұрған күйі көз жасы құм бетіне домалады. Адамға лайық ажалын қимайтындай не жазып еді бұ Құдайға? Не жазып еді? Шөп жеп, құрт-құмырсқаға жем боп, ит қорлықпен өлетіндей бұ Тәңірге?

— Мылқаусың... қатыгезсің безерген? Опасызсың, сұм жалған? Біресе бетінді, біресе көтінді беріп құбыласың! “Бұқа” сынды, Күрең сынды сұқ иттерге сүйек салдың! Абалаттың, айтақтап! Ақыры жетіп тыңдың ба дегеніңе!? Жынға тойған иттерге қойдай қоңыр халықты тақымдатып, талатып, тырқыратып торғайдай тоздырдың ба? Жеттің бе, мақсатыңа! Жемсауың толды ма? Ыбылыс иектеген кер заман! Судың да сұрауы болар! Елдің обалы жібермес. Балашағаның көз жасы жібермес! Аяғыңнан шалар! Құдай алдында жауабын әлі берерсің, сен заман! Сұраусыз кетпес еш қылмыс... Сұраусыз кетпес! Кетпес! Кетпес!!! — деп қырқырап тұмсығымен жер сүзе құлады Пахраддин. Әлдебір құдырет иесінің құлағына шалынар дегендей айқайламақ еді, бірақ кеуіп қалған аш өзегінен ысылдаған дыбыс қана шықты.

Естен танып сол жатқаннан мол жатып әлден уақытта санасы саңылауланып, шала-пұла ес жиды. Алдымен топырақ жас шөптің исін сезді. Кірпігін қозғап еді, тұмсығы жер сүзіп етбетінен жатыр. Бұл жатысының мәнісін түсінбеді. Өзегін өртеген шөл. Тілі тобарсып, желім болып қалғандай. Иегі астында жатқан көкөскін шөптен тістеп жұлды. Лабақ ахун елес берді. Лабақ ахунның үні келді құлағына.

— Айтқаным келіп, болжағаным болды ма? Тау тауға соғылар, теңіз ернеуінен шығар, мағрыптан бір от, машырықтан бір от көрінер дегенмін. Аспаннан Ғайса түсер, жерден Мәді шығар дегенмін. Адамзат ғарасат майданына жиналар. Сол жерде Құдайдың жүзін көрер. Құдай алдында һәмме адам ұлына ұлы сот болар дегенмін. Сол күнге жеттік, міне! Тілегіміз қабыл болды. Ақырды көзбен көрдік. Сен әлі де болса жалғаншыны қимай жатсың! Көк шөп талмап тірлікті көксеп жатсың! Ол райыңнан қайт! Қазір көз жұмсаң алдыңнан о дүниенің нұрлы қақпасы ашылар! Мынау жалғаншы тірліктен көтеріліп мәңгілікке бет түзерсің! Сол үшін жеттім қасыңа. Жылынбайын деп жаһилдің жаққан отына, тәрк еттім һәмме тірлікті. Қиналма! Шыдам ет! Қалимаға келтір тіліңді! Алдымнан жарылқа деп тіле! Иман сұра Алладан!

Пахраддин ерні күбірлеп іштей дұға оқыды. Әлгі ашуланғанын, Құдайды кінәлағаным асылық болған екен деп ойлады. Кеше гөр, Жаппар Ием, деп жалбарынды.

Пахраддин кеудесін өзер қозғап ауырсынып күш жиып тіктеліп отырды. Басы айналғандай. Аспан қиялап төңкеріле бергендей. Жер жылжығандай. Бет-аузының күм-топырағын сүрткен де жоқ.

— Бауа, шұбырған ел ... ел не болды?— деп сұрады қиялындағы ахуннан.

— Өлгені өлді, қалғаны қалды, інім.

— Үстірт үстінде қалған ел-жұрттан не хабар?

— Істері бар болсын олардың. Жастары азғандүр. Бейіт тынышын бүзғандүр. Аруакты күңіrentіп, содан елі тозғандүр. Мешіттерді құлатып сөйтіп Құдай атқандүр. Елін аштық жайлап, оздері тышқан аулап жеп, бытырап жөн-жөніне кеткендүр. Өздерімен кетпей кесепаты күллі адам баласына тиіп содан міне жер бетіне қиямет-қайым жеткендүр.

— Ехе-еее! — деп күңіrendі Пахраддин. Басы салбырап төсіне құлаған. Мұқап, мұнайып екі бүк-тетіліп отыр. Аздан соң танау астынан күбірлеп сөйлей бастады. Өзімен-өзі тілдесті.

— ...Қарағай басын шортан шалды десеңші... Тұрымтай тұсына, балапан басына кетті десеңші... Бәсе... бәсе... Күрең мен Сүржекей, Ждақай мен Қозбағар басқарған ел не оңсын... Басшысын таппаған ел азып, жолдасын таппаған ер азып... зұлмат өктеген екен ғой... О, жасаған, осы күнді көргенше күмрә неге болмадым... Осы күнді көрсетіп қинау ма еді мақсұтың? Бір емес екі өлтіргің келген екен ғой... Өлтірмей-ақ өртегенің ғой дозақ отына... Ажалынды да аяғаның ғой. Пахраддиннің алпыс жыл жанын отқа қақтағаны аз болып па еді? Ыбылыспен, сайтанмен, надандық, зұлымдықпен алпыс жыл айқасқаны аз болып па еді?... Мынау фәниден отерде енді... ең болмаса соңын күйретпей алсаң етті.

Пахраддин енді бірде қараса еңбектеп келеді екен. Сөйлеп келеді екен. Қайда бара жатқанын ұмытып іркілді. Осы арада өзінің қайда бет алғаны есіне түсті Пахраддиннің. Құм шағыл басында қалған Сырғаға жеткісі келген екен.

Күн ұясына қонып төңірек манайда көлеңке тұтаса бастаған шақ болыпты.

Құмшағыл басына қарай еңбектеп келеді Пахраддин. Шалбарының қалтасына салған екі тал жуасы бар, Сырғаны ойлауға тырысты. Олген шығар. Ең болмаса ақтық сапарға аттанар алдында қасында да болмады-ау!.. Ит тағдыр-ай... ит тағдыр.

Итшілеп өрмелеп ақыры төбе басына да шықты. Күн де бұ кезде жалындап барып кешкі ұясына қона берген екен. Дүзген түбінде құм үстінде шалқасынан түсіп Сырға жатыр. Қимыл жоқ... Үстінде қырмызы торғын көйлегі, ақ жаулығымен мойны, басы шандып ораулы.

— Сырға! — деді сыбырлап, бәйбішесінің жіңішке білегінен ұстай беріп Пахраддин. Сырға тірі екен, кірпігі кимылдады. Ортайып нұры азайғандай болған жанарында тілмен айтып, созбен жеткізе алмастық бір қасірет мұң бар. Шаршаулы, жадау назарын сәл төменшіктетті. Пахраддиннің қалтасына қарады. Пахраддин қос тал жуаны қолына ұстатты. Басын сүйеді. Сырғада салмақ қалмаған. Қаңбақтай. Әлжуаз, әлсіз саусақтарын жыбырлатып жуа сабағын дәрменсіз ұстағанмен қолын аузына апара алмады. Пахраддин жуаны өз қолымен Сырғаның аузына тыққыштады. Сырға ыңылдап асықпай талмады.

Қиян шөл құм шағыл басында бірін-бірі сүйеген қос ғаріп, қос мұңдар.

Кең шөлістан, сайын дала үстіне күміс жұлдызды алқаракөк кешкі аспан қанатын кең жайып төңкеріліп келеді. Алыс көкжиек шеңберін тарылтып, күңгірт көлеңкеленіп, сай-салаға іңір қараңғысы үйи бастаған.

Еңсені басқан бір ұлы тыныштық бүркеп келеді әлемді. Ымырт қараңғысымен қоса төңіректі түр-түсі белгісіз бір үрей жайлап келеді. Тысырсыз еппен ши бөрідей тіміскіленіп бұта-бұтаны тасалап, орағыта

жақындап келеді. Жым-жырт, құлаққа ұрған танадай тыныштықты бұзып, әлден уақытта тура желке тұстан байғыз сұңқылдады. Пахраддиннің тізесіне басын қойып жатқан Сырға дір етті.

Пахраддиннің бойына да ызғар шапты. Қоянның көжегіндей бүрісіп жатқан Сырға әлдене деп сыбыр етті. Бұл құлақ тосты еңкейіп. Көзі жұмулы Сырғаның ерні болмашы ғана жыбырлады. Пахраддин құлақ тосып, еңкейе түсті. Бірақ ести алмады. Сырға кірпігін әрең қозғады. Алыстан, өзге бір дүние түкпірінен қарады Пахраддинге. Айта алмай жатқан мол сырын, жан сырын үнсіз жанарымен паш еткісі келгендей. Соған шамасы келмей қиналғандай. Бақыласқысы келе ме, кім білсін. Пахраддиннің көзіне жас айналып бәйбішесінің шұңкиген сопақтау бетіне үңілін отыр. Үздігіп қиылып қарайды Сырға. Үнсіз, қимай қарайды. Бәйбішесінің кішкентай ашаң жүзін жалпақ алақанымен аймалады. Сырғаның көз құйыршығынан ыстық тамшы үзілді.

Қоянсүйектің шақасына қонып отырған жұдырықтай жалғыз байғыз сұңқыл қақты. Қаңыраған елсіз кешкі олкені сұңқыл үнге толтырып, одан бетер құлазытады. Жаманат шақырады.

Құмшағыл үстінде құшақтары айқасып жатқан екі адам. Төбеде — жұлдызы жайнап төңкерілген аспан. Төменде — түнерген алып жер.

Байғыз қанаты сыпылдап, аздасын беталды ұша жөнеді.

Құм басында қалған екеу осылай өтті дүниеден.

1982—1985 жж.



МАЗМҰНЫ

| | |
|----------------------------|------------|
| Құдық басында | 4 |
| Үстірт үстіндегі көш | 43 |
| Мазасыз жаз | 72 |
| Қашқын ауыл | 124 |
| Жаңа өмір | 163 |
| Дүрбелең | 211 |
| Зобалаң | 256 |
| Құм арасында | 279 |
| Ғарасат майданы | 309 |
| <i>Түсініктер</i> | <i>373</i> |